

# Enchiridion pietatis puerilis

Adam Siber

~~Handwritten text, heavily crossed out with diagonal lines.~~

Indignus & (q. dicit) ut non  
ipsum in mltis Catalogis in brevis

Joan. Bapt.

Act. sup. 79.

Namq.

Alteria vita mala semitae hinc  
entes?

In laqueis vid; sepe ppe sunt

Hanc etiam Fraud; pernam

DEVS

ut p

la ca

capitil.

Unio Capos

P.o. lat. 1678 f

Sammlung deutscher Drucke  
1450 bis 1912

Erworben mit Mitteln der  
Volkswagen-Stiftung

<36619798180019

S

<36619798180019

Bayer. Staatsbibliothek

三

一











*Joan: Reiff: Saxo: Viro:*  
**ENCHIRIDION  
PIETATIS**

**PVERILIS, EX DIVER-  
sis, Doctorum monu-  
mentis**

**Collectum, & distinctum Li-  
bris IIII, ab**

**ADAMO SIBERO.**

**ACCESSERVNT  
DE PASSIONE DOMINI  
nostri IESV CHRISTI, Dei  
& Virginis filij, ex diuersis auto-  
ribus antiquis & recentio-  
ribus collecti Li-  
bri II,**

**BASILEAE, PER IOAN-  
nem Oporinum.**

P.O. lat. 1678 f

Bayerische  
Staatsbibliothek  
München

B & B  
MÜNCHEN

VW/92/183

# IOACHIMVS CA

MERARIVS PABERG. AD  
mo Sibero S. D.



V E M longo uenerans iam tem-  
pore diligo, propter  
Ingenij ac morum probitatem, &  
Apollinis artes,  
Nuper decreram cum nostro ad  
te proficisci

Stramburgo, dubijs perspecto rebus amico,  
Et quo nec melior nec clarior est uir, Adame:  
Sed pituita fuit cupidum remorata, molesto  
Cum brancho & tussi. Interea tua carmina trado  
Nostro edenda Papæ, tum me uirtute, tuæq;  
Consolor constante operæ studiūq; labore.  
Nanq; fatebor enim, prope iam mihi pectore ab ipso  
Vsq; pedes animus trepidat delapsus ad imos,  
Et desperantis procul ingenium refugit, dum  
Nulla mihi reliquum iam nunc facit auxilium spes  
Pacis, & incœptas uideo pertexere telas  
Teutonidos furias terræ. Rursum æra sonare  
Audio, & armatas in castra coire cohortes.  
Non obstat hiemis bellorum frigora cladi,  
Et calcat glaciem per campos mules apertos,  
Naturæq; modum & uincit legem improba uirtus.  
Sic uetus cecit glaciales Hannibal alpes,

Et nini-

Et niuium silua flagrante liquauit aceruos,  
 Et feruente udas rupes molliuit aceto.  
 Ipse quoq; insanos ne Martis Iuppiter ausus  
 Impediat, retrò finit hunc præcurrere cedens:  
 Nec propior rabidas pugnarum mitigat iras,  
 Illustri rutilos aut fidere temperat ignes.  
 Hic & Apollineæ tendit de limite metæ,  
 Ledeæ ad sobolis rursumq; reuertitur astrum,  
 Libera Gradiui donec fax æthere summo  
 Ardeat, & terris incendia desuper addat.  
 Hinc ne discedat citò causas undiq; querit,  
 Progressusq; parum rursum se deinde retorquet,  
 Insistensq; abiensq; iterum sic conficit astrum.  
 O dura Aonidum hoc in tempore fata sororum,  
 Et quibus ingenui studij sunt ocia cordi:  
 Non locus his toto propè iam patet ullus in orbe,  
 Barbariæ exclusis rabie: pulchrum esse uidetur  
 Omnibus, ad belli se conuertisse furores.  
 Nulla exempla placent præsentia mitia uitæ:  
 Nec ratio magis inceptas humana gerit res,  
 Consilium ue ualet, uel cura est ordinis ulla:  
 Sed feritas audax, petulansq; insania mentes  
 Insedit, uersatq; uices temeraria rerum  
 Ambitio, & præceps inflat cor gloria uanum.  
 Vna salus miseris, spes unica restat egenis  
 Auxilij, uox sancta precum, gemitusq; fidelis  
 Pectoris, & lacrymæ nunquam pietatis inanes.

Procidat



5

Procidat ante Deum nostræ confessio culpæ;  
Et uenia oretur, celebrent quoq; carmina prisæ.  
Nostra simul bonitatis opus: præq; omnibus unum  
Patronum, mediumq; fides hominumq; Dei;  
Apprendat teneatq; Dei te Christe parentis  
Aeternam sobolem, qui nostræ crimina carnis  
Purgasti, auertens peccati tristitia damna,  
Iusticiæq; decus reparans. Nunc tollere rursum  
In cœlum ora licet, culpæ securâ prioris.  
Nunc sanctus, meritisq; tuis sit quilibet insons,  
Mortiferæ amē Dei poenis obnoxius iræ.  
Hanc dum curam operâ adiutas studioq; fideli,  
Officium & ueræ monstras pietatis Adame,  
Et teneri coetus cœlesti pectora comples  
Religione, facis quod te decet, & Deus ipse  
Talia facta probat: fortè & placatus ad huius  
Summissum pietatis opus, cum barbariæ se,  
Tum fraudum opponet pesti, scelerumq; furori:  
Atq; aliqua innocuis concedens ocia Musis,  
Hospitium studijsq; pijs seruabit in oris  
Misniacis, artiq; bonæ: quod tuq; tuiq;  
Nos, nostriq; simul uobiscum oramus Adame.

xi. Calend. Decemb. M. D. L.

4 3

AVTO.

# AVTORVM NOMINA.

<b>Adamus Siberus</b>	<b>Ioannes Picus</b>
<b>Andreas Ellingerus</b>	<b>Ioannes Riuus</b>
<b>Antonius Carchesius</b>	<b>Ioannes Sauromanus</b>
<b>Arcturus Phrisius</b>	<b>Ioannes Stigelius</b>
<b>Basilius Zanchus</b>	<b>Ioannes Sturnus</b>
<b>Bobuslaus Hassenstenu</b>	<b>Iuuenius Hispanus</b>
<b>Bruno Sidelius</b>	<b>Lucas Gauricus (rius)</b>
<b>Christophorus Auleus</b>	<b>Ludouicus Bigus Picto-</b>
<b>Christophorus Grauius</b>	<b>Marcus Anno. Flaminius</b>
<b>Christoph. Schellëbergi<sup>o</sup></b>	<b>Marc. Hieronym<sup>o</sup> Vidas</b>
<b>Coelius Sedulius</b>	<b>Martinus Lutherus</b>
<b>Decius Aufonius</b>	<b>Martinus Salbachius</b>
<b>Eobanus Hessus</b>	<b>Matthias Marcus Da-</b>
<b>Erasmus Roterodamus</b>	<b>berchusius</b>
<b>Euricius Cordus</b>	<b>Nicolaus Borbonius</b>
<b>G. Vrsinus Velius</b>	<b>Nicolaus Selneccerus</b>
<b>Georgius Aemilius</b>	<b>Petrus Fränciscus Spinula</b>
<b>Georgius Fabricius</b>	<b>Petr. Lotichius Secūdus</b>
<b>Hermannus Buschius</b>	<b>Petrus Suederus</b>
<b>Hiobus Madeburgus</b>	<b>Philippus Melanchthon</b>
<b>Iacobus Micyllus</b>	<b>Salmonius Macrinus</b>
<b>Ianus Pannonius</b>	<b>Sebastianus Castalio</b>
<b>Ioachimus Camerarius</b>	<b>Stephanus Schonfeldius</b>
<b>Ioannes Cellarius</b>	<b>Thomas Venatorius</b>
<b>Ioannes Gigas</b>	<b>Vitus Amerpachius</b>
<b>Ioannes Langus</b>	<b>Vuolsgangus Verterus.</b>

ILLV.

ILLVSTRISSIMIS  
PRINCIPIB. AC DOMINIS,  
DD. ALEXANDRO & CHRIS-  
TIANO, illustriss. Principis ac Do-  
mini D. AVGVSTI, Ducis Saxoniae,  
Imperij Archimarescalli & Electoris,  
Lantgrauj Thuringiae, Marchionis  
Misniae, & Burggrauj Magde-  
burgensis FF.

ADAMVS SIBERS



*M*pubis adeat finite turba parvuli  
Ad me, beata Christi ipse, Numinis,  
Suprema cui rerū potestas omnium,  
Proles dit: ne aëro eos accedere  
Vetate, ne manet aurei quos cerula

Cœli domus, custodiunt quos angeli,  
Nunquam angeli Patris vident qui non mei  
Vultum, ignea manus atq; flabilis, sacrum  
Ad limen appareat et usq;: maximi  
Non est voluntas, optimiq;: credite,  
Non est Parens is, percat ut de puerulis  
Vel minimus hisce. Vox suavis, gaudij  
Vox plena, uox amabilis. Placet Deo:  
Ergo, nihil quo maius est, Deo placet  
Tenellula, minutulaq;: rix dumq;: edita,  
Quæ turba pendet, ludit et circum ubera,  
In cunulis dulcem capit quæ somnulum,

2 4

Admisi.

Adnūtat, arridet suis, blandūm tota  
Ingeminat, & se librat in pedes, humum  
Iam iamq; signat primulis uestigijs,  
Arundinem equitat, blæsulo uoces sono  
Reddit patris matrisq;, tandem litteras  
Eburneas & noscit inter, æmula  
Aequalibus certatq; diligentia?

Sic est: beati, ter beati & amplius  
Pueri: oculis quàm blandulis en afficit  
Adamulumq; CHRISTVS, atq; Abrahamulum,  
Manus ut ambas porrigit Susannulæ?  
Iam poscit Hannæ filium, Iosephulum  
Vlinis fouet, mellita figit oscula  
Abelulo: matres aperto stant sinu,  
Nec est pudor, modò proximæ sint, & bene  
Dulcissimis CHRISTVS precetur liberis.

O' charitas ætatulam in primam Dei:  
O' prisca pietas, ardor & parentium,  
Dicare sua CHRISTO Deoq; pignora.  
Nam nunc quidem peruersitas tanta est, quis ben  
Ad alia quis non potius omnia liberos  
Adhibet furenter, quàm uenire ad te sinat  
Fili Dei salutis autor unice?

Natos equum corpus docet super edere  
Thoon, Pholusq;: furta Verris filius,  
Et discit Autolyçi, Euclionis colligit  
Præsegmīna unguium: dolis, calumnijs

Sycophanta

Sycophanta pater hunc instruit, domestico,  
 Parasitus exemplo ille fit: Baccho litans  
 Multi, colunt multi Paphi præcumibus  
 Diuam parentibus: caput per & pedes  
 In scelera præcipiti ruant ut impetu  
 Dat liberis occasionem, surdior  
 Fretosq; Mundus turbido: nec filium  
 Dei, nec audit Tarsi alumnum, qui monet  
 Ut educemus in timore numinis,  
 Patrisq; CHRISTI disciplina infantiam.

Impunè sed num talis est parentibus  
 Abstractio à CHRISTO futura liberum?  
 Futura uerò est, sermo sed quando irritus  
 Erit Dei, quò scandalis denunciat  
 Pœnam: expedire & inquit illis, pufio  
 Per innocens offenditur quos, aluo  
 Maris iacere saxea mole obrutos.

Tremenda uerba non modò parentibus  
 Suis perire caussa qui sunt liberis:  
 Pendenda diligenter animi sed mihi,  
 Tibiq; sceptrum quisquis es qui uirgea  
 Manu geris. Non muneri satis tuo,  
 Non feceris, curæ tuæ si traditos,  
 Et litteris & disciplinis sedulo  
 Imbueris: ac Maronis illis aurea,  
 Vatumq; cæcicarmina explicas patris:  
 Si Tullios proponis, & Demosthenas,

Simul Quirina & Attica facundia  
 Foto ferant ut orbe nomen inclytum:  
 Cursum expedis si qui micant cœlo ignium,  
 Naturæ in intima ducis & penetralia:  
 Sunt ista pulchra, sunt præclara, quis negat?  
 Sed Christus est quod non in illis, sunt nunc  
 Quæ casta castiora multo: sine Dei  
 Scientia doctrinæ gladius est sibi,  
 Quo iugulat ipse sese, eam quisquis habet.

Pietatis ergo cura sit primordia  
 Proponere unica pueris, & maxima,  
 Ut quid uenari seuiat præcordijs  
 Miseri sciant, quàm mentis inops, consilij  
 Expers, sit & pietatis omnis indigens  
 Nostrum genus: tum Patris indulgentia  
 Sit quanta, Patris optimiq; charitas,  
 Dulcissimum motus dedit qua filium  
 Nobis suum, qui uita, ueritas, uia,  
 Morti obtulit se pro salute publica.

Ducentur abs te turba sic ad optimum  
 Pusilla Christum, & testula imb. bet recens  
 Nardiq; odorem, balsamq; hedysmata  
 Cœlestis, habent aurulam actionibus  
 Per omne uitæ tempus ut suauissimam.

Pœniteat ista te nec iterum ac sepius  
 Repetere, eundem & usq; & usq; tundere  
 Incudem, ut hæcant: puer nec te bonæ

Andræ

Audire pigeat, uoluere & reuoluere:  
 Doctrina redijt cuius opera hoc tempora  
 Fidei, polo quæ nos beat, qui Thesbio  
 Baalis est aggressus aras robore,  
 Rasamq; turbam, & impudicos flamines,  
 Discendo, ait, fio catechesin senex.

Exposita libris quæ quòd extat plurimis,  
 Te siue Hebræus sermo, seu Græcus iuuat,  
 Siue Ausonum loqui tibi lingua sedet:  
 Magis mouet quòd & penetrat aerium  
 Numerum: eadē dulci lepōre uersuum  
 Condire placuit: addidi quibus preces,  
 Morumq; leges, & dedere uersibus  
 In uulgus hoc quòd multa multi tempore,  
 Non dissimilia litteris culti uiri,  
 Meliora quæ mihi uisa sunt, apīs uelut  
 Matina collegi undiq; Deo seruiens,  
 Ecclesiæq; quæ tamen si quis stylo  
 Diuersa quòd sunt, audeat reprehendere.  
 Filo esse quædam & crassiora dicere:  
 Eandem sciat nec omnis ostri gratiam,  
 Pares nec esse qui sequuntur Cæsarem.

Hæc edita antè, sed dicata nemini,  
 Et auctiora, plurimis & in locis  
 Politiora, inscriptione nomini  
 Tuo puer ALEXANDER, & puer tuo  
 Hæc CHRISTIANE cōsecro illustrissimo,

Cui

Cui parei ora Saxonis, Septemuiro,  
 Satis ut esse, quæ parentis in scholis  
 Prouincialibus docentur, ex nota  
 Cernatis illa, tradidere quæ uiri,  
 Tradentq; uobis eruditiq; & boni.

Orti pater materq; regibus, genus  
 Dant inclytum uobis, & indoles bona,  
 Ad summa quæq; & expedita se exerit  
 Vis ingenij: iam quod decus non uos manet,  
 Quis non honos, forti paterna cum manu  
 Geretis olim sceptræ? litteras quibus  
 Adiunxeritis si bonas, scientiam  
 Deiq; uerbi, cerno uos pios fore,  
 Magnosq; patriæ principes. Quod filij  
 Ergo sui det optimusq; & maximus  
 Rerum Parens, & autor altorq; omnium.

GRIMAE, CAL. MAII,

D. M. A XIII.

PIETA.



# PIETATIS PVE- RILIS LIBER I.

## CAPITULA CHRIS- tiana pietatis.

### SYMBOLVM APO- STOLORVM, ERASMI ROTTERODAMI.



Confiteor primum ore pio, uene-  
rorq; fideli  
Mente Deum patrem, uel nutu cum  
sta potentem,  
Hunc qui stelligeri spacioſa uolumi-  
na cœli,

Et ſolidum omniparæ telluris condidit orbem.  
Eius item gnatum IEſVM, cognomine Chriſtum,  
Quem Dominum nobis agnoſcimus, & ueneramur.  
Hunc Maria afflatu diuini numinis, aluo  
Concepit uirgo, peperit puriſſima uirgo.  
Et graue ſupplicium immeritus, damnante Pilato  
Pertulit, infami ſuffixus in arbore mortem  
Oppetiit, tumulatus humo eſt, clauſuſq; ſepulchra.  
Interea penetrat populator ad infera regna.  
Mox ubi tertia lux mœſto ſe prompſerat orbi,

*Emerſit*

**E**merfit tumulo superas rediuius in auras.  
 Inde palam ætheream scandit sublimis in arcem;  
 Illic iam dexter patri aſidet omnipotenti:  
 Inde olim rediturus, ut omnem iudicet orbem;  
 Et uiuos pariter, uitâq; & lumine caſſos.  
 Te quoq; credo fide ſimuli Spirabile numen;  
 Halitus afflatusq; Dei ſacer, omnia luſtrans.  
 Et te confiteor ſanctiſſima concio, qua gens  
 Chriſtigena, arcano nexu coit omnis in unum  
 Corpus, & unanimis capiti ſociatur I E S V.  
 Hinc proprium nescit, ſed habet communia cuncta.  
 Hoc credo in cœtu ſancto peccata remitti.  
 Nec dubito quin exanimata cadauera ruſum  
 In uitam redeant, animas ſortita priores.  
 Vtraq; pars noſtri, corpusq; animusq; deinceps  
 Iuncta ſimul, uitam ducens ſine fine beatam.

# I A C O B I M I C Y L L I:

**P** Rincipio Patrem cœli terræq; potentem;  
 Ingenitum, æternum credimus eſſe Deum;  
 Cuius in immenſum patet, & ſine fine poteſtas:  
 Qui regit ac paſcit, quicquid ubiq; uidet.  
 Credimus & ſanctū C H R I S T I cognomine natū;  
 Prædictum oraclis, carnūibuzq; Deum:  
 Quem Mariæ claſſo concepit ſpiritus aluo,  
 Mox hominem peperit nescia Virgo uiri.  
 Qui quondam diræ paſſus ludibria mortis;

In ſc.

In cruce pro nobis uictima facta Patri est.  
 Venit & ad Stygios, tumulato corpore, Manes,  
 Infernasq; nouo terruit ore domos.  
 Mox iterum superas abiit rediitque in auras,  
 Tertia cum Phœbi redderet ora dies.  
 Firmatisq; suis, cœlum conscendit, & alta  
 Scandibilem nobis fecit ad astra uiam.  
 Hic cum patre sedens regnat, dum luce supremâ  
 Pro merito prauos iudicet, atq; bonos:  
 Tunc cum flagrantem rapiunt incendia mundum,  
 Et surgem tumulis corpora uiua suis.  
 Numen & amborum de numine credimus illud,  
 Qui super æquoreus Spiritus ibat aquas.  
 Idem qui mentes regat & conseruet in æuum,  
 CHRISTI quas eadem iunxit amorē fides.  
 Hinc ueniam culpæ factam, clauessq; relictas,  
 Soluere quæ noxas, quæq; ligare ualent.  
 Et reduces animas in corpora morte redemptas,  
 Vltimâ cum summum finiet hora diem.  
 Actandem sine fine datam per secula uitam,  
 Gaudiâq; in cœlo tempus in omne p̄ps.

P E T R I S V E D E R I .

**V** Num mente Deum credo, uenerorq; fideli,  
 Qui regit arbitrio, cuncta creata suo.  
 Quemq; innupta Deū cōcepit fœmina CHRISſtū,  
 Numinis afflatu uiuificame sacri:

Qui

**Qui, ne Tartaream cuncti ingrederemur abyssum,  
Pro nobis mortem duraq; fata tulit.**

**Morteq; deuicta, fractoq; Acheronte triumphans,  
Astra, grauis iudex post rediturus, adit.**

**1 Te quoq; credo fide simili Spirabile nūmen,  
Omnia sanctificas qui bonitate tua.**

**Et te communi, sanctissima concio, uerbo  
Tristia peccati soluere uincla reor.**

**Nec dubito reducem deserta ad corpora uitam:  
Vitam, quæ stabili lege perennis erit.**

**IOANNIS SAVROMANI.**

**1 C**redo pia in nostrū ratione Deumq; Patrēq;  
Omnia quem statuo numine posse suo:  
Qui nitidis clarum stellis fabricauit Olympum,  
Stat cuius uerbo, quā patet, omne solum.

**2 Credo quoq; in CHR Istum simili pietate colendū,  
Vnicus est nostri filius ille Dei.**

**Omnis huic patrij est subiecta potentia regni,  
Qui regit arbitrio cuncta creata suo.**

**Penē fide maius, fuerat conceptus in aluo  
Virginis afflatu numinis ille sacro.**

**Postmodò conceptum peperit purissima uirgo,  
Quæ Maria est certo nomine dicta suo.**

**Quiq; fuit passus sub iniquo multa Pilato,  
Præsede Iudæi Casareo populi.**

**Affixusq; cruci miseranda morte necatus,  
More Palestino deinde sepultus humo.**

**Interced**

Interea uindex ad tartara caeca receſſit,  
 Ius adimens nigris, imperiumq; deis.  
 Terq; ubi praeſtuerat mundo ſua lumina Titan,  
 Surrexit per ſe uiribus ipſe ſuis.  
 Stelligeras ſcanditq; domos, ubi cuncta potentis  
 Proximus ad dextram nunc ſedet uſq; Patris.  
 Inde redibit, ut & uiuos, uitaq; carentes  
 Iudicet, & toto quaerſit in orbe fides,  
 Inq; Dei flatum credo, Spirabile numen,  
 Cuius agunt uitam flamine cuncta ſuant.  
 Conſiteor ſanctos homines, coetumq; piorum,  
 In quibus eſt ueri cultus, amorq; Dei:  
 Quos quod habent Ieſu communia dogmata Chriſti,  
 Communi dicas nomine Chriſticolae.  
 Omnia per CHRISTVM fateor peccata remitti;  
 Omnibus his quibus eſt indubitata fides,  
 Credo quod haec olim rurfus caro noſtra reſurget,  
 Quodq; procul dubio uita perennis erit.

GEORGII FABRICII.

Credo pio ſtudio, in uerum Dominũq; Deumq; t  
 Nomina qui blandi mitia patris habet,  
 Cuius ab aeterno fuit infinita potestas,  
 Sceptraq; in aeternum maxima cuius erunt,  
 Qui per uiuificum quoq; condidit omnia uerbum,  
 Quidquid & aſtra uehunt, terraq; quidquid alit.  
 Quiq; ſuo placidus conſeruans condita uerbo,  
 Suſtendat celfa ſummaq; & ima manu.

b

Credo

- Credo etiã in CHRISTVM qui proles unica patris,  
 Quem Dominum meritò cuncta creata colunt.  
 Humanam propter qui cœli templa salutem  
 Linquens, è patrio uenit ad ima sinu.  
 Conceptus sacra diuini Flaminis aura,  
 Et de non tacta Virgine natus homo.  
 Iniustum seui stans iudicis ante tribunal,  
 Nostrorum scelerum qui malefacta luit:  
 Arboreoq; crucis distentus stipite membra,  
 Victima pro humano traditus est genere.  
 Mox animam expirans, miseris cruciatibus ægram,  
 Imposita saxi mole sepultus humo est.  
 Sed non & permansit humo: nigra tartara fregit,  
 Peruadens clausas duro adamante seras.  
 Tertia lux uiuum, deuicta morte, Ereboq;  
 Protulit, & mœstis gaudia sancta tulit.  
 Iamq; tenet dextram Patris omnipotentis: & inde  
 Supremo ueniet, iudicis ore, die.  
 Inq; unum uiuos relegens, & lumine functos,  
 Præmia pro meritis iusta cuiq; dabit.  
 Credo quoq; in sanctum, numen uegetabile, Flatumq;  
 Cum nato æqualem, cumq; parente Deum.  
 Cuius per totum collecta Ecclesia mundum  
 Virtute, æthereo fert sacra grata patri.  
 Coimmuncmq; fidem, communia fœdera seruat,  
 Communes socio fundit & ore preces.  
 Hic uenire spes certa, remissio certa parata est:  
 Clau-

*Clauditur hic cœli, hic referatur iter.  
 Corpora de clausis surgent excita sepulchris,  
 Sublata indomitæ iuræq; mortis erunt.  
 Immortale pij peragent feliciter æuum,  
 Gaudentes facie colloquioq; Dei.*

**MEDITATIO**  
*eiusdem.*

*Hæc labente die meditor, redeunte reuoluo,  
 Et nil in prompto lingua habet ore magis  
 Da Pater omne meo cedat de pectore frigus,  
 Raptus in ardeſcam totus amore tui.  
 Idolisq; negem cultum, & quæcunq; decoram  
 Alterius ſpeciem religionis habent.  
 Et tu CHRISTE ſimul fragilem ſic dirige mentes,  
 Ad meritum ut diſcat cuncta referre tuum.  
 Sint odio, ſeu quis fictis operatur in aris,  
 Seu manifeſta tuæ quis mouet arma cruci.  
 Spiritus alme etiam, ne forſitan inſcius error  
 In mala præcipitem pernicioſa trahat,  
 Merege, & igne tuo calefactas re medullas,  
 Deficiat ne quo tempore lapſa fides.  
 Ipſa fides nerè eſt regni cœleſtis imago,  
 Quæ ſe propitium nouit habere Deum:  
 Et non viſibilem tamen aſpicit, atq; potentem  
 Intrepide recto lumine mentis adit.  
 Haſ accende faces, hoc lumen cordibus auge,  
 Extingui & nulla clade premente ſine:*

b

2

Vtque

Vt quæ certa fides animo iam præcipit, illa  
Sentiant euentu non caruisse suo.

GEORGII AEMILII.

- 1 **C**redimus esse Deum, cœli terræq; parentem,  
Qui sine fine manet, principioq; caret.  
Cuius in immensum protèditur alma potestas  
Nec bonitas metam, qua teneatur, habet.  
Iusticiæ qui fons, à quo sapientia manat,  
Cuius ab afflatu prouenit omne bonum.  
Ille suo cœlum nutu terramq; creauit,  
Et ualida seruat cuncta creata manu.
- 2 Credimus et CHRISTVM patrio de numine natū,  
Qui Saluatoris nomen IESVS habet.  
Natus ab æterno soboles æterna parente,  
Supremi uerbum dicitur ille DEI.  
Est etenim uerè diuinæ mentis imago,  
In quo cognosci uultq; potestq; Pater.  
Hic genus humanum per tristia crimina lapsum  
Posset ut in Priscum restituisse decus:  
Venit in hanc nostram cœli de culmine carnem,  
Et Dcus assumpto est corpore factus homo.  
Nec tamen humano conceptus more, modoq;  
Diuina genitus sed ratione fuit.  
Spiritus è cœlo ueniens, in Virginis aluum,  
Afflatu subiit uiscera casta suo.  
Intactumq; replens diuino semine uentrem,  
Reddidit, ut mater uirgo Maria foret.

Filius



*Filius hinc summi CHRISTVM virtute parentis*

Nascitur, atq; Deus nomen hominib; tenet.

Venerat ad nostram coelesti sede salutem,

*Aeternis cupiens nos reparare bonis.*

Pro pietate sua tali, & bonitate sed illi

*Redditachcu quàm non gratia digna fuit?*

Nam Iudea uirum infontem gens impia cepit,

*Irarum furijs exagitata malis.*

*Criminibus falsis onerant, unumq; necari*

*In iustis studiis uirq; puerq; rogant.*

Quis memoret plagas, conuicia, uulnera, sannas,

*Quæ patiens animo pertulit ille pìo?*

*Talia Romano sub præside facta fuerunt,*

*Pontius huic nomen fortè Pilatus erat.*

*Ille suo tandem populo damnauit I E S V M,*

*Quamlibet infontem cerneret esse uirum.*

*Ergo cruci affixus moritur, qui criminis expers,*

*Crimina fert ucrè corpore nostra suo.*

Quinctiam gemini pendent utrinq; latrones,

*In quibus ut summum prominet ille scelus.*

*Testantur cœlum tenebris, Manesq; sepulcris.*

Terra, petra, uelum, morte perire Deum.

*Impositum corpus tumulo fuit inde recenti,*

Concessum votis Arimathæe tuis.

*Interea CHRISTI dum membra sepulta quiescūt,*

*Spiritus infernas coepit adire domos*

Hic crebi dominum uicit, regnumq; subegit

b

3

*Illius,*

Illius, & priscis uincula demsit auis.  
 Tertia iamq; dies claro surgebat Olympo,  
 Atque nouum Phœbi lumine mane fuit:  
 Cum redijt CHRISTVS superas rediuius in auras,  
 Deuictæ mortis conscia signa gerens.  
 Sponte sua clauso lapides cessere sepulchro,  
 Inde fugam uigiles arripuere uiri.  
 Denique discipulos cùm confirmasset IESVS,  
 Venerat & Decimus iam quater inde dies:  
 Montis oliuarum conscenso culmine, sursum  
 Ad superas scandens transijt ille domos.  
 Spectantesq; uiros medio serzone reliquit,  
 Nube caua assumtum circumeunte Deum.  
 Angelici cœtus Dominum comitantur euntem,  
 Ille triumphato uictor ab orbe redit.  
 Captiuosq; trahens spolijs cum fortibus hostes,  
 Humano generi munera distribuit.  
 Atria se Domino uenienti lucida pandunt.  
 Excipit & reducem cœlica turba Deum.  
 Hic uero ad dextram chari sedet ille parentis,  
 Cum quo summa tenens, inaq; cuncta regit.  
 Vna eadem Patri rerum, natoq; potestas,  
 Par decus ambobus, gloria parq; manet.  
 Imperium sine fine tenent, pariterq; gubernant:  
 Est cœlum sedes, terraq; fulcra pedum.  
 Hinc iterum CHRISTVS ueniens sub fine dierũ,  
 Buccina terribilem cùm dabit alta sonum.

Quando

Quando resurgentes homines sua membra resumēt,

Vt ueniant summi iudicis ante thronum.

Iudicium toto Dominus celebrabit in orbe.

Letificum rectis, luctificumq; malis.

Cornigerosq; pijs hircos discernet ab agnis,

Et sua pro merito præmia cuiq; dabit.

Euitanda uenit nulli sententia, siue

Viuus ad huc, seu iam morte solutus erit.

Credimus & sanctum cœli Spirabile numen,

Vnum cum nato, cumq; parente Deum,

A Patre procedens qui Spiritus exit ab æuo,

Omnia uiuificans luminis igne sui.

Ille Prophetarum, Patrumq; per ora locutus,

Edidit æteni cœlica iussa Patris.

Venturumq; Dei natum prædixit in orbem,

Deleat ut mundi crimina morte sua.

Filus hunc cœlum repetens dimisit ab alto,

Exitet ut ueram cordibus ille fidem.

Hoc duce colligitur per totum Ecclesia mundum,

Vnanimi Christum religione colens.

In qua synceri resonat uox unica uerbi,

Suntq; pares cultus, est eademq; fides.

Quamlibet hic cœtus totum sit sparsus in orbem,

Omnibus in Christo mens tamen una manet.

Hunc saluatorem credunt, cunctiq; fatentur

Esse redemptorem, iusticiamq; suam.

Nec diuina deest animis communio sanctis,

b

4

Commune

Communis pietas quos ligat, atque fides,  
 Hic peccata solent cunctis admissa remitti,  
 Gratia quos CHRISTI munere parta iuuat.  
 Namque duas claues uerbi dedit ille ministris,  
 Claudere quis possint & referare polos.  
 Quicquid ab his fuerit resolutum, siue ligatum,  
 Hoc etiam in cœlo credimus esse ratum.  
 Nec magnum est adeò crimen, mediator IESVS  
 Quod tibi, si credas, non abolere queat.  
 Deniq; post mortẽ quondam caro nostra resurget,  
 Primaq; ut accepit, corpora reddet humus.  
 Hoc uirtute Dei fiet, qui reddere uitam  
 Namque gēfunctis omnipotente ualeat.  
 Hinc tandem æternæ speramus gaudia uitæ,  
 Quæq; manent cunctos cœlica regna pios.  
 Atq; hæc sunt fidei certissima simbola nostræ,  
 Credere q; CHRISTVM corda professa decet,  
 Ille fidem nostram confirmet, & augeat, olim  
 Omnibus in cœlum quò patefiat iter.  
 Hoc Pater & Natus iubeant, quibus æqua potestas:  
 Hoc uelit amborum Spiritus esse ratum.

IOANNIS LANGI.

**H**Ec mihi certa fides manet, æternũq; manebit,  
 Quã menti afflauit Suada superna meæ.  
 Esse Deum, terras unus cœlumq; profundũ,  
 Et quĩ condiderit numine cuncta suo:  
 Tam quæ conspicimus uoluentis corpora mundi,

Quĩm

Quam quæ luminibus cernere nemo potest,  
 Ad sacros usus hominum leganda piorum  
 Agmina sanctorum flammæ spirituum.  
 Omnipotens, augusta maiestate uerendus,  
 Terrigenum clemens & Pius usque Pater.  
 Illius est rerum solius summa potestas,  
 Cunctos ille sua pro bonitate fouet.  
 Qua fretus, tali fido patre, tamq; benigno:  
 Vnicus hic uitæ portus & aura meæ.  
 Assensu cuius non accedente, capillus  
 Non unus nostro decidit è capite.  
 Et patris unigenum credo de pectore Verbum,  
 Ipsa, prius natum, secula quam fierent.  
 Natum non cretum, Lux hic è luce coruscat,  
 Equ; Deo uero uerus & ipse Deus.  
 Hunc unum Dominum nos usq; atq; usq; fatemur,  
 Ordine per quem sunt omnia facta bono.  
 Cuius non quisquam secernat numen ab illo:  
 Sic sibi consistunt Gnatus & ipse Pater.  
 Hic generis casum nostri miseratus accrbum,  
 Ut dextro lapsis numine ferret opem:  
 Ac uindex hominem tristi reuocaret ab Orco,  
 Et saluum uitæ redderet æthereæ:  
 Astrifera summi demissus ab arce Parentis,  
 Imas terrarum uenit ad usque plagas.  
 Atque hic diuini conceptu numinis auræ,

b

s

Prodiit

Prodiit intacta uirgine natus homo.  
 Vnicus in gemina natura CHRISTVS, & idem  
 Quem summum fuerit dissociare nefas.  
 Salue CHRISTE Deus, salue mortalis IESV:  
 Summo nate Deo, uirgine nate sacra.  
 Innocuus tu sponte tua, facilisq; tulisti  
 Romulidæ indignum præsidis arbitrium.  
 Quo censente, crucis, nostri tibi criminis ergo,  
 Supplicium infamis, dulce subire fuit,  
 Inde salutifero defuncti funere sancta  
 Sunt Mausoleo condita membra suo:  
 Cum saccer interea diuina Spiritus aura  
 Viferet infernis agmina clausa locis.  
 Sed rediuiuus enim calcata morte, redisti  
 Fatipotens auras uictor ad æthereas,  
 Tertia cum lucem terris aurora referret:  
 Id quod fatidici præcinuere libri.  
 Mox quoque sublimis, spolijsq; decorus opimis.  
 More triumphantis sidera summa petis:  
 Hic ubi regnator cælo flammante  
 Aequæuo dexter cum genitore sedes.  
 Inde reuersurus, summis uoluentibus annis,  
 Aligero cæli concomitante choro,  
 Quæsitur, uiuis functisq; ut facta rependens,  
 Des bona digna bonis, des mala digna malis.  
Scebtro

Sceprrorum cuius regnum sine fine manebit,  
Aeterniq; statum temporis imperium.

Insuper agnosco Sanctum, afflatuq; potentem,

Et certo Zephyrum numine uiuificum;

Qui simul à genitore sacro, gnatoq; profectus,

Numinis est huius, huius & aura simul.

Idem cum genitore simul, gnatoq; perenni,

Christigenis colitur supplice more Deus.

Aurai cuius quondam responsa dedere

Afflatu uates, pectora sacra, pij.

Vnica quæ totum latè dispersa per orbem

Concio sincera religione uiget:

Non modò quæ nunc est, sed prima ab origine mundi

Quæ fuit, extrema quæq; futura die est.

Re passim sacra fruitur communiter omni,

Et pia doctrinis uiuit Apostolicis,

Sancta cohors olim conuiuia festa frequentans,

Degustat carnem uiuide Christe tuam:

Atque tuo sacros libat de sanguine potus,

Et celebrat laudes funeris illa tui,

Ilum fœlicem demum, uereq; beatum,

Tam sancti qui sit pars quotacunq; chori.

Et fontis laudo diuina lauacro sacrati:

Omnis uitali noxa piatur aqua.

Cœlitus ex alto per initia sacra renatis,

Natorum dantur iura beata Dei.

Dum

**Dum ueterem renouat naturam Spiritus almus.**

Chrismate lustratos sanctificatq; suo.

**Expecto, nec uana fides, dum lumine cœli**

In uitam redeant corpora cassa nouam.

**Que uunc sunt fatis obnoxia membra malignis,**

Tunc ærumnosæ nescia mortis erunt.

**Altera namque pios claro post funera cœlo,**

Atque ea (nil dubium) uita beata manet,

**Hanc mihi det Genitor, det Gnatus, detq; bifor mis**

Numinis aura, Deus trinus & unus: Amen.

P. FRANCISCI SPINVLAE.

**V** Num esse credo numen, eius unius  
Nitens opis fiducia.

Patremq; Filiumq; & alium Spiritum:

Patrem, creauit qui potens

**Terram, & polos, & quæ uidemus omnia, &**

Quæ non sub hos sensus cadunt

**Acterna: filium, unicum, nostrum ducem,**

Christus qui IESVS dicitur,

**Qui natus est æternitate ab omni co**

Ipso Patre almo almus, Deus

**Verus Deo uero, optimo optimus, potens**

Potente, numen numine,

**Qui genitus, haud factus patre, ut qui prorsus est**

Essentiæ eiusdem, refert

**Quàm maximè uultusq; faciemq; & sonos,**

Naturam & ingenium patris:

Per



Per quem tametsi æternus hæc creauerit  
     Pater opera æternum omnia,  
 In matris est dignatus intactæ sacrum  
     Aluum tamen descendere  
 A' sede patris, dictu & admirabile,  
     Complexa nullum unquam uirum  
 Integra uirgo, afflata solo at numine,  
     Et genuit illum, & edidit:  
 Qui factus est Deus homo, ut hominem perditum  
     Donaret æterna pius  
 Salute. proinde affectus est dura cruce:  
     Non abnuente Pontio  
 Prætoze Pilato, interemptus innocens  
     Est. & sepulchro conditus,  
 Descendit ima ad tartara, atq; (ut per suos  
     Vates receperat) Pater  
 Post tertiam lucem repente à luridis  
     Illum excitauit inferis,  
 Qui ad æthera ascendit, parentem & asidet  
     Dextra supremum: iudicem  
 Quem mundus æquum expectat, ut de mortuis,  
     (Qui mox reuiuifcent Dei  
 Iussu) atque de uiuentibus diiudicet,  
     Ac irroget nocentibus  
 Pœnas graues, bonisq; reddat præmia  
     Amplissima, Aluum Spiritum,  
 Patri atque Filio parem, Dominum inclytum,  
     Qui ex

Qui ex filio, parenteque  
 Emanat, idem quo uniuersa filius,  
 Et afflat ac sufficit pater.  
 Quem Patre, Filioque non minus colo, et  
 Supplex adoro, numine  
 Guius sacro afflati prophetae olim omnia  
 Futura praedixere: ad haec  
 Persuasum iterum mihi est, concioni uni à Deo  
 Patre, atque nato, et spiritu  
 Sancto dari uitam perennem: quae uiris  
 Addicta bis senis lae  
 Tutetur horum se magistrorum, eierans  
 In uerba eorum, quos patris  
 Diuina proles nunciatum olim omnibus  
 Misit, salutem gentibus,  
 Quis corpus est unum atque Iudeis simul,  
 Vtri que CHRISTVS est caput,  
 Horumque doctrinam sequentibus ducum  
 Iterum haud licere sentio  
 Ad criminum ueniam facris lauari aquis.  
 Mororque promissam diem  
 A uatibus, quo extincti ab orbe condito  
 Omnes reuiuiscunt patris  
 Iussu, ad perennae aeuum, et bonis gratissimum,  
 Miserrimumque fontibus.

NICOLAI SELNECCERI  
 E Sse Deum credo, qui uerbo cuncta creauit:

Qui Deus est tripplici simplex in numine numen,  
 Et series operum mundi quem pulchra parentem  
 Testatur, quocunq; uides, quocunq; moueris.  
 Est Pater aeternus, genuit qui lumine lumen  
 Aeterno gnatum, iustus, miserator & æquus,  
 Filius aeterni patris est de lumine lumen,  
 Rex unctus, cum Patre Deus, sacer atq; propheta  
 CHRISTVS. & hunc uerè sincero pectore natum.  
 Esse scio Dominum: qui certo tempore natum  
 Virgine de Maria, motu sic flaminis almi  
 Factus homo est: subiit ceu uictima funus acerbum  
 Sub diro passus crudelis iure Pilati:  
 Atque crucifixus tetræ, mortisq; nefandæ  
 Durum onus expertus, tandem sub puluere putri  
 Tectus humo mortem destruxit, ad infera scandens,  
 Moxq; dies solem ueheret cum tertia rursus,  
 Ipse resurrexit: cælos ascendit in altos,  
 Et sedet ad dextram patris super omnia princeps,  
 Et Deus atq; potens Rex: hinc uenturus ab arce  
 Aetherea iudex erit omni, siue sepulto,  
 Seu uiuo exoluet pœnas, & præmia cunctis.  
 Insuper & credo Flatum procedere uiuum  
 A patre & à gnato uerum, Dominumq; Deumq;  
 Qui facit ut maneat constans Ecclesia semper,  
 Sancta, Deo per cara, Dei cor, cordis amorq;  
 Hæc ubi terrarum sit cumq;, & disita quanquam  
 Sæpe locis sciungatur, tamen una eademq;

Sancto-

Sanctorum puro manet hæc communio cœtu.

In qua uera datur mihi condonatio culpæ.

Et scelerum moles cadit, & mihi uita refertur,

Vita suo certè nunquam spolianda uigore.

Namque caro clauso de cœspite uiua resurget.

\* Quando tubæ clangor dulci me uoce uocabit:

Tunc æterna dies aderit sine fine: Paterq;

Et gnatus, Flamenq;, erit omnia in omnibus: Amen.

CHRISTOPHORI SCHEL-  
lenbergij.

1 **C**redo Deū in Patrem, qui solus regnat ab æuo,  
Et propriū & facile est omnia posse cui:  
Qui summo cœlum suspendit in orbe supinū,

E media mundi sede locauit humum,

Refflua qui fixis circumdedit æquora terris,

Rerum author mundi quas latus omne tenet.

2 Credo Deum in Natū, quem Christū agnoscit Iesum,

Inuocat & Dominum concio sanctum suum:

Flamine quem sacro conceptum enixa Maria,

In lucem salua uirginitate dedit.

Plurima qui passus, Solymas quo tempore rexit

Pontius Ausonio iure Pilatus opes:

Affixusq; cruci soluit sine crimine pœnas,

Functus morte, noua contumulatus humo,

Orcum intrans: sed ubi redijt lux tertio mundo,

Extulit indè redux uictor in astra caput.

Nūc Patris ad dextrum latus omnipotentis, honore

Impe-

Imperioq; pari tempus in omne sedet:  
 Dum redeat, uiuosq; tuba, uitæq; carentes  
 Euocet, & iudex sistat utraq; sibi.  
 Credo sacrum in Flamen, Nati de corde Patrisq;  
 Spirans: cum Nato, cum Patre numen idem,  
 Quodq; sit in terris ecclesia, sancta piorum  
 Concio, quæ CHRISTVM scit caput esse suum.  
 Peccatisq; Deum placatum ignoscere nostris,  
 Et ueniam CHRISTI nomine credo dari.  
 Certa fides etiam, rediuiuam surgere carnem,  
 Extremi surget lux ubi iudicij,  
 Atrata malis, sed leta pijs: tunc uita perennis  
 Sub Phlegetonte illos, hos super astra manet.

# ANDRAE ELLINGERI.

**C**redo Deū in patrē Dominū, qui cūcta potēti  
 Numine, sub nitido quicquid uiget axe, guber:  
 Condidit hic clari conuexa uolumina cœli, (nat.  
 Fecit & omnigeno dotatam corpore terram.  
 Inq; Dci gnatum credo, cui nomen IESV,  
 Vnica qui æterni patris est, æternaq; proles.  
 Quem pia conceptum uirgo de flamine sacro,  
 Stirpis Iessæ Maria est enixa propago.  
 Qui mala perpeffus sub præside multa Pilato,  
 Affixusq; cruci lumen uitale reliquit.  
 Mox tulit exuias excisa in marmore tumba,  
 Exanimisq; artus contexit flebile saxum.  
 Interea loca cæca pctens inhiantis auerni,

Exertit

Euertit Stygij squalentia regna tyranni.

Tertia lux aderat, tumulo cum Christus aperto

Exurgens, mæsto rediuiuus in orbe refulsit.

Lucida cœrulei mox scandit ad ætheris astra,

Affeditq; sui dextræ Patris omnipotentis

Flammiuoma tandem uestitus nube redit it:

Iudicium cunctis positurus gentibus æquum,

Et uiuis simul & mortali lumine functis.

3 inq; sacrum credo Flatum, qui numine miti

Omnia uiuificat, seruat, fouet, atq; gubernat.

Et sanctum fateor cœtum, turbamq; piorum,

Quorū una in Christo mens est, concorsq; uoluntas

Vna fides & relligio, spes una, amor idem,

Credo etiam pœnas scelerum culpamq; remitti

Per Christum cuius, fidei qui dogmate prenso.

Admissi ueniam planctu deposcit amor.

Corpora nec dubito quin olim nostra resurgent,

Et uitam peragent animis coniuncta perennem.

MARTINI SALBACHII,

1 C Redo Deū in patrē qui cūcta potēte creauit,

Ex nihilo, regit & cūcta fouetq; manu.

2 Et Iesum in Christum, geniteris pectore natū,

Qui solus nostræ iura salutis habet.

Quem ueneranda satū diuini Virgo uigoris,

Conceptum salua uirginitate parit.

Iura rudi populo Iudææ dante Pilato,

In cruce qui sœua uulnera quina tulit.

Mortuus

Mortuus, infestas Erebi descendit ad umbras;

Funditus euertit Tartareasq; domos.

Inde redux iterum superas euasit ad auras.

Tertius ut terris Lucifer ortus erat.

Iudicioq; premet iusto, qui luce fruuntur,

Et quos consumpsit funeris atra dies:

In sanctum credo cœli spirabile numen,

Cum nato æternum cumq; parente Deum.

Concio cuius habet diuino munere sancta;

Omnibus à uitijis soluere posse reos.

Corpora, certa fides, à bustis nostra resurgent,

In cœloq; pijs uita perenniserit.

#### A D A M I S I B E R I.

**C**Redo in Deum Patrem, creauit omnia

Qui prepotens uerbo suo è nihilo, tuens

Et nunc regit, tellurem, aquas & æthera,

Et filium credo unicum Dei patris

In CHRISTVM IESVM, dominus omnium sacri

Conceptus est, qui Spiritus de numine;

Homo editus Mariæq; partu uirginis;

Pilato Iudeam regente Pontio;

Pendens latrones inter, affectus cruce;

Qui mortuus, sepultus est: ad inferos

Descendit, inq; lucis. oras tertia

Redijt die: ad cœlumq; conscendit, sedet

Ad dexteram patris Dei, uenturus est

Et inde uiuos iudicare & mortuos.

3 In spiritum sanctum DE I credo, Deum  
 Cum Patre uerum, filioq; : catholicam  
 Ecclesiam credo: pijs communia,  
 Remissionemq; ueniamq; criminum:  
 Et carnis excitationem a mortuis:  
 Vitamq; seclis quæ manebit omnibus.

EXPLICATIVN CVLA  
 eiusdem.

Credo, parens & arbiter rerum Deus  
 Aeternus, unus, optimusq; & maximus,  
 Potente quòd, cum nil forem, me dextera  
 Crearit, ut terram, mare, sidera, omnia  
 Et quæ suo natura continet sinu:  
 Quòd corpus hoc, & ista membra corporis,  
 Animamq; uimq; mentis atque sensuum,  
 Et dederit & conseruat: & bonus, fore  
 Patrem professus se mihi, quotidie  
 Victum ministrat, atq; amictum: & quidquid est  
 Rerum, quibus carere uita non potest.  
 Periculis, discriminum fidiſſimus  
 Comes, quod arcet, & tuetur numine  
 Suo malis in omnibus, præter meum  
 Meritum. queam nam quid mereri? maxima  
 Motus paternæ caritatis copia.  
 Soli deo omni emancipatum tempore  
 Me pro quibus gratum esse par est, unicui  
 Et conditorem amare totis uiribus,

Domini-



Dominumq; corde timere toto, laudibus  
 Patrisq; nomen prosequi sanctissimum,  
 Hæc cuncta sunt uerissima & certissima.  
 Credo quod à Parente, numen numine,  
 Splendore splendor, luce lux, DEO DEVS  
 Acuum ante, uerus, omne, par potentia,  
 Honore, maiestate genitus, flaminis  
 Sanctissimi satu potente, uirgine  
 Homoq; uerus matre IESVS editus,  
 CHRISTVS meus sit dominus & rex perditum  
 Qui, sempiternis destinatumq; ignibus,  
 A morte, sathana, fœditate criminum  
 Redemit, & me liberauit, diuite  
 Non auro & argento, malis nostris caput  
 Subdens, patriq; factus in cruce uictima  
 Ut agnus innocens: cruore sed suo,  
 Cruciatibusq; & morte tristi, & ad domum  
 Itione fontem, ut ipsius peculium  
 Sim iustus, integer, beatus omnibus  
 Acuisq; uiuam, in sancta regna coelitum  
 Translatus è sepulchro, ut ipse patria  
 Patefacta ab imis manibus retro uia,  
 Viuas domos colit excitatus gloria,  
 Regit & DEVS homo potente cuncta dextera,  
 Noster sequester, deprecator, Pontifex:  
 Appareat, donec suprema gentibus  
 Iudex die coram omnibus, pœnas malis

c

3

Et irro-

Et irroget, donetq; iustis præmia,  
 Interminatis quis fruantur seculis.  
 Hæc cuncta sunt uerissima & certissima,  
 3 Credo meæ quod ad salutis uindicem.  
 Christum queo, per arduum nec tendere  
 Vi mentis ingeniq; iter, nec credere  
 Habendo ei fidem: DEVS, sed Spiritus  
 A Patre iuncto filium per numine  
 Qui manat, ipse Euangelii potentia  
 Adhalat, excitat, uocat, trahit, rapit.  
 Mentem meam splendore dissipans suo,  
 Cordis tenebras sexei, & uera fide  
 Beat, suo redditq; sanctum numine,  
 Sanctumq; seruat, ut per ambitum solet.  
 Terræ salus contingere extra quam potest  
 Nulli uocare, congregare Ecclesiam,  
 Nouaq; collustrare luce, reddere  
 Verboq;, locione, sacris & epulis  
 Sanctam, Dei natiq; retinere in fide:  
 In qua mihiq; & omnibus credentibus  
 Veniam benignus omnium quotidie  
 Dat criminum. Cum uenerit mundo dies  
 Et ultima, exciens sepulchris conditos,  
 Fidentibus CHRISTO aurea cœli domo  
 Dabit omnibus mansura seclis gaudia.  
 Hæc cuncta sunt uerissima, & certissima,

ORA-

59

# ORATIO DOMINI- CA, QUAM IESVS CHRISTVS SERVATOR ET DOMINVS NO- STER DOCVIT APOSTO- LOS:

Matth. vi. LUC. xi.

IV VENCI HISPANI.

**S**idereo genitor residens in uertice cœli,  
Nominis oramus ueneratio sanctificetur  
In nobis Pater alte tui: tranquillaq; mundo  
Adueniat, regniq; tui lux ampla pateſcat.  
Sic cœlo, ut terris, fiat tua clara uoluntas:  
Vitalisq; bodie sancti ſubſtantia panis  
Proueniat nobis. tua mox largitio ſoluat  
Innumera indulgens erroris debita prauit:  
Et nos haud aliter concedere ſœnora noſtris.  
Tetri ſcua procul tentatio demonis abſit,  
Eq; malis tua nos in lucem dextera tollat.

CŒLII SEDVLII.

PATER NOSTER.

**Q**ui Dominum cœli patrē memoramus, in ipſa  
Iam fratres nos eſſe decet, nec origene carnis  
Germanum tractare odium: ſed Spiritus igne  
Flagrantes, abolere doli monumenta uetuſti,

c. 4. Atq;

Atque nolum gestare hominem, ne forsan ab alto  
Denegerent terrena Deo, cui nos ducit CHRISTO  
Fecit adoptiuos cœlestis gratia natos.

Sanctificetur nomen tuum.

Sanctificatur ubi Dominus, qui cuncta creando  
Sanctificat, nisi corde pio, nisi pectore casto?  
Ut mereamur cum nos sanctificare colendo,  
Annuat ipse prior: sicut benedicier idem.  
Se iubet à nobis, à quo benedicimur omnes.

Adueniat regnum tuum.

Adueniat regnum iam iam quoq; scilicet illud  
Morte uacans, et sine carens, cui nulla per æuum  
Tempora succedent: quia nescit tempus habere  
Continuus sine nocte dies, ubi principe CHRISTO,  
Nobile perpetua caput amplectente corona,  
Victor opima ferens gaudebit præmia miles.

Fiat uoluntas tua.

Iugibus hoc uotis, hoc nocte dieq; precemur,  
Illius ut fiat cœlo terraq; uoluntas,  
Qui nusquam uult esse nefas: hostemq; nocentem  
Utq; polo, sic pellat humo, ne corpora nostra  
Tanquam uile solum, seuus sibi uendicet hydrus.  
Sed qui cuncta fouet plena pietate redundans,  
Omnipotens, animas pariter conseruet, et artus.  
Altera pars etenim cœli sumus, altera terræ.

Panem nostrum quotidianum.

Annonam fidei speramus pane diurno,

Ne mens

Ne mens nostra famem doctrinae sentiat unquam.  
 A' CHRISTO ieiuna suo: qui corpore & ore  
 Nos saturat, simul ipse manens uerbumq; cibumq;  
 Dulcia nam domini nostris in faucibus haerent  
 Eloquia, exuperantq; fauos atq; omnia mella.

Et remitte nobis debita.

Debita laxari qui nobis cuncta rogamus,  
 Nos quoq; laxemus, proprij nam cautio uerbi  
 Spondentes manifesta tenet: grauiusq; soluti  
 Ne ctimur, alterius si soluere uincla negamus.  
 Incipietq; pius decies millena talenta  
 Dimittens Dominus, si nos affligere propter  
 Denarios certum conseruum senserit ullum,  
 Tradere confestim tortoribus: inq; feroci  
 Carcere constricti non permittemur abire,  
 Donec cuncta breuem reddamus adusq; quadratem.

Et ne nos in ducas intetationem.

Non quia nos Dominus, lucis uia, samita pacis,  
 In laqueos tentantis agat: sed cum mala nostra  
 Deserit, ire finit. nam quisquis retia mundi  
 Delitiosa sequens, luxus & gaudia blandæ  
 Perditionis amat, Deus hunc uirtutis amator  
 Linqvit, & ingreditur quâ se tentatio ducit.  
 Iugibus hanc igitur studijs uitemus & arctum  
 Corde petamus iter, tenuis quâ semita monstrat  
 Ire per angustam regna ad cœlestia portam.

Sed libera nos à malo.

e s Si cupi-

Si cupimus uitare malum, debemus adire,  
 Sectariq; bonum: hic quia liberat, ille trucidat:  
 Hic alit, ille necat. nam quantum sidera terris,  
 Ignis aquis, lumen tenebris, concordia bellis,  
 Vita sepulchris: tantum bona longius absunt  
 Dissociata malis. dextrum quicumque necesse est,  
 Aut leuum gradiatur iter. Sed dextra bonorum  
 Semita, conspicuos uocat in sua gaudia iustos,  
 Inq; tuos Patriarcha sinus: at leua malorum  
 Exercet poenas, & ad impia tartara mittit.  
 Ergo agnis ouibusq; Dei est hæc sola uoluntas,  
 Et bona libertas, euadere torua cruenti.  
 Ora lupi, uitaq; frui per pascua CHRISTIANI.

M. HIERONYMI VIDAÆ.

- 1 **O**mnipotens genitor, sedes cui lucidus æther
- 2 Sic nomen, laudesq; tuæ celebrentur ubiq;
- 3 Et promissa orbi incipiant procedere lustras  
 Cum tua non minus in terris gens iussa facessat  
 Mortalis, quàm cœlicolæ tibi in æthere parent.
- 4 Nos diuina hodie cœlo dape refice ab alto,
- 5 Parce dehinc bonus, ut nostris ignoscimus ipsi
- 6 Hostibus: ac nullis aduersis obijce inermes
- 7 Tendando, prohibe à nobis sed cuncta pericla.

IACOBI MICYLLI.

- O** Pater, ô rerum sola atq; æterna potestas,  
 Sub pedibus cuius sidera clara micant:  
 1 Da precor, ut sancto cuncti uenernetur honore

Nomen

Nomen in hoc toto, quâ patet, orbe tuum,  
 Da, quò te uera tandem pietate colentes,  
 Fiamus regni pars quotacunque tui.  
 Ac pariter toto cœlo, totumq; per orbem,  
 Cuncta tuo arbitrio conuenienter eant.  
 Nec non præsentì uictum Pater optime uitæ  
 Suffice, et hæc solido corpora pasce cibo.  
 Atq; ut nos alijs, tu sic commissâ uicissim,  
 Et nostrum nobis quæso remitte nefas.  
 Nec nos tentari patiaris ab hoste, nec ultra  
 Quàm tolerant uires pectora nostra premi.  
 Sed simul à cunctis uitæq; animæq; periclis,  
 Præsidio frætos ipse tuere tuo,  
 Solus enim regnas, soli tibi summa potestas,  
 Gloriaq; in nullos emoritura dies,

# SALMONII MACRINI.

**Q**ui cœlos habitas omnipotens Pater,  
 Sit sanctum usq; tuum nomen amabile.  
 Promissa adueniant secla fidelibus.  
 Terris iussa homines sic paragent tua.  
 In cœlo illa facit cœtus ut aliger.  
 Nos diuina hodie pasce bonus dape.  
 Et nostris uitijs parce, uti parcimus  
 Illis, quorum opera ledimur, hostibus.  
 Tentando neq; nos destituas malis,  
 Sed pellas opifer cuncta pericula.

GEOR.

## GEORGII FABRICII.

- O** Pater omnipotens, cui nostræ cura salutis  
 Maxima, qui cœli lucida regna premis.  
 Utq; tenes altum, sic nos quoq; respicis unis.
- 1 Terris: sit sanctum nomen ubiq; tuum.
- 2 In terra, ut cœlo, fiat tua magna uoluntas:
- 3 Et regnum adueniat Rex uenerande tuum.
- 4 Panem etiam, & uitæ nobis alimenta caducæ.  
 Atq; suas animæ da pater alme dapes.
- 5 Fratribus ut nostris peccata remittimus: & sic  
 Debita propitius nostra remitte Deus.
- 6 Ac ne crudeli nimium tentemur ab hoste,
- 7 Istum da contra fortia corda malum.
- Namq; tuum regnum, tua magna potentia sola,  
 Gloriaq; æternos firma futura dies

## EIVSDEM MEDITATIO.

## HOMO.

Pater noster qui es in cœlis.

- O** Pater, ô celsi Rex atque habitator Olympi,  
 In terris nati degimus ecce tui.  
 Hic sumus extorres, et regna aliena uidemus,  
 Sub grauis exiliij seruitijq; iugo.
- quando exacte post multa pericula uitæ,  
 Continget patrij regna tenere soli?

## DEVS.

Malachiæ 1.

Filius exequitur mandati iussa paterni,

Et



Et seruus Domini iusse superba sui.  
 Me Patrem dicis: sed ubi reuerentia patris?  
 Me Dominum: Domini quæ tibi cura tui?  
 Namq; meum toto nomen laceratur in orbe,  
 Et uestris audit peius ubiq; probris.

HOMO.

Sanctificetur nomen tuum.  
 Aspiciens placido miseros Pater optime uultu,  
 Supprime iusticiæ frena seuera tuæ.  
 Ira quidem iusta est, sed eam clementia uincat:  
 Plus ualeat nati crimine Patris amor.  
 Vt tua perpetua clarescat gloria laude,  
 Quam summa à gratis pro pietate feres.

DEVS.

Psalmo cxxxvi.

Qui poterit uestris mea laus clarescere linguis?  
 Ora doli, & nimium pectora fraudis habent.  
 Ferrea captiuo gestatis uincula collo,  
 Vitaq; uos tantis mersit iniqua malis.  
 Nemo peregrinis præconia dicere terris  
 Nostra, nec insigni tollere laude potest.

HOMO.

Adueniat regnum tuum.  
 Nostra alienigenæ iurè est data gloria genti,  
 Incuruat meritum colla scelestæ iugum.  
 Sed tu parce tuis, diuturnaq; uincula solue,  
 Reliquias sparsi collige quæso gregis.

Pristina

*Pristina iura tui reuocentur ut omnia regni;  
Et redeant festi post onera ista dies.*

DEVS.

Deuteronomij xxxii.

*Quem iuuo, perdo prius: mergo, quē laudibus orno:*

*Quem curo, uarijs tento proboq; malis.*

*At uos nec benefacta mouent, nec damna retundunt*

*Spernere mens uobis est mea iussa tenax:*

*Qui uestris igitur possum succurrere rebus?*

*Omnia iudicij spernitis acta mei.*

HOMO.

*Fiat uoluntas tua, ut in cœlo, sic etiam in terra.*

*Discute chare Parens de cæca nubila mente,*

*Consilium liquidò noscat ut illa tuum.*

*Semper ut in nostro regnet tua corde uoluntas:*

*In terra, & superis inuiolata thronis*

*Non sunt nostra tuis ultro contraria uotis*

*Vota: premit fragilis futile carnis onus.*

DEVS.

Psalmo lxxvii.

*Ore quidem multi me dilexêre, sed illis*

*Pectora mentiti plena fuêre doli;*

*Percipitis patriæ toties largiſſima dextræ*

*Dona, sed ingratis tantaq; totq; fero.*

*Regia magnifico struitis conuiuia luxu:*

*Sed pauper pellat, non habet, unde famem,*

Homo,

Panem nostrum quotidianum da  
nobis hodie.

*Speratum, licet indignis, ne detrahe panem:*

*Inprimisq; sacro pectora pasce cibo.*

*Non tantum fragilis sustentat corpora panis:*

*Ille salutaris prodit ab ore tuo:*

*Tunc suas brutis dones animantibus escas:*

*Flentibus hunc natis & Pater alme neges?*

DEVS.

Matthæi VII.

*Non decet ante faciem preciosas spargere gemmas, .ℓ.*

*Natorumq; canes non decet esse cibum.*

*Ille mihi natus, qui me ueneratur, amatq;*

*Qui facit imperij debita iussa mei.*

*Quantum anni uestri, tantum quoq; crimina crescunt*

*Degeneros animos uita scelestas probat.*

HOMO.

*Et remitte nobis debita nostra, sicut &  
nos remittimus omni debenti nobis.*

*At Pater, infirme ne spectes crimina uitæ,*

*Est meritis impar gratia nostra tuis.*

*Sic ueniam indulge, culpæq; ignosce professæ:*

*Vt placida, atq; alijs turba benigna sumus.*

*Indignè indignis pietas tua prompta, fatemur:*

*Promissum uerax sed tamen omne tuum.*

DEVS.

t. Pe-

## 1. Petri 2.

Ergo semel pœnas ignoui criminis omnes?

Ergo semel dextræ est ira repressa meæ?

Sponte secuti hostes, & castra inimica, peristis:

Quid labet in dubio pectore ficta fides?

Immundus ueluti canis, aut assueta luto sus,

Redditis obscœnis corpora criminibus.

HOMO.

Et ne nos inducas, &c.

6 Afflicta innumeris trahimus uix corpora morbis,

Innumeris tabent perdita corda malis.

Depositis adhibe medicamina mitia rebus,

Atq; salutiferam porrige mitis opem.

In preceps ne nos mundus trahat, aut caro, ne uē

Conficiat telis dæmonis ira suis.

DEVS.

Psalmo X.

Sum iustus, iustis sua præmia do, sua prauis:

Iudicij perstant omnia iura mei.

Vos quasuis tanto pro crimine pendere pœnas

Iustum est, & meriti uincla subire iugi.

Multa autem uestras acuit tentatio mentes,

Vt segnem his flammis suscitet illa fidem.

HOMO.

Sed libera nos à malo.

7 Eripe nos mansuete malis, iramq; coërce.

Sis patrij in tempus nominis omne memor.

Da

Da quoq; corporea mens tandem libera mole  
 Viuat, in ætheream morte recepta domum,  
 Vt meritis omni tollaris laudibus æuò,  
 Et te perpetua uoce canamus: Amen.

## GEORGII AEMILII.

**S** Vmme Parens, qui tecta tenes sublimia cœli,  
 Effice, diuinum quò sanctificetur in omni  
 Orbe tuum nomē: uclut est super omnia sanctū.  
 Adueniant hominum generi scœlestia regna,  
 In terris etiam fiat tua sola uoluntas:  
 Angelici tanquàm parent ad iussa ministri.  
 Hinc panem uitæ miseris largire precamur  
 Quotidie. Tum nostra pius peccata remittas,  
 Debita nos alijs ceu cuncta remittimus ipsi.  
 Nec Pater induci miseros patiaris ab hoste,  
 Vexat ubi nostras curis tentatio mentes:  
 Sed nos fida malo tua dextera liberet omni,  
 Vt lætis animis cœlestia regna petamus,

## NICOLAI BORBONII.

**O** Pater omnipotens, clariq; habitator Olympi  
 Laudetur merito nomen honore tuum.  
 Adueniat regnum. tua sit rata ubiq; uolūtas,  
 Fiat & in terris sicut in arce poli.  
 Da nobis hodie panem: & nos exime noxæ,  
 Vt ueniam nostris hostibus usque damus,  
 Nec sine tentando Stygius nos opprimat erro:  
 Fac, animas nostras ut mala nulla ligent,

d

Luce

## L V C A E G A V R I C I.

- 1 **O** Pater omnipotēs, resides qui in culmine cœli  
 2 Sanctificent omnes nomen ubiq; tuum.  
 3 Adueniatq; tuum regnum: fiatq; uoluntas  
 4 Vsq; tua, in terris non secus atque polo.  
 5 Dāq; hodie panem nostrum, cunctisq; diebus;  
 Qui uitres foueat corporis atque animæ.  
 6 Nōminibus nostris uelutiq; remittimus ipse:  
 Debita sic nobis nostra remitte precor.  
 7 Ne nos inducas, tētemur ab hoste maligno:  
 Liberet a cunctis sed tua dextra malis.

## G A S P. V R S I N I. V E L I I.

- 1 **O** Mnipotēs æterne pater supera alta gubernās  
 2 Cuius perpetuò nomen sanctū omnibus esto:  
 3 Iam regni propius leges, & sacra pateſcant  
 Iura tui, præſensq; animis illabere nostris.  
 4 Tu regere arbitrio æterno simul omnia dignus  
 Per terras hominum, & cœli radiantia templa.  
 5 Da Pater æthereis dapibus sine crimine uesti  
 Nunc, olim, quocunque die, noxamq; remitte.  
 6 Et scœlerum pœnas: nos ut debentibus ultrò  
 Omnia donamus, culpæq; ignoscimus omni.  
 7 Eia age, summe Pater, fortis quoque, pelle nocentes,  
 Pelle hostis prociul insidias tentantis iniquas:  
 8 Eripe nos inuicte malis, dignatus acerbas  
 Hinc prohibere minas, tristesq; auertere casus.

## I O A N N I S S A V R O M A N I,

Chare

**C** Hare Pater, summi residēs super æthera cœli:  
 Clare scat sanctum nomen ubique tuum.  
 Adueniānt magnum latè tua regna per orbē:  
 Nosq; regat sanctus Spiritus ipse tuus.

Fiat & in terris itidem tua ritè uoluntas:

Atque solet fieri sedibus æthercis.

Da nobis hodie potumq; cibumq; salubrem:

Erudias uerbo pectora nostra tuo.

Da ueniam, nostræ dimittens debita culpæ:

Nos siquidem facimus debita missa alijs.

Ne nos tam grauib; fereat tentatio curis;

Cogat ut his nostram succubuisse fidem.

Sed quæcunque solent nostræ contingere uitæ,

Omnibus eripias nos Pater, oro, malis.

B L A S I I F A B R I C I I.

**C** Onditor mundi; Dominusq; rerum;

Qui Pater noster cupis inuocari,

Et super cœlos moderaris imis

Omnia terris.

Quæso fac, gentes habeant honorem

Nomini sancto, quia laude dignum

Maxima, cuncti paueant, amentq;

Te Pater alme,

Spiritu sancto rege corda nostra,

Vt tuum regnum properans sequatur:

Denique ut cœlo tua sit uoluntas;

Angelique implent pia iussa spontè,

Sic

42

Sic in hac terra simili ligemur

Foedere cuncti,

4 Corpori, et nostris alimenta membris  
Poscimus, panemq; anime salubrem,  
Atque quod sanctis super alta donas  
Sidera nectar,

5 Nos quoque erramus miseri, maliq;  
Sed tua fac nos bonitate iustos:  
Omnibus rursus ueniam daturi  
Tempore quouis.

6 Utq; Getulis leo rugit aruis,  
Cum grege inuadens pauidos magistros:  
Sic tuum terret trepidum cruentus  
Hostis ouile,

7 Cuius è diro bone pastor ore  
Libera, qui te miseris querelis  
Inuocant: sic nos hilari Amen Amen  
Voce canemus.

LVD OVICI BIGI PICTORII.

**Q**uid rogo siderei potui dominator Olympi,  
In natum recipi promeruisse tuum?  
Cur seruum tanto Rex dignareris honore,  
Scrutari humana quis ratione queat?  
Cum referas te summa citi colere atria mundi,  
Innuis, ut tantum dona superna petam.  
Scilicet astrorum Dominum terrena rogarim,

Que



Quae plerunq; hominem præcipitare solent.  
 Sed qua spe, & quali coelestia fronte precari  
 Ausim, de fragili uas ego uile luto?  
 At mihi certa tamen datur hinc fiducia, cum te  
 Omnibus esse Patris confiteare loco.  
 Præcumpis igitur petimus super omnia uotis,  
 Ut tuus in cunctis semper ametur honos  
 Nam si res aliqua ipsarum bonitate creatas  
 Diligimus, poteris cui satis ipse colis?  
 Ipsa etenim bonitas, & ut optimus ipse, creasti  
 Cuncta bona, & durent in bonitate facis,  
 Ergo nihil tua respiciens opera, ut tibi nullo  
 Debita reddatur gloria sine, precor.  
 Quodq; mea intersit, me dirige, quâ tibi maior  
 Crescat honos, uel si me Styga adire uelis.  
 Nil queror, en adsum: licet id me duriter angat,  
 Quod te in tartareo carcere nullus amat.  
 Cum tamen æternum tota ui mentis in æuum,  
 Sit desiderium te coluisse meum.  
 Sic tua sese homines clementia fundat in omnes,  
 Currat & ad ueram gens aliena fidem.  
 Iamque tuum mandans regnum aduentare, flagello  
 Parce, per inuictæ signa uerenda crucis.  
 Quod si malueris pœna affecisse nocentes.  
 Quod placet, hic, supera sicut in arce, iube,  
 Nam si uno angelicæ grauius cecidere cateruæ  
 Flagitio, è summis ima sub antra polis:

Dedecet an scelerum plenos, dignosq; sub orca  
 Supplicio, hîc aliquod nos subîsse malum?  
 Perde pecus, subuerte casas, atq; obrue natos,  
 Viuâque fac scateant corpora uermiculis  
 Laudari te malo mea ob dispendia, quàm quis  
 In requie tantum murmuret esse reum,  
 4 Vt prius ergo tuos optavi gratus honores:  
 Fas ita sit nostrum dehinc cupîsse bonum  
 Non ego diuitias Cræsi, non robur Achillis  
 Poscep, Nec Aonijs corgrua plectra sonis:  
 Da precor ut liceat, qui uiuus ab æthere fulsit,  
 Perpetuo nobis tempore pane frui.  
 O' hominum tandem felicia pabula, quando est  
 Huius ab euentu nostra renata salus.  
 Cuncta prius densis fuerant immersa tenebris,  
 Optatum nobis attulit iste iubar.  
 Cùmq; suo tunc pane carens humanus obiret  
 Spiritus, æternos nunc habet inde dies.  
 Hunc mandet, uesci quicunq; salubriter optat.  
 Non secus ac animo præmeditante crucem.  
 Utq; saluari bene digerat ordine, plangat  
 Corde sui opprobrijs compatiante ducis;  
 Eius & exemplo (quod perficit omnia) uitam  
 Transigat, & lata non amat ire uia.  
 6 Quod ne delictis cunctanter agamus onusti:  
 Crimina nostra tuo sanguine CHRISTE laua.  
 Heu quoties luxu, quàm sepe cupidine fame,  
 Quam

Quam miserè læsi te pede, uoce, manu.  
 Sed quotus est dolor inde tamē meus obsecro, mecum  
 Mortis agas reCOLens premia sola tuæ.  
 Nos etiam rabidis ueniam damus hostibus: & ne,  
 Quam cupiunt, renuas ferre rogamus opem.  
 Quod reliquum est, concede simul, ne carnis amore, 6  
 Seu mundi, inceptum destituamus iter  
 A' uasfrōque rudes Erebi Ioue protege sensus, 7  
 Mēque prius, uiuam quā male, quæso, neca.

IOANNIS STIGELII.

**H**As tibi corde preces deo optime maxime fūdo.  
 Tēpore in extremo, dubio in discrimine mun-  
 Impia dū Geticū sumens in fœdera cornu (di  
 Bestia, sic ueteris stimulante furore draconis,  
 Exitium mundo molitur, & omnia turbat. (est  
 Hei quā parua manus, numerus quā paruus eorū  
 Ex animo cupiūt qui fratrem agnoscere CHRISTVM,  
 Tēque Patris coluisse loco. Sed respice Partem  
 Hanc quamcunq; tuam, tua qui sacra uerba professi,  
 Esse tui cupimus, nisi mens uiriosa repugnet.  
 Illa quidem antiquam iam pridem ab origine labem  
 Pressa trahens, oculis quædam uestigia cernit  
 Mandati ueneranda tui: sed uiribus impar,  
 Ne quicquam propria uirtute placere laborat.  
 At tu summe Deus, fons rerum & dulcis origo,  
 Mens æterna, potens, sapiens, sola omnia præstans,  
 Omnibus in rebus cuius uestigia monstrat

Autoris natura memor, qui solus & unus  
 Omnia perpetua Dominus ratione gubernas,  
 Quæ cælum, quæ terra tenet: qui conscia fati  
 Consentire iubes terrenis sidera rebus,  
 Ne casu solvatur opus: qui tempora certis  
 Distinguis uicibus, facis omnia, & omnia seruas.  
 Tu nos degeneres uultu miseratus amico,  
 A' nobis audire Pater dignaris, & orbi  
 Sponte tuum mitis fraternæ in fœdera natum,  
 Abluat ut sordes nostras, & crimina tollat,  
 Et reddat merita dulcem pro morte salutem.  
 1 Da Pater ut possim te uero agnoscere cultu,  
 Et nomen celebrare tuum, ueroq; timore  
 Te Patrem sentire Deum: da gloria sicut  
 Sancta tua est per se, sic uero semper honore  
 Luceat in nobis, tua qui nos membra fatemur.  
 Ne leuis ambitio, ne uani gloria mundi  
 Transuersos rapiat: rebus sed in omnibus uni  
 Semper honos, nomenq; tibi laudèsq; ferantur.  
 Impia corrupti cedant uestigia cultus,  
 Stultaque fictilibus fidens reuerentia diuis,  
 Et pietas omnis fucatae conscia curæ.  
 Me nutu dignare tuo, ne fortè recusem  
 Imperio parère tuo, tua iura uereri.  
 2 Perge tuum latè populis extendere regnum,  
 In quo non strepitus pomposæ splendidus aule,  
 Non aurum, non arma sonant, non quidquid inerti  
 Blan,

Blanditur mundo, fucóque arridet inani:  
 Sed colit unanimis regem concordia **CHRISTVM**  
 Propagátque pios simplex Ecclesia cultus  
 Angelicis adiuta choris. Da nescia frangi  
 Pectora, da vires animis tua dona professis,  
 Et flammis accende tuis, ut fortiter ausi  
 Vera repugnantí inculcent tua dogmata mundo.  
 Insidias prohibe Sathanae, compesce tyrannos:  
 Atq; suum turbam, turpi quæ squalida cæno  
 In gemmas ruit ecce tuas; dele omnia uite  
 Exempla impuræ, sacra cordibus instrue templa,  
 Quæ resonent **CHRISTINO** tēsque diesque triūphos.  
 Expectentq; simul rediturum, atque omnia mundi  
 Censurum scelera, et meritis noua regna daturum.

Et quoniam affectus nobis natura reliquit  
 Principiò corrupta malos, nec nostra uoluntas  
 Per se grata tibi est, semper contraria cælo,  
 Et uerbo aduersata tuo: tua sancta uoluntas  
 Nos regat, et factó primū spectetur in omni.  
 Fac nihil incipiam, nisi quod confidere possim  
 Antè tibi placitum, dignumq; fauore uideri.  
 Sint tibi sacra Deus cunctarum exordia rerum,  
 Euentusq; simul, qui primū exordia rebus  
 Principio ipse carens fecisti, atq; omnibus idem  
 Das finem, qui sine carens. Da uincere morbos  
 Hærentes animis, læse et contagia mentis.  
 Da uelut agnoscunt tua iussa, tremuntq; uerendū

Impe

Imperium unanimes, & sanctum nomen adorant,  
 Qui sociata colunt cœli commercia ciues,  
 Siue chori angelici, siue è tellure recepti:  
 Sic quoq; uos misera mundi qui ualle tenemur,  
 Spemq; animis alimus cœli, regniq; paterni,  
 In te compositi unanimes uiuamus, & uno  
 Consensu tua uerba pij, tua iussa colamus.  
 Omnibus in te sit pietas, amor omnibus idem.  
 4 Da pater hæc etiam, uitæ quorum indiget usus,  
 Demensum da cuiq; suum, quo corpus alatur,  
 Qui uolucres pascis magnum per inane uolantes:  
 Qui flores etiam decoras, & lilia campi.  
 Hei pereant, quos urget amor sceleratus habendi,  
 Quos iuuat artifici passim ditescere fraude.  
 Qui specie sua furtategunt, alijsq; rapaces  
 Inuigilant opibus, quam quas Deus omnibus offert,  
 Da uictum nos posse tuo sperare fauore  
 Officij memores, iussos præstare labores,  
 Et curam mandare tibi, tibi reddere grates.  
 Hoc etiam ex animo petimus, da libera uerbo  
 Incrementa tuo: da qui sincera professi  
 Dogmata nos doceant, rectaq; ad sidera ducant,  
 Ipse magistratus præsens tua munera serua  
 Iusticiæq; illis, ueræ & pietatis amorem  
 Inspira: placide da nobis tempora pacis,  
 Ut uigeant artet de te instrumenta docendi.  
 5 En Deus, infecti peccantis ab ubere matris,  
 Quotti-

Quotidie iustam nos te irritamus ad iram:  
 Respice nos bonitate tua, qui mitis in omnes,  
 Et solem & pluuias iustisq; malisq; ministras,  
 Nostra trahens quoties ueteris contagia culpæ  
 Deficit à recto studijs mens lapsa sinistris  
 Degeneris miscrere Deus succurre labanti.  
 Affectus compesce malos, siue ira furorem  
 Præcipitat, roditq; niger præcordia sanguis:  
 Seu dolor inuidiæ, seu nos uindicta laceßit,  
 Sine odio ardentem ferimur, seu dira libido  
 Ingenium à uero cœpta in contraria uersat:  
 Da ueniam miseris, nec noxam iure coerce.  
 Quod si ex iure manu confectum poscere mens est:  
 Nos causa cadere, & longè antè perire necesse est.  
 Ignoscas miseris, ut nos ignoscimus illis,  
 A quibus offensis nobis iniuria facta est.  
 Heinimum merita securi in tempora pœnæ,  
 Quorum sunt ueniam præcordia clausa precanti.  
 Ille suis ueniam nequicquam erroribus orat,  
 In quem sic hebetis cadit obduratio mentis.  
 Nesciat ut Læsus lædenti ignoscere culpam.  
 Hanc Deus o procul hinc dignere auerte pestem:  
 Da ueniam, danti ueniam: ne ue amplius erret,  
 Corruptæ uicium dignere extinguere mentis.  
 Ecce cateruatim nos undiq; & undiq; tentat  
 Insidijs coluber, primum non passus Adamum  
 Conditione frui, quam te donante tenebat,

Quos

Quos non ille dolos, quas non excogitat artes,  
 Vt genus humanum tenebris inuoluat, & omnem  
 Eripiat lucem miseris, & numina uerbi  
 Noticiamq; tui, quæ non incendia miscet?  
 Quas scelerum causas non inuenit? ille rapinas  
 Ille mouet, lites, pestes, homicidia, morbos,  
 Vt lupus esuriens, uentris stimulante dolore,  
 Per nemora & saltus, per flumina, iugera, rupes  
 Sæuus abit, ponitq; uago uestigia lustris,  
 Donec oues tandem pleno deprendit ouili.  
 Tum furor exacuit dentes, et duplicat iram.  
 Irruit in numerum grassator, & omnia turbat:  
 Sic (si immane licet paruo componere monstrum)  
 Spiritus immundus mille ingeniosus ad artes,  
 Mille opifex fraudum, scelerumq; magister et autor  
 In nos grassatur, tua qui mandata professi  
 Te colimus, natumq; tuum, numenq; fatemur.  
 In prædamq; inhiat: uoluit caligine mentes,  
 Seducitq; homines non hæc ad munera factos,  
 Hic uires effunde tuas, hic pectora firma:  
 Angelicas hic excubias, hic fulmina uerbi  
 Certa tui iargire Deus, quibus obruat hostem  
 In te nostra fides, & uinci nescia uirtus.  
 Non ego dura pati discrimina mille recusos,  
 Dum tua constanti tueor mandata labore,  
 Sed ne deficiam, ne sæuo uincar ab hoste,  
 Tu mihi sis præstò, tu suffice robora presso.

Demiq;



Deniq; ab aduersis nos cripe, & assere rebus 7  
 Omnibus, huius habet series quus impia mundi.  
 Nos uultu defende tuo, sed nomine hostis  
 Degener ille tui mendax, homicidaq; mentes  
 Obruit insidijs, scelerumq; in reſcia uerſat:  
 Seu nos ſollicitat pietati inimica tyrannis.  
 Ecce fremunt, & bella petunt funeſta tyranni,  
 Inuiſum quibus eſt fidei & damnabile nomen:  
 Qui faciunt turpes uera eſt pietate cothurnos,  
 Quando libet, ſoloq; colunt tua dogmata ſuco.  
 Ecce ruit, ſœdatq; tuas ſus horrida gemmas,  
 Illa infanda, procax, meretrix Babylonica, coniunx  
 Horrendi Sathanae, cui ſeptem guttura pendent,  
 Et totidem capita, he! diris ſuffuſa uenenis,  
 Monſtrum immane, ingens, pietatis lumine caſſum,  
 Quodq; ſua mundo mouet impietate ſtuporem.  
 Hei quas hoc furias ſecum trahit? omnia diro  
 Quâ uenit infeſtat uicio, labemq; nefandam  
 Euomit, infeſtum ſpirans ad ſidera uirus.  
 Tu tamen hic aliquem pateris Deus optime talem,  
 Quiq; tuo eſt populis de nato dogmata tollit,  
 Quiq; ferox animo ſanctos ſibi ſumit honores,  
 Qui tibi debentur, falſoq; ſuperbit honore?  
 Seq; ſupra reges extollit, & omnia mundi  
 Imperia, & faſtu tumidus latè omnia complet.  
 Vnanimos rupto diuellens ſœdere reges,  
 Inſpiratq; illis rabiem mortisq; furorem,

Orbis

Orbis & afflicti rabido sint ore cruorem,  
 Imperio infestus, pacis uiolator & hostis.  
 Illius insidias, fune st. m. j; illius iram,  
 Blasphemeq; dolos lingue, technasq; nocentes,  
 A nobis te iuste Deus profitentibus arce.  
 Aut sua cum tandem mors iura nouissima poscet,  
 Deulcto hoc monstro, superato dæmone & omni  
 Curarum ingluuie, da mollem in funera somnum;  
 Composito da sine mori, membrisq; solutus  
 Fac reddam patrio uitæ spiracula cælo.

## E I V S D E M.

**D**eus fator mortalium,  
 Terræ potens & siderum,  
 Qui mitis in nos asperos,  
 Grauisq; culpæ conscios;  
 Gaudes patris uocabulo,  
 Nutuq; seruas omnia.

• **Fac innotescat omnibus**

Nomen tuum mortalibus:  
 Verbi tui suauissima  
 Sic instruat nos gratia,  
 Ut te colamus unicum,  
 Sicut iubet, per Filium.

• **Accende mentes lumine,**

Tuiq; regni imagine,  
 Ut inchoent hinc auræ  
 Vitæ perennis secula,

Regno

Regno tuo nocentium

Infringe vires hostium.

**Fac nostra semper ut tuis**

Mens acquiescat legibus:

Consentiat cum cœlica

Terræna pax concordia:

Iussum ministret mens opus,

Curæ tibi sit exitus.

**Dum congregati uiuimus,**

Largire nobis quæsumus

Externa uitæ commoda,

Quibus uigent commercia:

Agnoscat ista charitas,

Agatq; uerè gratias.

**Ignosce noxam fontibus,**

Culpæq; uim dolentibus,

Delicta si nos hostibus

Non asperiri remittimus:

Da pœnitere mens queat,

Vt te iuuantem sentiat.

**Nusquam sinas nos obrui**

Draconis astu perdit,

Captos sed hostis artibus

Tuis tuere uiribus:

Fac militemus strenuè,

Et compotes uictoriæ:

**Nos adferas ab omnibus**

Cala,

*Calamitatum casibus:*

*Ducemq; mentem corporis*

*Ex mole duri carceris,*

*Cum postulabunt tempora,*

*Hinc transferas ad sidera.*

P. FRANCISCI SPINVLAE.

**R** Ex ô Deorum, numine qui in cælo regis  
Terras, & humidum genus,  
Pater piorum: omnes colant nomen tuum, &  
Sublime tollant ad polos.

2 Tu nos rege: imperata fiant hic tua,

3 Vt cæli in ampla regia:

4 Panis, quo egemus continenter hic, tuis  
Contingat à te filijs.

5 Remitte nobis omnia, ut debentibus  
Nobis & ipsi debita

6 Remittimus. labiq; ne finas ita  
Genus tuum, teterrimæ

Iniquitati ut seruidamus impiè:

Sed uindica nos à malo.

7 Qui temperas mundum potens & inclytus,  
Ad sempiterna secula.

CHRISTOPHORI SCHELLEN-  
bergij.

**O** Pater, & cælum cui regia, terra scabellum,  
Huc flecte ad natos corda paterna tuos.  
Effice,

Effice, ritè tuum nomen sancteq; colamus, 1  
 Atq; tuo nobis nil sis honore prius.  
 Tu rege nos: sceptrum Stygij confringe tyranni. 2  
 Ut regno accedat plurimà turba tuo.  
 Sic genus in terris hominum tuà iussa capeſſat 3  
 Paret ut imperio cœlica turba tuo.  
 Da nobis hodie, quæ uitæ postulat uſus: 4  
 Fac habeat panem cotidiana fames.  
 Da nostræ ueniam culpæ pœnamq; remitte: 5  
 Ut ueniam nostris nos damus usq; reis.  
 Cum sathan aggreditur tendando uiq; doloq;, 6  
 Non ui nos uinci, non sine fraudè capi,  
 Sed depelle malum, uitæq; occurre periclis 7  
 Omninus, & duris casibus affer opem,  
 Namq; tuum est regnum, totoq; potentia mundo  
 Amplior, & finem non habiturus honor.

STEPHANI SCHONFELDI.

**N**oster Pater cœlos regens, 1  
 Esto tuum nomen sacrum. 2  
 Adueniat & regnum tuum, 3  
 Tibi pareant terræ, & poli, 4  
 Omni die nos nutrias. 5  
 Ignosce & ignoscentibus. 6  
 Nectentet hostis debiles: 7  
 Sed libera nos á malo.

c. Regnum

Regnum, potentia, gloria  
 Quæ competunt soli Deo,  
 Vt maximo, sic Optimo,  
 Per cuncta durant secula.

NICOLAI SELNECCERI.

- O** Domine, ô æterne Deus, regnator Olympi,  
 Quem colimus patrem, qui nos tua pignora  
 seruas,  
 1 Nomen ubiq; tuum uero celebretur honore.  
 2 Viuificumq; tuum ueniat, Deus optime, regnum,  
 Fine carens, cœleste, potens, plenumq; salutis.  
 3 In terris fiat tua magna & sancta uoluntas,  
 Angelici sicut parent ad iussa ministri,  
 Et quicumq; colunt cœli commercia ciues.  
 4 Da Pater ipsæ tuum panem, tua munera, caule:  
 Vt grex demenso, quod uita requirit, alatur.  
 5 In primis, Deus ô clemens, Pater optime, nobis  
 Da ueniam: miserere Deus, peccata remitte  
 Dentibus & ueniam, & facile ignoscentibus omni,  
 A quo facta fuit nobis iniuria crebro.  
 Ignoscas rursus, miseris succurre, furorem  
 Siste Pater, ueteris dele contagia culpæ,  
 6 Nec merito noxam patratam iure coerce.  
 Tu quoq; iuste Pater sis præstô, robora pressis  
 Suffice, ne rabido forsan tentemur ab hoste,  
 Qui multis sumus antè malis hinc inde redacti,  
 Et miseri satis in nobis & carne uidemur.

Deniq;

Deniq; ab aduersis clemens nos eripe rebus  
 Omnibus, atq; tuo miseros defendido uultu.  
 O Pater ô uirtute potens, Rex maxime regum.

ANDREAE ELLINGERI.

**S**umme parens noster, qui maiestate uerenda  
 Incolis ætherei celsa theatra poli.  
 Nomina lati uago tua sanctificentur in orbe,  
 Adueniât regni dona beata tui.  
 Vt tua Stelligero semper fit in axe uoluntas,  
 In terris itidem fiat ut ille precor.  
 Pasce cibo fragiles moribundi corporis artus,  
 Atq; saluari dogmate pactus ale.  
 Debita condones nobis, donantibus ultro  
 Debita terrigenis non soluenda uiris.  
 Nec sine sollicitam uexet tendatio mentem,  
 Que solet à uera ducere corda fide.  
 Eripe nos uindex sed ab omni labe malorum,  
 Dæmonis insidias frange benigne Pater.  
 Te penes est rerum quoniam suprema potestas,  
 Imperium, uirtus, gloria, laus et honor.

MARTINI RALBACHII.

**S**ancte Parens, natus preciosa morte redemit  
 Quos; cœli exaudi mitis ab arce tui.  
 Nominis immensum didatur clara per orbem  
 Sanctaq; fama tui, te colat omnis honor.

c 2 Vt

- 2 Vt se sibi iungant sub regni sceptrā beati,  
 Spiritus illustret pectora nostra sacer.  
 3 Grata tibi fiunt ut in ætheris æde suprema,  
 Humanum faciat sic tua iussa genus.  
 4 Quotidiana tuis procura alimenta ministris,  
 Fœcundas dulci pace perennet ager.  
 5 Ipse Pater facilis ueluti es, ueniaq; paratus,  
 Sic quoque nos simus turba benigna alijs.  
 6 Tu nobis adsis, ne nos malus auferat error,  
 Hostis & addictos sub sua iura trahat.  
 7 Casibus aduersis nos omnibus eripe, leta  
 Nostraq; finito tristia morte ma'la,  
 Sic tua maiestas, sic magna potentia finem  
 Nesciat, & celebris continuetur honor.

#### AD AMI SIBERI.

- 1 **O** Summe, qui cœli incolis domum Pater,  
 Nomen locis celebretur omnibus tuum.  
 2 Regnum tuum adueniat: Velut cœlo solet  
 3 Fieri, uoluntas fiat in terris tua,  
 4 Præbe cibum fragili benignus corpori.  
 5 Bonus remitte nostra nobis debita,  
 Vt quisq; fratri sua remittimus: Sine  
 Nec ab hoste tentari, cruorem qui sitit  
 Nostrum: sed à malo tuere. nam tuum  
 Regnum Pater, tua maxima est potentia,  
 Et ab omni in omnem æternitatem gloria.

EXPLI-



EXPLICATIVNCULA  
Eiusdem.

**P**ater uocari maximus gaudet DEVS,  
Et optimus: nos ergo fratres: maximi  
Nati Patris, patris optimi: indulgentius  
Nil est Parente, dulcius nil liberis.  
Quid, ipse quod rogare CHRISTVS nos iubet  
Patrem, precitq; uerba nobis? feruida  
Spe, non satis putemur ut digni, tamen  
Rogemus: in CHRISTI preces quas nomine  
Fraterna fundit uox ab imo pectore,  
Fieri nequit quin filiorum præpotens  
Deus pater suo secundet nomine,

Ergo poli terræq; magne conditor.

CHRISTVM q; propter, noster ô sanctissime  
Parens, tuum quod nomen augustissimum est,  
Colatur & nos inter ut castè ac piè:  
A' labe nobis falsitatis adsere  
Verbum tuum, cuius sit antiquissima  
Dacura nobis: eripe errorem, quibus  
Obiectus est aliquis: pijsq; moribus  
Fac congruens ut nomini sancto omnium  
Sit uita. nam qui non docet uerbum tuum,  
Nec Christiane uiuere, officii sui  
Munus colens, studet, prophanat impius  
Nomen DEI: scelus quod auertas Pater.

2     Sceptrum tui fauoris & clementiæ  
 Terræ plagas in ultimas se porrigat,  
 CHRISTI que gentes nomen ignotæ audiant.  
 Refulgeat nobis tui lux spiritus,  
 Splendore quæ dispellat atras mentium  
 Suo tenebras, ut fidem uerbo tuo  
 Habeamus: omni dirigamus tempore  
 Et sensa cordis, dicta, fictaq; ad tuam.  
 Tuiq; nati gloriam, atque Spiritus  
 Sanctissimi: hostis reprime fraudes & dolos,  
 Ne det tuæ damnum malum ue Ecclesiæ.

3     Dei regentis cuncta nullo non loco  
 Fit sponte præpotens uoluntas: numini  
 Ecquis tuo resistat? omnibus furor  
 At ut repressis, quibus tuum conatibus  
 Nomen profanum reddere, & regnum impius  
 Exterminare nititur, fiant tibi  
 Nos inter etiam quæ probentur, ut polo  
 Fiunt in ipso, da Genitor da maxime  
 Robur animi contra hostis & petulantiam:  
 Illicia mundi, quæ sui non est potens  
 Cannis licentiamq; serua & ad ultimum  
 Verbo fideq; spiritum firmos: tua  
 Nam sic benigna sit uoluntas ô Pater.

4     Panem manu Creator alme sufficis  
 Nullo die non omnibus, etiam malis.  
 At tu cibum, potumq; uestis, ædium

Lares

Lares & agros, iugentium greges,  
 Domum bona in partem iuuat quæ coniugem,  
 Obedientes liberos, seruos probos,  
 Dominos bonos suorum amantes principes,  
 Respublicas bene constituas, tempora  
 Pacis quietas, frugibus sementibus  
 Auctos suos, auras salubres, legibus  
 Mores, scholas, & disciplinam congruant.  
 Nomen bonum, fidos amicos, candidam  
 Viciniam, quæ das tui esse fac Pater  
 Beneficij munus sciamus, liberi  
 Curis, auaritiæq; spinis: & tibi  
 Illis fruantes toto agamus pectore  
 Grates benignitate pro largissima.

Criminibus heu contaminamur singulis  
 Diebus, indigni tuis donis, nihil  
 Meremur & poenam nisi: uerum Pater  
 Clemens, benigne, misericors, facilis Pater,  
 Non ambules in ius tuis cum seruulis,  
 Innoxium nati tui sed sanguinem  
 Ad nos serena fronte propter aspice:  
 Contemptam habe nec inquinatum precem,  
 Acerbius nec debita exigas: tuo  
 Lesere nos qui munere, ueniam dabit,  
 Facietq; pietas nostra sic bene omnibus.

Nemo Pater tentatur à te, sed tamen  
 Relinque ne nos Domine nobis: proijce

Nec in hosticis aggressionibus, uiam  
 Affectat ad nos, hinc & inde insultibus  
 Dum callidis autor malorum, pondere  
 Graui caro dum uergit in lapsus, suis  
 Astutijsq; mundus in fraudem illicit,  
 Rebus fide ne deijci in malis, pedem  
 Nec patere cæcum, quæ ualeat, ferri: improbis  
 Ab hostibus tentatio aut si qua ingruit,  
 Ne nostra cedat turbini imbecillitas,  
 Da forte pactus, da Deus uictoriam.

Periculorum plena uita, fluctibus  
 Et hinc & inde tundimur discriminum:  
 At statue grauib; Genitor ærumnis modum,  
 Ab asperis & dextra nos cripe  
 Animæq; forti, corporisq; uenerit  
 Et cum dies uitæ suprema, turbida  
 E' ualle mortis, & beatas cœlitum  
 Migrabimus ad oras, solutas nexibus,  
 Et expeditas ponderosi corporis,  
 Reconde animulas in sinu nostras tuo.

Gratas supreme filium propter tuum  
 Pater, tibi iussu preces fusas tuo  
 Et esse, cis tribuere & additum credimus:  
 Quare ad tuum uerbum precata, nomine  
 Et in tuo ratum adijcit Fides Amen.

DECA.

# DECALOGVS,

SEV SVMMAPRAECEPTO-  
rum Dei, Exodi x x.

& Deut. v.

IOANNIS SAVROMANI.



On aliena tuis uenerabere numina 1  
uotis

Sume Deiꝑ; tui uanos nec nomen in 2  
usus.

Septima sacra coles, opera feriatuꝝ 3

ab omni.

Semper honore tuos merito reuerere parentes, 4

Non hominem quenquam crudeli more nec abis. 5

Alterius caueas lectum temerare iugalem. 6

Non furtum facies, digitos cohibebis ab illo. 7

Testi: es accitus, nihil attestabere falso. 8

Nullius affectes spaciosum tecta per orbem: 9

Alterius nuptam, seruum, famulos, & asellos. 10

GEORGII FABRICII,

**N**E diuinum alijs tribuas ingratus honorem, 1

Me solum metuas, me uerare Deum.

Me quoq; blasphemis dictis offendere noli, 2

Sed merito celebra nomen honore meum.

Dogmata sancta pio studio complectere, sitq; 3

Septima lux operi dedita tota sacro.

Deuinci obsequio, qui te degenuere parentes: 4

c

5

Quem

- Quem tribues illis, est quoque noster honor,  
 Iratus nulli iugulum mucrone resolve,  
 Nec fuso sæuam tinge cruore manum.  
 Alterius thalamos horre uiolare mariti,  
 Ne uel oculis placeat forma pudica tuis.  
 Non facies furtum: sed eris contentus iisdem,  
 Quæ tibi non digno dat mea larga manus,  
 Tum de fratre tuo mendacia nulla loquere,  
 Iudice nec coram testis iniquus eris,  
 Nunquam te perducatur amor sceleratus habendi,  
 Ut cupias propriam fratris habere domum.  
 Neu domino famulas, neu fidos abstrahes seruos,  
 Ne uel alij partis insidiare bonis.

## MEDITATIO

eiusdem.

G. FABRICII,

- Immense Deus, populi seruator Hebræi,  
 Tum furor incensus cum Pharaonis erat;  
 Per medios populū deducens fortiter hostes,  
 Præbebat siccas cui maris unda uias.  
 Deus, exagitans ingenti crimina poena,  
 Audax cum sequitur facta paterna nepos,  
 Idem æterna homini persoluens præmia iusto,  
 Illius inq; beans secula mille genus:  
 Te præter uenerer nil, seu quod terra fretumq;  
 Seu quod habent superis lucida signa plagis.

Sit

Sis mihi sole Deus, solius numen adorem,  
 Te metuam. & toto pectore semper amem.  
 In te uno sperem, tibi me mea q; omnia credam,  
 Inq; tuis ponam pinguia thura focis.  
 Improbam contemnam ueterum mendacia uatum,  
 Quosq; error fecit credulus esse deos.  
 Non tribuam iussos illis insanus honores,  
 Nec flectam timidum corde pauente genu.  
 Perfidiae magicas non uertar plenus ad artes.  
 Aut rerum indicia, aut temporis ulla notem.  
 Vsurpem sanctos diuinum nomen ad usus:  
 Pectora quem sapiunt, uox sonet, ora colant,  
 Te celebrem, ut multa charum pietate parentem,  
 Quem colo non falsa religione Deum.  
 Te quoque confitear uiteq; necisq; potentem,  
 Et tua non ullo iussa uetande sequar.  
 Sit mihi dulce pati propter tua nomina sancta,  
 Et pro lege tua sit mihi dulce mori.  
 Non uiolem externo sanctissima sabbatha cultu,  
 Nec uesti uideant acta prophana dies.  
 Luce sacra requiescat ager, ponatur aratrum,  
 Et Dominus seruo triste remittat opus.  
 In tua conueniam laudes tibi dicere templa,  
 Verbaq; mandati discere sancta tui.  
 Exemplo anteferam reliquis quasi lumen honesto,  
 Defendamq; tui membra relictæ gregis.  
 Sim pia cura bonis doctoribus, adiuuem & ipsos,

Qua uolo, qua ue mihi parte iuuare datur.  
 Hos motus nostris accensos cordibus auge,  
 Inuocet ut uerum linguaq; mensq; Deum.  
 Vt maneat constans ac firma professio nostra,  
 Et sit mandatis consona uita tuis.  
 Ac benefacta Dci postquam sunt cognita nobis,  
 Luceat ardenti nostra in amore fides.  
 Vt pax seruetur multorum in mentibus una,  
 Atque ut ciuile sit sine labe status.  
 4 Sim gratus, meritoq; colam pietatis honore,  
 Quis das magnifica sceptrum tenenda manu.  
 " Namq; magistratus, pater est quasi publicus, omnis:  
 " Atque uicem summi sustinet ipse Dci.  
 Tum uenerer, charos qui me genuere parentes,  
 Custodes uitæ quiq; fuere meæ.  
 Illis sim præsto tarda ueniente senecta,  
 Infirmisq; leuem grande laboris onus.  
 Sic mea promissis candescent tempora canis:  
 Sic memorem pueris secula uetusta senex.  
 § Non odio flagrem, nulli sim causa doloris,  
 Non subita illatum uindictæ ira malum.  
 Non dictis famam, non lædam uulnere corpus  
 Alterius, litis semina nulla seram.  
 Non fera bella sequar, non unq; arma impia sumam,  
 Vt possim uacuas cædis habere manus.  
 Non perdam corpus somno, dapibusq; meroq;  
 In quibus luxuriæ fomes inesse solet.

Nec



Nec mea non licitis flagrent præcordia flammis, 6  
 Suffiretq; uagos bruta libido thoros.  
 Non oculi peccent, non labrica lingua, manusq;  
 Ne uiolem templum pectoris ipse mei,  
 Coniugium felix, et sint sine crimine nati,  
 Castaq; legitimus corpora iungat amor.  
 Non alios spoliem grassantum more latronum, 7  
 Nec tacite infamis nomina furis amem.  
 Sacrilegos ausus fugiam, templiq; rapinas,  
 Inq; usus uertam rite parata bonos.  
 Execrer usuras, nec abutar pondere iusto,  
 Prodigæ nec nimium sit, nec auaræ manus.  
 In mihi commissio non cesset munere tardus:  
 Neue apium fucus roscida mella legam  
 Non uallam innocuum mentito iure clientem, 8  
 Nec testis mendax crimina ficta loquar.  
 Quid prodest liuor, quid seu calumnia? tandem  
 Quæ latuere diu proferet una dies. 9  
 Recta etiam doceam, uentosa nec efferrat aura,  
 Nec sermo ancipiti sub dolus ore fluat.  
 Non faucæ ingenijs petulantibus: omne proteruum  
 Et fallax, curæ mando Sophista tuæ.  
 Ac tetrico simulans incedat hypocrisis ore,  
 Pectora nostra probis stent ad aperta uiris.  
 Non inuadam alias ædes possessoriniquus,  
 Nec trahat alterius cæca cupido boni.  
 Non ultra saliam concessum limitem auarus,

Nec

Nec pellam patria pignoua parua domo.  
 Sit sua cuiq; domus, sit tuus terminus agri,  
 Et per me saluas quisq; reponat opes.  
 Contentusq; meo, traducam tempora uite,  
 Vt tēgat in modico tuta senecta lare.  
 10 Non aliena petam connubia fraude, doloūe,  
 Non ancilla mea sit peregrina domo.  
 Quisq; suos per me famulos, iumenta q; seruet;  
 Pondiferumq; asinum, ruricolamq; bouem;  
 Utq; in me cesset uetita & corrupta cupido,  
 Atq; nocendi alijs perniciosus amor:  
 Tu pater ex imo radicem uelle malorum  
 Pectore, que lapsu est fixa potenter Ade.  
 Terra ferant nostri ne quando absinthia campi,  
 Neue rubo, & spinis turpis abundet ager:  
 Nulla animum impietas uitiet, lasciuiia corpus,  
 Irati ut fugiam uindictis ora Dei.

# NICOLAI SELNECCERI.

Vm Deus omnipotēs, qui primū exordia reb;  
 Prima dedi, Deus eternus, suprema potestas  
 Solus ha & ud alijs concedens nomen honoris  
 Diuini, mihi quod soli debetur, & uni.  
 1 Audi mortalis, soli seruire studebis  
 Tu mihi, non alijs: tu me cole, meq; celebra,  
 Im me confidas: mihi te, tuaq; omnia creda,  
 Non tribuas iussos falsis insanus honores

Nami-

Muminibus: sed ne solum, me semper adorā.  
 Nam tuus ipse Deus tibi sum, seruator & autor,  
 Sum Pater & Dominus uera pietate colendus.  
 Tu nè fortè meum frustra tibi sumito nomen,  
 Lingua nec id temerè uano tua proferat usu:  
 Quod semper fuit, est & erit super omnia summum.  
 Quæ uolo, ne uioles externo sabbatha cultu:  
 Sintq; manus puræ, sed mens sit purior illis:  
 Lux ea sacra mihi est, hanc puro pectore serua.  
 Præcipuè si uis felicem degere uitam,  
 Fortunaq; bona quoties cupis esse beatns,  
 Victurus multos annos & secula mille,  
 Fac uereare tuos, qui te genuère, parentes:  
 Et caue, ne meritos demas incautus honores.  
 Vt quoq; quando tibi nascentur pignora, patrem  
 Te uenerentur, ament, uero dignentur amore,  
 Non odio flagres, nulli sis caussa doloris:  
 Nec facies cædem, Deus est iustissimus ultor.  
 Sit tibi coniugium castum, uiolare cubile  
 Alterius caueas, & spurcas excute flammæ,  
 Non facias furtum, contentus uiuito rebus  
 Quas tibi cœlestis tribuit clementia Patris.  
 Decipias nunquam mentito iure clientem:  
 Si fies testis, nil attestabere ficti:  
 Sit procul omne nefas, liuor, mendacîa, fraudes.  
 Linga placet, quæ uera refert, nec fingit iniqua  
 Verba nociua reo, damnumq; ferentia fratri.

Non

- 9 *Nan aliena petas conubie fraudibus ullis  
 Aspiciens oculis thalamum flagrantibus æstu,  
 Et pleno insidijs animo iuueniliter ardens.*
- 10 *Appete nil quidquam, quod summi gratia Patriis  
 Magna tuo tribuit ciui: dedit omnibus ille  
 Quantum sufficiat, breuis & quod uita requirat.  
 Non agros, non tecta, boues, iumenta, ministros,  
 Ancillas uic petas. nam certè est prima malorum  
 Causa cupido nocens, & amor sceleratus habendi.*

CHRISTOPHORI SCHEL-  
 lenbergij.

- 1 *O* *Mnia solus ego feci Deus, omnia seruo:*
- 2 *Me cole solum, alios nec tibi finge deos.*
- 3 *Ad res diuino nec abutere nomine uanas.*
- 4 *Quæ sacra, quas ferias impero, ritè colas.*
- 5 *Et patrem & matrem sanctè ueneratus honora.*
- 6 *In seſto nullum pectore dede neci.*
- 7 *Non uioles thalamos alienæ uxoris adulter:*
- 8 *Et bona nullius diripe, furta caue.*
- 9 *Perfide iuratus fugias mendacia testis,*
- 10 *Sit tibi uicinæ nulla cupido domus,*
- 10 *Nec captes nuptam, seruos, famulas uic fideles,  
 Aut pecus, aut quicquid possidet alter opum.*

EIVSDEM.

*V* *Ni fide Deo, Fuge nominis eius abusum.*  
*Sabbatha sancta habeas. Tibi sint in honore*  
*Ne sis pcussor, mæchus, fur, testis inanis. (parentes.*  
*Non*

Non ades, nuptiam, seruum, famulam, aut pecus, aut  
Vicini cupias, proprijs contentus, habere: (rem

ANDREAE ELLINGERI.

Iuos non alios colas, sed uni  
**D** Confidas super astra prepotenti. 1  
Nec sanctum Domini Dei & uerendum  
In uanos adhibeto nomen usus, 2  
Curis sabbatha liber à profanis,  
Cultu sanctifices Deo placentē. 3  
Dilectos uenerabere & parentes,  
Longæua cupiens frui senectâ. 4  
Nec cuiquam iugulum ferire ferro  
Ausis, æde manum & cor abstineto. 5  
Mon mox habere iura nec scelestus  
Frangas legitimi thori sacrata. 6  
Nec cordi tibi sint nefanda lucra,  
Impostura, dolus, rapina, furtum. 7  
Contra nil malè proximi salutem  
Testis falsidico loquaris ore. 8  
Vicini neque tecta concupiscas,  
Curæ sit uigilanter hæc tueri. 9  
Vxorem, famulos, boues, asellos,  
Quicquid possidet hic, cupisse noli. 10  
Zelotes ego sum Deus, seucre  
Qui delicta parentum ad usq; seros  
Pænis expio tristibus nepotes,

f Qui

Qui parère negant mihi momenti.  
 Cantrà qui bonus esse consueui  
 Mille in secula, diligentibus me,  
 Legis iussa meæ probantibusq;.

MARTINI SALBACHII.

- 1 **S** Vin tuus ipse Deus, mihi mens tua dedita soli  
 Scruiat, externos nesciat illa Deos.  
 Non mea blasphemis uiolabis uomina uerbis,  
 2 Non magicis addas thurea grana focis.  
 Luce sacra, rebus sanctis operare, Deoq;,  
 3 Numinis ad summi dirige cuncta decus.  
 4 Obserua dulces, qui te genuère, parentes,  
 Ut numeres uitæ secula longa, tuæ.  
 5 Vindictæ studio spaciosum tempus in iram  
 Non dabis: innocuas cedis habeto manus.  
 6 Non sis incestus, nullius tende cubili  
 Retia, legitimus sit sine felle torus.  
 7 Re quid subducas furto, nec inertia taret  
 Te pigra, contentus uiuito sorte tua.  
 8 Sit tibi sancta fides cordi, respectus et æqui,  
 Conciliet nulli garrula lingua malum.  
 6 Non inhies domui, quam frater possidet æquo  
 10 Iure, illi coniunx tuta sit, atq; pecus,

ADAMI SIBERI.

- 1 **E** Go Deus: aliena numina ne colas:  
 2 Caue inauspiter adhibeas Dei nomen: uacans

Soli

Soli Deo, quiesce luce septima:  
 Honorem habe, ut uiuas diu, parentibus:  
 Non auferas uitam alteri: non seruicens  
 Lasciuie, marita frange fœdera.  
 Afferre proximi bonis manum fuge.  
 Ne ficta mendax loquere testis crimina:  
 Non concupisces proximi domum tui:  
 Non concupisces coniugem, non seruulos,  
 Asinum, bouem, nec quicquid ille possidet.

3  
4  
5  
6  
7  
8  
9  
10

EXPLICATIVNCULA EIVSDEM.

**H**Acc cœlitus per filium Amrami Drus,  
 Manu notata duplici saxo sua  
 Decreta legum maximus nobis dedit  
 Et optimus, Sionio olim uertice.

Non ullum erit numen, mecum præter, tibi:  
 Me solum amabis, seruies soli mihi:  
 Me spem tuam, tuam uocabis gloriam,  
 In dextra mea reponens omnia.

Nam Dominus & Deus tuus sum, qui parem  
 Non ferre possum, sed parentum persequor  
 In liberis culpam: utor at clementia  
 In stirpem amantium mei millesimam

Vti profanè nomine metuas Dei:  
 Me laudibus fer, me celebra: nil bonum,  
 Nil esse rectum dixeris, quàm maximi  
 Quod lingua loquitur, & facit manus Dei;  
 Sit Sabbathi Dies tibi sanctissima,

f 2 Totum

Totum meo te dede uerbo, ab omnibus  
Cessa tuis rebusq; & actionibus,  
In te suas ut explicet uires Deus.

Post me loco secundo, honore quo decet  
Patremq; matremq; & magistros affice,  
Quibus potestas est & in te: Sic eris  
Felix ab omni parte, uiues & diu.

Ne cæde polluas manus, iræ dolor  
Oblitteretur seruidas uoces rege,  
Iniurias patientia obteras, tuo  
Promptus subire proximi periculum.

Amore cæsto coniugi obstrictus tuæ  
Cale, nec ullam mente pellicem foue:  
Stude pudori temperantiam cole:  
Obscæna uita uerba, factaq; improba.

In rem tuam ne aliena conuertas, tui  
Sudore cum uultus tibi uictum para,  
Sis liberalis & benignus in bonos  
Iuxta malosq; Patrem inimitatus cœlitum.

Testare uera, contine à mendacijs  
Linguam, calumnijsq; honori proximi  
Serui: tueri cuius & famam stude,  
Interpretari et in optimam partem omnia.

Non aræ, non te cupido coniugis,  
Vilius aut capiat rei quæ proximi est:  
Auerte quæ possint nocere: & ei omnia,  
Tibi ipse quod facis, precare prospera.

Decreta



*Hæc præstet ipse maximus CHRISTVS Dei,  
Qui factus est noster sequester, filius:  
Iram merentur facta nostra numinis,  
Nil & agimus homines, agamus ut omnia.*

P T I S M O. M A T T H A E I

& Marci ultimo.

IVVENC I HISPANI.

**I**n celo & terris genitor mihi cuncta subegit.  
Me Pater est uobis dignatus mittere lucem:  
Gentibus baud aliter nunc uos ego mittere cunctis  
Institui: uestrum est cunctas mihi iungere gentes.  
Pergite, & ablutos homines purgantibus undis  
Nomine sub sancto Patris Natique lauate,  
Viuisque pariter currant spiramina flatus.  
Ablutisque debinc nostra insinuate docentes  
Præcepta, ut uitam possint agitare perennem  
Nec uobis unquam nostri præsentia deerit,  
Donec consumens dissoluat secula finis.

IOANNIS SAVROMANI.

**C**HRISTVS ad aetheras cum fellet scandere  
Dixit discipulis talia uerba suis. (sedes  
f 3 Ite

Ite per extremas, ô uos mea uiscera, gentes,  
Cunctos doctrinam ritè docete meam.

Inq; Patris, Natiq; et Flatus nomine sancti,  
Mortales undis sponte lauate sacris.

Non qui crediderit, lotusq; erit amne salubri,  
Hunc bona perpetuò uita salusq; beant.

Qui sine saluifica fuerit pietate, fideq;,

Hunc bona destituet uita, salusq; simul.

GEORGII AEMYLI,

Ite per imensum, quacunq; habitabilis, orbem:  
Atq; Euangelium gentes efferte per omnes,

Quas Deus, ut mundū possent habitare, creauit;

Quisquis crediderit, sacraq; lauabitur unda,

Hunc æterna salus et cœlica uita manebit.

Verum crediderit qui non, damnatus ad orcum,

Perferet æterni stimulos flammæq; doloris.

GEORGII FABRICII,

I N cœlis, terraq; mihi data summa potestas,

Natus ab æterno hæc munera Patre sero:

Ite, docete meo cunctas in nomine gentes,

Quas ingens uasti circulus orbis obit.

Imperioq; Dei totum submitte mundum,

Atq; Euangelij luce præite mei.

Quosq; iuuat uestris placidas dare uocibus aures,

Saluifica uiui tingite fontis aqua.

In Patris, inq; meo, sanctiq; in nomine Flatus,

Fœderis.

Fœderis accipiant mollia uincla noui.  
 Inde mei discant mandata capeffere uerbi,  
 Et uerum tota mente timere Deum.  
 Ite, nec este unquam pauida formidine segnes:  
 Prouehet inceptas aura secunda uias  
 Donec erit tellus, & culti machina mundi,  
 Ipse meo presens numine semper ero.

## MEDITATIO

Eiusdem.

**Q**uas tibi pro meritis grates, quæ carmina  
 pangam,  
 Summe Deus, uitæ duxq; Paterq; meæ?  
 Qui me materni tractum de carcere uentris,  
 In lucem, inq; tuum suscipis alme gregem.  
 Te mihi, cum iussis purgarer sordidus undis,  
 Non piguit tenero supposuisse manum.  
 Et tuus ipse suo me lauit sanguine Natus,  
 Participem magnæ fecit & esse necis.  
 Tum maculas sanctus deterfit pectoris omnes  
 Spiritus, in solido uiuificatq; modo.  
 Est illo uerè patefactum tempore cœlum,  
 Nominaq; in uitæ parua relata librum.  
 In tua iuraui Deus ô Pater optime uerba,  
 Iam pars militiæ quantulacunq; tuæ.  
 Non Abrahamæo ritu data corpore gesto  
 Signa, sed æternis pectora scripta notis.  
 Quæ facer obsignans CHRISTI cū sanguine Flatus

f

4

Sæpe

Sæpe suæ fidei nos mouet igne data.  
 Ira Dei cessit: Pater est nunc qui fuit hostis,  
 Nec uult delicti plus meminisse mei.  
 Hæc animo ut memorem noctesq; diesq; fidei,  
 Effice cum Nato tu Pater alme pio:  
 Daq; mihi sancti cœlestem flaminis auram.  
 Fœderis æternum iura tenere tui,  
 Aegypti ne me ditissima regna morentur,  
 Melliti repetam lactea rura soli:  
 Vt frangam carnisq; moras, mundi; furor:  
 Ne peream in tumido cum Pharaone mari.

CHRISTOPHORI SCHEL-  
lenbergij.

**C**V'm nostrâ Christus rē morte, suoq; triūpha  
 Et Deus ex uerus restituisse homo,  
 Fecissetq; patri satis, humanæq; salutis  
 Per numeros omnes absoluisse opus:  
 Suprema undenos affatus uoce ministros,  
 Et firmans animos ultima iussa dedit:  
 In cœlo terraq; data est mihi plena potestas,  
 Sum rerum Dominus: quidquid ubiq;, meum est.  
 Vos agite infractis animis lectissima turba  
 Este, fide freti pollicitisq; meis.  
 Ipse adero præsens uobis ubicunq; locorum,  
 Vobiscum ad finem temporis huius ero.  
 Vos terra atque mari peragratis finibus orbis,

Omni.

Omnigenas gentes sacra docete me;  
 Atq; bona curare fide mandata monete,  
 Legatis nobis quæ referenda dedi:  
 Ut mihi se credant, & me saluentur in uno,  
 Hec Euangelij summa sit una mei:  
 Tum Patris & Nati, & sacrati in nomine Flatus  
 Credentem turbam fonte regate sacro.  
 Scilicet ut capiant, abluti sordē uetusta,  
 Mundiciem ante Deum, iusticiamq; nouam.  
 Sic quemcunq; fides uera, & sæcer imbuct amnis,  
 Iustus & æterno tempore saluus erit.  
 At non credentem, nec tinctum fonte salutis,  
 Damnatum Christo iudice pœna manet.

NICOLAI SELNECCERI.

**I**Te, docete homines sincero pectore, uerbo  
 Implete immensum totius orbis opus.  
 Ite docet rudes, nobis adducite gentes:  
 Dicite, prostrato nunc scelus hoste iacet.  
 Cuncta remissa cadunt uobis peccata, uicissim  
 Donatur CHRISTI sanguine parta salus.  
 Credite constanter, resipiscite, querite rectum,  
 Corrigat & uitæ crimina quisq; suæ.  
 Quisquis crediderit, quisquis baptisma salubre;  
 Ceperit, ille meo sanguine saluus erit:  
 Qui non crediderit, detractæ culpa salutis  
 Ipse est, & uiræ munus habere nequit.

f s ANDRE-

## ANDREAE ELLINGERI.

**S**ansurus liquidum CHRISTVS ad æthera,  
 Dat mandata suis talia fratribus:  
 Dilecti iubeo uadere uos uiri  
 Extremi populos orbis ad asperos.  
 Cunctis saluificum tradite gentibus  
 Verbum, quod docui pectore uos pio:  
 Conuersasq; sacro mergite flumine,  
 In sanctæ Triadis nomine mystico.  
 Quisquis crediderit, quisquis erit sacri  
 Baptismi liquidis fontibus obrutus,  
 Saluus fiet, & æterna beator  
 Post mortem incipiet uiuere secula.  
 Sed cuius fidei pectus inane erit,  
 Qui cœlestæ Dei dogma uel impiè  
 Contemnit, Stygia tormina dæmonis,  
 Damnatus rutilo sentiet in lacu.

## MARTINI SALBACHII.

**A**ethereas complet mea magna potentia sedes.  
 Telluremq; mea sub ditione premo:  
 Ite igitur, toto sparsim mortalibus orbe  
 Diuisis, famamificate meam.  
 Et Patris nomen, Natiq; & Flammis almi  
 Diuinum edoctos, tingite fonte sacro.  
 Qui mihi crediderit, sacraq; lauabitur unda,  
 Acternæ mecum tempora pacis aget.

Qui

91

Qui uerò rigidas nostris sermonibus aures  
Afferret, in Stygias præcipitabit aquas.

A D A M I S I B E R I.

**S**oli data est mihi potestas à Patre.  
Tellure quis cœloq; sunt rerum omnium:  
Ergo ite in omnes, quæ patent, mundi plagas,  
Euangelij perferite cunctis nuncium,  
In nomine Patris, Filij, atque Spiritus  
Sancti lauantes, ut renatae parcant  
Gentes, meis obtemperentq; legibus,  
Quicumq; credet, & sacri lauabitur  
In fontis unda, uiuet omni tempore  
Beatus: at quicumq; non credet, dabit  
Apud inferos in igne pœnas perpeti.

E X P L I C A T I V N C V L A

Eiusdem.

**I**N amme stat Iordanis ipse maximi.  
Proles Dei CHRISTVS beata, tingitur  
Et à Ioanne. uox Patris cœlo sonat:  
Amor meus, meumq; Natus gaudium  
Hic est: columbæ instar polo super caput  
Loti sacer uenit sacratum Spiritus.  
Iubet inde CHRISTVS, undecim uiri lauent,  
Ex omnibus quascunq; gentibus pudet,  
Piget & suorum criminum, in Patris sui,  
Suoq; sancti Spiritusq; nomine.

Non

Non ergo homo, sed ipse tingit nos Deus  
 Paterq; Filiusq; sacer & Spiritus,  
 Presens suo uerbo, suoq; numine:  
 Baptismus est nec unda sola, sed Dei  
 Circum unda sacro scripta iussu, cui fidem  
 Quicumq; habet, iam liber à tyrannide  
 Mortis, Erebi regis potentia, omnibus  
 Piaculis, beatus, innocens, Deo  
 Charusq; CHRISTI sanguine ablatu, polo  
 Transcriptus, alma Spiritusq; gratia  
 Perfusus, in spe uiuit eterni boni.

Vndam uidet oculus, sed ipsa uim fides  
 CHRISTI cruoris cernit, & sese Deo,  
 Que grata uita sit, renasci perspicit.  
 Cum CHRISTO enim tumulamur ad mortem sacri  
 Vnda lauacri, ut CHRISTVS ipsa à mortuis  
 Ad quem modum summi Patris per gloriam  
 Surrexit, in nouitate uitæ sic uiam  
 Voremus hinc ad sancta coeli gaudia.

PESA-



93  
DE SACRO SANCTA

COENA DOMINI, MAT-  
thæi 26. Marci 14. Lucæ 22.

& 2. Cor. 11.

IUVVENCII HISPANI,

—Hæc ubi dicta,

Diuisum panem tradit : sancteq; precatus,  
Discipulos docuit proprium se tradere corpus.  
Hinc calicem sumit Dominus, uinoq; repletum  
Gratis sanctificat uerbis potumq; ministras:  
Edocuitq; suum se diuississe cruorem,  
Atq; ait: Hic sanguis populi delicta remittet:  
Hunc potate meum, ueris & credite dictis.

MARCI HIERONYMI

Vidæ.

**I**psæ Heros puras, fruges, procrataq; liba  
Accipiens, frangensq; manu, partitur in omnes.  
Inde mero impleuit pateram, mox talia fatur:  
Corporis hæc nostri est, hæc uera cruoris imago,  
Vnus pro cunctis quem fundam sacra parenti  
Hostia, ut antiquæ noxæ contagia tollam.  
Vos ideo quoties positas accedere mensas  
Contigerit, sacrasq; dapas libamina iussa:

Funeris

*Eunus his nostrum mœsti referetis honorem,  
Et nunquam istius aboleſcet gloria facti.*

IOANNIS SAVROMANI.

**N**oste sacramentum Dominus, qua traditus ho  
Instituit firmæ fœdus amicitiae. *(sti,*  
Accipit panem, gratesq; ubi ritè peregit,  
Discipulis tribuit, sic referendo, suis:  
Hunc, caro namq; mea est, credentes sumite panem,  
Que modo pro uobis morte necanda datur.  
Hanc quoties editis, memores bene, clare referte  
Ex æquo uita facta, necisq; meæ.  
Sic ubi cœnauit, uiniq; liquore repleta  
Apprendit manibus pocula deinde pijs:  
Vtq; Patri grates solita pietate peregit,  
Porrexit socijs illa bibenda uiris.  
Atq; ait: Hoc iubeo, cuncti simul inde bibatis,  
Munera sunt ueri sanguinis ista mei.  
Quem modo pro uobis crucifixo corpore fundam,  
Quò sit peccati gratia cuiq; sui.  
Hunc quoties bibitis, memores bene clara referte  
Ex æquo uita facta, necisq; meæ.

GEORGII AEMILII.

**N**oste sub extrema, Solymo qua traditus hosti  
Proditione fuit sceſerati CHRISTVS Iudæ:  
Accipit panem digitis, gratesq; peregit,  
Discipulisq; dedit frangens, ac talia dixit:

*Accipite*

Accipite unanimes, cupidisq; absumite linguis.  
 Hoc uerè est nostrum, panis sub tegmine, corpus,  
 Quod modo pro uobis morti tradetur acerbæ,  
 Sumitis hoc quoties (fieri nam sæpe iubemus)  
 Voce meam mortem toties memorate fideli,  
 Qualia pro uobisq; tuli, feciq; referte.  
 Hinc ubi pulsa fames, & cœna peracta fuisset,  
 Accepit calicem, grates iterumq; peregit,  
 Discipulisq; dedit communi nomine dicens  
 Hunc omnes cyathum sacri gustate liquoris:  
 Iste calix nostri monumentum & pignus amoris,  
 Quem damus, est uerè nostro de sanguine plenus.  
 Qui modo fundetur precium pro crimine uestro.  
 Hunc igitur quoties bibitis, memorate fideli  
 Ore meam mortem, uestræq; piamina culpæ,  
 Nostræq; concordie studio benefacta referte.

GEORGII FABRICII.

**V**ltima discipulis præbens conuiuia Christus,  
 Vespere in hostiles quo datus ipse manus:  
 Partitur fractum per corpora singula panem  
 Verbaq; discipulis fatur amica suis:  
 Accipite, atq; alacres porrectum sumite panem,  
 Credite pane sub hoc corpus & esse meum.  
 Quod pro peccatis frangetur uictima uestris,  
 Tolle & admissi criminis omne nefas.  
 Hoc cum sumseritis, mea tunc benefacta referte,

Et.

Et duræ mortis uos meminisse decet.  
 Distribuens patera mensis quoq; uinare motis;  
 Et peragens grates, sic memorando dedit:  
 Haurite hac omnes (hauserunt scilicet omnes)  
 Est uinum sanguis fœderis iste Noui.  
 Pro multis meus hic sanguis fundetur, & ægra  
 Eluet immundi pectora quidquid habent.  
 Hunc tum sumpseritis, mea tunc benefacta referre,  
 Et duræ mortis uos meminisse decet.  
 Ac quoties panem hunc, quoties hæc pocula digni  
 Accipietis, erit certa parata salus.  
 Accipite, & passi præconia tollite CHRISTI;  
 In terras iudex dum rediturus erit.

## MEDITATIO EIVSDEM.

**I**N cruce qui pro me, multatus morte, pependit,  
 Deuictaq; mihi, qui nece uita fuit:  
 Indubitata sui monumenta reliquit amoris,  
 Præsentem semper testificatus opem.  
 Dum me carne sua, dum pascit sanguine membra;  
 Sum Factus CHRISTI corporis, ille mei.  
 Ille meo sedem figens in pectore, iustus  
 Iusticiæ impertrit præmia cuncta suæ.  
 Non mihi peccatum, non mors, demonq; nocebunt:  
 CHRISTVS præsidium, uita, salusq; mihi.  
 Non laudo proprias, uictoris prædico uires:  
 Ille suos hostes uicit, & ille meos,  
 Ille mihi patrẽm cœlestem facit amicum,

Et

Et Flatus tribuit munera magna sacri  
 Ille mihi sese donauit humillimus ipsum,  
 Hæredem regni fecit & esse Dei.  
 Hunc solum fateor causamq; caputq; salutis:  
 Hunc, per quem cœli limen aditur, iter.  
 Hunc scio, de tenui reuocatus membra fauilla,  
 Aspecturum oculis me super astra meis:  
 Cum sua in electis ornabit munera sanctis,  
 Quosq; bonos fecit, dixerit esse bonos.  
 Interea innocuæ decurrant tempora uite,  
 Dum CHRISTE aduenias: at citò Christe ueni.  
 CHRISTOPHORIS CHEL-  
 lenbergij.

**N**Ox erat, infandi cum criminis autor Iudas  
 Accepto Dominum prodidit are suum:  
 Tunc panem sumptū, dicta prece fregit IESVS  
 Discipulisq; dedit, talia fando, suis:  
 Accipite, atq; este hunc pascentem pectora panem,  
 Corpus in hoc uerè præbeo pane meum,  
 Hoc corpus, quod uerus homo gero, quodq; necan-  
 Pro uobis insons offero sponte reis. (dum  
 Vos, ut nullamca ueniant obliuia, sæpe  
 Hoc facite, & meritum commemorate meum,  
 Sic quoq; finita sumebat pocula cœna,  
 Utq; Deo grates egit & illa dedit:  
 Accipite, atq; omnes bibite, inquit: nempe liquorem  
 8 Sanguinis

Sanguinis ille mei, qui bibit inde, bibit.

Hunc ego pro uobis affectus morte profundam,

Vobiscumq; per hunc fœdus inibo nouum.

Crimine fœda meus purgabit pectora sanguis,

Et faciet uenia dignaq; pace Dei.

Hunc quoties capit is calicem, memoret omnis in orbe.

Grande mei meriti testificetur opus.

NICOLAI SELNECCERI.

**C**HRISTE Deus, qui morte tua das gaudia uitæ,

Ipse pijs factus mite salutis iter,

Traderet in fontem cum te uox turpis Iude

Talia nerba tuis nocte priore dabas:

Accipite hunc panem, quem cunctis porrigo uobis,

Pane sub hoc corpus sumite quisq; meum.

Corpus idem, quod pro culpa nunc traditur omni

Hic edite, & memores sitis ubiq; mei.

Sic calicem, egisset grates ubi uox tua **CHRISTE**,

Discipulis simili mote fauore dabas:

Accipite hunc, dicens: meus hic est sanguis, ab illo

(Credite) non aliter, uita salusq; uenit.

Hunc ego pro uestris peccatis fundo cruorem

Quisq; uelit tanti muneris esse memor.

ANDREAE ELLINGERI.

**N**Octe qua **CHRISTVS** rabidis apellis

Traditur, uide reprobis per artem:

Innocens, diram subiturus alta

Sub cruce mortem:

Accipite

Accipit panem, manibusq; frangit,  
 Gratias summoq; refert parenti,  
 Quem pia turba dat Apostolorum

Talia dicens:

Hunc cibum fratres commendatis, iste  
 Est meum corpus, prope ne candum  
 Morte, quam semper memores referte

Hac dape sumpta:

Iamq; cœnatis calicem repletum  
 Porrigit uino, referensq; grates  
 Singulis præbet, simul ora tali

Voce resoluit:

Hunc sibi sumant reuerenter omnes,  
 Sanguis est uerè meus iste potus,  
 Qui profundetur, sua quò remittat

Crimina mundo.

Hunc fide recta quoties bibetis,  
 Vt decet, uestri memores magistri  
 Illius mortem memorate prompto

Ore sacratam.

# MARTINI SALBACHII.

**N**oste Deus preciū mundi non uile redempti,  
 Qua dabat infontes in fera uincla manus;  
 Aceptum panem benedicit, cumq; uiritim

In socios frangens, talia uoce refert:

Sumite pro uestra quod corpus dedo salute:

g

2

Mandites

Mandite: perpetui hoc pignus amoris erit.  
 Post, calicem, mensis, simili ratione, remotis  
 Accipit & socijs distribuendo refert:  
 Iste, nouum fœdus, meus est cruor, cluet atra  
 Qui uicia, & uestre caussa salutis erit.  
 Hunc quoties memores grato libabidis ore,  
 Et meritum & nomen concelebrate meum.

A D A M I S I B E R I.

**D**ominus IESVS CHRISTVS, hostibus suis  
 Qua nocte Iudæ proditus dolo fuit,  
 Capiens manu panem sacra, Deo patri  
 Gratesq; agens, fregit, suisq; porrigens:  
 Accipite, dixit, edite, corpus hoc meum est,  
 Quod deditur salute pro uestra: in mei:  
 Hoc facite memoriam, meiq; funeris  
 Celebrate honorem. Poculum simili modo  
 Capiens manu, gratesq; agens Deo patri,  
 Socijs dedit, dixitq;: Bibite singuli:  
 Hoc est nouum fœdus, meum per sanguinem,  
 Ablutionem in criminum qui funditur.  
 Hoc facite, quotiescunq; bibitis, in mei  
 Memores honorem, & prædicate meam necem.

EXPLICATIVNCULA

eiusdem.

**Q**uid cœna quæris sancta sit? Christum roga.  
 Hoc corpus est meum, iste ait: sanguis meus.  
 Dat pane corpus ergo (quid nam murmuras  
 Ratio?



Ratio? suum liquore uini sanguinem,  
 Mirabili soli, Deoq; cognito,  
 Qui cuncta quæ loquitur facere potest, modo:  
 Vt illa edamus & bibamus, maximi  
 Verbis habentes & fidem CHRISTI, omnium  
 Remissionem consequamur criminum,  
 Vitamq; nullis terminandam seculis.

Tanti nec ipsa caussa uerò est actio  
 Boni: sed ista uerba, Pro uobis datur,  
 Effunditurq; quibus habet quisquis fidem,  
 Promissa habet, remissionem criminum,  
 Vitamq; seculis quæ manebit omnibus.

Non est opus ualentibus Machaone:  
 Et huc adeste, Christus inquit, quos graui  
 Pondus premit labore confectos: ego,  
 Ego recreabo uos, leuatos omnibus,  
 Malisq; miserijsq; Quare te excute  
 Ipsum, dapes ad has optimas qui uenis,  
 Ne pro salute pestem in os miser ingeras.

Nec tu para uentrem modo, cibo abstiniens,  
 Ad hospitii præsentiamq; gestibus  
 Ac moribus compone te decentibus:  
 Hoc disciplinæ opus quidem est, mense facit  
 At non sacræ dignum, sed una quæ fides  
 Hæc intuetur uerba, Pro uobis datur,  
 Effunditurq; quibus fidem qui non habet,  
 Et corporis CHRISTI, & reus fit sanguinis.

Conuiuiū postquam sed augustissimē  
 Acceptus es, letante laudes concine  
 Animo patri, qui non pepercit filio  
 Gratissimō, dulcissimōq; tradidit  
 Morti sed illum, pro salute publicā.  
 Tum proximo, CHRISTVS uelut sese tibi,  
 Te dede promptus, capitis & membrum tui  
 Illum inuuaq; toto amāq; pectore.

# PIETATIS PVERI- LIS LIBER II.

Preces diurnæ.

PVEREVOCATOR.

IOACHIMI CAMERARII.



Vcidus fulgor tenebrosum per orbē  
 lampadis

Phœbeæ relucet, & uago suum cœlo  
 iubat

Spargit : at Dians dudum euanidas

iaetat faces,

Stellulæ maris sub alti fluctibus sonantibus  
 Eluuntur, ut futura nocte rursum splendcat.

Surgite ô pueri, diei iam uolucres audio,  
 Conuenite, agite frequentes, non prius iam nostrum  
 Ordinemur, hymnos atq; balbulis labellulis (opus

Numini

Numini cantauerimus magno, Et eterno patri.  
 Da benigne, cum nouo splendore, cumq; fidere,  
 In tenellis ut animis tuum emicet lumen, Pater:  
 Et fuget caliginem lux uera nostri pectoris.  
 Mole douec solis ignes conteguntur terrea,  
 Mundus horret, atq; aspectu cuncta terribili silent.  
 Dum sacri latet lucerna occulta sermonis tui,  
 Occupat fraus cæca mentem, Et nigra nox mendacii.  
 Sed renidens flamma solis, phosphori cum præuia  
 Nuncium attulit diei, leta fiunt omnia:  
 Cum tuum salubre affulsit cordis atris nubibus  
 Lumen, exultat tenebris liberum pectus malis.

## PVERI SVRGENTES.

### EIVSDEM.

**N**unc iterum nos iucundam das cernere lucem.  
 Eq; Pater tenebris sancte uidere diem  
 Nox abiit, splendor circum se tollit Olympū,  
 Stellaq; uicini præuia lucis adest.  
 Et nunc rara nitent Phœbea lampade pulsa,  
 Quæq; nitent modicum sidera lumen habent.  
 Iam nos è stratis exiuit mollibus ales,  
 Quæ tacitum nullum tempus abire finit.  
 Ergo ad consuetas operas, studiumq; redimus,  
 Nostraq; iam recipit pensa diurna manus.  
 O Pater, usq; tua præsens ope sancte gubernas,  
 Quod sumus, Et quod mox aggrediemur opus.

Et fac ingressum nos sic decurrere solem,  
 Laudis uti simus pars quotacunq; tuæ.

## Matutinæ preces,

EIVSDEM.

**I**mploro te æterne Deus, pater unice CHRISTI,  
 Ut conseruatum hodiernæ ad tempora lucis,  
 Respectus quoq; deinde tui custodia cingat,  
 Angelus & mala propulset tuus undiq; sanctus.  
 Non animus probet ipse tuis contraria iussis,  
 Non uiolet diuina leuis mandata uoluntas,  
 Non in corde meo communi sit locus hosti,  
 Nec mens letifera capiatur fraude Sathanae,  
 Te solum, quidquid, teq; unum, cogito, spectet.  
 Ad te se ratio studiorum tota meorum,  
 Et deinceps referat degendæ semita uitæ,  
 Inq; tui arbitrio sperato fine quiescat:  
 Vt celebrent cunctæ nostræ tua numina uires,  
 Et tibi sacrati seruent commercia cætus.  
 Hoc fiat moderante tue mea pectora flatu,  
 Iustifici solam meriti nostraq; salutem  
 Apprendente fide, que uno Pater optime Nato  
 Conciliante tuo datur. O te semper adorent  
 Ora pio mentis te fretæ, concita motu,  
 Solum indistractumq; Deum, uerumq; bonumq;  
 Sanctum, immortalem, iustum, clementia cuius

Hoc

Hoc patet immenso terrarum latius orbe,  
Cuius & est expers regni omnipotentia finis.

## PVERIORANTES.

IACOBI MICYLLI.

**C**HRISTE potens rerū, melioris conditor *cui,*  
Qui mundo lucem sufficis atq; diem:  
Accipe nos tenebris iterum, somnoq; solutos,  
Et serua incolumes numine sancte tuo:  
Vtq; diem, pulsa cæcæ caligine noctis,  
Excipiunt, orto lumina sole noua:  
Sic tenebras animi, sic nubila discute mentis,  
Pectoraq; illustra lumine nostra tuo.

GEORGII FABRICII.

**E**Xeruit mundo clarus sua lumina Titan,  
Depulsaq; redit nocte, serena dies.  
Nempe quod attribuit tempus natura *labōri,*  
Hoc alijs totum seruiat, atque Deo,  
Dicantur pia uota Deo, tribuantur honores:  
Namq; pericla labor plura diurnus habet.  
Fortius incurrit totus cum dæmone mundus,  
Carneq; uix capimus luxuriante modum.  
Sed tu CHRISTE adsis miseris mitissime rebus,  
Cuius turba, tua morte redempta, sumus.  
Nil possit mundus, tristis succumbat Auernus,  
Audiat imperium seditiosa caro,

g

s

Vt

Vt cum contingat per te uictoria nobis,  
 Ac uerbo iaceant impia monstra tuo:  
 Nos grati sanctas omnes uoluamur ad aras,  
 Ponentes humili magna trophæa prece.

## MEDITATIO SVR-

**N**gentis.  
 Vnc ad opus lux quenq; suū, uariosq; labores  
 Euocat, & lecto membra leuare iubet:  
 Ast olim superas nos CHRISTE resuscita ad oras,  
 Angat ubi nullus gaudia nostra labor.

## IOANNIS STIGELII.

**C**onditor ô rerum, rerum seruator ab æuo,  
 Extra quem non est ullus ubiq; Deus:  
 Quod redeūte fruar post actas luce tenebras,  
 Gaudeo, & agnosco munus id esse tuum.  
 Tu genus humanum primū sine labe creasti,  
 Vt sanctē uultus uiueret ante tuos.  
 Quā malē desciiuit, quā turpiter excidit illud,  
 In mortem propria dum leuitate ruit.  
 At bonus es solus: iustamq; ut concipis iram,  
 Sic illam patria pro pietate premis,  
 Ergo admiranda natum pietate dedisti.  
 Innocuus nostrum ferret ut ille scelus,  
 Qui percussa fuit pro nostra uictima culpa,  
 Et uetus à nobis abluit omne nefas.

Ingentes

Ingentes igitur toto tibi pectore grates,  
 Perpetuus doni debitor huius ago.  
 Teq; precor supplex dilecti nomine nati,  
 Me rege, me totum numine flecte tuo.  
 Auspice principium te spectet, & assice finem,  
 Quidquid agam uitæ dirige cæpta meæ.  
 Ipse magistratus etiam, cætusq; piorum,  
 Ut tua conseruent dogmata sancta, rege.  
 Da pacem, uictumq; tuis: compeſce tyrannos,  
 Ut maneat uerbi gloria iusta tui.  
 Hac ego spe fretus, quod uitæ postulat usus,  
 Suscepti aggrediar dulce laboris onus.

## EIVSDEM.

**O**mnipotens, æternæ Deus, mens edita nullo  
 Principio, mens sine carens, mens omnia com  
 Omnia qui uerbo motum spirante creasti: (plens,  
 Alme pater, triplici simplex in numine numen,  
 Qui culpam humanâ, & casum miseratus acerbum,  
 Mente tua genitū CHRISTVM, cordisq; paterni  
 Effigiem, misero placidè largitus es orbi:  
 Ut Deus accipiens humani corporis artus,  
 Victima pro nostra cadcret non noxia culpa. 22  
 Illum etenim mittens, cœlesti uoce dedisti 23  
 Signa animi manifesta tui, cum clanguit æther,  
 Hunc audite, mihi dilectus filius hic est,  
 In quo leticia est, in quo mihi sancta uoluptas.  
 Sancte Deus, sapiens, fortis, mitissimè iudex,  
 Caste,

Caste, potens, liber, qui præstas omnia solus,  
 Vt tua non aliquem bonitas habet inclita finem,  
 Sic uotis ades, oro, meis. En omnia culpæ  
 Agnosco monumenta mea, pœnasq; pauesco,  
 Et doleo peccasse miser, cupioq; renasci.  
 Respice me miserum, culpam miserere fatentis.  
 Tu siquidem es uiua miseris sic uoce locutus:  
 „ Viuo ego, uiuo Deus, lapsi non expeto mortem,  
 „ Sed uolo conuersum salua resipiscere uita.  
 Quin etiam ille tuus, qui tecum tantus & idem.  
 Prostrator mortis CHRISTVS, mitisq; Sacerdos,  
 Per nomen tua dona suum nos poscere iussit.  
 Hunc propter miserere mei, mea pectora purga  
 Vi spirante tua, labemq; absterge nocentem,  
 Vt sint pura tui templa atque habitacula uerbi.  
 Tum linguâ regere atque animum dignare uagantē  
 Ne uelit illa loqui, tua quod diuina uoluntas  
 Non probet, & meritam quod te succendat in iram.  
 Ne uē hic degeneris securus in ocia uitæ  
 Lapsus, ab angusto deflectat tramite ueri:  
 Collige, redde, foue, rege, respice, flecte, gubernas,  
 Exiguum hunc cœtum, qui uero agnoscere cultu  
 Te didicit, natumq; tuum ceu debet honorat.  
 Hec etiam studia & dexteras quas discimus artes  
 Fac tuare Deus, quibus instrumenta docendi  
 Perficit, & leges uiuendi suppetit usus.  
 Inde tuum uerbum rectē tractare facultas,

Inde



Inde tibi æternas resonans Ecclesia laudes.  
 Gaude animæ uis tota meæ, mihi præbuit aures,  
 Qui nescit duro fidentem fallere uultu.  
 Iamq; opus incæpto mihi rideat omne labore,  
 Totaq; lux abeat faustis feliciter horis,

M. ANTONII FLAMINII.

**I**Am noctis umbras Lucifer,  
 Almæ diei nuncius,  
 Terra poloque dimouet:  
 Simulq; nos cubilibus  
 Monet relictis, pectore  
 Preces ab imo fundere  
 Ad templa summa cœlitum.  
 Oremus ergo supplices  
 Foſtem perennem luminum,  
 Vt ſicut omnes aeris  
 Illuſtrat oras: uiuido  
 Sic noſtra corda repleat  
 Fulgore ſanctæ Spiritus;  
 Qui nos per hæc contagia  
 Puros ab omni crimine,  
 Traducat ad cœleſtium  
 Sedes beatas: illius  
 Nutu gerantur omnia,  
 Cibumq; ſiuc ſumimus  
 Seu quid negotij foris

Tractamus,

Tractamus, aut domi, intima  
 Secum mente quid reuoluimus,  
 Id omne semper gloriam  
 Spectet beati luminis.  
 Rector supreme cœlitum,  
 Que mente tota poscimus,  
 Hec omnibus concedito,  
 Qui corde puro te colunt,  
 Et unicum natum tuum,  
 Cum sempiterno spiritu,

CHRISTOPHORI SCHEL-  
 lenbergij.

P ER CHRISTI sanctum dilecti nomen ab imo  
 Corde tibi grates dico supreme Pater,  
 Quod pestes omnes, arcesq; pericula cuncta,  
 Dum nox tellurem, me sopor altus habet.  
 Te precor humauæ tutor fidissime uitæ,  
 Cum me nunc stratis euocet orta dies:  
 Hoc tue are caput, tua me custodia seruet,  
 Aspiretq; sacri flammis aura mihi,  
 Ut dicam, faciamque nihil, mecumque reuoluam,  
 Quod tibi displiceat, sed mea cuncta probem,  
 Nam tibi fidentem hanc animam cum corpore soli  
 Commendo, inq; tuas omnia trado manus.  
 Pac mihi sit presens omni tuus angelus hora,  
 Ne mihi diræ obsit uis triculenta Stygis.

ANDREAE

## ANDREAE ELINGERI

**A**vrora surgit fulgida,  
 Lucis propinquæ nuncia;  
 Polus rubescit, emicat  
 Phœbus corusco lumine,  
 Amœna lux strato iubet  
 Nos excitatos surgere,  
 Dulcem quietem linquere,  
 Et supplices hæc dicere.

Ago tibi nunc gratias  
 Tuum Deus per filium,  
 Nostræ salutis uindicem,  
 Et liberatorem unicum:  
 Quod me sopori deditum  
 Hac nocte custodiueris,  
 Incommodis ab omnibus  
 Et horridis periculis.

Te quaeso nunc pia prece,  
 Ut hoc diei tempore  
 Alis latentem sub tuis  
 Clementer idem protegas.

Ne praua fors an actio  
 Legi sacræ contraria,  
 Te iusta cogat ut tui  
 Furoris arma concites.

Vt quidquid usquam cogitem,

**Tibi**

Tibi probetur, factus  
 Mandata legis exequar,  
 Nam me, meumq; corpus, &  
 Animam meam clemens Pater,  
 Commendo dexterae tuae,  
 Ne me pauentem deseras.  
 Meum sit angelus tuus  
 Sanctus, minister flammeus,  
 Qui Sathanae ferociam  
 Grassantis in me reprimat.

## CHRISTOPHORI

Aulei.

**H**anc mihi dignatus faustam, cōcedere noctē  
 Es quod, spes uitæ maxime Christe meæ,  
 Quas passum, meritas non quas ego debeo,  
 Eloquio, notum quod tibi, cordis ago. (grates  
 Meq; opus hac manuum sanctarum luce tuarum,  
 Nam potes, à cunctis quæso tuere malis.  
 Corporis atq; animæ curam gere: demonis astus,  
 Quosq; mihi laqueos tendit ubiq; caue,  
 Quem lanient querēs, totū ille perambulabat orbē,  
 Non secus ac catulis orba leæna suis.  
 Ergo mihi semper sanctus tuus angelus adsit,  
 Quo duce nec genios mille timebo malos.  
 Principis ille etenim mundi, scelerumq; parentis  
 Quo queat insidias pellerè, robur habet.

IOAN.

## IOANNIS GIGANTIS.

Optime Christe, potens uitæ reparator ademptæ;

Suscipe non rigida supplicis aure preces.

Da, precor, ut semper tibi, quas ego debco, grates

Cordibus eximis officiosus agam.

Fac tibi sincera possim confidere mente,

Fac ne crudeli pressus ab hoste cadam.

Dux sis, atque comes rerum pie Christe mearum

Hoc rege proq; tua me pietate die.

## ADAMI SIBERI.

Les dedit cantum diei nuncius,

**A** Cedunt tenebræ, cogit albis sidera  
Frenis, & exit Lucifer nouissimus

Statione cæli: Nos refectis uiribus

Quiete dulci, munere Creator tuo,

Ad solita uitæ nunc redimus munia.

O' sis bonus, & hac nocte quos tutatus es,

Ista die prohibe periclis omnibus

Ne callidus prædetur hostis ut uoret

Qui nos, leo ceu rugiens obambulat.

Nos spiritu tuo gubernæ pectoris

Caliginem splendore gratiæ tuæ

Nostri, Pater, cæcasq; tenebras discute:

Vt te Deum discamus æternum, & tibi

Cum Spiritu sancto coæuum Filium:

Vt studia nostra, ut tota uita seruiat

Laudi tuæ, atque proximorum commodis.

**b** PVER

154  
PVER IN, LVDVM  
uocans.

GEORGII FABRICII.

**I**AM uocat ad ludum nos hora; ite, ite frequentes  
O pueri, studij mutua cura mei,  
Sint nididae uestes, facies sit lota, manusq;  
Et facite arma libros ut sua quisq; ferat.  
Nemo tamen properet, qui non perlegerit ante,  
Que discenda isto computat esse die.  
In primis alacres ad uestros fertè magistros  
Mentes, et studij continuate uices.  
Asiduis presto Deus est: idem odit inertes,  
Et sua dat nullis absque labore bona.  
In ludo linguis animisque fauete modesti,  
Presentemq; illic esse putate deum:  
Qui secum Angelicas deducit mille cateruas,  
Custodes teneri presidiumq; gregis.  
Hec nunc ante oculos uobis proponite uestros,  
Impleat officij munera quisq; sui.

PVER LVDVM PE  
tens.

EIVSDEM.

**C**HRISTE puer, matris dilectæ immensa uoluptas  
Acterni soboles patris,  
Doctores inter qui uoce silentia rumpis:  
Et primo positus loco,

scrit

Scripta Prophetarum, & summi mandati parentis:

Admirantibus explicas:

Vt discam ingenuas, tua munera, sedulus artes,

Da de fonte aquulam tuo.

Ingenium, mores, & totam dirige uitam:

Vni deditus ut tibi

Et uiuam, & studeam, non segni pectore, crescens

Aetate & sapientia.

## P V E R A N T E L E C T I

onem.

A D A M I S I B E R I.

**A** Eterno soboles amata patri,  
 Quem uox æthere missa, mandat unum  
 Audiriq; coliq; CHRISTE: qui nos  
 Ad te uoce iubes uenire blanda;  
 Affirmans pueros Deo placere:  
 Da sanctum mihi Spiritum, magistro  
 Vt monstrante uiam ingredi, Redemptor  
 Ad te qua liceat uenire possim.  
 Da cum moribus, artibusq; honestis,  
 Sacri dogmata puriora uerbi.  
 Addiscam: sapientiâque & annis  
 Vt crescens, tibi plurimos & ipse  
 Olim adducere, quæ facit beatos  
 Doctrinâq; alios docere possim.  
 Hec est summa mei, caputque uoti:

h

2

Quod

Quod ratum iubeas ut esse, per te  
 Ipsum CHRISTO rogo, tuumq; nomen,  
 Aeterno soboles amata Patri.

## MAGISTER DISCIPV- los ad studia literarum co- hortans.

PHILIPPI MELANTHONIS.

**V**OS ad se pueri primis inuitat ab annis,  
 Atq; sua CHRISTVS uoce uenire iubet.  
 Præmiaq; ostendit uobis uenientibus amplas  
 Sic uos, o pueri curat, amatq; Deus,  
 Vos igitur leti properate, occurrite CHRISTO,  
 Prima sit hæc Christum noscere cura Deum.  
 Sed tamen ut Dominū possis cognoscere Christum,  
 Ingenuas artes discito parue puer.  
 Hoc illi gratum officium est, hoc gaudet honore,  
 Infantum fieri notior ore cupit.  
 Quare nobiscum studium ad commune uenite,  
 Ad Christum monstrat nam schola nostra uiam  
 AD PIETATEM ET LA-  
 bores.

G. FABRICII.

**S**is pius, et toto uenereris pectore Christum,  
 Officij facias munera sancta tui.  
 Obseruansq; pios doctores more parentum,  
 Atq; sodalitiij membra modestus ames.



In studio nullo deses frangere labore:  
 Et fugias, si quos senseris esse malos.  
 Ignauum prauumq; Dei grauis ira sequetur:  
 Optata assiduis dona dat, atque pijs.

## CHRISTPHORI GRAVII.

**N**unc iuuat assiduo puer indulgere labori,  
 Dum uiret intonsis prima iuuenta genis.  
 Sic tua non unquam, lassâ ueniente senecta,  
 Atria destituent Liber & alma Ceres.

Parua sit exemplo magni formica laboris,  
 Sole sub aestiuo quæ sibi farra legit:  
 At leuat interea stridentia tempora cantu,  
 Viuit & in medium læta cicada diem.  
 Huic age quid fiet? ludet formica petentem  
 Granulâ: nam uitam fors decet ista pigram.

## PVER MONITOR.

## G. FABRICIUS

**D**iscite, quòd pedicas humani nominis hostis  
 Ponat, gregiq; quàm sit infensus Dei,  
 I primis pueris: quos si non angelus alto  
 Custos polo seruaret, omnes perderet:  
 Quos si non superi defenderet alitis aura,  
 Omnes dolosis falleret mendacijs.  
 Niliacus pueros materna extinguit ab aluo,  
 Celsisq; mandat proijci de mœnibus.  
 Rex Syrie ferro Herodis crudelis acuto

h

s

Natale

Natale Christi uisitat infantis solum,  
 Tamberlane tuus turma calcauit equestri  
 Furor, tenellum supplicis turbæ globum  
 Iussit & occisis Burgundus matribus, ipsos  
 Natos soluta naui in undis deprimi.  
 Hæc exempla docent, nos quanta pericula circum  
 Stent à sinistra, quanta dextera premant.  
 Obiectum minus est oculis: doctrina prophana  
 Quæ dignitate gloriatur propria,  
 Et CHRISTI imminuit meritum, nobisq; salutis  
 Partem, potestatemq; agendi quæ Deo  
 Sunt grata, adscribit, menti est lethale uenenum,  
 Et lata pertrahens ad inferos uia.  
 Fœdera perpetuum quæ transmutat amoris,  
 Quibus lauamur in necem CHRISTI tui,  
 Corpore deq; eius iussu, sacroq; cruore  
 Usque in beatæ regna uitæ pascimur:  
 Hæc animis etiam cupiens solatia nostris,  
 Aut falsitate demere, aut proteruia,  
 Nunc doctrina uiget perituri tempore mundi,  
 Magnisq; propagatur chori plausibus,  
 At tu iuste Pater, pueros miserate pusillos,  
 Tueri corpus hoc per Angelos tuos,  
 Perq; tui sacri Flatus auram atque uigorem  
 Nostras tibi mentes dicatas instrue:  
 Corpore ut hoc animaq; tua uiuamus in aula,  
 Post hæc ruentis fluxa uita tempora.

NICO

## NICOLAI BORBONII.

**I**N primis pueri CHRISTVM discamus amare,  
 Hic fons est, à quo uita selusq; fluunt.  
**D**iffliccat nobis scelus omne, superbia, liuor,  
 Torpor, mollicies, ira, Cupido gula.  
**C**ordibus in nostris Dominum pingamus IESVM,  
 Primus hic est nobis conciliandus amor,  
**O**bsacro uos pueri, uiuamus crimine puri:  
 Non amat impuros Virginis ille puer.  
**C**HRI STO nulla potest melior doctrina parari.  
 Debet ad hunc acies tendere nostra schopum.  
**C**HRI STVM laudemus semper, semperq; precemur.  
 In Stygios casses ne cadat agra caro:  
**N**e post hanc miseram, et peiorem carcere uitam  
 Demur Tartareis præda uoranda rogis.

## CHORVS GREGIS

Scholastici.

ADAMISIBERI.

**T**E pastor bone, te tui rogamus,  
 Pro cunctis nece qui tua litasti,  
 Eluens scabiemq; postulasq;  
**N**unc Deusq; et homo regis potenter  
 Cum Patre omnia, Spirituq; sancto:  
**H**anc schlamq; gregemq; CHRISTE serua.  
 En uerbi micat aurei, rebelles  
**L**ux tui sibi uendicatq; terras,

b

4

Error

Error iam fugit, & fugit solutus  
 Qui longum tenuit ueternus orbem:  
 Te pastor bone, te tui rogamus,  
 Hanc scholamq; gregemq; CHRISTE serua,  
 Nunc patrum chorus, & corona matrum,  
 Nunc senex, puer, & tencella uirgo,  
 Quatellus patet axe sub Boreo,  
 Nomen carminibus tuum celebrant.  
 Te pastor bone, te tui rogamus,  
 Hanc scholamq; gregemq; CHRISTE serua.  
 Lotum Euangelij sacros per hortos  
 Balantes, cythisumq; literarum  
 Tondemus tua per uireta, leti  
 Musarum sapientiæq; resquis:  
 Te pastor bone, te tui rogamus,  
 Hanc scholamq; gregemq; CHRISTE serua.  
 Nunc ò nunc Deus & patronus Verbum  
 Hoc tuere, & opus canum frequentes  
 Adsint excubiæ, grauis per agros  
 Ne fors purpureos gregem fatiget:  
 Te pastor bone, te tui rogamus,  
 Hanc scholamq; gregemq; CHRISTE serua.  
 Auerno horribills, ferum, tremendum  
 Monstrum, se lupus incitat cruento  
 In nos ore, dolosq; necit, omnes  
 Nocendiq; modos uiasq; captat:  
 Te pastor bone, te tui rogamus,

Nos

Nos scholamq; gregemq; CHRISTE serua.

Tarpeias Anomus furit, minatur,

Arces qui tenet, intonatq; seuum,

Tuisconis, ueluti solebat ante,

Quod nunc glubere non datur bidentes:

Te pastor bone, te tui rogamus,

Hanc scholamq; gregemq; CHRISTE serua.

Accedunt scelerata turba, iactis

Fraudum euerriculis, tenebricosum

Qui incautos per iter trahunt ad Orcum,

Nec pili faciunt Dei furorem.

Te pastor bone, te tui rogamus,

Hanc scholamq; gregemq; CHRISTE serua.

Tu pestes, genus improbum, coherce

Tales, tu cohibe furentis astus

Lupi fortis & o repelle rasam

Dindymi dominae procul cohortem:

Te pastor bone, te tui rogamus,

Hanc scholamq; gregemq; CHRISTE serua.

Sed catus ouium malis uagantes

Pascuis reliquos, thymo salutis

Ad caulas quoque duc tuas, ut unus

Tantum pastor, ouile fiat unum:

Te pastor bone, te tui rogamus.

Hanc scholamq; gregemq; CHRISTE serua.

Audis uerba precantium? repellis

An suspiria? non repellis, o qui

h

s

Flosculi

Flosculus puerum: inuocemus ut te  
 Balbulis pueri iubes labellis.  
 Te pastor bone, te tui rogamus,  
 Hanc scholamq; gregemq; CHRISTE serua.  
 Tenellos facile heu podagra fectus  
 Infestat, maciesq; turpis: at tu  
 Da fontes liquidos, beatiore  
 Da spirent Zephiri salubris aure.  
 Te pastor bone, te tui rogamus,  
 Nos scholamq; gregemq; CHRISTE serua.  
 Per Sionia rura quò regentum  
 Camposq; Aonios pedum sequentes  
 Non fructu sine pascuis uagemur:  
 Qui tibi redeat, tuæq; caule.  
 Te pastor bone, te tui rogamus,  
 Hanc scholamq; gregemq; CHRISTE serua.  
 Hæc nobis petimus: leues magistros  
 At nostros facilis tuo fauore,  
 Et firmes patientia laborum  
 Fortes in studio, tuiq; amore:  
 Te pastor bone, te tui rogamus.  
 Hanc scholamq; gregemq; CHRISTE serua.  
 Sic qui nomen erunt, tuasq; laudes  
 Nunquam non celebri ferant honore,  
 Dum felix rediens gregem reuifas,  
 In scholæq; uchas perennis aulam.

CHO-

# CHORVS PVERILIS

## Scholasticus.

GEORGII FABRICII.

**Q**uotquot habet pueros hic noster ludus ade-  
 Grates, agamus principi iustas deo. *(Ite)*  
 Sancta placent superis, humili cum mente uenite,  
 Animisq; puris auspicamini preces.  
 Gratia cœlesti dicatur maxima Regi.  
 Quòd nos creauit, quodque sublimes dedit  
 Vultus, deque sua formauit imagine: quòd nos  
 Aetate molles, imbecilles uiribus  
 Seruat, alitq; sua, dictu mirabile, cura,  
 Intèr; Syrtes huius qui contegit.  
 Quot nobis faciles tribuit pietate parentes,  
 Qui litteris, linguisque curent imbui  
 Doctores etiam, quorum bonitasq; fidesq;  
 Morum atque uitæ prauitatem corrigat,  
 Denique contigerit misero quod tempore Princeps  
 Qui nostra alit fouetq; mitis oia.  
 Cetera quis memoret diuine munera dextre?  
 Non uocis, aut puerilis ingenij est opus.  
 Pro tantis meritis Pater optime soluimus hymnum,  
 Et corde et ore, quod negatum est uiribus.  
 Agmina propicius pueris respice turba,  
 Audi; uoces supplices canentium.  
 Quorum cura sumus, sint patres atque magistri,

Princeps

Princepsq; felix, nosq; conserua simul.  
 Tum studijs præbe stationem, ac littus amicum,  
 Perituri in orbis turbulentis fluctibus.  
 Ne nos ascendens aduersum Turca per Istrum,  
 Charis parentum uel à complexibus:  
 Detq; lupis canibusq; feris hæc corpora predam,  
 Escamûe monstris horridæ Propontidis,  
 Auerte hoc auerte Pater, cætusq; piorum,  
 Scholasq; nostras mitis ex alto uide,  
 Hinc abeant nunquam, culpa et leuitate fugati  
 Patris intuentes ora cœlitus Angeli:  
 Vt postquàm in studio et pietate adoleuerit ætas,  
 Tui offeramus nominis præconia.

ANDREAE ELLINGERI

Ddictus tibi Chryste paruulorum  
 Cœtus, te precibus pijs adoro,  
 Tu flatu rege corda nostra sancto,  
 Verbi luce animos rudes gubernans,  
 Vt uera pietate te colamus,  
 Agnoscamus, ememus, inuocemus,  
 Præstemusq; tibi parentibusq;  
 Toto pectore debitos honores,  
 Iniunctamq; alacres uocationem  
 Firma sedulitate persequamur:  
 Qui mores quoque litteris honestis  
 Emollire feros student, bonisq;  
 Formare ingenium artibus magistros,

Dile-



Dilectos ueneremur ut parentes,  
 Quicquid præcipiunt parati obire,  
 Nunquam horum pia iussa negligentes  
 Duramente, animoq; peruicaci.

Sed quando labor omnis est inanis,  
 Fortunante Deo nisi regatur:  
 Præstò sit tua defluens ab alto  
 Nobis æthere gratia, ut secundis  
 Ventis per studiorum iter uolemus,  
 Virtutis sapientiæq; florem  
 Pascentes, pietatis atque fructum,  
 Ceu finem ingenuæ occupationis.

Nec uerò horrifono finas tumultu  
 Discentum studia, atque amica Musis  
 Turbari ocia desuper: sed hosti  
 Virtute Angelica resiste, nostro  
 Semper pro grege spiritus benigni  
 Seruent excubias, & imbecillos  
 Morcs, ingenijq; uim tenellam  
 Miti numine suscitent & ornent.

O qui infantibus ora consecrasti  
 In laudem tibi, uis & inuocari:  
 Tanti nos quoq; muneris capaces  
 Reddas unanimi rogare uoce,  
 Ut laudum monumenta nos tuarum  
 Dignissimus in orbe prædicare,  
 Et te cum Patre, Spirituq; sancto

Hymnis

Hymnis conceleberrare sempiternis.

## PVERFINITALE

ctione.

ADAMI SIBERI.

**Q**uas grates tibi, quas agam Redemptor?  
 Rudem uoce quod instruis magistri  
 Amantèrque fidelitèrque, tradis  
 Viuendique uiam, et loquendi.  
 O' da, quæ didici, tenere firmo  
 Comprehensa animo queam, laboris  
 Da constanter onus ferant: nec unquam  
 Aut cessem piger, aut peritiozem  
 Quam cui discere sit necesse, credam.  
 Me totum rege, me guberna, ut uni  
 Consecrem tibi, proximòque, totam  
 Quam uitam tribuis mihi redemptor.

## PVEREXLVDO

reuertens.

GEORGII FABRICII.

**Q**uam multa audiui menti seruanda tenelle,  
 De moribus, de litteris?  
 Quamque meos cupidè uidi aduertisse sodales,  
 Monita docentis omnia?  
 At tu cunctorum largitor CHRISTE bonorum,  
 Sensus iacentes excita:

*Vt bona percipiant, & sicut certa sequantur  
Fingentis artificis manum.*

*Fac nihil à studijs unquam diuellat honestis,  
Non frigus, æstus, non famex.*

*Quantulacumq; pij perdurem portio cœtus,  
Tuæq; membrum Ecclesiæ,*

## PVERIENSIN templum.

EIVSDEM.

**D**ulce tui Pater est habitare sacraria templi,  
Dulce tuæ uocis percipere aure sonum.

*In magnòque tibi grates persolvere cœtu,*

*Iungere communes cum populòq; preces.*

*Tum celebrare tui benefacta pijima nati,*

*Atque omni illius tollere laude crucem.*

*Ille salus solus: cui quisquis credit, habebit*

*Actaroas felix non moriturus opes.*

*Da Pater alme, bonum sit ut illud, quæso, perenne:*

*Mæque tui partem corporis esse sine.*

*Sum puer, ingenio rudis, atque etate tenellus:*

*Non uis in proprijs uiribus ulla boni,*

*Naturam primæ corruptam ab orrigine culpæ,*

*Atq; meo impuram crimine Christe traho,*

*Tu potes æternum mihi conciliare parentem,*

*Demere tuq; mali pectoris omne nefas.*

*Sim tuus, ut Patris cœlestis filius, utq;*

Pro

Prò me de casta uirgine factus homo es,  
 Me rege sacra ti ductu, & spiramine Flatus.  
 Sitq; tuus uite regula sermo meæ.  
 Da tua dicta sequar, tua discam iussa libenter  
 Teq; colam ritu per tua festa sacro.  
 Ne sine dispergit tales mitissime cœtus,  
 Ferre sit his summam quisq; paratus opem.  
 » Vna dies homini melior tua templa colenti,  
 » Quam sine te reliquis secula mille locis.

## CHORVS PVERILIS in templo.

ADAMI SIBERI,

**P** Aruula turba sacris humiles aduoluimur aris,  
 Laudibus ora tuis nostra resolue Deus.  
 Vt gaudes puerum Genitor qui uoce uocari,  
 Concelebre nomien balbula lingua tuum.  
 Vnde tamen nostræ capient exordia Musæ,  
 Aut quæ pars meriti prima canenda Deit?  
 Cum nihil effemins, nobis tua matris in aluo  
 Humanos uultus oraq; dextra dedit.  
 Munere ab æthereis deducto sedibus auxit  
 Mentis, & effigiem iussit habere tuam.  
 Illa quidem exprimeret magis, authoremq; referret  
 Peccato scedè ni uitiata foret:  
 Peccato, à Sathana decepti culpa parentis  
 Primigeni, miseros quo facit esse reos.

Hoc

Hoc tamen, ô bonitas, damnum meliore rependit  
Sorte, Pater, tua quæ gratia sine caret.

Nam sobolis, maculas aufers de pectore nostro,  
Sanguine, sacra fontis in amne, tuæ.

Esse iubes natos, Sathanas quos fecerat hostes,  
Cum Christo hæredes instituisq; tuo.

Nostra moues sancto mollißima pectora flatu,  
Et iuuat in tenero corde habitare Deum.

At quæ das animis nostris alimenta, beato

Quam pascis mentes cordaque nostra cibo?  
Sermo tuus cibus est animæ: quo pastus abunde

Qui fuerit, nullam sentiet ille famem.

Quid uerò doctas linguas memoremus, et artes  
Ingenuas, quarum non finis esse rudes?

Dum te nequaquam pietate, fideq; magistri,  
Barbariem nostra mente fugare pudet.

Quid? das angelicos nobis quod mille ministros,  
Custodes teneri præsidiumq; gregis?

Ne nos humani generis sæuißimus hostis,  
Incautos laqueis implicuisse queat:

Abstrahat in noctem secum miserosq; profundam,  
Luridus obscuris qua fluit orcus aquis?

Quid? Mecœnatem quod das, facilémq; patronum,  
Et studij nobis ocia tuta sequi?

Quod uires tribuis, uestes uictumq; ministras,  
Et quibus hæc alijs corpora rebus egent.

Sed neq; cuncta pater referant tua munera lingue  
i Nostræ

Nostræ, uno quamuis gutture mille sonent.  
 Nos tamen, ô placeat tibi quod mitissime, grates  
 Pro cunctis bleſo dicimus ore Deus.  
 At quæ iam nil non miscet cum dæmone mundus,  
 Religio ut peſſum præcipitanter eat:  
 Ut percant artesq; bonæ, linguæq; diſerte,  
 Et quidquid regnis impietatis obeſt:  
 Tu miſerere tui populi, tua uerba profeſſos  
 Protege, proq; pijs in ſtatione mane,  
 Ne ſanctis meretrix tollat tua munera templis  
 Immundæ nomen quæ Babylonis habet.  
 Ne ſacro Odryſius Chriſti pro numine latro  
 Abdaridæ ſtatuat numine ficta ſui.  
 Sint tua cura pij quotquot regesq; ducesq;  
 Sincere laudem religionis habent.  
 Sint tua doctores, ſancta tua cura magiſtri,  
 Qui ſacra uerba rudes, litterulâſque docent.  
 Sit locus, exiguum tua nidum Eccleſia turtur  
 Quo ſtruat, & pullis paruula tecta paret:  
 Da pacem, liceat templi coluiſſe beati  
 Tecta, ſonat uerbi uox ubi ſancta tui.  
 In magnaq; tibi liceat benedicere turba,  
 Et populi uotis addere uota pij.  
 Nec minus in noſtris ſtudijs tua ſancta precamur,  
 Dextera perficiat quod bene cœpit opus.  
 E' noſtro poſſis aliquando ſumere cœtu,  
 Qui uerbi ſiant turba miniſtra tui.

Qui

Qui doceant CHRISTI de religione minores,  
 Imperij fines amplificentq; tui.  
 Malin'us esse tuæ pars contemptissima turbae,  
 Atque Dei sacras ante sedere fores,  
 Atria quàm CHRISTO spoliata habitare columnis  
 Marmoreis. CHRISTO nam sine nulla salus.  
 IOANNIS RIVII ATTHEN-  
 dorienlis.

O Christe summi nate Patris unice,  
 Salutis author, certa spes mortalium,  
 Cuius fauore destituta sedulo  
 Quid nostra, quæso, possit imbecillitas?  
 En nos tuam pater benigne grâtiâ  
 Miseri inuocamus, & piâ clementiam:  
 Adesto nunc, aureisq; faciles quæsumus  
 Precibus inuenta supplicibus accomoda,  
 Hæc præuolutæ genibus ô pater tuis,  
 Orantis ore pariter atque pectore:  
 Vt hebetis obscuram ingeni caliginem,  
 Atrasq; pectoris tenebras dissipēs,  
 Illuminans splendore grâtiæ tuæ,  
 Noctem profundam, cæcâq; penetralia  
 Mentis: te ut unum mysticis queat abditum  
 In litteris dilucidè cognoscere,  
 Efferre laudibus, & amare cognitum,  
 Tuisq; semper ingredi uestigijs:  
 Præcepta seruare tua, ulteq; unicam

Exprimere sanctis regulam te moribus.  
 (Aliunde neque enim certa uita formula  
 Petenda nobis) tu scopus studij unicus:  
 Ipse institutos ad te IESU dirige  
 Cursus, aberret ne procul, neque deuiet  
 A' destinato cæca mens studij scopo:  
 Ne uana mundi nos procul superbia  
 A' te reflectat, neu supercilium arrogans  
 Tuis abuti muneribus cogat Pater,  
 Tandemq; nobis inde scatcat exitij  
 (Quod tu precamur omen auertas Deus)  
 Acterni origo, spes salutis unde erat.  
 Rata hec IESU uota sint precantium  
 Fac quæsumus: & hunc deditum tibi gregem  
 Pubis studiosæ rege, tuere, promoue,

MATTHIAE MARCIDA  
 bercusij.

O Deus omnipotens, nati qui nomine mandas  
 Orare, & nomen sanctificare tuum:  
 Promittens certis per sacra uolumina uerbis  
 Te suscepturum talia uota Pater:  
 Quicq; probas laudes puerili ex ore profectas,  
 Et lingua infantum notior esse cupis:  
 Quos & complexu dignatus Filius olim,  
 Turbæ indighanti talia uerba dabat:  
 Quin pueros ad me permittitis ire pusillos,  
 Sunt quorum æterni regna beata patris?

His



His nos accensi meritò, Pater optime, iussis,  
 Promissisq; tuam sollicitamus opem:  
 Qua sine nil nostræ uires, nil debile prodest  
 Ingenium: nostras accipe quæso preces.  
 Principiò petimus, nos ut defendere contra  
 Insidias sathanæ, diraq; tela uelis:  
 Qui nos à recto uitæ deducere calle,  
 Atque in perniciem præcipitare cupit,  
 Precipue ut numenq; tuum, præceptaq; sancta  
 Secure à nobis despiciantur, agit:  
 Ut contemnantur, qui nos genuere parentes,  
 Præcipis eximia quos pietate coli:  
 Quiq; uicem illorum fungentes, pectora formant,  
 Artibus et rectis excoluisse student:  
 Quis, à discipulis tanta pro dote referri,  
 Tantis pro meritis gratia nulla potest.  
 Quinetiam impellit sæpe ad mendacia, furta,  
 Inuidiæq; malum, dissidiæq; malum,  
 Iram, inimicitias, fœdæq; libidinis æstus:  
 Et nos à studijs abstrahit usque bonis  
 Ad quæ iam pridem tu nos Pater ipse uocasti,  
 Donans quicquid ad hæc ritè colenda facit:  
 Ingenium, Patres, præceptoresq; fideles,  
 Qui foueant miseros, instituantq; rudes.  
 His quoniam pueri sæuis incurfibus hostis,  
 Exiguus nequeunt uiribus esse pares:  
 Ad te confugimus solum pater, atque precamur,

Ut nobis aſſit Spiritus ille bonus,  
 Quem nobis meruitq; tuus, ſeſeq; daturum  
 In ſacris dixit filius ipſe libris:  
 Naturam emendet qui prima ab origine turpens,  
 Ac uitiiſ nullum qui ſinat eſſe locum,  
 Luceat in nobis ut uera fidesq; timorq;  
 Abſque quibus poterit nemo placere tibi.  
 Hinc uigeat pietas in te, pariterq; parentes,  
 Doctoresq; tuo quos placet eſſe loco.  
 Tum fidei fructus comitetur, corpus ut umbræ,  
 Erga omnes homines non ſimulatus amor:  
 Hiſ ut præſtemus faciles, quæcunque uiciſſim  
 Præſtari nobis ducimus eſſe pium.  
 Adiuuat ut caſtam & moderatam ducere uitam  
 Poſſimus, ſanctos ut decet atque probos,  
 Corpora ne temerò contaminet ulla libido,  
 Templum quæ uoluit Spiritus eſſe ſibi.  
 Ut quoque diſcamus ſentire ac dicere uera,  
 Noſtraq; concordent pectora & ora ſimul.  
 Denique qui faciat, mens ut mandat aſequatur  
 Læta uoluntati pareat atq; tuæ.  
 Vnum etiam petimus, quoniam te authore uacamus  
 Hiſ ſtudijs, orſi grande laboris iter:  
 In quibus abſque tuo ductu non fidimus ire  
 Longius, aut ullo poſſe placere modo:  
 Hæc ut fortunet nobis, idemq; gubernet  
 Spiritus aſſutu, præſidioq; pio.

Diſcuſ.

Discussis tenebris, atque hac caligine mentis,  
 Qua tenera hæc ætas obruta tota iacet:  
 Primum teq; Deum deceat cognoscere uerum,  
 Quiq; fuit missus natus ab arce poli.  
 Est namq; hæc prorsus studiorum summa bonorum,  
 Est sita in hac una cognitione salus.  
 Excitet in nobis etiam torpentia corda,  
 Arcani ad uerbi percipienda sacri.  
 Quippe hoc notitiæ thesauros continet omnes:  
 Nemo sine hoc sapiens, nemo peritus erit.  
 Hæc nostræ existat certissima regula uite.  
 Dirigat hæc cecos clara lucerna pedes.  
 Arteis præterea quò discere detur honesta,  
 Neue quid inceptum fortè moretur opus:  
 Obtusa exacuat, tardoq; sepulta ueterno  
 Ingenia, ad uerum suscitet ipse diem.  
 Hoc Zephyro fragilis medio uolet æquore puppis,  
 Contingens portus inuiolata suos.  
 Et quia non uni terrarum allabitur oræ,  
 Linguarum uarios det quoque nosse sonos.  
 Nequa uoluptatem labes, neue inde uoluntas:  
 Segnior, aut stultos ulla cupido uocet.  
 Omnis linguarum stupio doctrina iuuatur,  
 Siue prophana libet discere, siue sacra.  
 Denique sit cunctis doctoribus illa facultas,  
 Quorum opera hæc nobis percipienda pater.  
 Ut tencros ipsi forment his artibus annos,

Ac his incultos moribus erudiant:  
 Quis magnumq; tuum celebretur nomen, & olim  
 Augeſcat nati myſtica turba tui:  
 Verbum hoc uulgetur, propageturq; per orbem,  
 Monſtratur miſeris unde ſalutis iter:  
 Quæq; ſalutares ſint omnibus, atque ſalubres,  
 Inprimis patria commoda multa ferant.  
 Hæc ſunt quæ petimus: quæ tu Pater optime nobis  
 Per CHRISTI imperti nomina ſancta tui.

GEORGII FABRICII.

**A**ſme Deus, rerum cui ſoli ſumma poteſtas,  
 Neſcius occaſum, nullo deductus ad ortu,  
 Natorum eximio non dedignatus honore  
 Indignum genus humanum, quod dulce parentis  
 Dat tibi nomen, eoq; iubet te ſponte nocari:  
 Aſpice quæis rapitur mortalis uita procellis,  
 Expoſita inſidijs, admiſſis obruta culpis,  
 Quæq; nequit minimum pugnando repellere telũ.  
 Inſtat ei uarijs hoſtis teterrimis armis,  
 Exitium ante oculos monſtrans, crebriq; tremorem:  
 Cuius nulla quies oculis, nulla ocia factis,  
 Vt fraude incautos euertat, clade nocentes,  
 Huic pugnant mundi illecebræ, blandiſſima regna,  
 Quæis miſeri magno toties ſuccumbimus auſu.  
 Tum caro nos infrenis agit: ceu turbo ſauillam  
 Diſijcit in membris etiam importuna tenellis.  
 Hæc iuſſis aduerſa tuis, legi q; repugnans,

Vincere

Vincere nec mundum, nec demonia vincere nouit:  
 Tota immunda, pio nisi sit conspersa curore:  
 Totaq; cæca, sacro uideat nisi lumine lumen  
 Admonitu quoties puerilem talia mentem  
 Terrent monstra, stupent fragiles in pectore uires,  
 Et fluit ex angui gelidus de corpore sudor.  
 Ergo præcipuum paruis tu suffice robur,  
 O' Deus & rabido minitagtem dente leonem  
 Frange tuis armis, nobisq; eadem arma ministra,  
 Fortibus in Christi solatia querere uerbo.  
 Inde tuo teneras forma spiramina mentes,  
 Improba quò uitent perituri gaudia mundi,  
 Gaudia mæstitiam subito trahitura perennem.  
 Tu nos in primis, primis rege Christe sub annis,  
 Et rege postremæ quoque tempora sera diei,  
 Cum senibus uolucris rapidus sol occidit orbe.  
 Tu Dominus seruos, & tu Pater aspice natos,  
 Supplicibus ueniam præbe, festisq; uigorem.  
 Ac quamuis digni pœnis habeamur, & orco,  
 (Nam quæ supplicium mortalia facta perenne  
 Non meruerunt?) tamen meritis tua gratia parcat.  
 Nostra procellosi superant delicta profundi,  
 Nubiferis alis quos colligit auster arenas:  
 Ast ea tu chari dempsisti sanguine Nati,  
 Ut certo afflictis reserares pignore cælum.  
 Heu quam sepe sua mens angitur impia labe,  
 Deficiuntq; omnes exhaustæ pondere uires:

i

s

Sed

Sed tua nos bonitas fido sustendet ubiq;  
 Auxilio, & pietas tot per peccata labantes  
 Subleuet, ac fractas diuina potentia uires  
 Restituat, nostros q; leuent tua dicta dolores.  
 Mitte adeo nobis promissi numina flatus;  
 Qui sacri in pauidis ardorem mentibus ignis  
 Excitet, & penitus coelestem inspiret amorem:  
 Ut mens grata tuos cantando extollat honores,  
 Vtq; tot meritis memorem se præstet amore  
 Atq; Dei atq; hominum tandem Deus & pater adfuit  
 His precor auxilio, quos uincula dura ligatos  
 Includunt, cæcæq; premunt in carcere noctes,  
 Quos metus atque horror nigris circumsonat alis:  
 His ser opem, uarijs quos longum uexat egestas  
 Acrummosa malis: quos moribus, & ipsa fatigat  
 Mors inconcussa perumpens cuncta securi,  
 Nec patere insanis succumbere fida tyrannis  
 Pectora, quæ Christi; crucem meritumq; fatentur.  
 Denique queis toto nullum solamen in orbe,  
 Omnes custodi, retine, solare, gubernare:  
 Ut quos omnipotens olim tua dextera fecit,  
 Hos etiam ad patrij ducat fastigia regni.

P V E R P O E N I T E N S .

A vdiui præcepta mei, tua iussa, magistri  
 O Deus: audiui iussa seuera tua:  
 Sed qui sit, iussis quod non parere facultas

In me, qui cupio uiuere Christe tibi  
 Cum mens dicta probat, cum se parat ipsa uoluntas.  
 In membris pugnat dissona secta meis.  
 Non opus arbitrij est hominis, non gloria carnis,  
 Aut sapere, aut minimum posse uidere bonum.  
 Vnde igitur uitæ ducam primordia sanctæ,  
 Vnde tibi placeam mi Domine atq; Deus?  
 Posse placere tibi, tua gratia: posse probare  
 Se tibi, tu tribuis: non alij atq; alij.  
 Ergo tibi placeam, te propter, & aspera nati  
 Vulnera, quæ uires sola salutis habent:  
 Auspiciūq; æui ducam melioris ab alto  
 Numine, quod mentes suscitāt atque nouat.  
 Dum nouus accinctusq; tibi tua iussa replebo,  
 Quantum sacra tui numinis aura fouet.  
 Quæ cum destituit, quæ cum se irata reducit,  
 In multum infelix est caro prona nefas.  
 Nil caro, nil hominis sine te speciosa uoluntas,  
 Dedita quæ sathane est, quam tibi Christe magis.  
 Tu tibi me forma, tu me trabe. nam nisi tu me  
 Traxeris, ante meos certa gehenna pedes,  
 Ergo tibi rape me Pater, & tu Nate perennis,  
 Amborumq; unum lumen, & unus amor.

M. ANTONII FLAMINII.

ES V benigne, feruidas  
 Precationes, & mea  
 Ne quaeso uota despice.

Vt terra solis ignibus  
 Hiulca: sic animus meus  
 Afflictus, eger, arridus,  
 Dulcissimum rorem tuum  
 Expectat, o salus mea:  
 Refrigeramentem meam,  
 Metas, dolores, lachrymas  
 Muta perenni gaudio:  
 Vt hæ querelæ flebiles  
 Nutentur in laudes tuas,  
 Et vox agendis gratijs  
 Noctes diesq; personet,  
 Ne quæso more iudicis,  
 Quid egerim, quid dixerim,  
 Quid cogitarim, pondera:  
 Peccata sed mea omnia  
 Tuo cruore deleas.  
 Me uulnere sanet dolor  
 Tuorum, amara mors tua  
 Cordi meo dulcedinem  
 Instillet, ut meam crucem  
 Et fortis & libens feram,

PVER AVDITA CON-  
 cione sacra-

AD. SIBERI

**G**rates tibi Pater Deus, Fili deus,  
 Qui Deus æternum iungis & aura duos,  
 Eccle-



Ecclesiam quod muneratus es tuam,  
 Quo maius Verbo nil, meliusq; tuo:  
 Ex quo benignum animum datur cognoscere,  
 Arcanum mentis consiliumq; tuæ.

Quidquid sumus malum est, malos malè perdere  
 Et poteras, sed non mors tibi nostra placet.

Ergo tuum das filium Pater, lauis  
 Nate cruore Deus crimina nostra tuo.

Sanctosq; sancte reddis ipse Spiritus:  
 Quæ ueniunt uerbo munera cuncta tuo,

O subige duri pectoris noualia,  
 Mollis ut excipiat nobile semen ager:

Patientiamq; perferat fructum, furor  
 Humanum mundi dum regit omne genus:

Vt agam tui de regula uerbi omnia:  
 Ac mea uita uni seruiat usque tibi.

ASTANS SACRO BA-  
 ptismo.

EIVSDEM.

Concepti uitio, uitio prodimus in auras,  
 Carne scelus, uitium mēte animoq; sumus,  
 Nec spiranda salus, iussu nisi rore beati

Tingamur laticis Christe benigne tuo.  
 Tu lotus sanctum corpus Iordanis in unda,

Omnia fecisti flumina sacra forent,  
 Crimina, lustrali suffusis, cuncta, liquore

VI

Ut uerbum pelagi mergat in ima, tuum:  
 Non aliter Pharo quam subscidit in æquore, tutum  
 Gens tua per medium dum mare carpit iter:  
 Me quoque uti puerum hunc, paulo felicibus ante  
 Christe tua infansem dextera sparsit aquis,  
 Ut, uelut eluuio cum tellus tota periret,  
 Lemechiden seruat lignea capsula Noan:  
 Ipse domus sacrae, quæ Ecclesia, naue receptus,  
 Aeternum lateam tutus in æde tua.  
 Hoc bone Christe tibi da sim pro munere gratus,  
 Utq; tuo uiuam dignus amore tibi:  
 Aetherea clemens, aura me plurimus affla.  
 Sic sacra non frustra fluxerit unda mihi.

A D M E N S A M D O  
 mini accedens.

A D A M I S I B E R I

**B**eaata Christe maximi proles Dei,  
 Iram tua placans obedientia  
 Qui patris, agnus innocens piacula  
 Et tollis, et clausas poli pandis fores:  
 Me pascis ecce, pro salute, corpore  
 Tuo, pependit in crucis quod stipite  
 Nostra: bibendum das mihi, pro criminum  
 Qui fusus expiatione, sanguinem.  
 Peccata quod remissa sint mihi omnia,  
 Quod certius mihi poteris pignus dare!

*Rede*

Redit animus, iam tristis ægrimonia  
 Metusq; cessit, amplius doloribus  
 Nil hic loci, nil hosticæ insolentiae.  
 Fauet pater Deus, benignus aspicit  
 Oculis Pater, non obseratis auribus  
 Fundo preces, Hospes suavis, optime  
 Ergo uenis habitare non modò meo  
 In corde Spiritu tuo, uerbo tuo:  
 Sed carne (taceat ratio) te quoque inferis  
 Carni meæ? uiuis homo Deus in secula,  
 Dubitem ne per te quin caro uiuet necas  
 Grates ago tibi redemptor pro tibo  
 Dulcissimo, suauissimoq; poculo,  
 O' excitatcm Spiritus mentem regat  
 Tuus, regatq; membra corporis fides,  
 Vt dedicans totum tibi me, proximum  
 Amore, quo complexus es nos, diligam.

M. ANTONII FLAMINII

RESV tuorum uulnerum  
**I** Cruore sancto pascere  
 Me queso nunquam desinas.  
 Me sanguis iste roborat,  
 Dulciq; replet gaudio.  
 Hoc est amoris poculum  
 Cœlestis, omnes sordidos  
 Pellens amores: ebria  
 Hac potione mens, sui

Et omnium sit immemor,  
 Quaecunque mundus continet:  
 Deumq; solum cogitet,  
 Tuumq; amorem. feruide,  
 Immense, nulli effabilis  
 Amor, beatis sedibus  
 Tu maximi natum Dei  
 Deducis, ipsiq; induis  
 Mortale corpus: asperam  
 Dein tollis illud in crucem.  
 Amabilis, dulcissime  
 Amor, meis insensibus  
 Tantas amoris excita  
 Flammās, ut ustis nexibus  
 His ponderosi corporis,  
 Alis tuis ad optimum  
 IESVM beatus aduolem.

## DEI BENEFICIA IN SE & cæteros mortales præ- dicans.

EIVSDEM.

IESV beate, numinis  
 Aeterna proles maximi,  
 Quibus tuam clementiam  
 Efferre possim laudibus  
 Tu pulchra linquens sidera,

**Formata**

Formata dextera tua,  
 Mortale corpus induis:  
 Ut ipse terram deserens,  
 Suprema coeli culmina  
 Conscendam, acerba uulnera,  
 Crucisq; dira sustines  
 Tormenta, ut ipse callidi  
 Serpentis ore saucius,  
 Mortisq; certus, gaudeam  
 Vita potius coelitum,  
 Tuoque factus munere  
 Tuus cohaeres. Fac precor  
 IESV benigne, cogitem  
 Haec semper, ut semper tibi,  
 Summoq; patri gratias  
 Agam, pieq; uos colam,  
 Totaq; mente diligam.

**CHRISTO GRATIAS**  
 agens, quodd ad uitam salutis  
 sit reuocatus.

EIVSDEM,

**O** Lux beata coelitum,  
 Mortalium fidissima  
 Tutela, quas agam tibi

IESV benigne gratias?  
 Ut olim aberrans à grege

k

Quis

Ovis mistella, saltibus  
 Formidolosus delitet,  
 Voranda mox rapacibus  
 Feris: miserrimus omnium  
 Sic ipse, per mala omnia  
 Cecus ruebam, candida  
 Cum lux beati Spiritus  
 Tuire fulsit, & uiam,  
 Quæ ducit ad feliciū  
 Aeterna regna cœlitum,  
 Monstrauit. ista lux meæ  
 Mentis tenebras dissipulit,  
 Cordi meo dulcissimi  
 Faces amoris ista lux  
 Infixit: illo ex eo tempore  
 Te sancte totus ardeo,  
 Te quero amore saucius:  
 Videre uultum candidum,  
 Tuis frui complexibus  
 Mens ardet: ipsa iam nihil  
 Te præter unum cogitat.  
 Non sic decentem uirginem  
 Furens amator deperit:  
 Non sic tenellum filium  
 Parens uterq; diligit.  
 Amoris æstu liquitur  
 Cor molle, ut olim seruidis

Percus-

Percussa cera solibus.  
 O flamma mentem frigerans,  
 Omnesq; labe excoquens,  
 Me semper indies magis  
 Incende perge adurere,  
 Consume totum uerteris  
 Me donec in facies tuas.

PVER E' TEMPL O  
 rediens.

GEORGII FABRICII.

**G**ratia magna Dei, laus & uictoria Christo  
 Spirituiq; sacro persoluatur honor.  
 Angelicas inter medius mihi stare catus  
 Visus, & aetherea prosperitate frui:  
 Audiui ut sancti diuina oracula uerbi,  
 Et meritis nullis iustificare fidem:  
 Ut sacra illa suotraſtarier ordine uidi,  
 Quis lauat & pascit pectora nostra Deus.  
 O' maneat fragilis tanto mihi tempore uita.  
 Quam doctrina manet non temerata diu.  
 Viuere quis cupiat sublato munere Christi?  
 Damnatas toties quis uelit ire uias?  
 Pulcra uelut spinas inter rosa surgit acutas,  
 Gloria sic uerbi flore at alma tui.  
 Pendet ut arcia suspensus ab arbore nidus,  
 Currit & ingenti parua carina mari:

h

a

Nec

Nec timet hæc Euros, nec uulturis ille furorem,

Sic tua te maneat uindice salua domus:

Aduersos uincat fluctus, irasq; potentum,

Perstet & auspicijs inuiolata tuis.

Quidquid in hoc cepi, docto spargente ministro,

O cadat in sætam nobile semen humum:

Producatq; suo numerosos tempore fructus,

Et plenæ messes area lata ferat.

” Quæ Christum nouit, quæ præstat commoda multis,

” Hæc meritò dici uita beata potest.

PRECES ANTE CIBVM.

Puer dapifer.

EIVSDEM.

Q Vi dat iumentis, mutisq; natantibus escam,  
Non solito pascat corpora nostra cibos

Verum hoc cœlestis munus cognoscite Patris,

O pueri ingratos uindicat ipse Deus.

” Quòd sit diuinæ nutritus munere dextræ

Isacides, grates iam moriturus agit.

Ne uerò, ô socij, uos tanti muneris este

” Immemores: res est spernere dira Deum.

Non lutulentus uti ruit ad præsepia porcus,

In data sic auidas mittite dona manus,

Nec lacerate, uelut prædam sæui ira leonis

Barbarus alterius præripit ore dapes.

Conuenit huic autem pudor atq; modestia mensæ:

Turpe



Turpe gula & nimio corda grauare mero.  
 Arma neci multos demittunt, crapula plures:  
 Luxuria ingenijs est inimica bonis,  
 Sobria uita decet studiosos, sancta professos  
 Christum, cui nostri est turba dicata gregis,  
 Agrestes primum socij componite mores,  
 Incipiat sanctas postea lingua preces.

## PVER ADMINISTER.

GEORGII FABRICII.

**A** T quàm lingua preces grato conceperit ore,  
 Hæc animus reputet facta stupenda pius.  
 Per panem ueteres soliti iurare, salemq;  
 Maxima mensarum iura fuisse docent.  
 Mensa sacra est, mensis Deus asidet ipse suorum:  
 Sanctificatq; pijs, quas creat ipse, dapes,  
 Ipse Deus mensa Mamræa in ualle recumbit,  
 Gaudet & humanas hospes adire domos.  
 In mensa Christus latices in dultia mutat  
 Vina, stupet uersas hydria grandis aquas.  
 Dumq; uenit mensis blandus conuiuia cupitis,  
 Quas Matthæe struis, quasq; Zachæe struis:  
 Has etiam pede dexter adit, uultuq; serenat,  
 In quibus ista Deo turba dicata sedet.  
 Hospitis ô pueri moueat præsentia talis,  
 Ut dentur sanctæ supplice mente preces,

h

3

PVER

PVER ORANS ANTE  
cibum.

EIVSDEM

**C**orpora nostra Deus tu pascere salubrib. escis,  
 Qui pascis unus omnia.  
 Pascendumq; cibo patria benedicito dextras  
 Nam dextra præbet hunc tua.  
 Ad positas mensas sic accedamus, in illis  
 Ut dona noscantur Dei.  
 Altera mox istis superadijce munera donis,  
 Qui corda nutriet, cibum.  
 Corpora pane dato saturantur: pectora uerbo,  
 Quod ore prodit de tuo.

PVER MAZONOMOS.

IOACH. CAMERARII.

**O**mnipotēs genitor, mūdi quadruplicis autor,  
 Cuius quod fecit continet omne manus.  
 Qui pictam æria pascis sub nube columbam,  
 Suppeditans uictus tempore quoq; suos  
 Piscis in æquoreis per te non interit undis,  
 Inuenit et muto quem legat ore cibum.  
 Quidquid habet tellus, per te genus omne ferarum,  
 In præfinito uiuit, agitq; loco,  
 Vere nouo serpens cæcis prosibilat antris,  
 Antè tamen brumæ frigore nutrit humus.

Quid

Quid memorem núbili, cōtemta animalcula, uermes,  
In ferro, saxi, gramine, fronde, luto?

En dapibus, plenis paruus, tua numina, mensis  
Grege uocat, infanti te canit ore Deum.

Qui factos facis esse tuos, quos educat alma  
Dextra: his perpetuò fac pater esse uelis.

### CHORVS PVERILIS.

EIVSDEM.

**H**Acc tua sancte Pater diuine munera dextre  
Que das, paruo iterum des alimenta gregi  
Per te sublimes spectamus sidera uultu,

Per te agit æthereus corpora nostra uigor.

Per te præteritos feliciter egimus annos,

Quod superest, per te fac bene tempus eat.

Sic ut præcipue te casta mente colamus,

Æternumque Deum, propitiumque patrem.

Vtque tuum nullus peruertat casus amorem,

Duret amor, inustus duret amore timor.

O Pater, igne tuo pueriles ure medullas,

Te præter sapiat mens nihil, ora sonent.

Excipiat nostræ cursum tua gloria uite,

In laudes studium desinat omne Dei,

Hæc est summa Pater uoti sanctissime nostri:

Cætera sollicitos nunquam habuere nimis.

Tu tamen et uestes nobis, uictumque ministras,

Et quibus hæc alijs tempora rebus egent,

Que nondum gnaris querendi sudgeris ultro,

Nullus erat nobis ista parare labor.

Néue quis addubitet, promissa fideliter addis,

Promissa exemplis nobilitata suis.

Nostros ergo animos leuis horum cura fatigat,

Stultè sollicitos de quibus esse uetas.

Hec dabis illa, preces, ut des, Pater accipe nostras,

Vtiliter tantum nos ale sancte tibi.

PHILIPPI MELAN-  
thonis.

„ **H**is epulis, donisq; tuis benedicito Christe,  
Vt foueant iussu corpora fessa tuo.  
„ Non alit in fragili panis modo corpore uitā:  
„ Sermo tuus uitæ tempora longa facit.

EOBANI HESSI.

**T**E Pater obseruant oculis, in te omnia sperant,  
Que uitalis adhuc luminis aura fouet.  
Et tu respiciens tribuis sua pabula cunctis,  
Distribuens escam tempore cuique suo.  
Mox ut aperta manus patuit tua, fundis in omnes,  
Omnia quæ uiuæ tempora lucis habent.  
Atq; ita quando uoles, dextra tua munera aperta  
Diuidis, et satias, quæ uoluere, bonis.

IACOBI MICYLI.

**O**Mnia qui pascis, quæ totus continet orbis.  
Qui pascis modico millia multa cibo:  
Aspice sancte pater labentis tempora uitæ,  
Atq;

Atque hæc filiis annue dona tuis,  
 Vt quibus hic iterum fragiles reparabimus artus,  
 Sumamus grata uina dapesq; manu.

VITI AMERPACHII.

**C**onditor & rector magni pater optime mūdi  
 Huc ades, & donis auxiliare tuis.  
 Nate Deo, nostræ reparator Christe salutis,  
 Vt cibus, ut positus fac bene potus alat.  
 Et tu sancte comes, dux solatorq; piorum  
 Spiritus, huic mensæ mitis adesse uelis.  
 Corpora sic rectè pascentur nostra, nihilq;  
 Languida sic poterit ledere membra mali.

ANDREAE ELLINGERI.

**A**lme rex, æterne factor  
 Omnium rerum Deus,  
 Cuius in benignitate  
 Spirat omne, quidquid est:  
 Cuius & numen requirit  
 Quidquid aura uescitur.  
 Quiq; das escam salubrem  
 Cuiq; in apto tempore,  
 Dextramq; pandis implens  
 Omne uiuens gratia,  
 Corporis præbens abundè  
 Nutrimenta commoda:  
 His Pater benigne donis  
 Quæsumus benedicito:

h

s

Que

Que tua de largitate  
Sumimus, Christum tuum  
Filium per unicum, quo  
Parta nobis est salus,

CHRISTOPHORI SCHELLEN-  
bergij.

**A**D Dominū te cuncta oculos animalia tollūt,  
Expectantq; tuæ dona benigna manus,  
Tu tempestiua victum largiris in hora,  
Omnia tu saturas exhilarasq; cibus.  
Alme Deus nobis benedic, & redde salubres,  
Quas capimus, largé te tribuente dapes.  
Non lauta humanam sustent aut fercula uitam,  
Sed quæ diuini uox uenit ore Patris.

BOHVSLAI HASSENSTENI.

**A**Rbiter ô rerum, nostræ spes unica uite,  
Nos tibi deuotum sanctifica populum.  
Sanctificaq; tuo concessum munere potum  
Huic mense impositas sanctificaq; dapes.  
Fac satiati hymnum pura tibi mente canamus,  
Vt tua laus nostra semper in ore sonet.

CHRISTOPHORI AVLAEL.

**A**Lme Pater quōdā tua qui documēta sequēti  
Pauisti modico millia multa cibo:  
Verbo redde tuo nos dignos sumere dona,  
Præstitit indignis quæ tua larga manus.

MEDI-

MEDITATIO ACCVM-  
bentis ante cœnam.

GEORGII FABRICII.

**T**Empore quo positis recreantur corpora mēsis  
Claudere finitum sole parante diem,  
Discipulis CHRISTVS corpus dedit atq; cruorē  
Sub specie potus, sub specieq; cibi:  
Aeterni pignus linquens moriturus amoris,  
Nos alios uera iussit amare fide.  
Succurrant memori tua facta salubria menti.  
Inq; meo inueniant pectore CHRISTE locum.  
Te mea mens solum meditetur, & ora loquantur:  
Grata pie laudes sunt holocausta Deo.

ANTE PRANDIUM.

EIVSDEM.

**Q**ua nos ad solitas hora contendimus escas,  
Atq; auido cupimus dente leuare famem,  
Illa damnatus patrum populiq; furore  
Scuitiam Christus portat, onusq; crucis,  
Inter & eductus rabido clamore latrones,  
Pro nostro innocuus crimine noxa fuit.  
Pro meritis ualeo quando nil tradere tantis,  
Fac tibi inoblita carmāna mente feram.  
Vtq; tuam statuam partam mihi morte salutem:  
Grata Deus possit pectora, fida probat.

IOAN.

## IOANNIS CELLARII.

**S**umpturi positas dapes, caducis  
 Præbentes alimenta grata membris,  
 Ad te summe Deus, Paterq; noster,  
 Ad te corda, oculos, manus leuamus,  
 Et grato celebramus ore tanti  
 Autoremq; pium boni, & datorem.  
 Nam quocunque oculos mouemus, ecce  
 Dulcis signa tui fauoris adsunt.  
 Tam larga benedictione ditas  
 Te uera populum fide professum.  
 Tu nobis quid opus sit & necesse,  
 Et scis, & patrio pius fauore  
 Iustas suppeditas Parens ad horas,  
 Figmentum manuum fouens tuarum.  
 O æterne Deus, fouere corpus  
 Non tantum cupias cibo caduco,  
 Escam des animæ suam, tuiq;  
 Nos uerbi recrees cibo perenni.  
 Da rectè tibi corda nostra fidant,  
 Da rectè tibi uita nostra uiuat.  
 Da postcuncta mali pericla mundi  
 Porta perpetuæ frui salutis,  
 Quam natus proprio tuus cruore  
 Seluator peperit suis IESVS.

ADA-



## A D A M I S I B E R I.

**A** T tollunt ad quem, uiuunt quæcūq; Creator,  
 Lumina sperati cū uenit hora cibi:  
 Qui largus cunctis præbes animantibus escā  
 Atque penū gratis diuite promissis opes,  
 Mentibus ut lætis saturæ nil crastina curent,  
 Et munus faciant officiumq; suum:  
 Aspice nos propius, trahimus qui semina mentis  
 Cælo, quò Christi morte redire datur.  
 Aspice & has epulas, tua quas dat gratia, membris  
 Esse salutes alme iubeto Deus.

## H E R M A N N I B V S C H I I.

**Q** Væ nunc sumemus membris alimēta caducis  
 Hæc Deus imperio sint benedicta tuo.  
 E V R I C I I C O R D I.

**P** Restita diuinò nobis alimenta fauore  
 Autoris dextra sint benedicta Dei.  
 I O A N N I S S T V R N I

**C** Hriste sacrata uelis hæc nostræ munera mense  
 Numine cuncta tuo Christe sacrata uelis.  
 I O A N N I S G I G A N T I S.

**F** Ac tua Christe pijs accedat gratia mensis:  
 Vt noscant superas pectora nostra dapes.  
 N I C O L A I B O R B O N I I.

**O** Deus, appositis, apponendisq; precamur,  
 Et nobis placido numine dexter ades.  
 P V E R

PVER ORANS POST  
cibum.

GEORGII FABRICII.

**N**ostra quod exhibito pauidisti corpora pater,  
Laudes tibi persoluimus.  
Accipe pro meritis, grati suspiria cordis,  
Linguaq; supplicis precēs.  
Ora cibos hausere, aures cœlestia uerba:  
Refecta mens & corpus est.  
Tolle famem nostris, & tristia cuncta diebus  
Da leta patis tempora.  
Et tua cotidie nobis bona cœlitus auge,  
Nosq; esse gratos effice.

PVER TAMIAS.

IOACHIMI CAMERARII.

**P**ostquā exempta fames, epulisq; fugata recessit,  
Ad studium redeat paruula turba suum.  
Da pater, alta tuo tibi munere corpora crescāt  
Vna sit, imperium, cura, obijssse tuum.  
Neu tua cum mereant ara, haud tua iussa capeffant,  
Quod iubeas faciant, quodq; uetes fugiant,  
Sic in concordia degat mens corpore, & una  
Cum ueniet, tecum sit sine fine, dies.

CHO.

157  
CHORVS PVERILIS.

EIVSDEM

**Q**visquis es, in quacūq; manes regione, locoq;  
Et quaecunq; tuæ nomina gentis habes.

Seu tibi primus adest rediuiuo lumine Phœbas,

Lotus ab æquoreis conspiciendus aquis:

Siue uides labi postremum in Tethyos undas,

Seq; agere ante diem, post tenebrasq; sequi,

Aut latere in læuo mundi, dextroue locatus,

Inde calore frequens ureris, inde gelu:

Mente, Deo & laudes quid cessas dicere uocet

Ore, animo, cunctos hunc celebrare decet.

Nam pater est, & nos auditq; uidetq; benignus,

Et fouet imposita uulnera nostra manu.

Subleuat iste graues qua mansuetudine casus?

Quidquid agit, nihil hoc mitius esse potest.

Ecce cibum, quem nos nunquam quæsiuimus, offert,

Et uitæ ignaros ueste domoq; tegit.

Atq; hæc non mutanda Dei sententia constat,

Quæ se huic credentibus posse perire negat.

Ergo simul lenis Pater est, ueraxq; bonusq;

Protegit hic, quis nos quem metumamus erit?

Nec sibi pro tantis meritis quicquam ille rependi,

Quàm bene factorum commemorasse iubet.

Namq; aliud nihil hic, unus qui cuncta creauit,

Quàm grati laudes cordis, & oris amat.

ALIVS

## ALIVS CHORVS.

EIVSDEM,

**H**ic magni adesto parue grex, patris proles,  
 Magni patris, magni Dei.  
 Christo sacer, deuotus & duci Christo,  
 Laudes feramus numini,  
 Versus canamus blasulo leues ore,  
 Carmen, Melos, Cithara, Lyra.  
 En per benignè debito cibo accepti  
 Redimus & deest nihil.  
 Igitur aues gutture sonante, coelestes  
 Complere certantes domos,  
 Sursum deorsum, & in uices uagabundas,  
 Scipias studentes uincere,  
 Frustra uidemus? & sua feras uoce  
 Faterier opificem Deum?  
 Mutum nihil, tacitum uic, cuncta uel uocem,  
 Vel signa uocis edere.  
 Vt piscium leuis salit profundo gens  
 Annis, maris uic in gurgite,  
 Et sese in auras librat, ac recipit intro,  
 Et quo datur laudat Deum.  
 At nos opus pulcerrimum Dei nostri,  
 Vox mente quibus ab intima  
 Venit, nec ore uana nascitur summo:  
 Nos ergo quid tacebimus?

Istamq;

Istamq; laudem bestijs relinquemus

O turba particeps Dei.

Minime tacebimus: decetq; nos brutis

Præstare, natos & suum

Colere parentem: gratias agere magnas

Pectoreq; uoceq; consona,

Pro tot beneficijs, & innumeris donis,

Quorum ille nobis autor est.

Quod uescimur uitalibus homines auris:

Hoc munus est primum ipsius.

Dein, quod ipsum agnouimus Deum æternunt

Beneficium est primum.

Pulcerq; uiribus quod integris sexus,

Nec alterum sumus genus:

Quod unde edamus, uestiamur & confert:

Et discimus quod litteras:

Nec corporis bonis, nec ingenij expertes

Ignobile æuum degimus.

Quid hæc, quod educamur ad decus uitæ,

Christiq; usus Ecclesiæ,

Ineruditam degimus nec ætatem,

Quæ laudis est occasio?

Quare agite, pro se quisq; concelebrate,

Quibus potest Patrem modis,

Et ad suum redeat opus alacri mente:

Sic sic pater noster iubet.

l

PHI-

PHILIPPI MELAN-  
thonis.

**P**ostquam epulis exenta fames, mensæq; re-  
mota:

Dicemus grates nos tibi summe Pater.  
Non hæc humanas vires alimenta iuuabunt,  
Diuina si non hæ foucantur opæ.  
Namq; tuo uiuunt agitata à numine cuncta,  
Afflatu spirant cuncta, ualentq; tuo.  
Cumq; epulas dederis rerum Pater optime nobis,  
Adde epulis vires pro bonitate tua.  
Nunc etiam gratis animis alimenta ministra,  
Atq; immortalis pectora pasce cibo.  
Et quia cura sumus tua nos Pater optime, serus  
Et studia, & uitæ tempora cuncta rege.

E O B A N I H E S S I.

**H**ic agite ô fassi cœlestia munera, laudes  
Et pueri grata dicite uoce DEO:  
Omnia qui immensa bonitate animalia pascit;  
Semper enim bonus est, semper & esse studet.  
Qui sua iumentis dat pabula, dat sua pullis  
Coruorum, querula quando ea uoce uocant:  
Non huic robure qui placet in fera bella ruentis,  
Non iuuat hunc fortis tibia crassa uiri.  
Ipsam qui timere placent, hos diligit ultro,  
Quicumq; ipsius spem bonitatis habent.

IACO-

## IACOBI MICYLII.

**C**orpora qui solito satiasti nostra cibatu,  
 Qui satias toto quidquid in orbe manet:  
 Pasce tuo, Genitor, mortalia pectora uerbo,  
 Nostraq; celesti nectare corda riga:  
 Quò pariter membris, pariter quò mente refectis,  
 Vsq; tua liceat nos bonitate frui:  
 Tandem etiam placido uectos super æthera cursu,  
 Inter felices astra tenere choros.

CHRISTOPHORI SCHELLEN-  
 bergij.

**P**ostquam repulimus dapibus ieiunia sumptis,  
 Munifico gratès dicite quisq; DEO.  
 Nam mitis Pater est, & nos bonitate parenni  
 Pascit, cumq; animis corpora nostra fouet.  
 Qui dat abundanter, quod edant animantia cuncta:  
 Qui curat bruto pascua leta gregi.  
 Quiq; suam coruit implumibus exhibet escam,  
 Gutturè quando uocant esuriente cibum.  
 Rex cœli, & Dominus terreni maximus orbis,  
 Non acris magno robore gaudet equi.  
 Firma iuuant illum non internodia crurum,  
 Brachia non uasti crassa Gigantis amat.  
 Omnibus ex rebus pietas est summa uoluptas.  
 Hi cordi & curæ sunt tibi summe Pater,  
 Qui te corde timent puro, & tua iussa capeffunt,  
 Et tua spe pleni dona fideq; petunt.

**H**æc Deus ælme tibi, per Christi nomen Iesu,

Pro cunctis canimus carmina grata bonis:

Corpora qui nutris epulis, & pectora uerbo:

Qui uiuis, regnum quiq; perenne tenes.

ANDREAE ELLINGERI.

Confitemini, decetq;

**C**Quas, Deo persoluite

Mente recta, corde puro,

Laude grates cum pia:

Cuius infinita semper

Est, eritq; gloria.

Qui suas ministrat escas

Omnibus uiuentibus,

Et manu fouet benigna

Membra passim languida,

Nutrit omne quidquid ambit

Trina rerum machina.

Qui cibus iumenta pascit,

Leta fundens pabula:

Quiq; pullos inuolucres

Alitis fouet nigri,

Dum relictis uoce mœsta

Cœlitus uictum petunt.

Non placet Deo ualentis

Robur aut uirtus equi,

Tibiæ nec huic superba

Vilius



Vilius placent uiri.

Hos amat, quorum recumbit  
Spes in ipsum cum metu.

Ergo nunc mensis refecti  
Affatim, grates tibi  
Summe rerum fabricator  
Dicimus, Christo, in tuo  
Filio, regnante tecum  
Seculorum seculis.

BOHVSLAI HASSEN,

stenij.

**Q**uod cerere et potu pleni sumus, ipsaq; quod  
Viscera quesito sunt saturata cibo: (iam  
Laus tibi Christe Deus, mundi uenerande redemptor.  
Qui mare, qui cœlos, qui Phlegethonta domas.

CHRISTOPHORI AVLAEI.

**Q**uod sumus et dapib. modo te tribuēti refecti  
Nostra tuo q; est munere pulsa sitis,  
Pectora sanasti quod diuino intima uerbo:  
Gratia pro donis sit tibi CHRISTE tuis.

IOANNIS CELLARII.

**P**ost sumptas epulas, pio Parentis  
Cœlestis repetemus ore laudes.  
Sed quæ carmina digna te canemus,  
O fons perpetua fluens salute?  
Ah tantis meritis tuis minores

l

3

Laudes

Laudes sunt hominumq; & angelorum.  
 Tu nos ad faciem tuam creasti:  
 Nos per uulnera Filij beasti.  
 Vu nos uoce tui potente Verbi  
 Ad regni illecebras tui uocasti.  
 Tu carnem reprimis malam, tuoq;  
 Nos sancto renouas regisq; Flatu.  
 Tu sæui rabiem premis Draconis,  
 Qui nostræ insidias struit saluti.  
 Et sanctos uigiles tuos ministros  
 Pro Christi facis excubare coetu.  
 Nos seruas & alis, parans abunde  
 Que uite fragilis requirit usus.  
 Quid multis? super astra gloriose  
 Et terras tua dona prædicantur.  
 O porro Deus, ô tuo fauore  
 Nos complectere, nos Deus tuere.  
 Sic nomenq; tuum, tuasq; laudes  
 Aeterna resonabimus camæna.

## VITIAMERPACHII.

G Ratia magna tibi Pater, & rex inclyte rerū,  
 Quod nobis larga das alimenta manu.  
 Sit CHRISTO, sit pro tantis par gratia sancto  
 Spiritui meritis, muneribusq; suis.  
 Hæc adeo, uitam ne tam uideare dedisse,  
 Quam seruasse datam, cura paterna tua est,

Sic

Sic homines timeantq; tuum uenerabile numen,

Et credant uerbis CHRISTE benigne tuis.

# ADAMI SIBERI.

**Q**ui das iura polo, terræ, pelagiq; profundo,  
Quæq; in eis uiuunt pascis, alisq; pater:  
Pabula iumentis qui præbes, pabula pullis

Coruorum, qui te uoce gemente rogant:

Non te robur equi, non te iuuat ardua ceruix:

Non tibi membra placent, cruraq; firma uiri.

Sunt tibi grata, tuum metuunt quæ pectora numen, ”

Spes omnis quibus est in bonitate tua. ”

Qualia, nunc quoniam cepit tua munera corpus,

Si dederis, dederis omnia summe Deus.

# HERMANNI BVSCHIL.

**Q**uod sumus utilibus dapibus, potuq; refecti:

Laus tibi pro donis sit Deus alme tuis,

# ERICII CORDI.

**D**ebit: qui corpus largito pane refecit:

Et uerbo mentem recreet ille suo.

# IOANNIS STVRNI.

**P**urima pascenti referatur gratia CHRISTO:

Pascentem large gratia larga manet.

# IOANNIS GIGANTIS.

**Q**ui largo corpus potuq; ciboq; refecit,

Pascat & aeterno pectora nostra cibo.

## NICOLAI BORBONII.

**Q**uas agimus grates leta Pater accipe fronte,  
 Qui nobis larga das alimenta manu.  
 MEDITATIO SVRGENTIS post cœnam.

## GEORGII FABRICII.

**C**um satiari requiem spectamus, et ocia fessi,  
 Iamq; die cessat pretereunte labor:  
 Discipulo prodente, furenti traderis hosti,  
 Discipulis promens dicta sacrata tuis:  
 Ac mox sanguinem missurus corporis imbrem,  
 Angeris, et nostro Christe dolore doles,  
 Fac doleam ex ima propter mea crimina mente,  
 Nec peccata malum suspicere esse leue.  
 Pœniteam, et uitæ linguam malefacta prioris:  
 Non magis est, si quem pœnitet, ille nocens.  
 POST PRANDIUM.

## EIVSDEM.

**C**um cœli medium lustrat sol aureus axem,  
 Membraq; sunt sumpto nostra refecta cibo:  
 Ipse sitit Christus laceratus, et in cruce pedes  
 Transfit et immeritum uulneris hasta latus.  
 Mœsta elementa gemunt, roseū sol occulit orbem,  
 Quassantur moto saxea claustra solo,  
 Heu mihi, non tangunt gelidos cur et alia sensus?  
 Cur tantum in fragili pectore frigus mest?  
 Christe moue tu corda, sacro ut rapiantur amore:

Sat

Sat tibi pro fuso sanguine, solus amor.

PRECATIO MERIDIANA.

M. ANTONII FLAMINII.

**I** Am sol citato sidere  
 Suprema cœli culmina  
 Percurrit, alma feruidis  
 Tellus calefcit ignibus:  
 At tu beato lumine  
 Accende corda frigida  
 Pater benigne, et omnibus  
 Tantos piorum sensibus  
 Ignis amoris excita:  
 Ut quicquid orbis continet,  
 Præ te sit illis sordidum,  
 Nec ulla uis hunc feruidum  
 Amoris æstum temperet:  
 Sed usq; crescens, omnia  
 Conuexa cœli transuolet,  
 Summoq; Patri uinculo  
 Nos iungat insolubili.  
 Has uos ab imo pectore  
 Precationes mittimus  
 Tuas ad aures, maxime  
 Terræ poli q; conditor:  
 Tu uota nostra numine  
 Dextro secunda: idq; ad tuam  
 Concede nobis gloriam.

l

s

PVER

PVER PRAEFECTVS  
ad socios ludentes.

GEORGII FABRICII

**P**ost studia ô pueri, concessa hæc ocia nobis,  
Vt fiat lusu dulcior ipse labor.  
Adproperate, Deus nobis hæc ocia fecit:  
Vocem eius, ludi (credite) rector habet.  
Ludite iam socij, non est meminisse laborum  
Nunc locus ingenuis conuenit hora iocis.  
Ludite: uerum absit petulantia, iurgia, clamor:  
Ingenium præceps arguit ira ferum.  
Vt quondam puerum audistis luisse Tobiam,  
Cursaret cæci cum patris ante pedes:  
Grandæuoq; satum ridentis uiscere matris,  
Qui tulit Abramo gaudia multa seni:  
Vt lusit, nondum raptus, carum ante parentem  
Prima Canopæi fama decusq; soli.

PVER A' LVSV RE.

UOCANS.

EIVSDEM.

**L**udendi tempus non ultra extendite metam,  
O socij pueri.  
Elapsum tempus nunquã reuocatur, & ætas  
Fluminis iustar abît.

Qvod

Quod lusus agitat, breue sit: quod seria, longum:

Lex ea fixa Scholæ.

Iam repetatur opus, rediêre in corpora uires,

Mensq; leuamen habet.

Ergo preces reuocate pias, reuocate labores,

Quod monet hora breuis.

Sic nostrum Christus coetumq; scholamq; gubernet,

Et fuget omne malum.

Cuius nos purgati undis, & morte redempti,

Turba pusilla sumus.

## PVER INSPECTATOR morum & studiorum.

EIVSDEM.

**M**Vnere quisq; suo pueri fungamur, honore  
Deo & magistris debitoi

Lumina nemo Dei fallit: celare docentes,  
Sed non latêre possumus.

Assidui, & nullo sumus cogente modesti:

Deus intuetur ipse nos.

Tempore prescripto faciamus cuncta, locoq;

Aptoq; rebus ordine.

Impius est, quisquis sancitas spernere leges

Molitur ausu noxio.

Sed ne quid nostris tribuamus uiribus: alti

Opem uocemus numinis.

Sanctæ

Sancte parens, æstus puerilis comprime mentis,  
 Tuo sacrato Flamine:  
 A'te ne cursus studiorum deuiet usquam,  
 Cæcis aberrans gressibus.  
 Sit simplex nostræ sinceræq; semita uitæ:  
 Te lingua, pectus, os colat.  
 Exempto nulli prauo noceamus, eisdem  
 Discamus artes seduli.  
 Nêue ignaua datum uiciet rubigo talentum,  
 Inferuiamus omnibus.  
 Donum quisq; suum pueri, tibi, Christe, dicamus,  
 Tuæq; sanctæ Ecclesiæ:  
 In qua dum liceat modò uiuere, summa tenemus,  
 Nec æstimanda munera.

PVER DECVRIO ORANS  
 pro socijs.

Vx aterna Dei summi, mens alma parentis,  
 Christe huius custos atq; patrone Scholæ,  
 Respice ad exiguas operas, paruosq; labores  
 In studijs pictas quæ tibi nostra locat.  
 Membra tui sumus coetus et uasa fauoris,  
 Quàm uiget in nobis spiritus iste diu.  
 Incipiens à te labor omnis, desinat in te,  
 Inq; tuo totus numine proffer eat.  
 Sed quia mens iussis diuinis cæca repugnat,  
 Teq; ardore boni patris amare nequit:

Turbi-



Turbida corruptæ sic organa perfice mentis,

Discat ut obsequijs læta uacare tuis:

Inq; bonis molles exercens artibus annos,

Per uitæ tempus seruiat omne Deo.

Auerte à teneris, ne quid studia ipsa moretur.

Ingenijs labem, corporibusq; lucem.

Nos pro tot meritis & tantis effice gratos,

Quæ tua largifluo dat sine fine manus,

Te discant per nos etiam nouisse nepotes,

Et capiant studij præmia iusta pij.

E nostris aliquid spiret uocale sepulchris,

Præstita perpetuò quod benefacta canat,

ALIVS.

**E**X paruis cuius membris Ecclesia crescit,  
Sancte Deus, parui maxime mure gregis,

Aspice ad has operas sociorum, qui tibi gratiæ

In studio exercent atq; sequuntur opus.

Ingenia ipsorum diuino numine firma,

In cœtu ut uigeant corda pudica tuo.

Officium faciant non segniter, omne repellant

Quodcunque ingenuis artibus obstat onus.

Vt quodcunque uocas ad munus, cura placere

Sit tibi, sitq; tuo cura studere gregi.

ALIVS.

**T**Empore conatus ne quo puerilis aberret,

O pater, innocuas dirige magne uias.

Néue tua sine luce uagi dubij ne feramur,

Mentem

Mentem Christe bonis moribus adde piam.  
 Néue rapax mundi teneros absorbeat æstus,  
 Præmia sit flatus aura secunda tui.  
 Omnia sunt operata tibi, mens, uita, laborq̃,  
 Ad superam donec nos uocet hora domum.

## ALIVS.

**Q**uicquid homo est, præuū est, animus, natura  
 Factaq̃; ab æterno sunt aliena deo. (uolūtas.  
 Talis et à patrio (miserū) produciū ortu,  
 Cum uitæ fragilis lumina prima uidet.  
 Quatenus autem mores ratione sub annis  
 Formet, quāue puer tendat ad astra uia?  
 Certa uia est seruare Dei mandata, Deoq̃;  
 Credere, & in nato uelle placere Dei.  
 Illa fides pura ex impuris pectora reddit,  
 Acceptos eadem nos facit esse fides.  
 Quæ cum sola Deo contingant munera dante  
 Talia, ne uacuos numinis esse sine:  
 Quod renouet mutetq̃; suo mala pectora motu,  
 Corrigat & caro quod perdit a labis habet.  
 Sic tibi sudoris nostri, sic uita placebit,  
 Numinis auspicio sanctificata tui.

## ALIVS.

**O**mnū in hoc uno uersatur summa laborum,  
 Cœlestem toto corde timere patrem.  
 Omnis ab hoc manat præclara scientia fonte  
 Non nescire sui dicta uerenda Dei.

Hanc

**Hanc animis auge doctrinam, illum adde timorem**

**CHRISTE** tui unius numeris ista bona,

**Nos** uerò ad uitæ leges cultumq; uocati,

**In** stadio expetimus fortiter ire sacro.

**Suffice** tu uires: & ne quid euntibus obstet,

**Dirige** nos: omnis te duce plana uia est.

**Tædia** ne uilis capiant nos muneris: id quod

**Mundo** uile, tibi grande placensq; bonum est.

**Exemplum** Ramathæ est ciuis, paruaq; Anathoni,

**Qui** sat habent uni se placuisse Deo,

**Fortes** in misera templi patriaq; ruina,

**Officium** peragunt, non sine laude, suum.

**Premia** cumq; serant pro magno nulla labore,

**Solius** pendent de bonitate Dei.

**Vt** timere Deum, utq; Dei mandata secuti,

**Sic** sunt in regno sidera clara Dei.

**Mercedem** & fidei, coeli plaudente senatu,

**Maxima** fulgentis gaudia lucis habent:

**Nos** imitatores fieri da Christe bonorum,

**Qui** populus simplex, turba rudisq; sumus.

**Mox** etiam turbæ angelicæ, populoq; piorum

**Adiunge**, inq; aulam suscipe sancte tuam.

**PVER CLASSICVS.**

**O**mnis in humanis uana est sapientia rebus, 73

**Quæ** non à summi mente profecta Dei 73

**Omniaq;** ut noris magnū miranda per orbē,

**Absq;** Dei profunt cognitione nihil.

” In studijs primus labor est, cognoscere Christum.

” Muneris officium tum meminisse sui.

Accende aethereo puerilem nomine mentem,

Mi Deus, ut flagrans ardeat igne tuo.

Sedulaq; in cursu studiorum pergat bonesto,

Ne lapsis retro perfida tentat equis:

Ad res ut sese maiores praearet olim,

Si quando meritam patria poscet opem.

Templa pij rectoris egent, Respublica docti:

Da claros studijs & pietate uiros.

Me quoq; in hoc numero, tua qui benefacta fatetur

Quique pie uiuunt, mi Deus, esse uelis.

PVER CLASSIARIVS.

**S**it mihi pröpta tui Pater optime gratia Flatus,  
Fungar ut officij munere ritè mei.

Ignaros mores rege, fortunaq; laborem,

Vt placiti maneam portio digna gregis:

Dignus ero, dignum cum tu me feceris: esse

Iam Christi coepi dignus amore tui.

Hunc mihi da rursus digno complectar honore,

Vtq; illum ardenti pectore sanctus amem.

Sis ô Christe mihi sapientia, semita, uita:

Sim tibi, me qualem tu cupis esse tibi.

ALIVS.

**Q**uam facile in pueri peccatû moribus haeret,  
Ingénioq; levis iudicioq; rudis:

Quam facile à recto deflectit tramite nita,

Annie

Annis quæ nondum consilijsq; sapit?  
 Ergo ego pascio tuum, pater optime maxime, numen  
 Vt dignere bonam ferre rogatus opem.  
 Improbilas, odium, leuitas, mendacia, torpor,  
 Heu nimis in fragili pectore regna tenent.  
 Meq; petit paruum, qui sicut uasta profundi  
 Bellua, nauifragis horridus usq; minis.  
 Tum studij tardat cursum, & uirtutis amorem,  
 Sæpe sodalitiij turba proterua mali.  
 Hæc mihi da uitare, Pater: uitare sed illa  
 Nemo tui Flatus absq; fauore potest.  
 Hunc olim matrum clausis infantibus aluo,  
 Manoidæq; dabas, Zacharidæq; dabas:  
 Me quoq; (nam tuus hoc promittit filius) auræ  
 Participem iubeas ô Deus esse sacræ:  
 Vt sic in studijs discendis ocia ponam,  
 Aetatis peragam tempus & omne meæ:  
 Ingratus ne sim primum tibi, qui mihi donas  
 Instrumenta, quibus tale paratur opus:  
 Deinde etiam patriæ referam, meritisq; benigne,  
 Iustas pro meritis officijsq; uices,

## A L I V S.

**V**irtutes Pietas in se completitur omnes. 23  
 Hanc puer ex imo pectore paruus amet.  
 Præterea obseruent doctores recta monētes,  
 Inuigilet studijs tum sine fine bonis:

m

Tem

Tempora distribuat, cunctas bene collocet horas;  
 Seq; pia membrum cogitet esse scholæ.  
 Qui pius est, toleratq; sui qui sponte labores  
 Officij, ingenij præmia summa feret:  
 Tu nos CHRISTE tuo pueros sic numine forma,  
 Nostra ætas rectum carpere nescit iter.  
 Te doctore uenit teneris sapientia ab annis:  
 Te doctore, boni nomen habebo uiri.  
 Hoc mihi contingat: securus cætera spernam,  
 In precio mundus quæ periturus habet.

## ALIVS.

**I**n finita tuæ numeret quis munera dextræ,  
 In paruum confert quæ pia cura gregem  
 Ingenijs animisq; Pater das inclyte lucem.  
 Et ueræ monstras prosperitatis iter.  
 Inq; sinu matrum nutritos ad sacra ducis  
 Atria, que is uerbi uox sonat alta tui.  
 Committis fragiles sanctis doctoribus annos,  
 Excubias uitæ qui patienter agunt.  
 Inq; miuisterium nostri studij atq; salutis  
 Agmina cælicolum stare parata iubes.  
 Ante meos oculos tua sint benefacta, manusq;  
 Vt teres in digitis annulus esse solet:  
 Vt solet artificis signum, quod lumina pascit,  
 In claro positum, conspicuoq; loco.  
 Nec tua ab immemori taceatur gratia lingua  
 Lex & laus Domini semper in ore meo.

## ALIVS.

**P** *Aruulus ut patrijs gestatur filius ulnis,  
 Sic portat Dominus te pia turba Deus,  
 Defenditq; tuos gressus, & prorogat æuum,  
 Ingenio ut multis utilis esse queas.  
 Sic igitur uires intende tenaciter omnes,  
 Et sic in studijs ocia pone tuis:  
 Sentiat ut sanum te uera Ecclesia membrum,  
 Moribus, & summi cognitione Dei.  
 Cetera si nescis, queis fama paratur, & aurum,  
 Et noua nobilitas, magnificæq; domus:  
 Non ideo populo puer excludêris ab illo,  
 Cui patet excelsi regia lata poli.  
 Artibus in pulchris moderatum cernere finem,  
 Paneq; contentum uiuere posse dato,  
 Muneris hoc opus est diuini: munera mecum  
 Cælestis quæso diuide tanta Pater.*

## ALIVS.

**P** *Rima sit in studijs, Deus ô mihi maxime, cura  
 Ut placeant mores, uita laborq; tibi  
 Sed quia nemo potest aliqua uirtute placere,  
 Atq; suis dici uiribus esse bonus:  
 Ad te per Christi ueniat nisi uulnera, seq;  
 Discipulum uerbi præbeat usq; tui:  
 Noticiam uerbi mihi, noticiamq; salutis  
 Adde, nec hic surdis auribus esse sine.*

Tempora siue domi consuetis transigo curis,  
 Siue domum linquens carpo uiator iter:  
 Lingua tuas semper meditetur grata loquelas,  
 Deq; Dei quouis tempore laude canat.  
 Cum corpus placidæ defessum pono quieti,  
 Eloquij admoneant somnia uera tui.  
 Sin matutinæ somnum rupere uolucres,  
 Incipiam toto te celebrare die.  
 Omnia ab auspicijs cœlestibus ordiar acta,  
 Inq; tuo peragam nomine quicquid agam.  
 Sumptero cū calamū, mea cum deuenero ad arma:  
 Mens, manus, & studium militet omne tibi.  
 Non prius os cpulas tangat, quàm carmina dicat:  
 Nec dapibus sumptis dona silendo neget.  
 Ocia grata tibi subeam, gratosq; labores,  
 Seu ualeo, morbo siue grauatus ero.  
 Nil loquar aut mediter, nil perficiamq; uelimq;  
 Quod non in summi fiat honore Dei.

PVER CLASSEM  
ducens.

AD. SIBERI.

**C**ommendo tibi me, ac meos sodales,  
 Aeterni bone Christe ocellè Patris:  
 Qui quondam pucr optimus fuisti,  
 Et te nos imitemur ut, magistris  
 Nunc tradis pietatis excolendos.

Sunt



Sunt plantariola hortuli, tenella  
 Cohors quæ studijs uacat, sacra  
 Irrigat citrios tui cruoris  
 Vnda cuius, et aureos nouales,  
 Ah ne curculio malus, uolucra,  
 Aut rubigo satisq; surculisq;  
 Et frigus noceat, perurat æstus,  
 Atq; intercipiat, necetq; fructus:  
 Spirent egelidos leuis Fauoni  
 Aurule uegetabilis tepores:  
 Sol clemens niteat, fluat beatus  
 Sulcos per liquor, aufert ipse spinas,  
 Et runca tribulos, uepresq; honori  
 Gloriæq; tuæ eruditionis  
 Ut crescant seges, ingeniq; fructus.

ALIVS.

**Q**uid non prius quàm nascimur  
 Corrupta nobis indidit  
 Netura uitij? cæci mens  
 Hinc est tenebris confita,  
 Nec nouit autorem Deum:  
 Praua est uoluntas, turbidis  
 Affectum discordia  
 Et fluctibus magis furit  
 Insanientis Adriæ.  
 Tremende rerum conditor,  
 Sic tenera turba dicite

**Mecum:** tremende conditor,  
 Qui de tuis nos legibus  
 Vis uiuere, aut hiantibus  
 Orcus futurum deuoret  
 Nos faucibus, misellulis  
 Quid fiet heu, nemo tua  
 Mandata nostrum si patet  
 Implere? Gratia sit tibi,  
 Nobis tuum qui Filium  
 Donas: obedientia  
 Is legibus sua tuis  
 Precit satis, purissimo  
 Peccata nostra sanguine  
 Delens, sacrum dat Spiritum  
 Amoris inclytum sui  
 Is pignus, ut caliginem  
 Tenebricosi dissipet  
 Cordis, suoq; nos regat  
 Nutu magisq; sordibus  
 Magisq; purget omnibus,  
 In parte donec aurea  
 Cæli beatos collocet.  
 O'da Pater, munus tuum  
 Hoc grata mens ut cogit et  
 Noctes diesq; seduli  
 Da studia nostra ad Filij  
 Tui, tuamq;, Spiritus

Sanctissimiq; nominis  
Vt dirigamus gloriam.

A LIVS.

**D**iscamus socij, cohors tenella,  
Discamus: male nec bonas locantes.  
Horas, mecum agite o, iam uorate.  
Ad sacros Aganippidum recessus.  
Instar tempora cunctis fluentis undæ:  
Nec quæ iam cecidit genista, surget:  
Nec quæ lux abiit, redibit unquam.  
At tu (nam sine te bono profectum est  
Nil unquam auspicio) Pater supreme,  
Tui pectora Spiritus fauore  
Æterno rege, nostra quò uoluntas  
Ex tuo moueatur usq; uerbo.  
Atq; eum tibi seruiant per omne  
Hic labor, studiumq; literarum.

PVER CENSOR MO-  
rum & studiorum.

EIVSDEM.

**I**am turba tandem desinas inceptire  
Pusilla, non locus iste postulat nugas.  
Non nos quidem magister ipse iam cernit,  
Quis hoc negat: oculi sed ubiq; presentis  
Vident Dei, potest latere quem nemo.  
Boni, modesti simus, & pij: munus

no

4

Suum

Suum impigre faciamus officij quisq;  
 At num tamen, si non det hoc Deus, fiet?  
 Non fiet unquam. Tu benigne, tu CHRISTE  
 Clemens adesto: uirium nihil no bis.  
 Ventis ut unda stringitur maris, fluctu  
 Præcordia rudi sic uibrata crispantur  
 Affectum: uirtute quæ tui sedata  
 Nutus, gubernas Spirituq; nos sancto,  
 Ut in tui timore uita decurrat,  
 Dicta omnia & tibi probemus, & facta.

## ALIVS.

**N**ON annis infans CHRISTVS puerilib. ædo  
 Materna, uelut fabula uana refert,  
 Non limo finxit cæraue animalcula, uiua  
 Quæ caperent, simulac plauderet ipse, fugam:  
 Officij, patris matrisq; impleuit amorem,  
 Ut fert prima etas sedulitate sui.  
 Vicinis testu iussus tulit ædibus ignes,  
 Subdidit ardenti lignaq; sicca foco.  
 Lactucas petijt, panes, carnesq; macello,  
 Instruxitq; thoros, apposuitq; dapes.  
 Deniq; quæ puerum par est properauit honestum,  
 Omnia diuina sanctificando manu.  
 Exemplo pueri ò tanti quoq; nostra iuuentus  
 Officij faciat munera parua sui,  
 Ut bene successerat pariter sapientia & annis.  
 Digna fauore hominum, digna fauore Dei.

PVERI

PVERIORANTES.  
 PHILIPPI MELAN-  
 thonis.

Eterno genitore nate CHRISTE,  
 Orator Patris ex sinu uerendi  
 Vocem Euangelij ferens suauem,  
 Quæ credentibus exhibes potenter  
 Vitam iustitiamq; sempiternam,  
 Et qui sanguine nos tuo redemptos  
 Exaudis, reputas facisq; iustos,  
 Ostendisq; pijs tuum parentem:  
 Nostras ipse doceto Christe mentes,  
 Ac in pectora gratiæ arrabonem  
 Nostra effundito, Spiritum mouentem  
 Casta incendia & inuocationem:  
 Fac pars agminis ut tui per omne  
 Aeuum simus, alacriterq; semper  
 Laudes & Patris et tuas sonemus.

ADAMI SIBERI.

Eterne, uiue, cuncta qui potes Deus,  
 IESU Panens CHRISTI beate, uindictis  
 Nostri, recentatoris & rerum omnium,  
 Qui pandis ipse uoce te nobis tua,  
 Animiq; mentem aperis, poli de uertice  
 Audite, dum clamas, magistrum Filium:  
 Satorq; seruatorq; nutu qui tuo,

m

s

Sapi-

Sapientia quæ condidisti, temperas,  
 Substantia paternæ imagine cum tuo  
 Et unico & tibi coæuo filio:  
 Qui carne nostra amictus, humanum genus  
 Sua redemit morte: nunc, ad regiam  
 Reuersus & poli auream, tecum omnia  
 Tenet, gubernat: cumq; sancto Spiritu,  
 In Apostolos effusus illapso sacro  
 Qui se inserit: animis, sua potentia  
 Viuoq; uiua pectora facit numine:  
 Fortissime, sapiens, misericors, optime:  
 Immenso, nulli effabilis, liberrime:  
 Habet tibi mens nostra, lingua gratias  
 Agit, tuam clementiamq; prædicat,  
 Quod ad tui homines condidisti imaginem,  
 Credentium tibi eligisq; Ecclesiam:  
 Miseraq; è nostre massa, & obruta omnibus  
 Malisq; calamitatibusq; Filium  
 (Amore motus, quo parens non diligit  
 Charissimos maiore uterq; liberos)  
 Cui das, suo qui nos cruore, uictima  
 Factus tibi, redemit è mortis manu,  
 Et sempiternis uindicauit ignibus.  
 O illius uitia litatus gratia  
 Nobis remitte cuncta, quidquid noxi  
 Heret reuelle corde, spinas rustica  
 Memus uelut agro: Spiritus sanctissimi

Affect

Afflet pusillis aura beata: publicas  
 Hospitia res tuere Ecclesiae, & Scholas,  
 Nec opprimi sine Turcicis tumultibus,  
 Aut fraudibus Anomi, artibusq; sophisticis  
 Euangelii lucem: sumus coetu tui  
 Ut portio qui paruula, tuo munere,  
 Ductu magistriq; excolamus ingeni,  
 Mentisq; uim, tuoq; uerbo, litteris  
 Bonisq; moribus pijsq; seruiat  
 Ut uita nostra dedicata Ecclesiae.  
 Infantulorum conficis tibi decus  
 Ex ore, Vates inquit, & laetentium.  
 Hoc fiat, o rogamus, in nobis, tuis  
 Ut sancte Genitor, optimiq; Filijs,  
 Et sempiterni Spiritus praconijs,  
 Noctes celebrandis diesq; personent  
**Hec** ora, tuere, rege, gubernare principes  
 Nostros, parentes & magistros, & tui  
 Quicunq; spargunt pura uerbi semina,  
 Ah ne misellos, ceu ferus gregem lupus,  
 Hiantibus qui circuit nos rictibus,  
 Aut dissipet sceleratus hostis, aut uoret.  
 Concede mentem uerba seruandi tua:  
 Nil cogitemus, nil agamus numini  
 Nihil loquamur, quod minus gratum tuo.  
 Pigricia deses, atq; contumacia.  
 Petulantiaq; procul sit, & mendacium.

*Vt in timore tui indies magis et magis  
 Succrescat etas nostra, quò freti tuo  
 Verbo pie uiuamus hic, post ultima  
 Et fata, hœli transuolantes sidera,  
 Tecum beatis perfruemur gaudijs.*

## PVER ORANS.

GEORGII FABRICII.

**V**is æterna Dei, patriæ sapientia mentis,  
 Humani frater Christe potens generis:  
 Sanctus adi hunc cœtū puerilem, quem tibi passim  
 Colligis, inq; Scholis discere sancta cupis:  
 Huius ego membrum cœtus quoq; dicor, et à te,  
 Ne tenuem, hoc munus Christe tulisse scio.  
 Pro quo indignus ego grates tibi dicere pergam,  
 Donec in hoc aliquis corpore sensus erit.  
 Tempora tu uiridi puerilia cinge corolla,  
 Qua sapiam, et tua qua lucida templā petam.  
 Namq; timens Domini dignus tua templā subire,  
 Sertaq; spiranti mollia ferre rosa.  
 Da uirtute tua crescam sapientia, et annis:  
 Hoc sapere est, imo corde timere Deum.  
 Crescere et est cœlis, turpi decrescere mundo  
 In fluxis nec opes ponere uelle suas.  
 Sic quicumq; sapit, crescitq; immobilis heret:  
 Nam radix alto fixa profunda solo est.

TUM



Cum ramis latè diffusis floret, & eius  
 Merces magna, salus indubitata manet.  
 Dextra etiam impositū Domini diadema, resulges  
 Auro, cælestis ciuis honore feret.  
 Hoc sperare iubes, hoc credere: spemq; fidemq;  
 Auge Christe: meas non tulit aura preces.

# CHORVS SCHOLASTICVS.

EIVSDEM.

**O** Socij letas huc omnes uertite mentes,  
 Nostri putemus dignitatem muneris:  
 Ac puerum pueri simul obsecremus Iesum,  
 Imo uocantes corde nescit spernere.  
 Ille sibi placitas puerili in pectore sedes,  
 Eius sequente fida iussa deligit,  
 Materno nondum formatam corpore massam,  
 Vitæq; inanem, luminisq; nesciam,  
 Esse hominēq; iubēs, & ad ipsa hæc munera scruās,  
 Sua antecuenit ipse prouidentia.  
 Nos quoq;, quos uitium tristi damnauerat orco,  
 Iræq; natos, esse natos gratiæ  
 Fecit, & ad uiuas perduxit fluminis undas,  
 Sacroq; paruos imbuuit spiramine.  
 Post etiam ex hominum tanta (mirabile) turba  
 Hanc ad palestram literarum conuocat.  
 Ex nostroq; sibi (pueri hoc perpendite) coactu  
 Tandem ministros eligens Ecclesiæ,

Cælum.

Cælum ipsum mandat, quia uerbi munera tradit

Docenda: uerbum patris ipsa CHRISTVS est.

Nos patris et Christi, patrem Christumq; rogamus,

Vt ipse pectus, ipse nostra lingua sit.

Sinus in hac fortes socij statione, nec annos

Spectemus, aut uires ad has increduli.

„ Non mendax Deus est, nec CHRISTVS fallere no-

„ Paruisq; gaudet, ut superba conterat. (uit:

Excitat hic puerum Samuelem, ut destruat Heli

Domum, propage nobilem, sed impiam.

Helchitin pueri tutatus uoce pudicam,

Libidinosos sustulitq; iudices.

Non fragilem etatem, non incunabula spernit

Cum membra nostræ sumpserit forme Deus.

Et qui non solum patres dedit, atq; magistros,

Sed intuentes ora patris Angelos,

„ Hostis erit? cesset mens, & uox impia: summus

„ Contentus est, non uelle Christo credere.

Omnia speramus, promittimus omnia nobis:

Audacis, impijue non hoc est opus.

Munera dant nobis indulgentissima patres,

Cælestis ipse non sit mitior parens?

Vnanimes igitur pueri contollite uoces:

Audire uult, orare cum ipse iusserit.

Nate Dei, miseras non horrens uisere terras,

Mortalibusq; uerba fari mystica,

Sit tuus ille saccr nobiscum Spiritus: ut te

Nosce.

Noscamus, atq; prædicemus cognitum.  
 Non sine de patrijs tolli tua munera templis  
 Tuere collectas tibi myrmecias.  
 Non rimosa tui, sint pecciora, uascula uerbi:  
 Nec templa nostrum polluantur cordium.  
 Seruiat ingenium diuinæ laudis honori:  
 Inanis omnis sine Deo scientia.

## PVERI CUBITVM

euntes.

IOACHIMI CAME-  
 rarij.

**N**unc cubitū, quoniā magna est pars acta diei,  
 Tenebræq; terras occupant,  
 Imus, quisq; suas ædes: pensoq; soluto,  
 Curam diei ponimus.  
 Nunc propria, ô pueri, occurrabit mortis imago:  
 Germana leti hæc est quies.  
 Discite uos Patri, quanti estis, credere uestro:  
 Perijstis, hic si negligat.  
 Exiguus restat dehiscentis spiritus oris,  
 Mors præter hunc ipsissima.  
 Ergo prius, dulcis quàm claudat lumina somnus,  
 Et fessa membra recreet:  
 Sic geminis sursum ad nascentia sidera palmis  
 Tensis, precamini Deum:  
 O Pater, hanc facilem carpat mens leta quietem,  
 Et in sinu æternam tuo,

EIVS.

**I**am Phaetonteos ignes populère tenebræ,  
 Fumantesq; egit sub mare Phœbus equos:  
 Vmbræ iam faciunt æqualia cuncta uideri,  
 Omnibus in rebus cum color unus inest:  
 Lucibus exiguis tantum nox atra nitescit,  
 Plurima quâ tremulo lumine stella micat.  
 Aurea gemmatitemones plaustra reducunt,  
 Iamq; moues segnes tarde Boota pedes.  
 Ipsæq; fulgentes humeros ostendit Orion,  
 Atq; uno pressam sub pede calcat humum.  
 Ibinus hinc solito capturi tempore somnum,  
 Ut renouet dulcis languida membra quies.  
 O' pueri, uera condemur imagine mortis,  
 Quisq; Dei casta uoce precemur opem.  
 O' Pater hanc noctem, ne quo perdamur ab hoste,  
 Auxilio firma præsidioq; tuo.  
 Cumq; sopor fessos studiis recreauerit artus,  
 Lumina da letum cernere nostra diem.  
 Atq; ita seu capient nocturnam membra quietem,  
 Siue die iussum perficiemus opus:  
 Esse tuos semper facias, semperq; manere,  
 Hæc Pater est nostræ summa caputq; precis.

## IACOBI MICYLI.

**A**lme parens hominū, cui rerum summa pote  
 Qui miseros noctu nos tegas, atq; dic: (stas,  
 Re-

Respice quos cæcis opcrit nox atra tenebris,  
 Quosq; iterum dubiæ mortis imago premit.  
 Et nos pacato facias requiescere somno,  
 Tutâq; præsidio membra leuare tuo.  
 Quo simul à tenebris liceat nos, atq; periclis,  
 Incolumes reducem manè uidere diem.

GEORGII FABRICII.

**I**nclinata dies, & sol decessit Olympo  
 Aureus, ac terras nox tenebrosa premit.  
 Corpora concessæ donamus fessa quieti,  
 Donec ad impositum suscitet ales opus.  
 Sed non & Stygij uis dura quiescit Auerni,  
 Nec patitur somnos peruigil ille Draco,  
 Pugnat in humanam qui toto Marte salutem,  
 Quiq; struit uarijs mille pericla modis.  
 Pro nobis uigiles te maxime CHRISTE rogamus,  
 Sopitos sensus dum tenet alta quies:  
 Sit tuus ad dextram bonus Angelus, atq; sinistram,  
 Cælesti miseròs qui tueatur ope,  
 Tristia terrificæ qui pellat somnia noctis,  
 Et quicquid trepido corda timore mouet.  
 Ut cum depulerit tenebras aurora, diurnum  
 Auspicijs letis aggrediamur opus.

MEDITATIO CVBITUM  
euntis.

**V**T modo ponitur languētia corpora somno,  
Sic olim luteum morte iacebit opus.  
Effice, dum uenias iudex, ut Christe quiescant,  
Spiritus in cœlo, reliquie in tumulto.

IOANNIS STIGELII.

**I**Am mea declino nocturno lumina somno,  
Omnia mox rigido membra sopore premar.  
Nec scio num possim redituram cernere lucem:  
An mihi sit, somni, mors obeunda, soror.  
Sed tibi summe Deus, Deus inuictissime, grates,  
Quas toto possum pectore gratus ago:  
Incolumem qui me uoluisti hac luce tueri,  
Ne uitam premerent ulla pericla meam:  
Quiq; represisti grassantis dæmonis iram,  
Qui rabido populos circuit ore tuos.  
Nunc quoq; dum iaceo ueluti morientis imago,  
Mi Deus, hæc nutu membra tuere tuo:  
Ne lasciuiæ meos perturbent somnia sensus,  
Organa tu mentis dirige crassa meæ.  
Fac tuus immanem procul Angelus arceat hostem,  
Cui proprium est regni ledere membra tui.  
Crastina sic cernens redeuntis tempora lucis,  
Grata tibi memori carmina mente canam.

lanceffent curæ, placidi requiefcite fensus:

Tu mihi iam CHRISTO, Somne, fauente ueni:

M. ANTONII FLAMINII

**I**Am uesper ortus incipit  
Diem tenebris condere.

At nos parentem luminis

Sancti prececur, ne finat

Noctem suorum mentibus

Caliginosam irrepere.

Seu dulcis alma recreat

Sopor quiete, languida

Seu liquit ille lumina,

Nunquam recedat à pijs

Lux sempiterna cordibus

Vt semper indies magis,

Magisq; detur maximi

Benignitatem numinis

Videre mente lucida,

Et hinc amoris optimi

Ardere semper ignibus.

Supreme cœlitum pater,

Votis tuorum supplicum

Aures benignas admoue:

Vt sensa cordis omnia,

Et dicta, factaq; ad tuam

Sic diriganus gloriam.

n. 2

CHRISTO

CHRISTOPHORI SCHELLEN-  
bergij.

**I** Am cœli faciem spargente micantibus astris  
 Nocte, quies oculis est capienda meis.  
 Sed non antè torum somno fruiturus inibo,  
 Summe Pater grates quàm tibi promptus agam:  
 Quod felix huius mihi transijs hora dici,  
 Et te custodem tutus agente fui.  
 Et quia nemo hominum te non offendit & errat,  
 Lux sine peccato non abit ulla suo:  
 Tu miserere mei Pater ô lenissime, daq;  
 Erratis ueniam, quam prece posco meis.  
 Dumq; salutarem tua munera carpo quietem,  
 Fac mihi secure tempora noctis eant.  
 Nam cum sopito uigilantem corpore mentem,  
 Cunctaq; tutelæ cætera mando tuæ:  
 A dextra læuq; mihi sacer Angelus adstet,  
 Vt sathanæ fiat copia nulla mei.

ANDREAE ELLINGERI.

**S** Olece cursu languido  
 Decliuis occasum petit,  
 Sensim refulgent aurea  
 Cœli nitentis sidera.  
 Caligo noctis ingruit,  
 Quietis hora iam redit,  
 Quæ sessa membra recreat

Blando



Blando soporis munere.

Te CHRIS TE uoto supplici  
Toro recumbens inuoco,  
Grates tibi Rex optime  
Depromo cordis ex sinu:

Quòd hac die clementia  
Me numinis textit tui,  
Quòd feceris saluum tori  
Me fulcra rursus scandere.

Ignosce si quid perperam  
Et impiè patrauimus,  
Sermone, facto, friuolis  
Et cogitationibus.

Somno fruentem me tua  
Noctem per hanc præsens ope  
Tuere, ut alterna uice  
Iucunda surgant tempora.

Adsit mihi sacer tuus  
Defensor angelus, Draco  
Ne peruigil me suppressat  
Molli quiete lassulum.

EIVSDEM.

**B**landa quies furtim fessis subrepat ocellis,  
Iamq; sopor gemina lumina nocte tegit:  
Compositus iaccā, concessio et munere fungat  
Excubitor gallus dum uocet ore diem.  
At tibi me commendo Deus, tu nocte sub ista

¶

¶

Defen-

Defensum placida protege mitis ope.  
 Da precor angelica fidos de gente ministros,  
 Quos iubeas lateri semper adesse meo:  
 Ut quibus oppugner, nullas nigra bellua vires  
 Inueniat, quamuis seua fuisse uelit.

## CHRISTOPHORI AVLAEI.

**C**hriste colorati possessor & arbiter orbis,  
 Sub pedibus Ditis qui fera regna premis:  
 Qui nitido illustras obscurum lumine mundum,  
 Veraq; qui recte crederis esse dies:  
 Qui tenebras nescis, & caecae nubila noctis,  
 Cui placet & gratum est nil nisi lucis opus:  
 Me, precor, à cunctis animae defende periclis,  
 Dum solitam requiem mens capit agra suam,  
 Suscipe me, curamq; mei gere tutor: & horrens  
 In me nil poterit iuris habere sathan.  
 Noctis praestigias auerte benignus opacae,  
 Ne moueant sensus somnia uana meos.  
 Dumq; fatigatos gratus sopor occupat artus,  
 Officiumq; suum languida membranegant:  
 Corporis atq; animi bona, quae mihi Christe dedisti,  
 Credo patricinio tempus in omne tuo.

## IOANNIS GIGANTIS.

**C**hriste pater rerū, tellus cui parcat & aether,  
 De cuius pendet munere nostra salus:  
 Suscipe per totam miserum defendere noctem,  
 Suscipe me famulum Christe iuuare tuum.

Ne

Nemihî uel cæcæ metuenda pericula noctis,  
 Vel noceat Stygijs uis truculenta lupi.  
 Cura meæ tibi nam soli data Christe salutis,  
 Te melius nobis nemo prodesse potest.

## ADAMI SIBERI

**P** Hæc bus peracta luce uultum co-  
 Micantq; cœlo sidera:  
 Nos fessa curis, & laboribus  
 Dulci quieti corpora;  
 Sine uitijs non uiuit ullus, & rudis  
 Occasiones criminum  
 Non uitat ætas: ergo facta nequiter  
 Ignosce filijs Pater.  
 Præstò iube nobis tuus sit Angelus,  
 Qui nocte nos hac protegat.  
 Et tu, tua quæ maxima est potentia,  
 Obscena pelle somnia.  
 Nil iuris habeat hostis hîc: simus tui  
 Hac nocte, qui fuimus die:  
 Exhibit ut cum luce crastina uigil  
 Aquis Eois Phosphorus,  
 In litteris tibi seruiamus ô Pater,  
 Et mente simul, & corpore.

PATER ORANS PRO  
liberis.

ADAMI SIBERI.

**O** Qui solus habes uerè, Pater unice, nobis  
Dulcia quæ donas nomina ferre patris;  
Quæ tua sancta homini uox dixit Crescite, prole  
Nec pauca uestrum multiplicare genus:  
Quam dedit è casti iuncta mihi fœdere lecti,  
Fœcundi natos pignora grata thori.  
An tacitum nobis pertentent gaudia pectus?  
An patris ut solus leticiâq; fruatur?  
Tantum corpus alam, fragilem traducere uitam  
Nec non commonstrem qua ratione queant?  
Tantum diuitias multo illis congerat auro,  
Curâq; non tenues nostra relinquat opes?  
Non ita: Sed discant ut te Dominumq; Deumq;  
Vulnere nature fœdâq; nosse suæ.  
Scilicet à primo labem traxisse parente,  
De facili finxit quem tua dextra luto,  
Illum, dum uetita decerpit ab arbore pomum,  
Ah caussam quantis, quotq; fuisse malis:  
Vt iam nemo colat, nemo ueneretur, honoret,  
Ritè Creatoris numina sancta sui.  
Mancipium sathanae sed homo sit uiuus, Auerno  
Atmersus Stygijs præda cremanda rogis,  
Ne tamen humani generis stirps tota periret,

Quæ

Quæ fuerat cœli nata tenere domos:  
 CHRISTVM iræ iusti se subiecisse parentis,  
 Nec merita nostrum morte luisse scelus.  
 Hoc qui confidunt, cœlestes scandere in arces,  
 Lucida cœruleum qua plaga monstrat iter.  
 Hoc igitur primum, Rectas coluisse per artes  
 Tum mentes, linguas & didicisse uelint:  
 Erudiant seros ut de pietate nepotes,  
 Non paucis nomen notificentq; tuum.  
 Quot tamen hoc faciunt? cheu pars maxima patrū  
 Doctrinæ genus hoc crimen habere putant.  
 Instillantq; suis odium pietatis, in atros  
 Serpentes Erebi uirus & adiiciunt.  
 Quid uerò reliqui? magis quàm sua pignora, curant  
 Stetigerosq; fues, yuricolæ boues.  
 At mihi da mentem contra impium secula rectam,  
 Officio sancti fungar ut ipse patris:  
 Instituanq; meos, ueluti de sanguine natos  
 Lamechidesq; suo, Thariadesq; suo.  
 Et qui discantis nisi mens pietate trahatur-  
 Cura nihil quicquam præcipientis agit:  
 Sparge precor tencras cœlesti rore medullas,  
 Afflatusq; tui numine corda moue,  
 Ut patris aure bibant cupida præcepta, magistri  
 Quiq; tenet sanctæ uirgæ sceptra scholæ:  
 Ut formatrices mollis quasi cæra sequantur,  
 Optima non tardè percipiendo, manus.

Qui facieq; tua, genij, uultuq; fruuntur,  
Præfenti uigiles hos tue antur ope.

Ne Stygij teneris noceat uis sæua tyranni  
Mentibus, & captas sub sua iura trahat.

Consita sed riguo cœu plantula surgit in horto,  
Et fit frondosis arbor opaca comis.

Iusticiæ flore, & pietatis fœtibus aucti  
Succrescant, laudis pars quotacunq; tuæ.

Hæc ego pronatis, quæ ne sint irrita, CHRISTI  
Per te sancte Pater facta, crucemq; rogo.

GEORGII FABRICII.

**M**agnū opus est, homini nomē tribuisse pater  
Datū quod uni conuenit et soli Deo. (nū:  
Ipse Pater uerè est; seruat quia cuncta benigno  
Vultu, repletq; gratiarum munere.

Aeris cuius pendent bonitate uolucres,  
Ceteq; lato magna ludunt æquore,

Plurimaq; in uastis stabulant animalia campis,  
Syluisq; congregantur, & lustris latent.

Tu quoq; sancte Deus, sancti pater unice Christi,  
Nomen mihi patris sacrum communicas:

Quæq; tuo cœpit sperare & uiuere uerbo,  
Vis esse custodem creaturæ tuæ.

Sunt tua dona, meam cingentia pignora mensam,  
Quæ matris ipse subleuasti ab ubere.

Sit tua cura, mei soboles dulcissima lecti,  
Lecti tuo feracis unius bono.

Nemo

Nemo potest sine te sanctos educere natos,  
Ciuesq; dignos tradere olim Ecclesie.

Ezechias dirum genuit feritate Manassen,

Tribusq; David luxit ipse in filiis.

Isacides quales habuit: tuq; inclyte uates,

Quem mater impetrauit Anna siletibus?

Non de progenie, non de uirtute parentum,

Dei timentes procreantur liberi.

Nam nimium nostri corruptus seminis ortus,

Origo cunctis una nempe debilis,

Luce Deoq; carens, primoq; à germine praua,

Emissa prauis scilicet de surculis.

Est pietatis opus, meriti donumq; superni,

Bonos habere & educare liberos.

Quapropter tua nos doceat sapientia, queis sint

Primis ab annis inbeundi moribus.

Grata nec desit, quas sint sine labe per artes

Virtutis ipsam pertrahenda ad semitam,

Nos tua præterea clementia seruet, & illos,

Latentur in commissio utrique munere,

Non luxus fragiles, aut ignoscantia mentes

Euertat, & materna stulta lenitas.

Non uulgi mores, nec consuetudo malorum,

Nec discipline exempla discrepantia.

Quicquid & ingenijs obstat puerilibus, absit

Procul parentis à boni peratibus.

Carente

Carente luctus et modestiæ domo,  
 Qua sancti coetus societati, uoce præalta  
 Deum inuicem modis celebrant orthijs:  
 Et nos cum nostris concordi pectore natis,  
 Aeternum in illis floreamus cætibus.

### LIBERI ORANTES PRO parentibus.

**A** Mortali utero quicquid procedit in auras,  
 Ortus suo nostrum anteit longè genus:  
 Cornua sunt ceruo; ualido sunt cornua tau-  
 Nobis inermis nudaq; est natiuitas. (ro,  
 Nil natura creat homine imbecillius ipso,  
 Et solus ærumnæ capit sensum suæ.  
 Nominis (heu miserum) diuini nascitur hostis,  
 Hostisq; magni machinis exponitur:  
 Qui ludente sibi mundo atq; cupidine nostra,  
 Cotidianis gestit in uictorijs.  
 Hæc non sunt dictis nobis ignota parentum,  
 Quorum fides amorq; nescios monet.  
 Quinetiam insomnes noctes, uariasq; laborum  
 Acerbitates toleranter perferunt,  
 Ut uictum hospiciūq; parent, certasq; relinquāt  
 Opes, egestatemq; deformem arceant,  
 Implantant uiridi uitæ præcepta sub æuo,  
 Docentq; sancta cum Deo loqui prece:  
 Nos prece comendantq; Deo, queruntq; magistros

IN



In educatione gnauè industrios,  
 Inuentisq; suam tradunt curamq; uicemq;  
 Desuntq; nullo nec loco, nec tempore.  
 Ante sed in cœli stellas percurreris orbe,  
 Quàm per piorum facta eas patrum pia,  
 O' tales, Deus omnipotens, bonitate parentes  
 Tua gubernans esse longæ eos sine.  
 illorum cœptis bonis et sudoribus adsis:  
 Sunt absq; te nil cœpta, sudores nihil.  
 Reddere cumq; uicem meritis sit nulla facultas,  
 Audi preces, quas mente grata reddimus.  
 Quis tibi nãq; Deus, quis digna parëtibus, unquam  
 Soluet salutis atq; curæ præmia?  
 Qui iacit in nudum patrem ludibria Chamus,  
 Deletur omni cum sua propagine:  
 Cum pecore intereunt homines, cumq; urbib. agri  
 Tolluntur igne, terra paret exteris.  
 Casarie patula dependens Absolo quercu,  
 Malo malus letho necatur filius.  
 Has tu cum statuas ingratissimæ pœnas,  
 Gratos bonis fac nos Deus parentibus.  
 Obsequio pensatur amor, pietate labores,  
 Et cura pro curis amica mutuis.  
 Hanc curâ, hunc immitte piû Deus alme fauorem,  
 Ut et parentes, teq; honoremus Patrem:  
 Tempora cernamus felicitis prospera uite,  
 Promissa in hoc et in futuro seculo.

Non

Non ueluti fumus uita euanesceat inanís,  
 Nec morte nostra finientur gaudia.  
 Quidq; paternus amor possit, quid pectora iuncta;  
 Hoc ante nostra ut sol micabit lumina.  
 In te cœlestiq; Patre, & te Natē potente,  
 Et in perennis charitate Spiritus.

MAGISTER ORANS  
 pro discipulis.

GEORGII FABRICII.

**O** Domine atq; Deus, terram & supera ar-  
 dua torquens,  
 Quem Patrem credunt pectora, lingua uocati:  
 Nemo tuo quicquam peragit sine numine ritē,  
 Seu priuata gerat, publica siue gerat.  
 Nec gerat illa tamen, primis nisi doctus ab annis,  
 Virtutis carpat cum pietate uiam.  
 Ergo inter promissa tui tot munera nati,  
 Doctores etiam nomina prima tenent.  
 Hoc nunc officij cum indignus fungar honore,  
 Paruaq; sit fidei tradita turba meæ:  
 Da mihi solliciti mentem, affectumq; parentis,  
 Cura sit ut teneri fida, tenaxq; gregis.  
 Nil doceā, uel agā, quod praua exempla sequantur;  
 Ne temerem CHRISTO templa sacrata tuo.  
 Ille suis pueros quā blandē amplectitur ulnis,  
 Quamq; ipsos ledi uoce minante uerati?

116

Ille suis puerum monstrans etiam ipse ministris  
 Maximus esse studens, hunc imitetur, ait.  
 Hos mihi committis, quos nunc ego grandior annis,  
 Quosq; alij debent simplicitate sequi.  
 Non ego, non istum caperem Pater alme laborem,  
 Sed bonitas fortem me tua magna facit.  
 Te mandante sequor, te defendente guberno,  
 Teq; iuuante meum non ego segnis opus.  
 Quod nequeunt parue uires, tenuisq; facultas,  
 Hoc scio me ardenti posse parare prece.  
 Expertusq; almae tot propugnacula dextrae,  
 Non cessabo tuam sollicitare fidem.  
 Ergo care parens, imbelles affere coetus,  
 Iq; tuum miseros suscipe sancte sinum:  
 Ne paradisiadicos homini furatus honores,  
 Decipiat solito credula corda dolo.  
 Inuidiosos defende Potens, et Maxime paruos,  
 Conserua pia quod dextra creauit opus.  
 Quicq; tua aetherei uigilant ante ora ministri,  
 Perpetua fragiles hos tueantur.  
 Aetati est error, leuitasq; innata pusillae,  
 Addit et ad uitium uita proterua faces.  
 Saepe mali nocuere bonis: quicq; ante secutus  
 Recta fuit, captus concidit ille dolo.  
 Sed quicquid uitij est, et quicquid triste timetur,  
 Corrige, tolle, tua pro bonitate Deus.  
 Delige de tenero tibi membra fidelia coetu.

Qui

Qui celebrent nomen secula cuncta tuum.  
 Impelle infantum CHRISTI ad præconia lingua,  
 Ingenuisq; animum moribus adde pium,  
 Tu regē nutricis uix raptos lacte tenellos,  
 imbueq; afflatu pectora parua sacro.  
 Quam thus in Libano suaues diffundit odores,  
 Tam gratos fructus ærea cuncta ferat.  
 Surgit ut Idalijs, uernans rosa, consita riuus,  
 Vt Syrio florent lilia cana solo:  
 Sic crescat studijs pietateq; clara iuuentus,  
 Et cœtus uigeat fida ministra tui.  
 Da placidos Zephyros, nostræ da uela carinæ:  
 Vt contempta sumus, sic tua turba sumus.

## ADAMI SIBERI.

C Hriste fauce, grex ingreditur sacrata tenellus  
 Tecta scholæ, clemens huc facilisq; ueni.  
 Hic cum Pasithea, blandisq; sororibus olim  
 Ducebat socios Calliopeia choros:  
 Regna superstitio cum nondum uana teneret,  
 Sancta q; floreret cum pietate fides.  
 Virgineos cœtus Bromiusq; Venusq; fugarunt,  
 Ac Molochō templum constituere suo.  
 Nunc loca conuertit sacros hæc rursus in usus  
 Cura magistratus, Picridumq; domum.  
 Tu Deus hunc illis animum mentemq; dedisti:  
 Quæ bona sunt, fiunt cuncta mouente Deo.  
 At quia non res grata magis tibi maxime CHRISTE,  
 Quam

Quam uita & studijs culta iuuenta bonis:  
 Tu Deus ô nostras impellas numine mentes,  
 Quod linguam regat, & quod regat acta, tuos:  
 Ut bene doctrina pueris præsimus, honestis  
 Et uitæ exemplo conueniente uiris.  
 Ne malus ab mentes, ne quis tibi fascinet illas,  
 In quibus est regni pars sita prima tui:  
 In tua tam blandis sermonibus use redemptor,  
 Quos inuitatos colla uenire iubes.  
 Sunt delubra tui iuuenilia pectora Flatus:  
 Ah pereat, puerum fallere quisquis amat.  
 Sed quoq; abesse procul iubeas: discedite, fastu  
 Quos tumido inflatos parua docere pudet.  
 Quis furor est, quæ mens, septos impube corona  
 Grammaticæ sprete, quam decet ire, uia:  
 Naturæ obscuro sermone euoluere mores,  
 Iunctaq; perpetua corpora brima fides?  
 Cur luna atratos aliena luce refulgens,  
 Cur sol defecto lumine iungat equos,  
 Vnde perennis aqua in nubes, qua fulmina caussa  
 Aetherea coeant, desiliantq; domo:  
 Vnde tremat tellus, cur in mare fulmina currant  
 Omnia, nec fines exeat unda suos.  
 Quam potius laudandus hic est, quem queq; docere  
 Distinctisq; locis, temporibusq; iuuat:  
 Ad tenere qui se turbæ demittere captum,  
 Cum pueris puerum turpe nec esse putat.

Sic cum collegis ego sim, te CHRISTE fauente,

Irrita nec parui cura laboris erit.

Nec minus ô puerum mollissima pectora firma,

Afflatusq; tui numine CHRISTE rege.

“ Aduitium pronos ætas iuuenilibus annis

“ Omnis habet lapsus, cordaq; stulta gerit.

● Quinetiam casses nullo non tempore tendens,

Insidias gaudet composuisse sathan.

At tu defensos uindex fortissime serua,

Occultos hostis nec patiare dolos.

Da, uitæ custos illis, sanctiq; pudoris,

Angelici assistat sedula turba gregis.

Impia da ut tent morum contagia, quicquid

Mentibus & teneris transitione nocet.

Socraticis sine te sapientia prodita libris

Nil prodest, imò lædit obestq; magis.

Te primis ergo solum uenerentur ab annis

Suspensis animis & tua uerba bibant.

Consuescant tibi ferre preces, tibi dicere laudes,

Consuescant factis te celebrare suis

“ Extremis serò pietas condiscitur annis,

” Inualuit longa cum scelus omne mora.

” Quo testa imbuitur primum noua, seruat odorem,

” Et pietas reliqui temperis acta regit.

Tum præceptorum dictis parère laborent,

Inq; loco patrum qui docuere putent.

Cœur rigide cernicis equus qui frena recusant,

Non

Non poteris magnis annumerare uiris.  
 Aut quos emendant tantum modo flagra: bonorum  
 Mentis uerba mouent, uerba nulla melos.  
 Omnia uincit amor uirtutis, et omnia discit:  
 Hunc si CHRISTE dabis, qualia dona dabis?  
 Namq; Heliconiadum nec tentabuntur ab hoste,  
 Qui se, quam didicit, plura tenere putat:  
 Et subiisse nolent nullos non sponte labores,  
 In studij ponent tempus et omne bonis.  
 O' niueam lucem, cum quæ sit docta, bonorum  
 Hoc ludo exhibet plurima turba uirum  
 Non, non succrescet Chamus hic, non Absolo, iusti  
 Aut maduit fratris cui nece dextra sui.  
 Hic crescent, patri falso periisse relatus  
 Rachelides Nili gloria qualis erat:  
 Qualis erat nondum conceptus matre uouente  
 Iam sacer, Helcana de genitore satus:  
 Cum socijs qualis Chaldeo oblita tyranno  
 Cui concessum uni uisa referre Puer:  
 Deniq; bis senis etiam natalibus actis  
 Ipse puer qualis CHRISTE redemptor eras.  
 Tunc, lacera quæ iam pudibunda Ecclesie ueste,  
 Ungue notatq; genas, ungue notatq; comas:  
 Talibus ingenijs lugubres ponet amictus,  
 Et cingent letum mollia ferta caput.  
 Tunc quoq; florebunt leges, pax alma reuersa  
 Optatas nostro ducet in orbe moras.

*Annue, sic tua sit tibi gloria Christe pereennis,  
Cum Patre, cumq; sacro Flamine cuncta regas.*

DISCIPVLVS ORANS  
pro magistris.

GEORGII FABRICII.

**N** On casu noster coetus collectus in unum,  
Qui modo non una ducit in arte diem.  
Ipse Deus proprio discentes conuocat ore,  
Sacratas studijs dedicat ipse casas.  
Ipse etiam praesens est talis in agmine turbae,  
Quae fundit iussas multiplicatq; preces.  
Ut curat natum genitrix blandissima: curat  
Impubem uigilans sic Deus ipse gregem.  
Hunc fouet, hunc audit, praesentiaq; omnia lustrat  
Facta, nec usquam oculos dimouet inde suos.  
Praeficit eximia doctos pietate magistros,  
Officio fungi quos iubet ipse suo.  
Virgea mandat eis, contemnaq; sceptras, sed illi  
Vix ullum in terris gratius extat opus.  
O quoties uerbis non est efferre beatum,  
Sedulus in tali munere quisquis agit.  
Nunquam manè leuo de molli corpora lecto,  
Nec solito rursus membra repono thoro,  
Quin ualuisse mei codnoscam uota magistri,  
Ad summum pro me quae dedit ille Deum,

*Ille*



Ille meæ uitæ curam gerit, ille salutis,  
 Perpolit & lima pectus agreste meum.  
 Instillat placidas artes, præceptaq; sancta,  
 Nec sinit in brutum degenerare pecus.  
 Luxuriam, ueluti fœcunda in uite coercet,  
 Et docta carpit noxia quæq; manu.  
 Heu quoties à me iustam commotus ad iram,  
 Protulit in mores dicta seuera malos:  
 Bileq; composita, dilexit more parentis.  
 Aut magis ex animo si quis amare potest.  
 Neue irem pessum, sathana fraudante laborem,  
 Perstitit in multa nocte dieq; prece.  
 Sed numerum citius florentis tempore ueris,  
 Blandinasq; rosas, coryciumq; crocum:  
 Quàm memorare queam fidi benefacta magistri,  
 Que fert innocuo sponte uolensq; gregi.  
 O' Deus, exigui cœtus excelsæ Creator,  
 Difficili oblatas ne reice aure preces.  
 Namq; tuo fretus iussu, te apello benignum,  
 Qui tali gaudes sanctus honore coli.  
 Suscipe tutandos, tibi qui seruire parati,  
 Quorum ingens humeros iugiter urget onus.  
 Sint tuti in tandis turbis, miseroq; tumultu,  
 Mundus in exitium quo ruit ultro suum.  
 Tu nisi saluifici seruares semina uerbi,  
 Doctoresq; dares per sacra templa pios:  
 Perq; scholas, homines uita & grauitate seueros:  
 O       :       Essemus

Essemus similes foeda Gomorrha tui.  
 Et quoniam in terris hæc turba uicaria Christi est,  
 Illam per CHRISTVM queso tuere tuum:  
 A recto nunquam conuertat hypocrisis ullum,  
 Néue tuum euertat dira tyrannis opus.  
 Ingratoq; famem quio uix de pellere mundo  
 Possunt, in placitas adijce diues opes.  
 Roboret illorum fortis patientia pectus,  
 Ne fugiant oneris pondera magna sui.  
 Neu segnes odijs, aut improbitate malorum,  
 Contineant cursus incita uela sui,  
 Cuncta indigna pati discant, pulchreq; mercri,  
 Nec regnum cessent amplificare tuum.  
 Excelsos tu præbe animos, ueriq; tenaces,  
 Atq; aliquam superi luminis adde facem.  
 Tempora tum fragilis post hæc durissima uita,  
 Illis pollicitus quæ dare. dona dato.  
 Purpureo splendet ueluti sol aureus orbe,  
 Aethereasq; micat phosporus ante faces,  
 Iustorum prælustre decus sic fulgeat: ornas  
 Doctorum cultas sic amarante comas.

ANDREAE ELLINGERI.

Rerum magne sator, conditor omnium,  
 Phœbea reuehis Lampade qui diem,  
 Et lunam tenebris præficias humidam,  
 Distinguens uarijs sidera motibus.  
 Dum per sana tui dogmata Filij

Creden-

*Credendum numerus crescit, & in dies  
 Augetur fragilis turba fidelium,  
 Doctrina fidei scilicet agnita:*

*Te nunc summe Deus, te precor intimo  
 Ex sensu taciti pectoris, ut tui  
 Flatus uiuifico numine robores  
 Omnes qui studio iussa docent tua.*

*Rectis tu studijs, artibus & pijs  
 Offundi tenebras obsecro ne sinas:  
 Hanc lucem retine, coelitus hanc fove,  
 Ne quã barbaries prisca repullulet.*

*Tales ergo uiros protege sedulo,  
 Qui mentes teneras artibus instruunt:  
 Hos uel præcipuè, quorum opera in meis  
 Vtus sum studijs, ut pòte maxima.*

*Primis quippe fui cura parentibus,  
 Qui me sub uiridi tempore paruulum,  
 Eductum lepidis moribus, ad scholam  
 Iusserunt teneris pergere passibus.*

*Omnes & reliquos, qui mihi sedulo  
 Dignis officijs, & studio pari  
 Ostendèrè animi pignora candidi,  
 Inceptisq; meis corde fauent pio:*

*Seruato incolumes hos precor optime,  
 Et uitam facili tempore proroges:  
 Et tandem geniti per meritum tui,  
 Fac uitæ teneant gaudia perpetis.*

LIBERI ET DISCIPV-  
li orantes pro parentibus  
& præcepto-  
ribus.

HIOBI MADEBVRGI

**Q**uem tellus tremit, & terra sublimior orbis,  
O Deus, ô clemens accipe uota Pater.  
Pectore quasq; damus pauido iustissime iusta  
Exaudi nostras pro bonitate preces.  
Nos tua maiestas terret ueneranda: sed illa  
Filius, ut comis, sitq; benigna, facit.  
Vnus is ad dextram tecum Deus, ipse pusillos  
Suscipit & placida uoce uenire iubet.  
Assumus, & precibus facilem te poscimus aurem,  
Amplius ô timidis non metuende Deus,  
Nos pia te docuit uenerari cura parentum.  
Pro quibus has meritò fundimus ore preces.  
Hoc pietas iubet, hoc tua non uiolanda uoluntas,  
Hoc uult pro meritis reddere gratus am or:  
Ad te igitur tot nos suspiria ducimus, in nos  
Esse quot ipsorum facite benigna solent.  
Emisit primas nos mater dulcis in auras,  
Cui graue, sed gratum tum fueramus onus.  
Huius & infantes pleno ubera duximus ore.  
Hec alimenta manu dulcia sepe dedit.

Sapius

Sæpius infomnes exegit sedula noctes,  
 Dum sua uult somno pignora cara frui.  
 Deniq; quod summū est, uerba ipsa precātia primū  
 Nos docuit balba uoce iterare rudes.  
 Maior deinde patris cura, assiduiq; labores,  
 Quo uigor in nobis maior inesse solet.  
 Cuius amor uitam natorum spectat in omnem,  
 Proq; suis curus anxius unus agit.  
 Fine carent benefacta patris, nec nocte dieq;  
 Illius nouit sollicitudo modum.  
 Credidit hæc doctis nos nobiliore magistris  
 Parte simul iussit nomen habere patris.  
 Nomen dulce patris, nomen quoq; dulce magistri:  
 Non minus is curat, non amat ille minus  
 Mitius ingenium, pia mens exalta per artes,  
 His par esse bonis gratia nulla potest.  
 Gratia nulla potest meritis par esse parentum:  
 Vix tamen, ô scelus, has unus & alter agit,  
 A nobis scelus hoc Deus ô prohibeto nasandum,  
 Et fac mente pia facta tenere patrum.  
 Pro quibus has memores iustas effundimus ad te,  
 Non dubitante Deus pectore & ore, preces.  
 Spiritus illorum fac sanctus corda gubernans,  
 Instruat in uera cognitione tui.  
 Sincerum pure da religionis amorem,  
 Da ueram nati noticiamq; tui,  
 Hanc si noticiam dederis, quid cætera frustra

Expetimus, quæ tu sponte daturus eras?  
 Sed prece tu multa gaudes: & in hac quoq; noster  
 Parte erit erga ipsos officiosus amor:  
 Concordes petimus peragant ut tempora uitæ,  
 Inq; annos multos uiuat uterq; parens:  
 Iniusta nunquam res fraude domestica crescat,  
 Atq; suæ sortem conditionis ament.  
 Addictiq; semel studijs, cum tempus in omne  
 Artibus optemus posse uacare bonis,  
 Hanc illis mentem, & mediocres suggere sumtus,  
 Ne pessum, in nobis quod bene cœpit, eat.  
 Et quia nos fidis iam commiserè magistris,  
 Nobiscum ô Deus hos ut tueare rogant.  
 Te saluasse patrem, nati per uulnera CHRISTI,  
 Numine nosq; sacro uiuificasse, docent.  
 Moribus informant iuuenilia pectora castis,  
 Omne simul prohibent impietatis opus.  
 Sed nos esse bonos quia fert malè, pessimus omnis  
 Autor flagitij, his sæpe nocere studet.  
 Despicit hos mundus, cui uirtus sordet: inani  
 Et contrà fastu quod timet illud amat.  
 Quos tu summe Deus nobis defende, pusilli  
 Inq; duces prohibe uimq; dolumq; gregis.  
 Utq; illis meritò patris attribuuntur honores,  
 Illos fac patrius sic quoq; tangat amor.  
 Non labor assiduus segnes, non immemoresq;  
 Officij faciat mens malè grata sui.

Et tu, quod multa cura studioq; merentur,  
 Pro precio dignam redde benigne uicem.  
 Hæc te summus amor, fretus bonitate, precatur:  
 Nostra nec esse fides irrita uota sinit.

# PIETATIS PVE- RILIS LIBER III.

## Preces uariæ.

IOANIS STIGELII, DE  
 uirtute fidei Christianæ.



In dubio pugnans dum mens discrimi-  
 mine querit,  
 Sit ne ipsi curæ, sit ne relictæ Deo:  
 Iamq; Deus lucem uerbi subducit  
 Et aufert,

Iam reddit, uarias continuatq; uices:  
 Et de more patris timida cum prole iocantis,  
 Cor tremere ambigua speq; metuq; facit:  
 Non alia est ratio, contrâ quæ uiribus armet,  
 Quàm ualida supplex uox repetita fide.  
 Me licet occidas, tua sum, tua dicar oportet,  
 Per gnatum soboles morte redempta tuum.  
 Verus in hoc uitam mihi, præsidiumq; dedisti,  
 Promissæ

Promissi nequeunt fallere pacta tui.  
 Fons ut es immoti, uirtus ut uiuida ueri,  
 Sic oris nescis fallere lingua tui.  
 Omnia ut opponas, fidei te robore uincam,  
 Sæpius hac etiam uictus es ante Deus.  
 Hec ubi non dubio de promi pectore sensit,  
 Incipit ad pugnam segnior esse Deus.  
 Et quasi iam uictus fidentis robore cedit:  
 Crede mihi, hæc uis est unica grata Deo.  
 Sic pugnante fauens cedit Cananitide Christus  
 Et firmam pleno prædicat ore fidem.  
 Dixerat huic: Canis es: turpe est, nec more receptum,  
 Erepto pueris pascere pane canes.  
 Illa sed ardenti fidei certamine pugnans,  
 Strinxit in aduersas reddita tela minas:  
 Ecce micæ etiam trito de pane catelli,  
 Copia quas mensæ spargit herillis, edunt.  
 Sim canis: at liceat passim fragmenta catellis  
 Debita, querenti sumere Christi cani.  
 Huic Deus adplaudens: Tua me fiducia uincat:  
 Fiat, ut ex animo conscia credis, ait.  
 Sic quicumq; malis, quicumq; doloribus æger  
 Difficili certam tempore poscit opem,  
 Exue quod mentem uiciat, precibusq; profundis  
 Non dubiam casto pectore iunge fidem.  
 Inde Deo, quamuis duro, constanter adhere,  
 Fidentem nescit deseruisse Deus

ipse



Ipse fidem firmat, nutu iuuat ipse uolentem:  
 Quocūq; queat uinci, præcipit ipse modum  
 Non ne uides paruo de semine surgere plantam,  
 Que sepe ingentes tollit adulta comas?  
 Sic crescit teneræ surgens fiducia menti,  
 Dum Deus adflatu cor fouet ipse suo.  
 Ergo Deum precibus superare assuesce, fideq;  
 Non alia iratus uincitur arte Deus.

DE VI ET EFFICACITATE  
 Precationis Christianæ.

EIVSDEM.

**Q**uisquis in hoc uario uitam discrimine rerū,  
 Carnifici lugens hospes in orbe trahis:  
 Si modò non animum despondes, si modò uero  
 Agnoscens gemitu numina uera colis:  
 Nulla adeò est atrox ullo uiolentia casu,  
 Que rebus ueniat perniciofa tuis.  
 Fide Deo, et contra fortunam audentior ibis:  
 Omnibus oppressos liberat ille malis.  
 Quid quòd et inuitat, quid q; sese omnibus offert?  
 Et patrio cunctos motus amore uocat?  
 Quisquis in aduersi iactaris turbine fati,  
 Et malè difficili tempore pressus habes:  
 Ad mea suspira sublato numina corde,  
 Ipse tibi præsto tutor et ultor ero.  
 Ipse ego te creptum medijs seruabo periculis,  
 Omnibus

Omnibus ærumnis, me duce, liber eris.  
 Sic ait, sequeni facunda per organa Flatus,  
 Ipse boni & ueri fons & origo Deus.  
 Quæ uox? quæ harmonicis chelys argutissima ner-  
 Quis sonus hoc poterat dulcior esse sono? (uis,  
 Ecce cruori uori premeris sub lege tyranni,  
 Vincula uel sæuo captus ab hoste geris:  
 Aut tibi ieiunas stringit penuria mensas,  
 Aut uastat patriam pestis acerba domum:  
 Aut mensuræ expers: immanis bellua, bellum  
 In tua non merita tegmina clade ruit:  
 Aut tibi subiectæ tollunt bona patria flammæ,  
 Impius aut partas miles ademit opes:  
 Protinus auxilium, solatia, robur habebis,  
 Orabis puro si modò corde Deum.  
 Dum loca bis quatuor Moses per inhospita lustris  
 Iusta Deo addicto milite bella gerit,  
 A' populo quoties pœnam ruditate merenti  
 Deflexit precibus dira pericla suis?  
 Angelus Achasidæ precibus legatus in hostem,  
 Agmina diuina delet iniqua manu:  
 Fauce siti pressa, precibus fortissime Samson  
 Es subiti puras fontis adeptus aquas.  
 Obruit ignita tres in fornace precantes,  
 Sæua sed illesos perdere flamma nequit.  
 Afferuere preces sæuorum ex ore leonum  
 Innocuum uatem Mede Dariæ tuum.

Sapathi-

*Daphatidæ Syriæ nequicquam uincla tyrannus:*

*Dum facit is puro pectore uota, parat.*

*Liberat è cete fidentem oratio Ionam,*

*Dum firmo in medijs pectore fidit aquis.*

*Per mare iactatus, terræq; pericla Paulus,*

*Ad Dominum fusa uincit ubiq; prece.*

*Facta cadunt manibus confiso uincula Petro,*

*Dum leto auxilium prædicat ore Dei.*

*Quid tamen exemplis opus est? exempla petenti*

*Quelibet ostendit milia multa dies.*

*Nonne Deus nobis mensas spectantibus auget,*

*Consecrat ad positas cum pia lingua dapes?*

*Nōne hominū numerus sata grana æquare uidetur,*

*Que pius agricolæ misit in arua labor?*

*Plena tamen mirè distendunt horrea messes,*

*Præsentemq; docet copia larga Deum.*

*Quod si idem fieri Geticæ causabere genti,*

*Aut si qua est alibi gens aliena Deo:*

*Næ data præsentis dum carpit commoda uite,*

*Ante Deum æternis est caritura bonis,*

*Vt casta uult mente coli, precibusq; uocari,*

*Sic negat oranti munera nulla Deus.*

*Tu modo ne tempus uotis præscribe uocato:*

*Sæpe Deus differt, quæ citò facta nocent.*

*Ipsi tota tuæ ratio est notissima uite,*

*Arbitrium uoti finiet ipse tui,*

*Nec peregrinanti uox irrita mente feratur,*

Nec sonet ignaro pectore lingua preces.  
 Hec cæcos animis, suaq; in mala sponte ruentes,  
 Quos res à memori distrahit ulla prece.  
 Aut qui dum fuscæ, sic re cogente, precantur,  
 Tam sanctam trepidi rem dubitauer agunt  
 Ethnicus ignotis sic diuis concinit Orpheus.  
 Sic hymnos dubio ludis Homere sono.  
 Vox concors cum corde sonet, mens pura precetur,  
 Et ueniam in solo quærat, opemq; Deo.  
 Mens humilis, culpæq; dolens, fidensq; salutis,  
 Ardua perruptis nubibus astra subit:  
 Per mediatorem firmans uestigia Christum,  
 Non aliter compos, quod cupit, illa feret.  
 Ipse Deus præsto est, & proximus omnibus illis,  
 Qui uera faciunt agnitione preces.  
 Illum adeo uero quicumq; uerentur amore,  
 Omnia gauisi, quæ uoluere, ferent.  
 Ut se saluifici patefecit munere uerbi,  
 Sic sibi uult proprio solus honore coli,  
 Nec cultum agnoscit, quem Christi gloria nescit:  
 Illius oratus nomine cuncta dabit.  
 Ergo suis subeat sua fata furoribus, orbis,  
 Quem iuuat à uero semper abesse Deo.  
 Cladibus inuoluant insana hæc tempora mentes,  
 Omne ausit regni dira cupido nefas:  
 Te Pater, inuicti sacro cum numine Christi,  
 Mente fide plena te uoco uiue Deus.

Qui

Qui te saluifici manifesto munere uerbi,  
 Perspectum populis omnibus esse cupis.  
 Et uelut è speculo, tua quæ sit uera uoluntas,  
 Præcipis è Gnati discere morte tui.  
 A te uera salus, tu tanto in turbine rerum  
 Auxilio serua meq; meosq; tuo.  
 Neue animum rapiat secum sentina malorum,  
 Da mala pacata publica mente pati.  
 Ecce caput diro pugnat cum corpore fato,  
 Et rapit insontes seuus in arma furor.  
 Paruulus ista tuus trepidè grex praelia spectat,  
 Et fieri in pœnas talia cuncta dolet.  
 Heu multos belli uis impia raptat eorum,  
 Qui ferro certè non meruere mori.  
 Ut uolitans rupto uiolentus ab aggere torrens,  
 Cum pecore inuocuas flumine tollit oues:  
 Sic latè extendens crudelia brachia bellum  
 Versat in innocuas publica damna domos.  
 Ah quam sancta tui fœdatur gloria uerbi,  
 Dum dictu Mauors facta nefanda facit.  
 Aure Deus placida gemitus admitte torum,  
 Et dubijs certa consule rebus ope.  
 Obiectas arce nebulas, & nubila pelle,  
 Quæ uerbo inducit uis manifesta tuo.  
 Impia mordaces conantibus iniice frenos,  
 Nominis extinguant ne monumenta tui.  
 Ne cogant propriam nos abiurare salutem,

**Q**ue sola gnati morte parata tui est.  
 Sed tu iam Christi famulatrix Musa potentis.  
 Siste querulosum, sineq; claude melos.  
 Cor sine spe plenū expectet, quod lingua precatur  
 Sic Deus oblato munere largus adest.  
 Fisa Deo cupidum firmet patientia pectus:  
 Omne malum, in Christo si patiare, leue est.  
 Christe potens mundi domitor, Rex maxime regū  
 Auxilio foueas meq; meosq; tuo.  
 Tu potes in medio pacem donare tumultu,  
 Ut nusquam mentis senti at arma quies.  
 Naufraga delirans subeat sua tempora mundus,  
 Sacra mihi presens anchora Christus erit.  
 Hoc duce seuorum pelagus superabo malorum:  
 Iam ualeat mundus, Tu mihi Christe faue.  
 PRECES EXAUDIRI PRO-  
 pter Christum.

PHILIPPI MELAN-  
 chthonis,

**A** Cer Idumæus, loca per deserta uagantes  
 Arcere Ebræos finibus ausus erat:  
 Conseruitq; manus, sed Moses arma suorum  
 Adiuuat, & precibus prælia magna ciet.  
 Et uincit, quoties palmas ad sidera tendit,  
 Quemq; uocat coram sentit adesse Deum.  
 Brachia sed quoties iterum lassata remittit,  
 Cogitur Ebræi cedere turba ducis.

Ergo.

Ergo dic toto dum fusus pellitur hostis,  
 Erectas palmas ut tenuisse queat,  
 Subijcitur cubitis orantis saxea moles,  
 Sollicitoq; suis corde petentis opem.  
 Sic quoties curamq; precesq; remisimus ipsi,  
 Ocia securis insidiosa nocent.  
 Illecebre uacuas subcūnt dulcedine mentes,  
 Et facile in uitium pectora prona trahunt.  
 Exacuunt igitur tot nostra pericula curas,  
 Proposita nobis exitijq; uia.  
 Nec quisquā putet his se emerge re posse procellis,  
 Auxilium præsens ni Deus ipse ferat.  
 Conāitor æternus uera est tibi uoce rogandus:  
 Hunc tamen ut places, ara petenda tibi est.  
 Nulla est grāta Deo, nisi Christus filius, ara,  
 Qui luit officio crimina nostra suo.  
 Huic appone manus, huic toto in cumbito corde  
 Ad patrem nostras perferet ille preces.

## EIVSDEM.

**N** Ec tu Gnate Dei maius meliusue rogare  
 Aeternum poteras, optime Christe, patrē  
 Quam quali oroyū semper te diligit ipse,  
 Diligat & simili nos ut amore Pater.  
 Nec tribui nobis hoc possit munere maius  
 Quid nati posset maius amore dari?  
 Non apud æternum facis irrita uota Parentem,  
 Adfirmat iurans hoc Pater ipse tibi.



Erga nos etiam es patrij tu pignus amoris,  
 Iussus pro nobis debita λότρη dare.  
 Nos igitur quanquā sumus ægra & sordida massa,  
 Credimus ista tamen munera summa dari.  
 Confisiq; tua prece Christe, pericula nostra  
 A summo petimus cuncta Parente regi.  
 Tuq; tuo serues infirmos Numine, qui uis  
 In nostris uiuens mentibus esse λόγος,

AD DEVM PATREM.

DECII AVSONII.

Galli.

**O**mnipotens, quē mēte colo, pater unice rerū,  
 Ignorate malis, & nulli ignote piorum,  
 Principio extremoq; carens, antiquior æuo,  
 Quot fuit, ant ueniet: cuius formamq; modumq;  
 Nec mens complecti poterit, nec lingua profari,  
 Cernere quem solus, coramq; audire iubentem  
 Fas habet, & patriam propter considerare dextram,  
 Non genito genitore Deus: qui fraude superbi  
 Offensus populi, gentes in regna uocauit,  
 Stirpis adoptiue meliore propage colendus,  
 Cernere quem licuit proauis, quo numine uiso  
 Et Patrem uidisse datum, contagia nostra  
 Qui tulit, & diri passus ludibria lethi,  
 Esse iter æternæ docuit remeabile uitæ.  
 Nec solam remeare animam, sed corpore toto  
 Cælestes intrare plagas, & inane sepulchri

Arca.



Arcanum uacuis adopertum linquere terris,  
 Nate patris summi, nostroq; salutifer æuo,  
 Virtutes patrias genitor cui tradidit omnes,  
 Nil ex inuidia retinens, plenusq; datorum:  
 Pande uia precibus, patriasq; hæc perfer ad aures:  
 Da Pater inuictam contra omnia crimina mentem,  
 Vipereumq; nefas nocituri auerte ueneni:  
 Sit satis, antiquam serpens quod prodidit Euam,  
 Deceptumq; adiunxit Adam, nos fera nepotum,  
 Semina, ueridicis etas prædicta Prophetis,  
 Vitemus laquos, quos letifer implicat anguis.  
 Pande uiam, qua me post uincula corporis ægri  
 In sublime feram, puri quæ lactea cœli  
 Semita uentosæ superat uaga nubila Lunæ,  
 Quæ procures abiçre pij, quaq; integer olim  
 Raptus quadrijugo penetrat super æthera curru  
 Helias, & solido cum corpore præuius Enoch.  
 Da Pater æterni speratam luminus auram,  
 Si lapides non iuro deos, unumq; uerendi  
 Suspiciens altare sacri, libamina uitæ  
 Intemerata fero: si te Dominiq; Deiq;  
 Vnigene cognosco patrem, mistumq; duobus  
 Qui super æquoreas uolitabat spiritus undas.  
 Da genitor ueniam, cruciataq; pectora purga,  
 Si te non pecudum sibilis, non sanguine fuso  
 Quæro nec carnis numen coniecto sub extis:  
 Si scelere abstineo errori ipse obnoxius, & si

Opto magis quàm fido bonus purusq; probari,  
 Confessum dignare animam: si membra caduca  
 Execror, & tacitum si pœnitet, altaq; sensus  
 Formido excruciat, tormenta q; fera gehennæ  
 Anticipat, patiturq; suos mens saucia manes.  
 Da Pater hæc nostro fieri rata uota precatu,  
 Nil metuum, cupiamq; nihil: satis hoc reâr esse,  
 Quod satis est: nil turpe uelim, nec causa pudoris  
 Sim mihi: nec faciam cuiquam, quæ tempore eodem  
 Nolim facta mihi, nec uero crimine lædar,  
 Nec maluer dubio, paulum distare uidetur  
 Suspectus, uereq; reus, male posse facultas  
 Nulla sit, & bene posse adsit tranquilla potestas:  
 Sim tenui uictu atq; habitu, sim charus amicis,  
 Et semper genitor sine uulnere nominis huius.  
 Non animo doleam, non corpore, cuncta quietis  
 Fungantur membra officijs, nec saucius ullis  
 Partibus amissum quicquam desideret usus.  
 Pace fruar, securus agam, miracula terræ  
 Nulla putem, suprema mihi cum uenerit hora,  
 Nec timeat mortem bene conscia uita, nec optet,  
 Purus ab occultis cum te indulgente uidebor,  
 Omnia despiciam, fuerit cum sola uoluptas  
 Iudicium sperare tuum, quod dum sua differt  
 Tempora, cunctaturq; dies, procul exige seuum  
 Insidiatorum blandis erroribus anguem.  
 Hæc pia, sed in æsto trepidantia uota reatu,

Christe

Christe apud æternum placabilis affere Patrem:  
 Saluator Deus ac Dominus, mens, gloria, uerbum.  
 Filius, ex uero uerum de lumine lumen,  
 Aeterno cum patre manens, in secula regnans,  
 Consona quem celebrat modulato carmine plebes  
 Et responsuris ferit æra uocibus Amen.

IOHANNIS PICI

Mirandulani.

**A**lme Deus, summa qui maiestate uerendus,  
 Verè unū in triplici numine numē habes  
 Cui super excelsi flammantia moenia mūdi,  
 Angelici seruit turba beata chori.  
 Cuius & immensum hoc oculis spectabile nostris,  
 Omnipotens quondam dextra creauit opus.  
 Aethera qui torques, qui nutu dirigis orbem,  
 Cuius ab imperio fulmina missa cadunt:  
 Parce precor miseris, nostras precor eluc sordes,  
 Ne nos iusta tui pœna furoris agat.  
 Quod si nostra pari pensentur debita lance,  
 Et sit iudicij norma seuera tui,  
 Quis queat horrendum uiuentis ferre flagellum  
 Vindicis, & plagas sustinuisse graues?  
 Non ipsa irata restabit machina dextra,  
 Machina supremo non peritura die.  
 Que mens non primæ damnata ab origine culpæ,  
 Aut quæ non proprio crimine facta nocens?  
 At certe ille ipse es, proprium cui parcere semper.

p 4 Iustit

Iusticiamq; pari qui bonitate tenes.  
 Præmia qui ut meritis longè maiora rependis,  
 Supplicia admissis sic leuiora malis.  
 Namq; tua est nostris maior clementia culpis,  
 Et dare non dignis res mage digna Deo est.  
 Quauquam sat digni: si quos dignatur amare,  
 Qui quos non dignos inuenit, ipse facit.  
 Ergo nos placido miserans precor aspice uultu,  
 Seu seruos malis, seu magis esse reos,  
 Nempe reos, nostræ si spectes crimina uitæ,  
 Ingratæ nimium crimina mentis opus.  
 At tua si potius in nobis munera cernas,  
 Munera præcipuis nobilitata bonis:  
 Nos sumus, ipsa olim tibi quos natura ministros,  
 Mox fecit natos gratia sancta tuos.  
 Sed premit heu miseros tantæ indulgentia sortis,  
 Quos fecit natos gratia, culpa reos,  
 Culpa reos fecit: sed uincat gratia culpam,  
 Vt tuus in nostro crimine crescat honos.  
 Nam tua siue aliter sapientia, siue potestas,  
 Nota suas mundo prodere possit opes:  
 Maior in erratis bonitatis gloria nostris,  
 Illeq; præ cunctis fulget amandus amor,  
 Qui potuit cælo Dominum deducere ab alto,  
 Inq; crucem summi tollere membra Dei:  
 Vt malè contractas patrio de semine sordes  
 Ablueret lateris sanguis et unda tui.

sic

Sic amor ex pietas tua Rex mitissime, tantis  
 Dat mala materiem suppeditare bonis.  
 O' amor, ô pietas nostris malè cognita seclis,  
 O' bonitas serui facta ministra tui.  
 O' amor, ô pietas nostris bene prouida rebus,  
 O' bonitas nostris nunc propè uicta malis.  
 Da precor huic tanto qui semper feruet amori,  
 Ardorem in nostris cordibus esse parem.  
 Da sathana imperium, cui tot seruasse per annos  
 Poenitet, excusso deposuisse iugo.  
 Da precor extingui uesana incendia mentis,  
 Et tuus in nostro pectore uiuat amor,  
 Vt cum mortalis perfunctus munere uitæ,  
 Ductus erit Dominum spiritus ante suum:  
 Promissi regni felici sorte potitus,  
 Non dominum, sed te sentiat esse Patrem.

IOACHIMI CAMERARII.

Ræ cunctis æternæ Deus, nos uoce precamur  
 Supplice, sincere liceat præconia semper  
 Doctrinæ exaudire, tuus quam filius ipse  
 De patrio promens patefecit pectore nobis,  
 Filius ille tuus sermo, lux, ardor, imago.  
 Ipse manus rabiem Gethicæ depelle cruentam,  
 Seu te mente alij scelerata Chryste furentes  
 Deturbare throni conantur sede paterni,  
 Atq; tuum in terris audent diuellere coetum,  
 Depravando tuæ cœlestia dognata uocis.

P

S

Spiritus

Spiritus ô regni confors paraclete perennis,  
 E' patrio natus quem mittit pectore sanctum,  
 Iunge tui sensu populi concordæ cateruam,  
 Assis & nobis morte impendente benignus,  
 Concilians semper mansuræ gaudia uitæ.  
 O' pacem largire Deus, largire quietem,  
 Tranquilla ætatis concedens tempora nostræ  
 Cursus ut à nobis huius tibi seruiat omnis.  
 Tu solus potes hostiles arcece timores,  
 Tu formidandas solus prohibere ruinas,  
 Et potes inuicta pauidos defendere dextra:  
 Aeternæ ô Deus, æterni Pater unice Nati,  
 Aequale æterno spiras qui pectore Flamen.  
 Sit Deus incursus hostilis libera tellus  
 Quam colimus, studijs contingant ocia nostris,  
 Floret hæc regio diuino tuta fauore:  
 Conficiatq; suum spaciū fœliciter omnis  
 Aetas, conditio, sexus, natio, genus ordo.  
 Fons desiderij Deus opt. maxime sancti,  
 Consilij & recti, atq; operum uirtutis origo,  
 O' pacem largire tuis, quam non dare mundus.  
 Iste potest: semper sic corda uacantia iussis  
 Nostra tuis, omnisq; metu cessante pericli,  
 n te perpetua secura quiete fruuntur.

# SEBASTIANI CASTALIONIS

O Mnipotens genitor, quæ uox mortalis obire  
 Argumenta queat laudum diuina tuarum?

Tu

Tu cœli uarios orbes, terræq; creasti  
 Immotam molem: tum claro lumine mundum  
 Illustrando, diem paribus succedere nocti  
 Iussisti spacijs: medio deinde æra tractum,  
 Infernis uolucres ab aquis discludere nimbos:  
 In partesq; inas detectæ flumina terræ  
 Desfluere, atq; cauas latè complere lacunas.  
 Mox patefacta tuo iussu, genus omne sub auras  
 Arboreum trusit tellus, herbasq; uirentes.  
 Ducturusq; diem Titan, & Cynthia noctem,  
 Sidereiq; ignes reliqui conuexa per alta  
 Splendentes, liquidi tenuerunt ætheris oras.  
 Tum pisces in aquis, & corpora picta uolucrum  
 Emicuerunt ab aquis, pecorum tum terra creatrix  
 Sæptentumq; dedit uarium genus, atq; ferarum:  
 Postremoq; hominem magna ratione creasti,  
 Magnæ participem mentis, cui cætera cuncta  
 Subijcere ntur, aquæ pisces, cœliq; uolucres,  
 Cumq; parente sua pecudes telluris alumne.  
 Qui cum fatali gustasset ab arbore fructus,  
 Conflassetq; sibi dueros cum morte labores,  
 Contactumq; suo uitiasset crimine mundum,  
 Tu genus humanum magno miseratus amore,  
 Vnigenam terris largitus es, optime, Natum,  
 Qui crimen lucret, quod non comiserat ipse,  
 Atq; suo nobis repararet sanguine uitam,  
 Et nos æterno tibi fœdere conciliaret,

Et

Et cœli tristes terris auerteret iras:  
 Omniaq; in melius, casu labefacta, referret.  
 Quid non oratus Pater optime maxime, nostro  
 Concedes generi, qui Natum sponte dedisti?  
 O' amor, o' pietas: ponamus corde timorem  
 Iam licet, & nobis de te omnia pollicemur,  
 Tu clemens, tibi fas soli mortalibus ægris  
 Omnia largiri: qui te, Natoq; potenti  
 Fidimus, & nobis promittimus omnia de te,  
 Salue magne Pater, da nobis cernere Nati  
 Regna tui, charo deletis sanguine culpis,  
 Cœlestisq; domus epulis gaudere beatis.

GEORGII FABRICII.

**V**luimus indigni natorum nomine: teq;  
 Dicere quo miseri possumus ore Patrē?  
 Natus ut in charo sp̄e ponit opēq; Parente,  
 Flagitat auxilium cura ita nostra tuum.  
 Non ideo tua nos Pater inclyte dextera finxit  
 Omnipotens, ut opus perderet ipsa suum.  
 Respice pacato, quo seruas omnia, uultu,  
 Contege & oblita crimina nostra manu.  
 Assiduis madefacta rigent ploratibus ora,  
 Ex animi solitus cecidit ab ore color.  
 Mens mea te refugit, pugnat tibi praua uoluntas,  
 Obruta peccati pondere tota caro est.  
 Vix tot uere uigent fecundi floribus agri,  
 Sordida quot fœde pectora labis habent.

Ira



Ira tua inde furit, meritis acerrima pœnis,  
 Peste minax, gladio seuæ, timenda fame.  
 Parce tuis, parcis quoniam Pater optime, natis:  
 Et propter Nati uulnera parce tui.  
 Nominis inq; ira patrij reminiscere iusta.  
 O' uenerande parens, ô celebrande Deus.  
 ADIESVM CHRISTVM RE-  
 demptorem.

## ADAMI SIBERI.

**S**ic tibi Christe Deus, seruiati conditor orbis,  
 Quem tremit immensi machina tota poli,  
 Aethereæ coelestum animæ sine corpore uitæ,  
 Seruiat angelici sanctaq; turba gregis:  
 Sic, quam seruares æterna ex morte, tulisti  
 Sanguinis & uitæ prodigus esse tuæ,  
 Te solum laudet tibi grata Ecclesia, uero  
 In terris celebret nomen honore tuum.  
 Aspice nos placido, quo conspicias omnia, uultu,  
 Accipe sollicita factaq; uota prece.  
 Horrendi miseros hostis dum more leonis  
 Circuit, heu qua non perte timendus adest:  
 Ut iunctum possit tecum confundere fœdus,  
 In Stygia & captas addere uincla manus.  
 Scilicet ex illo rapido cum fulmine cœlo  
 Tartareas cecidit pulsus ad usq; lacus,  
 Exercens immane odium, te dante salutem  
 Aeternum, positos nos dolet ante sibi.

Sed

Sed tu nostrarum præsens fiducia rerum,  
 Illius occultos ne patiare dolos.  
 Ceperit insidijs, nec opina fraude parentes,  
 Dum suadet uetida carpere poma manu,  
 Mortis aperta uia est quæ propter, seu a tyrannis  
 Peccati in nostrum procubuitq; caputi  
 At nobis mentem fidei da robore fultam,  
 Aethereo sensus perlue rore meos.  
 Da cultus tribuam ueros tibi, uota precesq;  
 Quis sine nulla abeat nox mihi, nulla dies,  
 Primigenæ quantum non tardant semina culpa,  
 Preliæ cum uitij irrequitæ geram.  
 Non Venus, aut uinum, non fallax alea, fuco  
 Non perfusa animum gloria sollicitet.  
 Sim gratus patriæ, charis iucundus amicis,  
 Sentiat officium plurima turba meum.  
 Sed neq; Pactoli ueniat mihi diues arena,  
 Aut sub tectâ fluat lymphæ heata Tagi:  
 Pinguis fœcundi ruris non mille requiro,  
 Quæ ualidi subigant arua serenda boues  
 Me iuuat exiguo contentum uiuere corde,  
 Dum pura ardenti fulgeat igne fides,  
 Multiplicetq; manu paruos diuinus acervos  
 Tempore non ullo deficiente fauor:  
 Luceat ante pedes dum sacri semita uerbi,  
 Dogmata nec cæco falsa furore sequar.  
 In populi cœtu proprio tibi sanguine parti,

Quam

*Quàm tua uox nostra dulcis in aure sonat?*

*A te sancitas leges seruare sacrorum*

*Quàm iuuat, et pueris tradere posse senem?*

*Aut quando tristes agitat mens anxia curas,*

*Mœrores illis rite leuare meos?*

*Hoc te dante mihi contingat Christe, superbi*

*Damnosas quicquam nil moror orbis opes.*

*Quinetiam si me iubeas extrema subire,*

*Ferre famem, maciem, uerbera, uincla, necem:*

*Per te quicquid erit patiar, mea uita: sit ipsum*

*In te dulce mihi uiuere, dulce mori.*

*Interea studijsq; meis, Musisq; faueto,*

*Ad laudemq; tui dirige Christe Deus.*

*Castalia cingant alij sua tempora lauro,*

*Labra Medusæo sicca liquore leuent:*

*At mihi de Libani sertum sit fronde, sacrata*

*Pocula Iordanes plena ministret aquæ:*

*Vt tua concelebrans grato præconia uersu,*

*Nomine deducam carmina digna tuo.*

**P H I L I P P I M E L A N -**  
**chthonis.**

**N** *Il sim, nulla miser noui solatia, massam*

*Humanâ nisi quod tu quoq; Christe geris*

*Tu me sustenta fragilem, tu Christe gubernas*

*Fac ut sim masse surculus ipse tuæ,*

*Hoc mirum fœdus semper mens cogitet: uno*

*Hoc est, ne dubita, fœdere parta salus.*

**IOACHIM**

## IOACHIMI CAMERARII.

**C**hriste, Dei æterni soboles æterna parentis,  
 Ex illibata Virgine natus homo:  
 Morte tua qui deuicta de morte triumphas,  
 Et peccata tuo sanguine nostra lauas:  
 Ah uitam largire pijs sine fine beatam,  
 Qui te cunq; fide non dubitante colunt.  
 O'da peccati tangat mea pectora sensus,  
 Delicti ut pigeat, pœnitatq; mei.  
 Vtq; petens ueniam credam tibi uera professio,  
 Et studium de te pendeat omne meum.  
 Te solum uenerer, tibi discam fidere soli,  
 Vnicum & agnoscam te Dominum atq; Deum.  
 Ne uic tuo à cultu uesana mente recedam,  
 Resq; prior mihi sit nomine nulla tuo.  
 Ne me quicquã in uita, aut in nece separet abs te:  
 Sed semper famulus sim, maneamq; tuus.

## IACOBI MICYLLII.

**S**ic tua cœlestes metuant, sic numina manes,  
 Sic celebrent omnes nomen ubiq; tuum.  
 Aspice ut in dubijs uersetur Christe periculis,  
 Imminet, atq; omninititur hostis ope.  
 Nam sua quando iterum credit se posse parare  
 Imperia, & prisca sceptrâ tenere manu:  
 Quos non ille dolos, quas non excogitat artes,  
 Aut quod non animo concipit ille malum?  
 Illic in medijs committit prælia campis,

Hic

Hic laqueos tacita callidus arte premit:  
 Et quocunq; etiam referas oculosue pedésue  
 Instat, & aduersus occupat antè uias.  
 Lumina nec somnum capiunt, nec membra quietem:  
 Ille (malum) noctes excubat, atq; dies.  
 Non secus ac pelago, si quæst sine remige puppis,  
 Fertur, & emissis fit noua præda notis:  
 Sic tua progenies nullo prohibente uagatur,  
 In nos certatim uentus & unda ruunt.  
 Ah bene sub priscis currebant patribus anni,  
 Cum genus in uerbo credidit omne tuo.  
 Tunc neq; diuitiæ, nec amor regnabat habendi,  
 Parebant uni pectora sancta Deo,  
 Hostis erat tenuis, raræq; ad prelia uires,  
 Tranquilla quiuis pace quietus erat.  
 Nunc malè cum longis perierunt omnia seclis:  
 Spreta iacet pietas, spreta iacetq; fides.  
 Nunc pudet esse bonos, nunc est malè uiuere uirtus:  
 Nunc quicquid facias turpiter, omne detet.  
 Scilicet hæc rerum facies, ea gloria mundi est:  
 Hei mihi, quis finis temporis huius erit?  
 Atq; ea cum spectat qui nobis imminet hostis,  
 Ocia tum lentum ducere posse putem?  
 Concipit imperium, & regni sibi firmat habenas:  
 Atq; inhiat prædæ, ceu lupus, ille suæ.  
 Forsitan & merito patimur nunc omnia nostro,  
 Et ueniunt factis præmia digna suis.

Sed tu cui cælum, cui pondus & æthera seruit.

Arbitrio cuius mensis & annus eunt:

Aspice nos oculis, quibus aspicias omnia, blandis.

Et nos è tantis erue Christe malis.

Affere, nam penes est te solum cuncta potestas,

Affere nate Patris uindice iussa manu.

Ipseruades, hostis quas cogat ad arma cohortes:

Has nisi tu uincas, uincere nemo potest.

Ergo fer auxilium, & tandem res excipe fessas,

Quassatis pelago portus & aura ueni.

ANTONII CARCHESII.

**Q**ui regis & terras, & celsi sidera cœli,

O Patris proles unica Christe tui:

Vnica spes hominum, nostræ autor Christe salutis.

Qui solus summo cuncta fauore foues:

Diuina aspires sic nostræ gratia menti,

Vt uita dux sit præsidiumq; meæ:

A te ne uita quis nostræ gressus aberret,

Qui scopius & uita es regula recta piæ.

Ad te fac uita referam omnia sedulus acta,

Nominis ut mea sit gloria uita tui.

Seducat ne nos uita fiducia nostræ,

Aut uaser iniiciat corda philauta Sathan.

Soleturq; animum patientia firma iacentem,

Et spes auxiliij non dubitata tui.

Da nobis, augeq; fidem, te Christe precamur,

Tanta

Tanta etenim solus tu dare dona potēs.  
 Tolle prophanarum curas è pectore rerum, ut  
 Possimus Patris querere regna tui:  
 Solaq; sint nobis semper cœlestia curæ,  
 O nostra ad nutum dirige corda tuum.  
 Cuncta ut sic nobis ponantur tempora uitæ,  
 Totius ut uitæ sit sine labe tenor.  
 Iuerit ut postquam de corpore spiritus isto,  
 Euolet ad summi regia testæ poli.

GEORGII FABRICII

**I**ncipsum quando penetro, inq; latentia cerno;  
 Totus homo miser est, perditæ tota caro est.  
 Et quia nulla meæ pars non damnabilis umbræ:  
 Nam teuera aliquid si sumus, umbra sumus:  
 Ad te tollo oculos lachrimis manantibus egros.  
 Leticiam inq; tua sentio Christe necesse:  
 Oblitusq; mei, pœnarium oblitus, et iræ,  
 Vulneribus recror Christe cruento tuis.  
 Diffugiunt curæ, mors musat, clauditur Orcus:  
 Mors tua Christe quies, crux tua Christe talus.  
 Effice dura tuæ meditando uulnera mortis  
 Auferat, et flagrem raptus amore pio.  
 In primis fragiles posituro corporis artus,  
 Halitu in extremo mite leuamen ades.  
 Inq; tuas fugientem animam placabilis ulnas  
 Excipe, nec gremio Christe repelle tuo.

## M. ANTONII FLAMINII

**T**E sancte IESU mens mea,  
 Amoris ista uulnere,  
 Suffirat. O salus mea  
 Me solue tandem uinculis  
 Istis, ut euolem tuam  
 Beatus ad presentiam:  
 Fac interim magis magis  
 Amore totus ardeam:  
 Ut pura mens à corporis  
 Contagione, amplexibus  
 Euadat aptior tuis.  
 Tu spes, uoluptas, unicum  
 Cordis mei sis gaudium.  
 Benigne IESU da precor,  
 Humana cuncta spernere  
 Te propter, omnia fac mihi  
 Te propter unum sordeant:  
 Seu pulcher oras ætheris  
 Sol lustrat almo lumine:  
 Seu nox benigno languida  
 Rigat sopore corpora,  
 Domi forisq; mens mea  
 Te quærat, inuocet, canat,  
 Solumq; felix in tuo  
 Dulci acquiescat numine,



**I**ESVM pudicæ uirgines,  
 IESVM iuuentus integra,  
 IESVM uiri, senes, anus  
 Cantemus: in cuius fide  
 Letamur esse, patrio  
 Qui nos amore diligit,  
 Fouetq; summi numinis  
 Aeterni fidi, siderum,  
 Terræ, marisq; conditor.  
 Nil uasta cœli immensitas,  
 Nil magnus orbis continet,  
 Non dextera factum tua.  
 Tu patris in sinu sedens,  
 Alis, gubernas omnia.  
 Tu charitate maxima  
 Nostræ misertus miseriæ.  
 Mortale corpus induis:  
 Diræq; suffixus cruci,  
 Nos morte uindicas tua  
 A sempiternis ignibus.  
 Tu morte uicta regiam  
 Reuersus ad tuam simul,  
 Tui colentes aurea  
 In parte cœli collocas.  
 Te cœtus omnis cœlitum  
 Noctes diesq; concinit,

Te sempiternus si itus,  
 Salutis autorem unicum  
 Testatur esse: tu quies,  
 Lumen, uoluptas mentium.  
 Tu pastor, agnus omnia  
 Peccata tollens, pontifex  
 Aeternus, iram maximi  
 Sedare praesens nminis.  
 Clemens, suavis, optime  
 IESU, tuorum prospera  
 Cursum benignus, ut soles,  
 Piasq; laudes suscipe.  
 Quas ore puro fundimus.

## EIVSDEM.

A More totus langueo,  
 Nec ulla iam datur quies:  
 IESU benigne, iam meam  
 Solare mentem, candidos  
 Ostende uultus, lumine  
 Tuo beata lmina  
 Fac mea, nec osculum precor  
 Amans amanti denega.  
 Tu sponsus es animae meae.  
 Te querit illa, lachrymis  
 Te continentur inuocat,  
 Tu sancte, mortis è manu  
 Tuo redemptam sanguine,

Tuiq;

Tuiq; amore sauciam  
 Odiffe certè non potes:  
 Ergo misella cur tuæ  
 Dulcedinem presentie  
 Non sentitis: ah cur supplices  
 Veni querelas dissipant?  
 Sed tu licebit anxio  
 Amantem amore torques,  
 Non illa amare desinet:  
 I E S V, tui tabescere  
 Amore res dulcissima est.

BASILII ZANCHII

**O** Mundi uenerande sator, mēs alta Parentis,  
 O decus, ô nostræ Christe salutis iter:  
 Te liquidi spacia ampla poli, te maxima tellus  
 Tollat, immensis finibus Oceanus:  
 Te recinat quodcunq; tuo de munere uiuit,  
 Quicquid & in toto prouidus orbe creas,  
 Tu puram in tenebris lucem, & caligine cæca  
 Fundis, & ætheria lumina clara face.  
 Tu miseros, tu morte tua, formidine mortis  
 Soluis, & à lethi limine restituís.  
 Mortalesq; artus terræ, moribundaq; membra  
 Condis, & in motos dissoluis cineres:  
 Et longo sator ipse iubes post tempore rursus  
 Surgere non ulla dissoluenda die?  
 Atq; immortalia mortalia corpora uita

Afficis, eternis inclita muneribus:  
 Occlusus penetrare fores, sine pondere, ferri  
 Das pater, & uentos præterijisse fuga:  
 Et Phœbum radijs, Phœben candore niuali  
 Vincere, dum plena cornua fronte gerit.  
 Tu Stygij fera terga domas, & colla Draconis,  
 Frangis & inuicta claustra tremenda manu.  
 Et felix spolia ampla refers super æthera uictor,  
 Et nitet exuijs regia celsa nouis,  
 Christe parens tu templa tibi, tu pectora nostra  
 Effice & ipse tuo numine corda reple.  
 Da mentem mactare piam, da mente litare:  
 Euincant nostræ thurea dona preces.  
 Proq; focis cantata tibi noua carmina fument,  
 Sullet et è nostris myrrhea gutta genis.

AD DEVM SPIRITVM  
Sanctum.

H. EOBANI HESSI.

**V**Eni maxime Spiritus, tuorum  
 Reple corda fidelium, tuiq;  
 Accendas in eis amoris ignem;  
 Qui gentes fidei sub unitatem,  
 Per discrimina multa linguarum,  
 Solator paraclete congregasti.  
 Quem nunc mittere Spiritum per orbem  
 Digneris Pater, omnia innouabis.  
 O qui corda fidelium benigni

Elatus

Flatus numine doctiora reddis,  
Da nobis agè Spiritu ex eodem  
Et rectum sapere, & frequenter eius  
Conso lamine uiuere ac ualere.

THOMAE VENATORII.

**F**loridæ doctor facilis iuuentæ,  
Spiritus patris, genitiq; uerbi,  
Mitis irrora salientis undæ  
Pectora riuus.

Velle crescentem segetem malorum  
Cordis humani, leuibusq; flammis  
Vre desertum, simul & nocentes  
Comprime spinas.

Quando nascentum scelus expiantem  
Laudibus ferret Pater ille diuûm,  
Tu super tincti caput infidebas  
Casta columba.

Quinq; post cursum decies dierum,  
Nuper ut mortem tulerat Redemptor,  
Tu super uisus pauidos, ut ignis  
Lingua refulges.

Adiuua duos hominum labores,  
Daq; nos rectumq; sequi, piûmq;  
Et simul nostras studiis honestis  
Imbue mentes.

Scilicet Musæ redeant Maronis,  
Rursus & culti Ciceronis ora,

Quicquid & quondam Clarius uidebat  
Phœbus Athenis.

IACOBI MICYLLI.

**S**piritus alme parens, triplicis pars tertia regni,  
Qui noua sedisti fonte columba sacro:  
Tunc cū se tingi uoluit Iordanis in amne,  
Quem genitum ē summa miserat arce Pater:  
Huc ades, atq; animis clemens illabere nostris,  
Et renoua accensos luminis igne tui.  
Quo uelut omnigenæ linguarum munere gentes.  
Vnanimi per te conualuere fide;  
Sic nostra unanimi socientur pectora pace,  
Noscamus uetri nomen, opesq; Dei.

IOACHIMI CAMERARII.

**A**lme serenator, diuini numinis aura,  
Qui super æquoreas uolitasti spiritus undas  
A patre & genito ueniens æquæ uas potestas  
Huc ades, & nostras diuino lumine mentes  
Accensas renoua, & flammis celestibus imple.  
Numine ut afflati supero, Natumq; Patremq;  
Per te noscentes animo credente colamus,  
Languidaq; æthereæ firmemus pectora pace:  
Ceu quondam toto diuisas orbe mariq;  
Imbutasq; nouo fidei melioris amore,  
Linguarum obsequio gentes in regna uocasti.

GEOR.

## GEORGII FABRICII.

**F** Rigida consumptis tabescunt ossa medullis,  
 Sanguis in exhausto corpore nullus inest.  
 Nam uis peccati nos intoleranda fatigat,  
 Consumit meritum poena nec una caput.  
 Aspice ut hinc nudis astent mucronibus enses,  
 Lethalis latè serpat ut inde lues.

Priuatæ tacco non pauca incommoda uitæ:  
 Magnus ubiq; metus, iustus ubiq; dolor.  
 Ad te confugimus Patris Natiq; potestas,  
 Spiritus ætherco qui datus orpe uenis.  
 Corporibusq; animisq; amissum redde uigorem:  
 Te duce, quod cruciat, uincitur omne malum.  
 Qui nobis uictus precibus delicta remittis,  
 Et minuis uultu noxia damna tuo:  
 Da desiderium uitæ melioris, & omnem  
 De pauido, oramus, pectore solue metum:  
 Ut mens nostra æui reputans uenientis honores,  
 Leta sit in solo, sitq; beata Deo.

## PETRI LOTICHII

## Secundi.

**P** Atris feruida, Filiq; flamma,  
 Fac nos cuncta mouens uigor, nefandi  
 Puros criminis, integrosq; uitæ.  
 Blando corda reuinciens amore.  
 Da solatiolum, tuiq; curis  
 Dulci numinis expeditus haustu

Sanctis

Sanctis totus ab ignibus liqueſcam.  
 O' ſax certa precumq; gratiaeq;  
 Conſtans pax animi, quieſq; rerum  
 Dum nos lubrica fluctibus tot ætas  
 Incertos agit, & graues procelle,  
 Tu caſtæ arbiter institutionis  
 Flammiſ pectora tempera pudicis.

## EIVSDEM.

**V**T noua cum Dominus fabricaſſet corpora  
 illa Dei ſouit Spiritus igne ſuo: (mundi,  
 Fœcundosq; dedit rebus naſcentibus auctus,  
 Cuncta ſui reddens plena uigoris ope:  
 Sic miſeris duro ſolatia tempore præſtes,  
 Sic foueas cætuſ ſpirituſ alme pios.  
 Te ponat queruloſ Eccleſia præſide luſtuſ,  
 Numine curarum mole ſoluta tuo.  
 Oppreſſæq; malis, feſſæq; ſenilibuſ annis,  
 Afflatu recrea languida membra tuo.  
 Diſcute ſollicitoſ terroreſ, ſuffice uireſ,  
 Corda ſinaſ cæcæ noctiſ habere nihil.  
 Aſſit amant ueri ſtudum, probitaſq; fideſq;  
 Aethereæ per quam ſediſ adimus iter.  
 Omnipotentſq; tuæ firmet noſ halituſ aure,  
 Solamen cunctiſ, hoſte furente, malis.  
 Erige tu pauidoſ, & opib; cœleſtiſ egenteſ,  
 Sicut auib; pluuiſ mollibuſ oua, tege.

Tn



*Tu requies animi, tuus omnia temporat ardor.*

*Muneris est, quidquid spirat ubiq; tui.*

*Tu moderaris opus triplicis mirabile mundi,*

*Aeternamq; doces cuncta tenere fidem.*

*Aeris & liquidos tractus, cœliq; meatus,*

*Quidquid & in toto nascitur orbe, foues.*

*Vis tua præcipiti magnum uertigine cœlum*

*Non intermissis cursibus ire facit.*

*Tu regis obliquo contrâ surgentia nisu,*

*Omnia quæ certis legibus astra micant:*

*Quæq; suos peragunt clarissima lumina motus,*

*Te sine sol fixis lunaq; staret equis.*

*Vis tua felices uiridanti gramine colles*

*Vestit, & innumeris floribus ornat humum.*

*Tu patulos mulces fecundo flamine campos,*

*Vt grauidos onerent frugibus arua sinus.*

*Aspice sic miseros, sic consolare iacentes,*

*Rore salutifero Spiritus alme iuua.*

*Pectora te flammis agitante beata calecant,*

*Sitq; Deus soli cui placuisse uelint.*

*Nec sacro auertant nos iussa minantia uerbo,*

*Auxilio cedat mors quoq; uicta tuo.*

*Vt, fragiles summa cum luce reliquerit artus,*

*Viuat in æternæ spiritus arce domus.*

BRVNONIS SÍDELII.

Qui de patre filioq; spiras

**O** Flatus sancte, tua precamur aura

Nos

Nos præsens rege, mentibusq; nostris  
 Accendas dominam fidem, per omnes  
 Quæ securi periculi labores  
 Ex mundo comitetur hoc euntes.

Da lucis radios tuæ, governa  
 Nostrum pectus, ut unius salutem  
 In Christi merito sitam scientes,  
 Saluatoris opem petamus eius.  
 Errantes necce qui sua reduxit  
 Ad uerum patriæ decus beatæ.

O ueri facer ipse fons amoris,  
 Dona quæsumus hælitum fauentem  
 Ut sit congrua pectorum uoluntas,  
 Ac concordia copulet ligatas  
 Mentes, perpetuo uerenda nexu:  
 Nec tranquillior absit aura pacis.

Consolator & aduocate, fidus  
 Supremis ades actor in periculis  
 Fac ne mors, neq; dedecus, timorem  
 Nobis incutiant: fide sed fio stem  
 Olin sustineamus imminentem,  
 Cum Christi ueniamus ad tribunal.

PRECATIO AGENTIS POE-  
 nitentiam.

IOANNIS STYGELII.

**N**ate dei, humauo dignate in corpore nasci,  
 Dum mea, dū mūdi crimina Christe geris:

HA6

*Hæc tibi nunc lachrimas lacerato è pectore fundo,*

*Hos tibi nunc gemitus corde dolente fero.*

*Dum cruce pendentis tua me perterret imago,*

*Horrida dum mortis cogito signa tue.*

*Nam quia tu plagas pro me, mortemq; tulisti,*

*Sim lapis, hic si non me premat iste dolor.*

*Ah doleo, & ringor, me propter talia passum,*

*Me propter diram te subiisse necem.*

*Ipse tibi inflexi colaphos, tibi uulnera feci,*

*Ipse fui mortis proxima causa tue*

*Ipse ego sic angi merui, cædiq; , moriq;*

*Ipse meo perdi crimine dignus eram.*

*Quo miser effugiam, pollutæ crimine uitæ*

*Degener, inq; ipsum bestia scæua Deum?*

*Ecce deus, uiuo qui condidit omnia uerbo,*

*Quæ natura suo continet ampla sinu.*

*Qui fouet immensi stellata uolumina cœli,*

*Atq; opus hoc nutu maximus omne regit,*

*Obrutus impuri scelerato crimine mundi,*

*Infami patiens de cruce pendet homo.*

*Proh dolor, huius ego pars non paucissima culpæ,*

*Quo miser exitio tale piabo nefas?*

*An precer, ut ruptæ rapiant me tartara terræ,*

*Aut miserum pota sorbeat amnis aqua?*

*Deleat aut rupto uitalem è pectore fontem,*

*Aut iugulum stricto soluat ut ense manus?*

*O miserere deus miseri, fons uiuæ salutis,*

*O nun-*

O' nunquam immensa fons bonitate carens.  
 Ne procul irato damnatum proijce uultu,  
 Ne sine cor propria labe perire meum.  
 Proditor auerso desperet pectore ludas,  
 Sustineat dubitans sponte perire Cain:  
 Ipse tui imploro uestigia pronus amoris,  
 Spero, uoloq; etiam perditus, esse tuus.  
 Cede furor, flagrum stimulantis cede doloris,  
 Cede procul quicquid cor dubitare facis.  
 Tu quoq; quæ proprijs confidere uiribus audes  
 Plena superstitio crimine, cede procul.  
 Fixa mihi in solo est constans fiducia Christo:  
 Quo sine, peccati nil nisi massa sumus.  
 Pœnitet ex animo, notæq; renuncio culpæ,  
 Et cupio motu cor renouante frui.  
 Fixus ex humeris saluandis pendeo Christi:  
 Solus is è cœlo uenit, eoq; redit  
 Me tua sine carens bonitas, mellita uoluntas,  
 Fraternalisq; tuus Christe redemit amor.  
 Tu me fasce leuas, tu fontem crimine soluis,  
 Tu regni haredem me facis esse tui.  
 Hinc lachrimas delent lætæ mihi gaudia mentis,  
 Viuo tua pectus luce nouante meum.  
 Viuo, nec horresco minitandis spicula mortis,  
 Nec metuo in festo tutus ab angue mihi:  
 Sed tecum lætus superata morte triumpho,  
 Et tecum uictor regno dracone Deus.

Da Deus hpc etiā quoniam uia prona cadendi est,  
 Vt possim immota mente manere tuus.  
 Ne natura procax, uani aut petulancia mundi  
 Per loca me turpi deuia func trahat.  
 Cur ualet heu hominum tam firmis uiribus hostis,  
 Ille uno miscens tempore mille dolos?  
 Qui uelut esuricens clausum lupus ambit ouile,  
 Circuit, & sicca scuit ubiq; fame.  
 Hunc animis contra quo possim ingentibus ire,  
 Lux mihi sit uerbi semita certa tui.  
 Da ueluti ternis amplexibus annulus hæret  
 Quem tamen in simplex forma cathenat opus:  
 Sic eadem cum mente mihi, cum corde uoluntas,  
 Fisa tibi, stabili seruet amore fidem.  
 Da tua non dubio teneam uestigia passu,  
 Et crucis ut fiam dulcis imago tue.  
 Sponte malum fugiā, quod longo errore uagatur,  
 Et sanctos etiam fallere sæpè solet.  
 Et caueā causas peccandi: & quicquid agendū est,  
 Officij peragam pro ratione libens.  
 Condonemq; alijs temerè exercentibus iram,  
 Et nulli illicita sim leuitate grauis.  
 Sic tuus hoc miles uesani in turbine mundi  
 Euoluam uite tempora certa meæ:  
 Exuiuias donec deponens corporis huius,  
 In tua saluificæ regna quietis eam,  
 Tunc ueram cernens sene cum Simeone salutem,

*Letus eam, cygnus funeris ipse mei.  
Et uitam æterni donato in munere regni  
Christe tua tecum luce superstes agant.*

## EIVSDEM.

**M**ollibus nati pater ut labellis  
Osculum figens, animum calentem  
Pandit, & dulcem simul afflat alti  
Cordis amorem:

Sic tuam in Christo sobolem redemptam  
Et foues mitis Deus, & paternæ  
Mentis aspirans animam benigno  
Numine seruas.

Illud, æternum, Patris atq; Nati  
Robur exercens, recreata uerbo  
Erigit, fulcit, renouatq; sancto  
Pectora motu.

Nescit humanum genus omne, nescit  
Eloqui mundus tua quàm sit ampla,  
Et sinu terræ bonitas, & alto  
Maior Olympo.

Candidè iuras: Ego triste nolo  
Funus errantis, redeat sed ultro  
In uiam, & ueræ placidè fruatur  
Munere uitæ.

En ego infecta uitiosa matris  
Vltera, & seuifaniam Draconis

**Pertrahere**

Pertraho mecum, propriaq; merfus  
Sordeo culpa.

Audio sanctæ pia iussa legis,  
Ceca sed torpet mihi mens, uoluntas  
Frena formidat, tumido repugnat  
Viscere pectus.

Et tamen riuos lachrimor fluentes,  
Percitus uero quatiore dolore,  
Pœnitet culpæ, ueniamq; toto  
Pectore ploro.

Cede uirtutis sapientiæq;  
Dignitas omnis, opæ & labores,  
Factaq; Heroum, tumidaq; regum  
Cedite uires:

Tu mihi dextram pelago natanti  
Porrigis, mortis domitor, tibiq;  
Christe fidenti ueniam & salutem  
Suggestis ultro.

Cum uoles ergo, moriar triumphās,  
Et tuis hærens humeris beatæ,  
Regna conscendam mihi parta uitæ,  
Christe redemptor.

# ADAMI SIBERI.

**M**agne pater, rex terrarum, rex ætheris alti,  
Qui sine principio mens es iustissima, casta,  
Mens bona, mens sapiens, uerax, liberrima, clemens:  
Omnia qui nutu moderaris solus & unus,



Quæ mare, quæ tellus, quæ cœli et æthere æther  
 Tiq; Patris æterni, non enarrabile uerbum,  
 CHRISTE Deus, soboles æquæui æquæua parentis,  
 Factus homo, miscrans qui nostra incōmoda, lapsis  
 Succurris rebus, dulcem reuehisq; salutem:  
 Et tu sancte uigor, diuini Flatus amoris,  
 Cuncta fouens ardor, calor aureus, aurea flamma,  
 A Patre per Natum qui manas numine iuncto,  
 Et trahis humanas uerbo super æthera mentes:  
 Quanta premit caput hoc scelerū sentina remorsu  
 Quantum edat tacito miserum dolor, impia facta  
 Noctes atq; dies propter curisq; fatiget,  
 Non mihi si centum sint ora sonantia linguis  
 Enumerare queam. certant mea crimina nigris,  
 Littore quæ Libyco Zephyris turbantur, arenis  
 Nam tua cum cœli ciues mandata capebant  
 Pennatæ ciues acies, tibi parcat æther,  
 Sol oculus mundi, stelleq; argentea Luna,  
 Anfractusq; uicesq; suas et fœdera seruent,  
 Cum mare ueliuolum, cum terræ frugiferentes  
 Et quæcunq; sinu magnus complectitur orbis,  
 Seu spirant, uitæ seu sunt expertia, uultus  
 Ad nutum Rex magne tui quæcunq; quid ipse,  
 Heu miser, heu quid ago? Concreui matris in aluo  
 Quò dante, et pulchri nunc uiso lumina solis,  
 Parte auctus diæ cœlesti mentis, et haustu  
 Æthereo, brutis foret ut præstare, reliqui

Perfi-



Perfidus, & mitem te fastidire Perentem  
 Sustinui, nec me Patris obseruantia, nec me  
 Sistere; quòd tandem tua me ad subsellia cogar  
 Morte obita, mouit, sequerer ne castra malorum,  
 Impius authoris nigra qui regnat in au.  
 Scilicet ô ideo suffusum labe Parentis  
 Purgaras pruni, fœdum immundumq; lauacro  
 Diuino: dederas cœlestia munera, uerbum  
 Flatu aspirabas sacrati molliter oris:  
 In cœnum ac sordes rursum lutulenta uelut sis  
 Vt rucrem temerarius, ingratusq; salutis  
 Corde reluctarer duro tibi, iussa negarem  
 Et tua sacra Pater clausas dimittere in aures,  
 Sponte fugans à me diuinum insanus amorem,  
 Et te sancte uigor cœli spirabile numen.

Heu quia nam summis potero emerfisse periclis  
 Ecc mihi ante oculos collisis nubibus ignis,  
 Qui cœlo ingeminans terras rutilante petebat,  
 Immensa obrueret cum cuncta licentia ponti:  
 Ante oculos Sodomæ lucent incendia lucent  
 Flumina perpetuo torrentia sulphuris igne,  
 Dextera præcipites tua quòd dabit impia corda,  
 Cùm iudex hominum uitas & crimina dices.  
 Cor tremit, antonito refugitq; è pectore sanguis,  
 Omnia nigrescunt: Non ulla relicta salutis  
 Est tibi, ait, uia, qui me terris inuidet Orcus,  
 Ergò ne proiecta spe tellus ima dehiscat

Optabo, pectus ferro scrutabor acuto,  
 Aut laqueo inuisam properabo abrumperè uitam  
 Crimina tanta uetent mitissima numina: Saulus  
 Impius hoc faciat, faciat sceleratus Iudas.  
 Crede fides, ratio mendacia lumina condat.  
 Crede, Pater, inundo qui dat sua pignora Christum,  
 Non est iratus, non est, Deus. En tibi iurat  
 » Ipse suam uerax uitam. Non est mihi cordi,  
 » Non unquam sedit menti sententia, turpe  
 » Si quid commissum est, miserrorum ut morte pictur  
 » Sed magis, ut sese damnent, & crimina fassi  
 » Toto animo nostra bointate & amore recumbant,  
 » Ac uita æternum dulciq; salute fruantur.  
 » Verba Dei sine fine manent immota, quis autem  
 Quis Pater à te unquam est uultu indignate repul-  
 Pertesus, pacem supplex ueniamq; rogaret (sus,  
 Qui scelerum? Achasida testis genitore creatus,  
 Qui uetidis Solymas sacris & cæde repleuit,  
 Ipse Petrus testis, uictus formidine turpi  
 Abiurat scæde chari qui nomen amici.  
 Quid tibi, quid memorè largo quæ Christe genarè  
 Rore pedes lauit, & fouit crine, puellam:  
 Aut qui pendebat dextra tibi parte, latronem?  
 In medium ô miserere igitur sua crimina dantis,  
 Propter quæ de te bonitatem maior es ipso:  
 O propter numero quam non comprehendere tolle  
 Tolle precor pietatem mens quæ leua patrauit,

Dum

Dum sceleri accumulatur scelus, indulgetq; furori.  
 Nam quid dissimulem? fateor mea crimina, semper  
 Impietasq; oculis sese fert obuia nostris:  
 Peccatum uiuo, peccatum nascor, in alio  
 Peccatumq; tuli crescens fastidia matri.

Ah utinam nemore in sancto, non arbore lectum  
 Fecisset uetita pomum exitiale, parentum  
 Primorum culpa: ut uero te arderet amore  
 Nostra fides, uerè nosset Patremq; Deumq;  
 Mens animi, & tibi se uita factisq; probaret.  
 Nunc ratio caeca est, densisq; sepulta tenebris,  
 Tetra animo foedo illuies, auersa uoluntas  
 Nititur in uetitum, dira; cupidine capta  
 Ingrediturq; uias scelerum, ferturq; procellis.

Quin etiam, tanta est uis in nos atra ueneni,  
 Vipera quod diffudit, hypocrita uiuere credat  
 Ut sine peccato sese natura, uetantes  
 Et uelut incuset leges peccare: sit à se  
 Aut si qua forsitan titubatum, posse reponi  
 Id factis longè melioribus: & modò paulum  
 Inueris, ad superas per se auras nititur ipsa,  
 Ac pietate sua cælum post fata mereri.

Hūc errorē animis Genitor precor cripe, turpes  
 Stet pudor ante genas confuso lege, notasti  
 Quam digitis Deus ipse tuis: tibi gloria soli  
 Est quæ iusticiæ, quam nudus inopsq; salutis  
 Mundus & ignorat, mihi sit sapientia nota:

Quod solus sanctus gaudes sanctum bonumq;  
 Reddere, qui propter scelerosa atq; impia facta  
 Infelix animum curis mordetur honestis,  
 Teq; suæ fudit causaq; & fonte salutis.

Sparge tuo me rore, tui me sanguine sacro,  
 Sic ero Bistonia niue purior, ablue Nati,  
 In cruce qui moriens hominum peccata refellit.  
 Fac haurire tui me nuncia leta fauoris  
 Auribus, hæc ut membra nouo contusa uigore  
 Exiliant, redeatq; sua in præcordia sanguis.  
 A uitijs auerte tuos mitissime uultus,  
 Tandem auerte Pater, mea q; omnia crimina dele,  
 Sat mundo Sathanæq; datum: sit tollere mentem  
 Sublimem cœlo, & fœdis auellere terris.  
 At nostri quoniam generis sæuissimus hostis  
 Nil intentatum fraudis uic doliue relinquit,  
 Dum leo ceu frendens rabido nos circuit ore,  
 Pectoris & dirum iaculatur ad intima uirus:  
 Auxilium mihi redde tuum. ustu Halitus ille  
 Maximus, omnipotens, quo corda agitâte calescunt  
 Sordibus à fœdis, & perpurgata nitescunt,  
 Indubitare tuis uerbis uetet, ut uelut alto  
 Stat uentos spernens rupes immota profundo,  
 Sit mens nixa tui meritis certissima Nati:  
 Deq; fauore tuo Genitor, uitaq; perenni.

Ille etiam, incautum ne fors malus auferat error  
 Quem me proijcias propter, mea cuncta gubernet  
 Dicta

Dicta & facta, regens sacro uestigia uerbo:  
 Incutiat legum mandatorumq; tuorum  
 Ardorem in pectus: ueri deludat imago  
 Non anceps mentem, instringam me fortiter ipse  
 Firmo animo, cura tue ar mandata fideli,  
 Commodus & patiens cunctis prodesse laborem:  
 Tum uerbum celebrare tuum, tua dicere facta  
 Sit mihi dulce, tuas lateq; extendere laudes,  
 Et quæcunq; Dei pro numine dura pacisci.

Contigerit simulac moribundos exuere artus,  
 Vt Stygiosq; lacus, loca tetra silentibus umbris,  
 Non subeam infelix, atq; illætabile regnum.  
 Ablutos inter potius sed sanguine CHRISTI  
 Te speciem æternum radiantem luce corusca:  
 Tergemino pollens qui trinus & unus, honore  
 Maximus, optimus, omnipotens, sine fine tuorum,  
 Summū unūq; bonū es, simplexq; & uera uoluptas.

# PRO ECCLESIA.

PHILIPPI MELAN-

chthonis,

**A** Eterni de mente Patris Sapiaentia nata,  
 In qua mundi operum fulsit idea noui:  
 Et quæ distinxit pulcherrima corpora rerū,  
 Et iussit formas singula habere suas:  
 Hæc eadem in paruis uagit Sapiaentia cunis,  
 Naturæ nostræ membra tenella gerens.  
 Sic quanquā infundit se nostra in pectora, nobis

r

s

Nondum

Nondum se totam cernere posse dedit,  
 Ut tamen in nobis sint tantæ exordia lucis,  
 Tanquam uagitus dogmata prima sonat.  
 Non spernis, quanquam infirmos, si debita credant  
 Te utq; pro nobis Christe dedisse Patri.  
 Ah precor infirmis adsis ut mentibus, atq;  
 Doctrinæ foueas semina sparsa tuæ:  
 Dum tua se totam pandet sapientia nobis,  
 Atq; Patrem clara luce uidere dabit,  
 Quando mortali soluentur carcere mentes;  
 Et duce te cœli culmina celsa petent.  
 Christe tuo exulibus patriam tu sanguine reddis:  
 Nulla uenit nobis, te nisi dante, salus.

## E I V S D E M.

**T** Emaneat semper seruante Ecclesia Christe,  
 Insertosq; ipsi nos tua dextra tegat.  
 Tres uelut in flamma testes Babylonide seruas  
 Rex ubi præsentem te uidet esse Deum.

## E I V S D E M.

**Q**uātus erat dolor in Cananæa matre puella,  
 Cuius mens furijs exagitata fuit:  
 In tanto nuuc est Ecclesia mœsta dolore,  
 Doctorem furias cum uidet, atq; ducum.  
 Sed tu Gnate Dei, gemitus audito precantum:  
 Nulla uenit nobis, te nisi dante, salus.  
 Tu procul à nobis sæuos depelle furores,

Et

Et sanes uerbo pectora nostra tuo.

Quamuis ira tui nos urget iusta parentis,

Et sumus ut turpes nos rea turba canes:

Attamen ut timide sub mensa captat herili

Esuriens modicas parua catella dapes:

Sic cum dira fames nostros absumpserit artus,

De mensa petimus pabula Christe tua.

Gnate Dei, generis nostri cum sumpseris artus,

Nos gerat infirmos hæc tua massa precor.

ANDREAE ELLINGERL

**D**eus redemptor unice,  
Omnis chorus credentium  
Grates tibi pro uiribus

Læto canat cum iubilo.

Qui puritatem dogmatis,

Quondam statu sub pristino

Densa obsitam caligine,

Hoc reddisti seculo.

Quas ergo uoce supplici

Ex cordis imò fundimus

Suspirijs mixtas preces,

Pater benige suscipe.

Verbi ministros, qui tuo

Docendo præsunt cœtui,

Corroborato Spiritu

In hoc maligno tempore.

Ecclesie ut fideliter

1107



Mandata nuncient tua,  
 Sacroq; uerbi munere,  
 Tui gregis pascant oues.  
 Ah ne tenebris impij  
 Sinas papatus suppressi  
 Lucem recognitam, pio,  
 Verbi, Lutheri munere,  
 Scholasticorum coetui  
 Adesto dextro numine,  
 Ut sana uerbi dogmata  
 Hi transferant ad posteros.  
 Compeſce motus bellicos,  
 Largire pacem quaesumus,  
 Qua nil habet praestantius  
 Totius orbis machina.  
 Infesta tela daemoris,  
 Quibus subinde sauciat,  
 Ut a fida nos auocet,  
 Confringe, nosq; subleua.  
 Qui circuit quemuis locum,  
 Dolosa pandens retia:  
 Venetur ut saltem pios,  
 Mergatq; in ima tartara  
 In urbibus lites ferit,  
 Reddit rebelles subditos:  
 Et turbat omnibus modis  
 Ecclesiae tuae statum.

Huius



Huius furorem reprime

Per Angelos, qui seruiunt

Semper tibi, & iussu tuo

Vitam adiuuant mortalium

Munitus his custodibus

Sodomæ Lothus periculum

Euasit, omnes cœlitus

Cum flamma perderet malos.

Afflicta corda ad te uocas

Graui duello saucia,

A te petant opem iubes,

Veniamq; spondes criminum.

Tuo regas nos spiritu,

Mentesq; nostras suscita:

Vt innotescant hoc duce,

Tuæ erga nos benignitas.

In cultibus fac ut pijs

Versemur omnes sedulo:

Ne forsan hostis impetu

Nos oscitantes opprimat.

Flatus fauore sic tui

Laudabimus nomen tuum,

Et integris affectibus

Tibi canemus gratias.

**PRO**

## PROPIA VITA,

## ANTONII FLAMINII.

**T**vtela præsens omnium,  
 Qui mente pura te colunt.  
 Da quæso, nil ut cogitem,  
 Agam, loquar, quod numini  
 Tuo placere non queat.  
 Comis, benignus in bonos,  
 Malosq; sim: ne degener  
 Sim natus optimi Patris,  
 Qui solis almo lumine  
 Illustrat omnes, omnibus  
 Potum cibumq; sufficit.  
 Legum tuarum per uias  
 Me continentur dirige:  
 Boniq; quicquid egero,  
 Id esse totum muneris  
 Tui sciamq; & prædicem.  
 Seu febris artus pascitur,  
 Seu miles urit impius  
 Donum paternam, dicere  
 Laudes tibi ne desinam:  
 Sed cuncta numinis tui  
 Nutu regi nil ambigens,  
 Vivam quietus Filios  
 Dei secunda & aspera

Laurent

Iuuent oportet gloriam  
 Tuam, Patrisq; maximi,  
 Meæ salutis præferam.  
 Nec ulla res optatior  
 Queat mihi contingere,  
 Quàm contumelias pati  
 Te propter, ipsa carior  
 Sit luce mors: ut corpore  
 Exutus ad tui uolem  
 Regni beata gaudia.

EIVSDEM.

**T**E sancte Iesu supplici  
 Adoro corde, cor tibi,  
 Meamq; mentem dedico.  
 Ut bimulus puer, sua  
 Custode si caret, sibi  
 Magna creat pericula:  
 Sic ipse, si desit tui  
 Tutela præsens Spiritus,  
 In cuncta præcipitem mala.  
 Dulcis, benigne Spiritus,  
 Me quæso totum posside,  
 Tuaq; flamma incendito  
 Amore cor, illumina  
 Mentis tenebras, excoque  
 Quodcunq; inheret noxi.  
 Fac semper in te gaudeam:

Opr.

Opes, honores sordeant,  
 Summiq; Patris gloria  
 Sit luce carior mihi.  
 Seu pascit hortus lumina  
 Florum colore gemmeo,  
 Seu fons susurrans uitreis  
 Delectat undis, illico  
 Vox surgat in laudes dei.  
 Sol, Luna, fulgor siderum,  
 Lapsus perennes annium,  
 Formosa sylua, frugibus  
 Ager redundans, omnia  
 Quaecunq; cerno, maximam  
 Sancti beati numinis  
 Benignitatem cernere,  
 Manuq; tractare faciant.  
 Hinc ipse discam, comiter  
 Omnes iuuare, nemini  
 Nocere: purus, integer,  
 Deoq; carus exigam  
 Quod restat æui: transuolās  
 Dein summa cœli sidera,  
 Fruar perenni gaudio.

# PROPACE.

IANI PANNONII.

**O** Pater omnipotens, qui cœlum et sidera solus  
 Aeterna ditione premis, defige potentes  
 His

His miseris oculos terris, quas Marte feroci  
 Vastari cernis, longoq; perire duello.  
 Et nobis tandem tribuas Pater optime pacem,  
 Quæ mala cuncta procul, mortesq; repellit acerbat.

## ARCTVRI PHRYSII.

**T**V Pater aduersis præbes solatia rebus.  
 Solus es populo portus & aura tuo.  
 Tu geris inuicta pro nobis prælia dextra,  
 Tu nos tartareo solus ab hoste tegis.  
 Ipse tuas ædes præsentî numine firma,  
 Ipse tua Christi regna tuere manu.  
 Ipse repugnantes sceptro contunde tyrannos,  
 Da nobis placida posse quiete frui.

## IOANNIS STIGELII.

**C**Hriste salus mûdi, placide da tempora pacis.  
 Pro nobis solus tu pia bella geris.  
 Infidijs sathanæ, seuisq; resiste tyrannis,  
 Fidaq; militiæ membra tuere tuæ,  
 Vt minus à duris agitata Ecclesia monstretis,  
 Hereat amplexu fida ministra tuo.

## EIVSDEM.

**D**À Deus lætæ bona sancta pacis,  
 Quæ uacet uitæ studijs honestæ  
 Debito semper tibi quæ timore  
 Scruiat uni.

§ Pace

Pace foecunda nutriuntur artes,  
Et uigent urbes, populiq; leges,  
Omnis & uirtus pietasq; uero  
Claret honore.

Ast ubi Mars est, ibi nil honesti,  
Sed iacent leges: silet inter arma  
Quicquid est sanctum, pietas & omnis  
Languet honestas,

ANDREAE ELLINGERI.

Rerum creator maxime,  
Omnem Deus qui numine  
Substantiam foues tuo,  
Clamamus ad te supplices:  
Sanctam uides Ecclesiam  
Multis grauata casibus,  
Ab utraq; parte (respice)  
Est cincta seuis hostibus.  
Oppugnat Euangelij  
Lucem Papatus agnitam,  
Cultus ut abroget pios  
Belli tumultus excitat.  
Ruit per oras, Austrie  
Armata Turcarum manus.  
Furens petit Germaniam  
Vasto tyrannus impetu.  
Qui Christiani nominis  
Est hostis insensissimus,

Et

Et insuper couicijs  
 Blasphemat indecentibus.  
 Grassatur hostis efferrus  
 Cruore fuso gestiens,  
 Ad Barbaros uelut pecus  
 Captiua mittit agmina.  
 Trucidat hic innoxios  
 In cunulis infantulos:  
 Stupris nefandis uirgines  
 Contaminat, uiros necat,  
 In hoc graui periculo  
 Opem tuam implorantibus  
 Nobis adesto quæsumus,  
 Solamen unicum Deus,  
 Adiuta ni diuinitus  
 Fucri salus Germaniæ  
 Vexata tandem funditis  
 Peribit hoste Turcico  
 Precamur ergo supplices,  
 Vt desuper mittas opem,  
 Cœtumq; te colentium  
 Victrice liberes manu.  
 Contunde uires Turcicas,  
 Inimica castra disijce,  
 Incepta frangas impia  
 Fretus potenti dextera  
 Omnis t.ao potentia

Mundi furore corruet,  
 In qua superbit impius,  
 Fati futuri nescius.

Nil tum ualebit Romulus  
 Quacunq; fraude Pontifex  
 Licet uelut lupus furat  
 Ouile circa innoxium.

Timebit omnis natio,  
 Retrò cadet gens impia,  
 Quando tua instar ignei  
 Ardescet ira fulminis.

Clemens inexhaustæ Pater  
 Qui prædicaris gratiæ,  
 Ob nominis laudem tui  
 Auerte quæuis noxia.

Vt hostium formidine  
 Sublata, ab omnibus pijs  
 Queant honores rectius  
 Tibi exhiberi debiti.

Tranquilla pacis tempora  
 Optantibus ne deneges  
 Tuamq; propter crimina  
 Parumper iram mitiges.

Tu fluctuantem Ecclesiam,  
 Velut procellis obrutam  
 Cymbam, cruas ex omnibus  
 Instantibus periculis.

Nam



Nam uoce firmasti tua,  
 Te uelle sanctam Ecclesiam  
 Sinu fouere patrio,  
 Prolem uelut puerpera.

Tibi uicissim gratias  
 Grato canemus pectore,  
 Et sempiterna nominis  
 Tui uigebit gloria.

# V V O L F G A N G I V E R T E R I.

**A**rdent ciuili nunc aspera tempora bello,  
 Et Mars in toto ferreus orbe furit.  
 Imminet in primis Euxino è littore Turca,  
 Qui contra gentem concitat arma tuam.  
 Possit ut hic pelli, uires Pater optime præbe.  
 Blasphemet nomen ne ferus ille tuum.

# A D A M I S I B E R I.

**Q**uã sine te nõ est tellus habitura, precamur,  
 Vt pacem per te possit habere Deus.  
 Perde feros populos, seuos compesce tyrannos,  
 Qui genti faciunt bella scelestæ tuæ.  
 Tu pugnare potens, hostes tu uincere fortis,  
 Nemo nocere tuis te prohibente potest.

# G E O R G I I F A B R I C I I.

**H**sc ades, et seui depelle pericula Martis,  
 Christe salus populi prasidiumq; tui.  
 Pone moras, nec te natis Pater alme pigebit  
 Porrexisse piam post mala longa manu:

s

z

Effice

Effice ne nostræ spolientur ciuibus urbes,  
 Neu fluat effusus seuâ per arma cruor.  
 Quicquid & insanis tentant conatibus hostes,  
 In caput ipsorum recidat omne nefas.  
 Consilia & fictas scelerati pectoris artes,  
 In uentum & liquidas sparge benignus aquas.  
 Huc ades, & duros frange & contunde tyrannos,  
 Hostibus apparens hostis & ipse tuis.  
 Ne uerelinq; tibi cœtum qui sacrat honores,  
 Votaq; suppliciter non numeranda facit.  
 Quiq; modò sperat. modò se peccasse recordans.  
 Incipit immedia subdubitare prece.  
 At mens firma mane, præsto Deus ipse petenti est:  
 Tu modo crede, salus certa parata tibi est.  
 Ipse tuus Christus: te Christus morte redemit:  
 In quem dum speras, impia turba perit.  
 Christe tuum defende gregem, patris astrue regnũ,  
 Membra perire ueta corporis ipse tui.  
 Et nostros defende duces qui iusta tuentur,  
 Armaq; prouera relligione ferunt.  
 Tunc tibi soluemus præconia laudis, & aras  
 Ornabunt donis fœmina uirq; sacris.

# IOANNIS GIGANTIS

**D**A pater omnipotēs tranquilla tēpora pacis,  
 Qua nihil immensus firmitus orbis habet.  
 Ex

## Ex Germanico Lutheri.

IO ANNIS STIGELII.

**S**erua Deus uerbum tuum,  
 Et frange uires hostium  
 Qui Iesum filium suo  
 Turbare conantur throno,  
 Ostende nunc potentiam  
 O' Christe Rex regum tuam  
 Defende paruulum gregem,  
 Qui te fatetur principem.  
 Viuificator Spiritus,  
 Concordiam da cordibus:  
 Ades periclitantibus,  
 Cum morte conflictibus.

EIVSDEM,

**A**dsere nos, uerbumq; tuū Deus optime serua,  
 Et rabiem Turcæ Pontificumq; preme.  
 Qui tecū æquali regnantē fœdere Christum  
 Conantur patrio præcipitare throno.  
 Da pacem, defende tuos: tibi semper ut omnis  
 Posteritas laudes hîc & ubiq; canat.

IO ANNIS CELLARII,

AD DEVM PATREM.

**D**ona tui serua nobis Deus optime uerbi,  
 Turcarum contra Pontificumq; minas.

s

4

Qui

Qui tecum cupiunt regnantem in secula Christum  
Deturbare tuo uiq; doloq; throno.

Ad deum Filium.

**T**V quoq; quē Dominū dominorū agnoscimus  
Hic cupias uires Christe probare tuas: (unū,  
Et cœtum defende tuum, defensus ut ille  
Grata tibi æterna carmina laude canat.

Ad deum Spiritum S.

**N**Ec nō ucrē Deus, paracleteq; Spiritus adsis,  
Da populo unanimi uiuere corde tuo;  
Et nos extremo serua in discrimine, tu nos  
E' media in uitam ducere morte uelis.

PRO PACE.

**D**A pacem nostris, ô pacis amice, diebus.  
Summe Deus, pax te dante beata uiget.  
Nā nisi tu nostros uindex pugnaris in hostes  
Spes nobis certæ nulla salutis erit.

GEORGII FACRICII.

**D**Eus Pater mitissi me,  
Nos in tuo uerbo tene,  
Tuiq; filij throno  
Infesta perde nomina.  
Tu Christe uires exere  
Magnas, potentum maxime.  
Laudesq; cantet ut tuas,  
Gregem pusillum protege.

Solator

Solator alme Spiritus,  
 Conserua in unitate nos:  
 Præsens supremo tempore  
 Sis ductor in uitam è nece.

# A D A M I S I B E R I.

**S**erua Deus nobis tuum  
 Verbum, domans Papat, domans  
 Getas, tuum Natum suo  
 Throno student qui pellerè.

O' Christe rex ter maxime,  
 Vires tuas promens: tuam,  
 Te laudet ut per secula,  
 Miseram tuere Ecclesiam.

Da Spiritus sanctissime  
 Concordiam gregi tuo,  
 Agone præsens ultimo  
 Vitamq; per mortem ingredi.

# I N M O R B O.

## P E T R I L O T I C H I I.

### Secundi.

**H**Uc ades omnipotens, nostroq; medere dolori  
 O' Deus, à cuius spes mea pendet ope,  
 En languore grauis iaceo, sine uiribus ullis,  
 Imaq; nunc propius serpit in ossa malum.  
 Tu potes incolumem misera seruare parenti,  
 Tu proferre tuo numine fata potes.  
 Non tua finitur spacio numeroue potestas,

s

s

Vtq;

Vtq; aliquid fiat, te uoluisse sat ast.  
 Ergo age, lenis ades, ueniasq; salutifer ægro,  
 Omnipotens, per te, per sobolemq; rogo.  
 Nil agitur succis, ad opemq; potentibus herbis.  
 Ars sine te medici nil operosa ualet.  
 Aspice desertum Pater, & miserere iacentis:  
 Tu quoniam mitis, non quia dignus ego.  
 Ipse tibi meritas seruatus carmine grates  
 Munere pro uitæ, muneris autor, agam.  
 Ipse coronabo sertis redolentibus aras,  
 Et dicam laudes, quo precor, ore tuas.  
 Tu modo supplicibus uotis precibusq; faueto,  
 Et defecta suo membra uigore iuua.

M. ANTONII FLAMINI.

**I** Am quintæ lunæ cornua  
 Se luce complent horrida,  
 Cum febre membra tabida  
 Depascor, ossa frigore  
 Tremor furente concutit:  
 Dein æstus acer intinas  
 Vrit medullas, ut faces  
 Absumit ignis aridas.  
 Iam corpus amisi, mei  
 Vix umbra iam superat leuis.  
 Vt flos grauatus imbribus,  
 Caput tenellum deiicit:  
 Sic mens misella perditæ,

Cedit

Cedit malorum ponderi.  
 IESV benigne respice  
 Meos labores, dextera  
 Tua cadentem subleua.  
 Non illud ipse iam precor,  
 Meo recedat corpore  
 Hæc pestis: unum id omnibus  
 Votis requiro & obsecro,  
 Ut robur & constantiam  
 Mihi ministres: languidos  
 Artus, medullas, omnia  
 Hic ignis ossa deuoret,  
 Dum mens refecta, uiuida,  
 Tuoq; fortis Spiritu.  
 Resistat & semper tibi  
 Iucunda laudes concinat.  
 IESVS benignus, optimus,  
 Horrenda passus uulnera,  
 Dolentibus succurrere  
 Est promptus: egrimoniam,  
 Metus, querelas abijce  
 Fidenter, ô anima mea:  
 Quiesce, nomen inuoca  
 Dulcissimum regis tui.  
 Est ille munitissima  
 Arx inuocantibus eum.

**A**lme Puer, sanctis quæ uirgo amplectitur ul-  
 Virgo cœlesti numine facta parens: (nis,  
 Cernis, ut exilis febris mihi pascitur artus,  
 Cernis quàm seuis concutit ossa tremor.  
 Quem sequitur miseras exurens flamma medullas,  
 Vrit ut arentes lucida pruna facces.  
 Tu Puer, æteruus cui dat Pater omnia posse,  
 Tutela humani sancte puer generis  
 Si labefacta graui sub pondere tota recumbit  
 In te uno famuli spesq; salusq; tui:  
 Aut morbum pelle, aut uires mihi suffice, tanta  
 Queis possim læto pectore ferre mala.

# RESTITVTA VALETVDINE.

P. LOTICHIVS SECVNDVS.

**S**vmme Pater, sobolesq; patris, quiq; halitus af-  
 Omnia: qui firmās nos, ab utroq; uenis: (stas  
 Omnipotens, cuius diuina potentia finem  
 Non habet, æternū laus sit honorq; tibi.  
 Tu facis, ut ualidas reparent languentia uires  
 Membra, reedit nobis, qui fuit ante, color.  
 Nec lateris cruciatus adest, & anhela recessit  
 Febris, & ora minus torret amara sitis.  
 Vtq; suas uiridi cunas sub fronde relinquens  
 Debilibus pennis æra tentat auis:  
 Sic ego nunc tardos quoq; desuetudine gressus,  
 Lassus, & exiguo uerba retento sono.

Nec



Nec mihi iam totæ somni sine munere noctes  
 Inualidis miserè quæ uigilantur, eunt.  
 Nec uel hyoscyami cum semine tempora adiungit  
 Mandragoræ cortex, rubraq; fila croci.  
 Nec bibo lactucæ permista papauera succis,  
 Sponte sua facilis non eget arte sopor.  
 Quinetiam spaciosior uicinis letus in hortis,  
 Et graue sit quoties ire, dat herba torum.  
 Ergo mihi semper casto celebrabere uersu,  
 Laudibus ingenium seruiet omne tuis,  
 Quantaq; te Genitor teneat miseratio nostri,  
 Cum patet admissi poenituisse, canam.  
 Utq; Palestinæ sit uirginis edutus aluo  
 Filius, immenso non genitore minor  
 Tunc loquar immites poenas, & funus acerbum,  
 Mortis & humanum præmia magna genus.  
 Tu modò quæ nunc mota fremunt bella, horrida bella,  
 Non sine per tristes longius ire moras.  
 Ut fera ciuilis genetrix discordia belli,  
 Martius & nostro cesset in orbe furor.  
 Tunc tibi, pacis opus, resonantia fila iuuabit,  
 Tunc tibi desuetæ plectra mouere lyre.

PRO BEATO VITAE EXITV.

PHILIPPI MELAN-  
 chthonis,

**C**Ur metua mortē? mors non est, mortis imago.  
 Nā merito nitor maxime Christe tuo. (est,  
 Vermis

Vermis adhuc spiro, moriturus fortè sub horam:

Mors etenim certa est, funeris hora latet.

Ergo Gnate Dei tibi iam me tradò Redemptor:

Viuam, seu moriar, sanguine uiuo tuo.

GEORGII FABRICII.

**H**anc animã fragiles fugientẽ corporis artus,  
Commendo dextræ Chryste benigne tuæ:  
Quam tu primorum uitiatam labe parentũ  
Morte tua mortem nunc superare facis.

Ne remorentur eam scelerum contagia, neue

Tot maculis obstant crimina fœda suis:

Tu dux esto uiæ, supremumq; excipe flatum,

Ne premat hoc sæui demonis ira caput:

Vtq; tibi niueam uestem, quam fonte sacro

Accepi, absq; omni reddere labe queam:

Et sic mortalis post aspera tempora uitæ

Angelicis per te letus adesse choris.

M. ANTONII FLAMINII

**R**ector beate cœlitum,  
Qui sic amas mortalium  
Salutem ut almi filii

Cruore sancto laueris

Peccata eorum: suspice

Serui precantis spiritum,

Qui fretus unica tua

Benignitate, languidos

Artus libenter deserit,

Vt

Vt alta cœli sidera  
 Petens, fruatur optime  
 Pater tua præsentia,  
 Et sempiterno gaudio.

AD CHRISTVM PRECATIO  
 tempore pestis.

CHRISTOPHORI SCHEL-  
 lenbergij.

**C**hriste salus uiuis, morientibus unica uita,  
 Spes desperatis sola relicta malis.  
 Qui tuus est, uerbumq; tuum cum nomine seruat,  
 Respice perpeſsum tristia fata gregem.  
 Promiſiq; tui memor has admitte querelas.  
 Teq; datas audi præcipiente preces.  
 Dum uitium cœli uitales polluit auras,  
 Et terras atra peſtilitate premit:  
 En truncata dolet caris Eccleſia membris,  
 Et multis hominum millibus orba gemit:  
 Letiſcero graſſans quos impetit ulcere morbus,  
 Et necat inuiſta mors properata luc,  
 Cum ſtulto ſapiens moritur, cum paupere diues,  
 Cum rudibus docti, cum ſeniore puer.  
 Præcipiti dulces rapiuntur morte parentes,  
 Pignora ſollicitus luget adempta pater.  
 Orba uiro uiduum plangit matrona cubile,  
 Sæpe uni tumulto nuptaq; uirq; datur.

Extin-

Extinctum properè suspirat amicus amicum,  
 Cognati deflet funera quisq; sui.  
 Indigenis urbes priuantur, & arua colonis,  
 Nudantur doctis templa scholæq; uiris.  
 Tacta uenenatæ spissa caligine nubis.  
 Tabida membra uelut putrida poma cadunt,  
 Nulla quies mortis, cumulatur funere funus,  
 Iam tumultis etiam deficit ipse locus.  
 Heu miseranda patent oculis spectacula nostris.  
 Omnia ui diræ depopulante luis.  
 Triste genus pœne, sed nostro crimine dignum,  
 Nos digni damnis his grauiora pati.  
 Non faciunt nobis hunc Delphica tela dolorem,  
 Non pestem nobis sæuus Apollo dedit:  
 Sed tuus ille furor, uariorum clade malorum  
 Afflixit stupidi qni Pharaonis humum:  
 Angelus ille tuus Iessæi criminis ultor,  
 Pestifero nostrum nunc petit ense caput.  
 Nam reuocante Deo uitiorum à turpibus ausis,  
 Cur rident monitus pectora stulta sacros?  
 Cur toties uires irati experta Tonantis  
 Vita, Dei iustas spernit iniqua minas?  
 Hæc sunt militiæ stipendia debita nostræ,  
 Vt totas turbas dira uenena necent.  
 Nec ratio est remedi, stupet & timet ipse Machaon,  
 Succumbit tantis & medicina malis.  
 Quis sibi longæuam possit promittere uitam,  
Dicere

Dicere quis possit. Cras quoq; sole fruar?  
 O' cecae hominum per aperta pericula mentes,  
 O' magis indomitae aspera corda feris:  
 Quae non mollescunt tam tristi tempore fracta,  
 Nec semel irriguis ingemuere genis.  
 Nā quotus est hominū, mala quē praesentia tangant,  
 Pœniteat scelerum, terreat ira Dei?  
 Ad mandata Dei surda sumus aures, placetq;  
 Pro uirtute nefas, pro pietate scelus.  
 Ac terni cultu neglecto, & numinis ara:  
 Vna uoluptatum est, altera cura lucri.  
 Mens humana nimis uitæ fugientis auara,  
 Nec cœlum curat, nec Stygis antra timet.  
 Ergo quid incusas fremebundo numina corde,  
 Atq; malum cumulas improba turba malo?  
 Non iniusta feri patimur tormenta tyranni,  
 Tristia qui læta funera fronte uidet:  
 Sed nos mansueti castigat uirga parentis,  
 Qui capit inuita rara flagella manu.  
 Maluit hac cædi uirga Iesseius heros,  
 Quàm meritas pœnas ense fame uē dare.  
 At tu qui proprii semper tibi criminis autor,  
 Et faber ærumnæ semper es ipse tuæ:  
 Desine non sanis numen culpae querelis,  
 Incipe turpis homo propria facta queri.  
 Sæuior ipse tibi diuinam contrahis iram,  
 Tu reus es. fontem te tua culpa premit.

t

Hæc

Hæc tibi sponte ferox accersis bella. famemq;  
 Et pestem, latos quæ modò uastat agros.  
 Sic quos lenta Dei nunquam patientia flectit,  
 Vltane fas animos perdomat ira feros.  
 Sed tu cui proprium est miserescere Christer eorum  
 Exitium quorum corde dolente uides:  
 Da ueniam, turbæq; tuæ placabilis adsis,  
 Quæ supplex aras uoluitur ante tuas,  
 Errores confessa suos, & crimina uitæ  
 Detestata, graui mœsta dolore pauet.  
 Quem bonitate tua solatur, & æthera spectans  
 Te te suspirat te gemebunda uocat.  
 Ergo ne præbebis surdam clamantibus aurem,  
 Et nostras rapient uentus & aura preces?  
 An nunquam. quamuis iusta, reuocabit ab ira  
 Se Deus, & nobis pœna perennis erit?  
 Non ita: non talem nobis oracula monstrant  
 Certa Deum, miseros qui sine fine premat.  
 Sed qui se facilem delicta fatentibus offert.  
 Veridicaq; homini uoce professus ait:  
 En ego. quem penes es uitaq; necisq; potestas,  
 Viuo Deus, uester Rexq;, bonusq; Pater:  
 Nolo mori fontem, lapsi. m succumbere nolo,  
 Nec peraget partes ultio nostra suas:  
 Dummodo deposita resipiscat labe, fideq;  
 Me peccator homo quærat, & oret opem,  
 Sic duce me uiuet, mundi crudelis & Orci

Victor.

Victor, & in quouis turbine saluus erit,  
 Ergo animum iam vince tuum, miserere rogantum,  
 Promissam fer opem, nostraq; damna leua,  
 Letiferos tandem condat tuus angelus enses  
 Hisq; petat regno colla inimica tuo.  
 Redde salutaress auras, nec noxia pestis  
 Diuellat coetus omnia membra tui.  
 Viuorum Deus es, te uiui carmine laudant:  
 Non memorat laudes mortua turba tuas.  
 Christe tibi uiuant aliqui, & tua nomina dicant:  
 Tu caput es nostrum, nos tua membra sumus.  
 Te uox indubijs implorat nostra periclis,  
 Expertiq; tuam te celebramus opem.  
 Ficta prophanatæ fugiunt ad numina gentes,  
 Supplicat igoto barbarataurba Ioui:  
 Exquisita alijs quærit medicamina morbis,  
 Et plus humanæ, quàm tibi, fidit opi:  
 Circæos alijs cantus amplexus, & herbas,  
 Nititur ægra mago membra leuare dolo:  
 At nos, qui numen, nisi te, non nouimus ullum,  
 Et sine te nullum Christe salutis iter:  
 Per tot acerba tuam discrimina quærimus aram,  
 Ara nil scimus tutius esse tua.  
 Immutata tenet nostram sententia mentem,  
 Omnia, quæ patimur, te statuente pati.  
 Tu nos, ceu sobolem pietas materna recentem  
 Sollicito in gremio, nocte dieq; foves.

Abieclus uili uenit passerculus asse,  
 Nec tamen ullus humi te reuente cadit:  
 Quinetiam nostro numerasti in uertice crines  
 Et sine te nemo uulserit inde pilum.  
 Cur igitur tantus trepidantia concutit horror  
 Pectora, presentem peste minante necem?  
 Esto, lues ipsa teneat praeordia morte,  
 Imaq; pestiferum uiscera uirus edat:  
 Tu tamen indomiti uires inhibere ueneni,  
 Tu potes inuictis esse me dela malis.  
 Fidimus ergo tibi, tibi nos addicimus uni,  
 Seu n os Christe uelis uiuere, siue mori.  
 Vltcrius fragili si uis nos carne morari,  
 Simus ut in laudes turba ministra tuas,  
 Corporibus uires addes, animisq; uigorem,  
 Vt corpus sanum mens quoq; sana regat:  
 Sin animam hinc migrare iubes, fac mentibus æquis  
 Reddamus matri debile corpus humo.  
 Hoc saltem, hoc præsta, ne summa mortis in hora  
 A te deficient corda pauore necis.  
 Ne ué fides cedat Stygio opugnata tyranno,  
 Omnia spes firmo uincat amore tui.  
 Ac licet externos tenebris mors condât ocellos,  
 Lumina suspiciant interiora Deum:  
 Et cum nigra dies linguæ quoq; dempserit usum,  
 Mens tamen hæc intra se meditata sonet:  
 Hanc animam tibi fide Deus, tua munera, reddo,

Que



*Que uerum credit te uenerata Deum.  
 Que nunc uisa tibi sese commendat, et orat,  
 Ut repetat patriam, prodiit unde, suam.  
 Innumeros pro me tolerasti Christe labores,  
 Natus homo, passus flagra, neciq; datus:  
 Fac tandem miser exule ego per inhospita mundi,  
 Hospitij subeam te cta beata tui.*

FINIS.

PIETATIS PVE-  
 RILIS LIBER IIII.

Liberis S. Paulus.  
 ad Ephes. VI.

ANDREAE ELLINGERI.



*Asitis pueri, tenella turba,  
 Addicti Domino, notate uocem  
 Qua quisq; officij sui admonetur,  
 Ut poscit pietas, boniq; mores:  
 Vestros ò reucremini parentes,  
 Sitis morigeri, nec ijs rebelles,  
 Id iustum est: quia lex iubet, per orbem  
 A summo data coelitus parente.  
 Quod si feceritis, DEI fauore  
 Aucti, pernia consequimini ampla,*

t

3

Que

Quæ uobis DEVS ipse pollicetur,  
 Stellantis resonans ab arce cœli,  
 Longæ uos fore, perq; uos beatos  
 Cunctarum benedictione rerum,  
 Mandatum Domini piè exequentes.  
 Huc ergo pueri cohors modesta,  
 Huc attendite quæso diligenter,  
 Imis imbibite hunc sonum medullis,  
 Qui uobis bona cuncta pollicetur.  
 Promissis igitur frui uolentes,  
 Seruetis pia iussa præpotentis.

P V E R L E G I F E R.

G E O R G I I F A B R I C I I.

Egifer hæc rescero quam uobis ore magistri,  
 Ut à magistro dicta leti aduertite.  
**L** Et quæ cuiq; loco uirtus sit digna notate:  
 Mentis gubernata docte incertes spiritus.  
 In tota pietas præluceat inclyta uita,  
 Semper timendus atq; amandus est Deus.  
 Grata Deum semper mens inuocet, illius almo  
 A numine inchoetur omnis actio.  
 Relligio in templo, sacriq; attentio uerbi,  
 Decent precesq; cum sonoris laudibus.  
 In ludo obsequium est, & prima industria uirtus,  
 Audire promptè, nec grauatè discere.  
 Quisquis amat socium studiij, se diligit: ingens  
 Decus sodales inter, est concordia.

**I**n conclaue pium ne turpia sordidaq; intrent,  
Omnes tuas res expedi silentio.

**A**t tecum loquere, & mores expende, sacræq;  
Sanos labores functionis perfice.

**M**iles in ancipiti solet ut præludere campo,  
Sic è palæstra prodeas umbratili:

**V**t discas quid nam sit agendum, publica cogit  
Si coetui res interessè publico.

**M**aiorem obserua natu, nec sperne minorem,  
Aequalibusq; æqualis esse ne dole.

**S**ermo tuus simplex, conuictus suavis, honestus,  
Sed non agrestis atq; morosus rigor.

**V**era audi, ueroq; stude. uerumq; fateri:

Nam uera uerus uult & approbat DEVS.

**C**ompositi mores in mensa, & parca uoluptas  
Pios decent, frugalitasq; sobria.

**M**unde etiam uestes, librorum munda supellex,  
Ornent foris domiq; alumnū musicum.

**I**n studijs animus sit præsens: cura, laborq;  
Alacritasq; maximas artes docent.

**T**empore non ullus sumptus preciosior: auro.  
Nec Indicis potest parari mercibus.

**T**emporis est igitur ratio atq; ætatis habenda,  
Thesaurus utriusq; inæstimabilis.

**Q**uod si non crebo puteus purgatur ab haustu,  
Aquæ putrescunt: æra splendescunt minus,

**V**surpata minus: pariter quoq; nostra frequenti

Exercitatione mens fit acrior.

Ergo artes solitas uarium exercete per usum:

Non ullus est sui laboris nescius.

Cumq; DEVM pueri toto de corde colatis,

Pensum diurni absoluitote muneris.

Fungitur Helchanides contemptus munere paruo,

Claudens sacrarij, ac recludens ostium:

Audijt ille tamen Dominum sibi nocte loquentem,

Nam diligentes & pios amat DEVS.

Tu nos fac DEVS esse pios, Pater optime: mecum

Orate, Tu nos fac DEVS Pater pios.

Perq; tui Geniti mortem, fusumq; cruorem

Charum tibi fac nos DEVS peculium

Vtq; humilem seruas obscuræ Anathotis alumnum,

Sic nos tuo serua arduus iuuamimine.

DE OFFICIIS PVERO-  
rum Παῖδων Ἀδαμίου  
Siberi.

**D**VM, qua uia, citis Iambis explico,  
Studium suum qui dediderunt literis,  
Se comparent, uitamq; sic totam instruant,  
Vti Deo probentur, & uiris bonis:  
Ades puer, mentemq; dictis adijce.  
Primum, timor Domini quod est sapientiæ  
Caput, Deum uenerare toto pectore:  
Finem laborum nec tuorum noueris

Vllum.

Vllum, Dei Christiꝑ; præter gloriam.

Cum lege te didiceris esse Dei reum,  
Propter malum lethale, morbumꝑ; insitum,  
Et te quibus contaminasti crimina:  
Tum lancinati fœditatem pectoris  
Non stare contra posse uultum uindictis:  
Plenus fideꝑ; speꝑ; ad aram confuge,  
Aram Dei dico perennis filium,  
Qui morte tristi nostra finiuit mala:  
Quem propter & misertus omnium Pater,  
Spondet salutem perpetem credentibus.

At de Dei clementia iam certior,  
Eius capeſſe iuſſa toto pectore.  
Cultus parentum, cura muneris ſui,  
Mens grata, dextra liberalis, ſobrius  
Victus, uoluntas prompta, pectus tolerans,  
Modesta lingua, ueritatis os amans,  
Mores pudici, uita fraudis inſcia,  
Sunt Chriſtiani certa ſigna nominis.  
Fides ſalutem dat, ſequuntur hæc fidem  
Non mortuam iratus ſacrati munera.

Quæ cœlitum fatur Parens, crede: eſt homo  
Mendax, Deus ſed neſcit unquam fallere.  
Pœnas minatur maximas incredulis,  
Fideiꝑ; gaudet eſſe noſtræ debitor.

Operare precibus, continenter inuocans  
Nomen Dei, ſeu feſſa ſomno lumina

Das uesperis, seu manè stratis surgere  
 Te lucifer monet relictis in bonas  
 Te litteras siue abdis: ut laboribus  
 Adsit tuis, suæq; clarum gratiæ  
 Menti benignus præferens lumen tuæ,  
 Collustret obscuram ingeni caliginem:  
 Ut Principes, Ecclesiam, Scholasticos,  
 Coetus, parentes & magistros, & pios  
 Quocunq; sunt loco, gubernet & tegat,  
 Sed & domi forisue quicquid omnium  
 Rerum geris, mente intima quicquid capis  
 Tecum ipse consili, Pater cœlestium  
 Præsto tibi nutu suo sit, supplicia.  
 Nam quas fauor gubernat & bonitas Dei  
 Res, exitum solent habere prosperum.

Templum Dei sumus, nec est sapientiæ  
 Prauus capax animus. fuge ergo facinora:  
 Latere, ab omni sit remotus arbitro  
 Licet locus, scelus nec occultum puta  
 Deum, uidet qui solus, & notat omnia,  
 Adeoq; mentis cogitata introspicit.

Diebus in conuentibus festis sacris  
 Libenter adsis: quæq; dicuntur, pia  
 Exprimere uita, & moribus sanctis stude.  
 Custodiam mandat Deus nostri angelis,  
 Periculis qui nos abarcent, excubant  
 Credentiumq; pro salute: ne fuges

Petur

Petulantia, ne spiritus ulla sacros  
Castosq; similes qui sibi pueros amant.

Quid horter, ut ritus colas Ecclesiæ,  
Quos CHRISTVS ipse tradidit? spernit Dei  
Quicumq; uerbum, et instituta negligit,  
Ex patre Sathana natus est, non ex Deo

Iusto parentes, sic Deus inbet, tuos  
Dignare cultu: nec patres animi minus,  
Qui litteris, pietate moribus instruunt:  
Ipsos iubere, te decet iussa exequi.

Linum Hercules, Chirona Peleo satus  
Colitq; amatq;: quid facere par est, fidem  
Te qui dedisti maximi nato Dei,  
Veneratus est cum matre qui 'Iacobiden?

Ab his loco uenerare proximo senes,  
Natu patres & esse maiores putans:  
Canoq; honorem uertici caluoq; habe,  
A' belluis ne deuoreris, Saphati,  
Qui riserant, ut execrati, filium.

Nil omnium rerum quidem formosius  
Pie tate, quæ nouit deum: eadem pulchrior  
Est artibus tamen, & polita litteris.  
Cessas in has quid mente tota incumbere,  
Fortis laborum perferens molestias?  
Amariores sunt quidem radicibus  
Scientiæ, sed fructibus dulcissimæ.  
Musis amica aurora, partem perficit

Eademq;

Eademq; tertiam operis. Ergo surgito,  
 Et manè tempus optimum da literis,  
 Nec perde reliquum ocio segnis diem.  
 Iactura nulla maior est quàm temporis.

At das magistro operam prius quàm publicè,  
 In explicandis ingeni vires tui  
 Periclitare: sic potitus hostium  
 Est Pyrrhus à palestra arena Equirijs  
 Sic consecutus Castor est uictoriam.

Qui lectiones sæpe negligit, fore  
 Putet quis eruditionis compotem,  
 Cum continens in litteris regnet labor?  
 Quod si tamen te causa abesse iusserit,  
 Eam magistrum ne latere tuum uelis.

Ingressus in ludum (angeli namq; assident  
 Discentibus) nuda caput, tibi locum  
 Et tacitus in sub fellijs datum occupa.  
 Instructus armis, fac relictis omnibus  
 Agas, quod illic flagitat præsens locus,  
 Ferasq; uicta palmam ut ignorantia:  
 Ab ore, pendens te docentis excipe  
 Quæcunq; dicit: nil agit sine clypeo  
 Trux Martio, sine gladio miles nihil:  
 Tun, posse te tuum fugare existimas  
 Hostem, sine eminente pennula in manu  
 Dextra, papyri candidaq; chartulis?

Qui contumax obedientiam abijcis,

Qui



Qui non magistris mente tota gratiam  
 Persoluis, & quod te decet munus facis,  
 Qui sustines obmurmare, cum in tua  
 Non inuchuntur sponte delicta acrius:  
 Procul ò fuge, fuge sacrum locum nec pollue.  
 Qui litteras amat, amat idem corrigi,  
 Idem magistro obtemperat gratus suo.

Magnifica quamuis sit domus, sit splendida,  
 In glarea quæ structa stat, rimas agit,  
 Tandemq; corruit, quibus sine nequeunt  
 Præclara quæ consistere olim. sedulo  
 Tu disce quæ iubet magister discere,  
 Et memoria constare doctrinam puta.

Tibi quid insusurrat alter clanculum,  
 Quid ipse recitantem alium ad aures admoues?  
 Partes suas agat ille: tu munus tui  
 Absolve pensi, quàm potes, bellissimè.  
 Sic diligentia æmula excitabitur,  
 Et pulchra uterq; augebitur scientia.

Finita quando est lectio, tacitus tuum  
 Conclaue adi, nulli molestus alteri,  
 Nec hâc nec illâc cursita circum uagus.

Vides legant ut Eucliones nummulos,  
 Ut cogitet nihil uisi lucellulum  
 Noctes diesq; quietis & cibi immemor  
 Phidon avarus: dicta seu de moribus  
 Seu litteris, nec à magistro pectore

**Memor**

Memor recondas, indiosq; scientia  
Magisq; studeas & magis ditefcere?

Sunt qui putent decus ingeni, præcurrere  
Docentium præcepta: dant sed Icarum  
Eiusmodi pœnas. prius quam plumulas  
Hærent duæ calæ, detineri te diu  
In primulis patienter initijs sine.  
Hærens in his, non audet unquam liberè  
Aut scribere, aut loqui, locus si postulet.

Depone nunquam de manu stilum: sed hunc  
Oratione, uersione, carmine

Exerceas. Lux nulla sit sine linea.

” Magister est dicendi, & artifex, stilus:

” In litteris absq; hoc opera & oleum perit.

Vagatur omne per Attalus scripti genus,

Sine Calidi Mæuiq; habens discrimine

Manu libellos, è quibus pingit sua.

Telenicus ad quem se modum pitatijs.

At tu tibi propone scripta Tullij,

Andæa uatum principisq; carmina:

Hos sequere, adora pronus & uestigia,

Donec queas te credere sine cortice

Mari patenti, & reliquos cognoscere.

Quàm commodum est communicare sæpius

Cum pluribus, communibus de litteris?

Amica sed sit illa conuersatio:

Quæ cum frequens est, tum laborem subleuat,

Ad

*Ad res paratum maximas & effecit.*

*Aetate frui, quæ cito cursu fugit.*

*Constet tibi ratio distributi temporis:*

*Age ordine ac loco suo, quæcunq; agis.*

*Quos iungit ætas & professio & locus,*

*Ama, nec ullo læde durus uerbulo.*

*Nec ceteros ama minus, quos copulat*

*Tecum fides, & caritatis regula.*

*Imitare sedulos, probosq; ab improbis*

*Sciunge te, contentionem & iurgia,*

*Quæ barbaræ signa sunt naturæ, fugæ.*

*Lapsos mone, non diligentes corrige:*

*Nec fas nocere uel malis ingens puta,*

*Patiare potius, quàm inferas, iniuriam.*

*Quam si tibi fortasse quis fecit prior,*

*Aut perfer: aut si maior atq; indignior,*

*Quàm ferre debeas, magistris indica,*

*Homini æquus ipsi, uerùm iniquus crimini.*

*Tu uerbera nullum, nec ulli irascitor:*

*Non execrando precare quid cuiquam mali.*

*Non arroganti pectoris fastu tumens .*

*Præpone te alijs, neminemq; despice.*

*Qui gratiam dat mitibus suam Deus.*

*Idem superbis iurè pugnat omnibus.*

*Cibum prius non inuocato numine*

*Ne sumito: qui namq; condidit Deus,*

*Mortali alimenta præbet idem corpori.*

*Pulsaq;*

Pulsaq; iam fame dato pro munere  
Preces eidem funde grato pectore.

Natu sede quem maior assignat loco,  
Arrecta sit facies, manus quò lumina  
Intenta: cape cibum modestus, non suum  
Lupum uè, sed hominem scias te: congere  
Non ante te dapum struices: quid tibi  
Oculi ampliores uentre sunt? quid rustica,  
Quod ante te non est situm, rapis manu?

Baccho Cerereq; temperanter utitor:  
Luxuria uires mentis atq; corporis  
Frangit, uenenum Colchicis nocentium:  
Vbicunq; regnat crapula, uirtus exulat.

Præmorfa reiicere in paropsida, nil habet  
Urbanitatis: ad mouere os poculo,  
Ciuitatis nil, bibente proximo.

Mensa relicto turpe cultro surgere,  
Fragmetna panis indecorum linquere;

In cæteris accommoda te moribus,  
Et quæ recepta & honesta consuetudini.

A prandio cœnaue, quando ludicris  
Vacant sodales, si quid est leuis rei,  
Quæ non eget animi ingeniue industria  
Agendum, agas: ne quid perire temporis  
Sinas, quod est tuo dicatum Apollini.

Non ueste secta, non breui, non pendula,  
Multoq; uelis laxiore nauticis

Incede,

Incede, scurra sicut aut miles solet,  
 Aut qui feras sectatur altis montibus.  
 Sit apta tunica, calceus decens, toga  
 Qualis modesto, & non superbo conuenit:

Non ense & armis efferus succingere:  
 Cum Marte Musæ nil habent commercij.

Quid ora iubeam manè lymphis ut riges,  
 Capillus ut sit pexus, ut munda manus,  
 Conclauē conuersumq; composti libri,  
 Puræq; uestes, stragulaeq; lectuli?  
 Nil, quàm puer non mundus, est odiosius.

In publico ne turpiter te gesseris,  
 Aut per plateas ociosus ambulans,  
 Aut circulis loquendo stans forensibus:  
 Sed strenuè, si iussus es quid, perfice,  
 Senex tibi si factus aliquis obuiam,  
 Aut publici fungens honore muneris.  
 Decede de uia, caputq; detege.

Interrogatus, fac breui respondeas,  
 Præfato honore, gestibusq; corporis,  
 Vultu & pudorem liberalem præferens:  
 Hoc est diei quod Sol, modestia puero.

Nihil loquatur tenera lingua obscœnius,  
 Os uerba bellum obscœna quomodo decent?  
 Nec garrulum esse, futilemue conuenit.  
 Semper tace, de rebus aut loquere bonis.  
 Raros silere, lingua multos perdidit.

- Si cogitata mentis efferenda sunt,  
 Non anteuertat lingua mentem lubrica.  
 Tua clara sit uox, nec nimis uolubilis.  
 At si magistro loqueris, aut æqualibus,  
 Animi latine facito sensus explicēs.  
 " Est purus index sermo diligentiae:  
 " At diligentia bonæ est index indolis.  
     Ne riseris, cum nulla risus causa sit,  
 " Est risu inepto nullares ineptior:  
 " Nec sint tui Timonis æmuli sales.  
     Nec fraude, nec aliena aperta ui rape:  
 " Nil insciente uel magistro uel patre  
 Eme atq; uendē: debiti nil contrahe.  
     Restitue, si quod muenis, domino suo.  
 Ne quid tamen perdas tuorum, sed ulò  
 Vestes, libros, & quidquid est custodias.  
 " Ne mentiare, odit Deus mendacium:  
 " Vera, audi, amaq; uera, uera dicito;  
 " Nil est amore ueritatis pulchrius  
 " Aliena, capta nec oculis, nec auribus.  
 Quid faciat hic, quid dicat ille, pertinet  
 Ad te nihil: age res tuas, liceat Ioui  
 " Iunone cum sine arbitrio quid colloqui.  
 Non curiosum uiuere, est uita optima.  
     Cum te dabis iucunditati, turpibus  
 Nec utitor ludis: nec in conuiujs  
 Leuis choreas, aut ineptus ducito.

Ne no-

Ne nocte ludi testa clanculum exiens,  
 Aedes uic patris, furta secleris mala,  
 Aut poculis intentus, aut lasciuiæ:  
 Ceret pudore nox, & adolescentia.  
 Domum uocatus, fac modestis moribus,  
 Grauiq; uita te geras ita, cæteris  
 Ut disciplinæ liberalis præbeas  
 Exemplum: honori sis tibi, atq; litteris.  
 Nec uinculis teneare sic domesticis,  
 Ut litterarum obliuione debitum  
 Ad muneris locum recurras tardius.

Sed iam satis bono, superq; Qui regit  
 Terram polumq; Spiritus sui tibi  
 Et optimus precor parens, & maximus  
 Det gratiam, dictis ut omnibus deum  
 Verearis, & factis: bonisq; in litteris  
 Versando, sic uitam instruas, ut inuidis  
 Non detur ansa calumniandi, aut improbis:  
 Nec unius culpa audiant omnes male.  
 Ad res honestas imperans tibi excites  
 Sensus iacentes, parte mentis optima  
 Ut usus ad Christi Patrisq; gloriam,  
 Famamq; referas, atq; congeras opes  
 Quas nulla uis & nullus eripit dies.  
 Nam cuncta pereunt, sola perpetuo manent  
 Pietatis atq; mentis excolte bona.

## E O B A N I H E S S L

**Q**ui sapiſ, & qui uera probas, mendacia uitæ  
Et tua quæ non ſunt, ſurripuiſſe caue.

Quod debes, citò ſolue alijs: fuge debita multa,

Promiſſam uerbis omnibus adde fidem,

Et ſi plura ſcies, alijs ne plura loquaris:

Reſponde paucis, querere multa caue.

Cautior ut ſias, alienos aſpice mores,

Atq; imitare bonos, atq; relinque malos.

Omnia ſer patiens, affabilis omnibus eſto:

Quandoquidem neſcis, quid ſapiant alijs.

Qui ſapiſ, & qui uera probas, hæc omnia ſerua:

Sic fuerit uirtus nulla relictæ tibi.

CHRISTVS AD APOSTOLOS.

de pueris: Marc. 10.

G E O R G I I F A B R I C I I.

Dne qui ueniunt, non triſti auertite uultu,

**A**mplexu pueros nec prohibete meo.

Tales namq; pater cœleſtis curat, amatq;

Nec cœli tenero eſt ianua clauſa gregi.

Quam qui non ueluti puer incorruptus adibit,

Is ſurdas pulſus concitet ante fores.

Sic ait: amplexuq; fouens ſancta oscula figit,

Impoſitaq; optat proſpera cuncta manu.

Matth. 18.

Ex iſtis aliquem contemnat nemo puſillis,

Nam pars eſt regni paruula turba mei.

Quoſq;



Quosq; dedi pueris cœlesti in sede ministros,

Quisq; suum custos Angelus implet opus.

Astat & ante mei faciem super æthera Patris,

Pro paruo remanens in statione grege,

DE EDUCATIONE LIBE-

rorum, Elegia Adami Siberi.

expressa de Cap. xxx,

Iosuaë Sirachi.

**M**ollibus ex animo natum qui diligit annis,  
In sanctos mores erudiisse studet.

Increpat, hortatur, laudat, monet, urget, & instat,

Quæ facienda iubens, quæ fugienda uetans:

Vt simulatq; illi matura adoleuerit ætas,

Ipse ferat curæ præmia digna suæ.

Præmia, læticiam, qua non implere uoluptas

Corda pij patris gratior ulla potest.

Quàm si conspiciat natum uirtutibus auctum,

Nomen honoratos inter habere uiros:

Liuor & hoc uide te propter, gaudia mente

Sed læta iunctos sanguine ferre sibi.

Quàm si conspiciat, ueniet cum funeris hora,

Moribus in nati se superesse sui:

Vt neq; non possit dubijs in rebus amicis

Extinctus quamuis, utilis esse suis.

Præsidiumq; illum sibi fortè, suisq; relinquat,

Atris oppositum dentibus inuidiæ.

Lenis at indulget nato quicumq; puelli

Singulta quoties pectora rupta sonant,  
 Ingemit, & lachrymis manantia lumina tergit.  
 Nec fletu patriæ continuere genæ.  
 Quid, quod uerberibus dignum defendit, & eheu  
 Causa, inquit, fletus sim ferus ipse meis?  
 Saxa gerit duro, solidumq; in pectore ferrum,  
 Nomen & inmerito dulce parentis habet:  
 Sustinet immiti puerum qui cadere uirga,  
 Tristiaq; ætati uerba loqui teneræ.  
 Stultus qui miseræ sobolis corruptor & osor,  
 Quo sese natum credit amare, nocet.  
 Ut duros nondum qui frenos ore momordit,  
 Rectorem indomitus ferre recusat equus:  
 Haud aliter quisquis puer indulgente parente,  
 In mores coepit luxuriare malos,  
 Non audit præcepta de intractabilis ulla,  
 Recta scrox odio uerba monentis habet.  
 Omnia, ceu furijs actus, contraria legum  
 Mandatis, posito facta pudore facit:  
 Sic & in æternum uitiorum gurgite mersus,  
 Exitium, patrio crimine præcipitat.  
 At tu, cura tui uerè quem tangit alumni,  
 Dum pueri est ætas mollis & apta regi,  
 Ne uerò indulge, ne fortia frena remitte.  
 Stulticiæ illius stultior ipse fauens:  
 Infectus uitij ne quando adoleuerit, & iam  
 Quæ cupiet, credet cuncta licere sibi.

Colla

Colla iugo eripiat, diruptaq; lora relinquens,  
 Mœroris patris sit tibi caussa suo.

Ah quoties aliquis leni cum mente repertus,  
 Vidit ubi sobolis facta scelestæ suæ:

Ah quoties gemuit, quoties suspiria ducens  
 Fleuit, & heu seris ora rigauit aquis.

Blanda nocet teneræ menti indulgentia, iuncta  
 Verba pijs profunt imperiosa minis.

Principijs obsta: sero conuellitur arbor,  
 Viribus immensum quæ stat adaucta suis.

Sed cape lora, ferosq; animos crescentibus annis  
 Ipsius ex multo uerbere terga doma.

Ille fcat potius, fœdes quàm puluere canos,  
 Et ferias misera pectora mœsti manu.

Ocia dant uitij auctus: quæ uitet ut ille,  
 Da uacuo semper quod tucatur opus.

Fac artes primo uitæ condiscat ab æuo,  
 Communis quibus hæc uita carere nequit.

Vtilis ut patriæ, charis iucundus amicis,  
 Ac generis fiat gloria magna sui.

DE EXCELLENCIA DOCTRINÆ  
 deq; eruditæ pietatis usu, Elegia  
 eiusdem, de cap. 39.

**D**iscere ritè potest diuina uolumina nemo.  
 Cui diuersè animum cura laborq; trahūt.  
 Et nisi qui liber non plura negocia tractat,  
 Hæc eadem nemo ritè docere potest.

„ Totum hominem leges, oraculaq; sancta requirunt,

„ Et uacuae requiem mentis habere uolunt.

Quid doceat, curuo terram qui uertit aratro,

Et gaudet stimulis increpuisse boues?

Mane cui studium tardas expellere uaccas,

Et pastas stabulis claudere nocte suis?

Qui nil quam rastros, stramen, mulctralia nouit,

Nil nisi de tauris quodq; loquatur habet?

Tigna, trabes, ualuas, tabulata, sedilia, mensas,

Atq; domos totas extruit arte faber.

Circinus huic curae est, & serra, dolabra, securis.

Arma manu noctu tractat, & ista die.

Qui rigida exercet ualidis incudibus aera,

De ferro tantum cogitat ille suo.

Malleus huic circum multis sonat ictibus aures

Ante focum frangit duraq; membra labor.

Accipit & reddit uentosis follibus auras,

Flamma acri ferri duriciemq; domat,

Non ueniente die, non discedente quiescens,

Quod coepit donec perficiatur opus.

Sic calices, ollas, ut possit, pocula, lances,

De facili figulus composuisse luto,

Seligit argillam, cribratam miscet arenam,

Que subigens pedibus massa sit una facit:

Tum sese inclinans toties, totiesq; reclinans,

Partem aliquam cretae sumit utraq; manu,

Inde rotam pedibus celerem contorquet in orbem,

Et

Et digitos inter protinus exit opus:  
 Incrustat uitro, uarios pegmenta colores  
 Inducit, tandem durat in igne coquens,  
 Tempora lucis eunt sic illi cuncta, labore  
 Plurima & hoc illi tempora noctis eunt.  
 Utq; faber, figulusq;, ita qui uersatur in arte  
 Quæ lassat duras sordida cunq; manus:  
 Arte sua fretus, nullos fugiendo labores,  
 Robore membrorum quod facit, omne facit.  
 Atq; equidem quæ sit felix & salua, carere  
 Res opera artificum publica nulla potest.  
 At nemo illorum legati munus obire,  
 Nemo rudi populo reddere iura potest.  
 Sacra Prophetarum nemo cognoscere scripta,  
 Ad cælum nemo dicere quæ sit iter.  
 Hoc tantum doctas qui per caput extulit artes,  
 Ingenioq; ualet, iudicioq;, potest.  
 Ille sacrosancti diuina oracula Verbi,  
 Sedulus autorum uoluit & omne genus.  
 Nocturna uersat dextra, uersatq; diurna,  
 Quireferunt prisca temporis acta, libros.  
 Historias ueterum rebus presentibus aptat,  
 Quid rectè fieri possit, & inde legit.  
 Omnia digna uiro discit sapiente, bonoq;,  
 Quamq; alij docto cultius ore loqui:  
 Possit ut officio, rebus præfectus agendis,  
 Præcipua fungi dexteritate suo:

Regibus præsto magnis, ducibusq; superbis,  
 Consilio patriæ commoda multa ferat.  
 Oratorq; bonus longinquas missus ad oras,  
 Pro populo faciat uerba diserta suo.  
 Et sine diuino quia nil humana fauore  
 Efficete in studijs cura laborq; potest:  
 Autorem implorat, largitoremq; salutis,  
 Eois quoties Phosphorus exit aquis.  
 Pro se, proq; suis uerba obsecrantia fundens  
 Supplice det ueniam postulat ore sibi.  
 Nec facilis non est illi: quæ recta uidere,  
 Iustaq; sunt, animo dat sapiente Deus.  
 Dat graue consilijs pectus, successibus ornat,  
 Euentu carcant ne bene cœpta bono.  
 Ille deo gratus quicquid loquiturq; facitq;  
 Cœlestium ad laudem dirigit omne patris.  
 Debita uertuti nec desunt præmia, tandem  
 Iustaq; cum magna gloria laude uenit.  
 Ergo inter primos legitur procuresq; patresq;  
 Conspicuum signis & tenet altus ebur.  
 Aut regum accitum, doctrinam propter, in aulam,  
 Velat honoratum purpura clara uirum.  
 Non ille imprudens unquam rem consulit ullam  
 In medium, uerbo non præcunte dei.  
 In tenebris præfert clarissima lumina uerbum,  
 Non certis pedibus semita certa dei.  
 Intendunt aures omnes ad uerba loquentis,

Con-

Consilium assensu quisq; probatq; suo.  
 Illum mirantur omnes, uenerantur, honorant,  
 Laudibus ad cœlum uirq; puerq; ferunt.  
 Quàm grata illius doctrinam uoce minores  
 Concelebrant, cupit & proderc quisq; suis?  
 Quid moror? est uerè doctus quicunq; piusq;  
 Fert quàm mille alij comoda plura suis.  
 Nec præsens illum solum mirabitur ætas,  
 Fama sed æternæ posteritatis erit.

PIETATEM CONIUNGENDAM  
 esse cum litteris. Eiusdem, ad

Ioannem F.

Res præclara quidem est, lustrare Heliconia tempe,  
 Bellerophontæi quæ rigat humor equi:  
 Discere res, linguas doctas, præclara, desertum  
 Et uario uarios ore referre sonos.  
 Inter enim quid erit nos, et ratione carentes,  
 Nate feras, proprias ni tue amur opes,  
 Nisi sit cura, animis, quibus est cœlestis origo,  
 Musarum studijs conciliare decus?  
 Mule nihil sentis, ne quis tibi dicat, incersq;  
 Argutas cuculus sis uelut inter aues.  
 Extudit ingenuas felici semine mentis  
 Muncre, quas artes cura laborq; Dei,  
 Abstergent animis dense caliginis umbram,  
 Deq; tenace leuant lumina cæca luto,  
 Altius humanis caput exerisse tenebris,

Et

Et clara ut possis luce uidere diem.  
 Iudicium formant: simul ignorantia ueri,  
 Barbariesq; animo, quæ fuit ante, fugit.  
 Se patitur claro contingi lumine uirtus:  
 Naturæ mores conuenienter eunt.  
 Apparent rerum causæ, iuuat iræ, supino  
 Rimari & fati conscia signa polo:  
 Ac tandem ex mira, qua mundum temperat, arte  
 Autoris numen grande notare Dei.  
 Iam quid facundæ uerò quàm gratia linguæ,  
 Oris quid tersi pulchrius eloquio?  
 Quo iudexq; grauis, patres lectiq; trahantur,  
 Cui uictas reges dent populiq; manus?  
 Quæ numeris res est cultis iucundior, & quas  
 Non dotes, quod non carmina pondus habent?  
 Carmina inaccessis traducunt montibus ornos,  
 Carmina dura mouent saxa, ferasq; domant.  
 Mentibus insinuant faciles sacra Carmina motus,  
 Ad mores faciunt Carmina docta bonos.  
 Tantum aliosq; locant nos ante in honore, uolucres  
 Gorgonius quantum cornipes ibat equos.  
 Nec tamen hæc ueræ contendere gloria laudi,  
 Altera qua nequeat maior & esse, potest.  
 „ Laus est uera, trahi pulchro pietatis amore:  
 „ Summa, Deum in Christo, gloria, nosse patrem:  
 Complexus qui sic homines miserosq; malosq;  
 Arsit, erat quorum tota sepulta salus:

Qui



Qui desiderium est, qui lux, qui patris ocellus,  
 Ut daret unigenam (munera quanta?) suum.  
 Indutus fragilis mortales corporis artus,  
 Qui Deus in misera consti tit exul humo.  
 Passus & infandâq; crucē, atq; opprobia mortis,  
 De Stygia duxit clara trophæa domo.  
 Ut pedibus cœli tereretur ianua noctis,  
 Vita ubi non ullis concutienda malis.  
 Semotâq; licet curaq; dolore, metuq;,  
 Conspectuq; Dei, colloquioq; frui.  
 Hunc, artes, linguæ, uirtus, sapientia nosse  
 Vnica, quæ cœlo sola beare potest.  
 Hac sine quid prodest, sua si tibi carmina donet  
 Phœbus, & Aoniam Calliopeia chelyn?  
 Quid, magni scriptis animum emendare Platonis,  
 Et Stagera tui dogmata nosse senis?  
 Esse quid instructum prodest Demosthenis armis,  
 Grande quid Ausonio cum Cicerone loqui?  
 Non Anyti uirtute reo cessisse, Catoni  
 Aut uita, quæ non labe notata, seni.  
 Deniq; non opere ex mundi ignorare Tonantem,  
 Qui mare, qui terras, qui sua regna quatit.  
 Artibus excultus, uirtute ornatus, & ipsa  
 Quam natura docet cognitione Dei:  
 Nempi Orci uises tenebras, uastasq; lacunas,  
 Finc ubi te dempto uindictis ira premet.  
 Non satis ergo puta, Phœbi lustrare recessus,

Castor

Castaliâq; umbram, Pieridumq; choros,  
 Discere digne uiro docto, sapiente, bonoq;  
 Et penna celsos præpete adire polos.  
 Sit tibi prima dei mentem cognoscere cura:  
 Ista tibi noctes auferat, ista dies.  
 Hanc uerò ut noris, qui Graiæ gloria gentis,  
 Aurca Aristoclis non tibi scripta dabunt:  
 Non Arpinatis diuina uolumina, fila  
 Non etiam Orphææ, fila sonora, lyra.  
 Phœnicum claro non cœlo inuenta, nec almæ  
 Naturæ arcano condita cuncta sinu,  
 Non tabulæq; adeò, radiatus tempora uultu  
 Ardenti legum quas tulit Amramides.  
 Ipse dabit solus, patris decreta recludens,  
 Est, fuit in gremio qui genitoris, erit.  
 Hunc igitur studeas uerè cognoscere: Christum  
 Qui nouit, summum nouit & ille patrem.  
 Supplicat Actæus, rerum cui summa potestas,  
 Quos colit urbs, senior, nec putat ipse deos,  
 Nec minus Abdarides, qui res creat, auctat, alitq;  
 Nec minus ad dominum fundit Apella preces.  
 Vincula cui nudos includant lignea plantas,  
 Fune latus cinctum est, & sine crime caput:  
 Quæ tibi, ait, facio deus, accipe liba, bonusq;  
 Hanc uastem & chordas & beneficia uide.  
 Talia pondus habent at nullum uota: precesq;  
 Qui probet has, non est ullus in orbe deus.

In solo, diuina coli uis, inq; uocari

Vult Christo, qui cor deliciaq; Patris,

Hunc propter miseris uult parcere, uult dare uitam

Perpetuam, cum nos soluerit atra dies.

At uero si non fueris tibi cognitus ipse:

Qui Christi quæ sint, quantaq; dona scies?

Disce igitur quod sacra docet nos pagina, totum,

Quantus homo est, uitiũ, & crimẽ, & esse scelus.

Quisq; sibi placeat, tamen est mens lumine cassa.

Arbitrioq; homini non licet esse suo.

Nam praua huc illuc rapitur, uitiata uoluntas.

Et mala quæ, sequitur: quæ bona, sponte fugit.

Hinc quæ terra patet, scelere est imbuta nefando,

Mente omnes cupida iustitiamq; fugant:

Nemo Deum metuit, pedibus uerumq; fidesq;

Obteritur, non est qui bonus esse uelit.

Nec nobis uis est tristes euincere morbos,

Ac quod subrepsit uiscera in ipsa malum,

Et bona si qua superfuerant, nos ad mala nostri

Corrupti uitio uertimus ingenij.

Coruuit usq; adeo nos primi culpa parentis,

Et sathanae prorsus misit in arbitrium.

Et tamen, o pietas, miseros nos, atq; parentem

Das inter medium te bone CHRISTE tuum.

Proijcis & uitam pro nostra sponte salute,

Suffixum fœde nec pudet esse cruci,

Ex quo nascuntur nobis bona cuncta, Paterq;

Inuictos

Inuiolos recipit, supplicibusq; fauet.  
 His animaduersis, tecum tua tristitia nate  
 Damna puta: cum mens destituitq; animum,  
 Crimina cor propter trepido terrore repletum  
 Nil & opis quidquam, praesidijq; uidet,  
 Reijce te in Christum, quae qualiscunq; redempta  
 A te, sum tua, ait: semper croq; fide.  
 Hunc propter ueniamq; Patrem, pacemq; precare.  
 Huic memori grates pectore & ore cane,  
 Et cum mane nouo Sol lumine conserit arua,  
 Et cum lux alto conditur Oceano?  
 Ex unda quod te diuina, auraq; renasci,  
 Et uoluit membrum corporis esse sui.  
 Quod tibi condonat mitis dilecta, Notosq;  
 Crimina fluctisonum trans mare ferre iubet.  
 Quod sardum & tectum seruat, necce uindicat atra,  
 Atq; rudem uerbo uluificante docet.  
 Et te carne sua, te nutrit sanguine, coelo  
 At uitam, quae nos tempus in omne manet.  
 Et tibi dat Patrio quem spirat pectore Flatum,  
 Ut uitium ex animo diluat omne tuo.  
 In Christum nos sola beat fiducia, sola  
 Et Patris aetherei collocat in gremio.  
 Et tamen, in sole est comes ipsa ut euntibus umbra,  
 Hanc sequitur uirtus, officijq; decus:  
 Ut cernant alij purgatum pectora dictis  
 Veridicis, pura credere mente Deo:

**Ergo**

Ergo etiam fidei sanctos expromere foetus,  
 Atq; stude uita concelebrare Deum.  
 Quod si fors tristes curæ subeuntq; premuntq;  
 Nec uentis agitur parua carina suis:  
 Fide Deo, precibus uotisq; operatus, ab illo  
 Impositumq; tibi fer patienter onus.  
 Tum bonitas homines tua se diffundat in omnes:  
 Quaq; alios poteris parte iuuare, iuua.  
 Quàm pietate decet iusta coluisse parentes,  
 Quosq; loco patrum iusserit esse Deus?  
 Quàm decet & dictis & factis esse modestum,  
 Officio assiduum muneris inq; sui?  
 Sobria uita, animi patientia, dextra benigna,  
 Sunt partes mentis, signaq; certa piæ.  
 Ad quæ cuncta bonas si innges sedulus artes,  
 Impones sacris Pieridumq; manus,  
 Præclare ornabis mentemq; animumq; repertis:  
 Et bonus & iustus, non modo doctus eris.  
 Cumq; alios rursus de relligione docebis,  
 Ad cœli monstrans sidera quâ sit iter:  
 Tempore quo tumultis strepitus clangorq; tubarum  
 Eliciet fato corpora functa suo:  
 Ut celso fulgent nuditissima sidera cœlo,  
 Inter fulgebis clarus & ipse pios,  
 Maxima perpetuæ lucratus gaudia uitæ:  
 In CHRISTO doctos gaudia tanta manent.

x DISTI-

## DISTICHA EPI-

STOLARVM DOMINI-  
calium, conscripta àGEORGIO FABRICIO  
Chemnicensi.

## NATIVITATIS CHRISTI,

Heb .1.

**P**Er sanctos olim qui dixit multa Prophetas,  
Nunc eadem nati prædicat ore sui.  
Circumcisionis. Gal.3.

Lege tenebantur rigido pia corda magistro,  
Est modò per Christi gratia parta fidem.  
Dominica proxima. Gal.4.

Virginis atq; Dei sub legem traditur infans,  
Ex seruis natos nos facit esse Dei.  
Epiphaniæ. Esaïæ 60.

Quod lumen cæcis exortum gentibus olim,  
Luceat hoc omni tempore quæso Pater.  
Dominica prima. Rom.12.

Da ne gentili fœdemus corpora ritu  
Christe, sed ut maneant templa pudica Dei.  
Dominica

## Dominica 2. Ibidem.

*Cœlestis similes animos Ecclesia seruet,  
Quæ semper concors et sine lite uiget.*

## Dominica 3. Ibidem.

*Corporis unius cum simus membra, quid ergo  
Mutua non constans pectora iungit amor?*

## Dominica 4. Rom. 13.

*Si quis amat toto quem pectore debet amare,  
Hic iustos inter nomen habere potest.*

## Dominica 5. Coloss. 3.

*Dilige sic alios, ut te quoq; Christus amauit:  
Et grates Domino pectore psalle Deo.*

## Septuagesima. 1. Corinth. 9.

*Certat ut optatam cursor contingere metam,  
Sic qui uis studeat munus obire suum.*

## Sexagesima 2. Corinth. 11.

*Exemplo Pauli uarios perferre labores  
Discite, sitq; unus gloria uestra deus.*

## Quinquagesima. 1. Corinth. 13.

*Aera uelut uacuos sonitus Temesca remittunt,  
Sic torpet uiuo pectus amore carens,*

## Inuocauit 2. Corinth. 6.

*Vt nos discipulos, Christi q; Dei q; ministros  
Agnoscant omnes, uita q; crux q; probet.*

## Reminiscere. 1. Telsal. 4.

*Qui ne ctit fraudes, æstu q; libidinis ardet,  
Ille nequit templum Flaminis esse sacri.*

Oculi, Ephes. 5.

Sit procul omne nefas uestris à moribus : ipse  
CHRISTVS pro nobis hostia factus, obit.

Lætare, Galat. 4.

Seruum Abrahamæ tibi Memphitica protulit Agar:  
Nos semen Saræ libera turba sumus.

Iudica, Hebr. 9.

Christe patris residens ad dextram summe sacerdos,  
In cœlis populi iura tuere tui.

Palmarum, Philip. 2.

Sic hominem ex alto Christus respexit Olympo,  
Vt non horreret funera acerba crucis.

Paschatis 1. Corinth. 5.

Viuit mactatus pro nobis uictima Christus,  
In quo etiam nobis uita perennis crit.

Qualimodo geniti, 1. Ioan. 5.

Qui per aquam immundum uenisti. perq; cruorem:  
Da uiuat mundum firma in amore fides.

Misericordiæ, 1. Petri 2.

Quisquis es, afflicti serua uestigia Christi,  
Inq; omni patiens esse memento malo.

Iubilare, Ibidem.

Principibus pare, uitam sine crimine dege,  
Et famulus tristem fer patienter herum.

Cantate, Iacobi 1.

Sis audire celer, sis uelox dicere, tardus  
Irafcitè cœlo, quod datur, omne datur.

Vocem



# Vocem iucunditatis, Ibidem.

Qui sermone pius, sed turpis moribus; ille  
In speculo oblitus, conspicit ora, suo.

Ascensionis Domini, Act. 1.

Christus ad æterni conscendens regna parentis,  
Omnibus (ô pietas) hoc patefecit iter.

Exaudi. 1. Pet. 4.

In precibus uigila, ueroq; amplectere cunctos  
Affectu: hospitibus sit tua tuta domus.

Die Pentecostes, Act. 2.

Cum patre, cumq; Dei nato, tu spiritus unum,  
Imple saluifica pectora nostra fide.

Trinitatis Rom. 11.

O diues, sapiens, inuestigabilis auctor,  
Humanos sensus dirige quæso Deus.

Dominica 1. 1. Ioan 4.

Quisquis amore Dei fido ueroq; tenetur,  
Verè etiam fratrem diligit ille suum.

In die Baptistæ. Mar. 6.

Chare Deo Baptista peris, meretricula saltat:  
Te quoq; cæduntur Papa iubente boni.

Dominica 2. 1. Ioan. 3.

Non dubitat uitam pro nobis ponere Christus:  
Ut fratrem redimas, negligis ipse mori?

Dominica 3. 1. Pet. 5.

Sobrius et uigilans Domino tua pectora crede:  
Nam leo securas circuit acer oues.

x

3

Do-

## Dominica 4. Rom. 8.

Quisquis in hac uita fœdo in squallore iacebit,  
Postea cœlesti lumine clarus erit,

## Dominica 5. 1. Pet. 3.

Inclinat faciles Dominus clamantibus aures  
Inq; bonos, oculos nocte dieq; iacit.

## Dominica 6. Rom. 6.

Heu nascor morti, uitæq; renascor, in unda  
Baptismi: ut uiuam, fac deus alme, piæ.

## Dominica 7. Ibidem.

Vt per peccatum mors atq; afflictio dantur,  
Sic quoq; per CHRISTVM uita salusq; uenit.

## Dominica 8. Rom. 8,

Heres ipse dei fies, CHRISTIQ; coheres,  
Si das spiritui corda regenda sacro.

## Dominica 9. 1. Corinth. 10.

O pater, instabiles ne lubricus auferat error,  
Fac certa maneant in statione pedes.

## Dominica 10. 1. Corinth. 12.

Non uni dat cuncta Deus, sua munera quisq;  
Conferat ad laudem simplicitata dei.

## Dominica 11. 1. Corinth. 15.

Mortuus est nostro pro crimine Christus, eundem  
Tertia discipulis obtulit orta dies.

## Dominica 12. 2. Corinth. 3.

Stulte tumes, frustra q; animis efferre superbis:  
Quicquid habes, munus noueris esse dei.

Dominica

## Dominica 13. Galat. 3.

**Dignior ut Mose** CHRISTVS, sic gratia legem  
*Sustulit in Christo: libera turba sumus.*

## Dominica 14. Galat. 5.

**Qui carnem sequitur,** capiet quoq; premia carnis:  
*Qui uicem, æterna sede beatus erit.*

## Dominica 15. Gal. 6.

**Vos faciles gratiq; pijs estote ministris,**  
*Inq; uicem alterius perferat alter onus.*

## Die Michaelis, Apocalyp. 12.

**Christe tuus pugnet p r nobis Angelus:** in nos  
*Ne quid atrox possit iuris habere Draco,*

## Dominica 16. Ephes. 3.

**Perpetuas sedes in nostro pectore ponat**  
*Christus, in æterni cognitione patris.*

## Dominica 17. Ephes. 4.

**Vna fides, unus baptismus, & tu Deus unus,**  
*Omnia sic unus pectora iungat amor.*

## Dominica 18. 1. Corinth. 1.

**Sit sua pastori commissa Ecclesia curæ,**  
*Fidus & infirmi sit pater ipse gregis.*

## Dominica 19. Eph. 4.

**Exuite omne malum, ueteres deponite mores,**  
*Vt nouus in uestro pectore uiuat homo.*

## Dominica 20. Eph. 5.

**Vina parant luxum: uigilans & sobria uita**  
*Voce, hymnis, psalmis concinat ante Deum.*

## Dominica 21. Eph. 6.

*Vt contra Stygium pugnemus fortiter hostem.*

*Suggere tu nobis pectus & arma Deus.*

## Dominica 22. Philip. 1.

*Gratulor in Christo uos credere: deprecor idem*

*Vester ut æterno tempore duret amor.*

## Dominica 23. Philip. 3,

*Qui uentrem curant, plausumq; sequuntur inanem*

*Vitæ: inq; pio munere state uiri.*

## Dominica 24. Colofs. 1.

*Erepti tenebris, clara estis luce locati:*

*Sint uestri mores, uitaq; digna Deo.*

## Dominica 25. 1. Tefs. 3.

*Corpora quæ tumultis requiescunt, ponite questus,*

*Illæ olim Domini tollet in astra dies.*

## Aduentus Dominica 1. Rom. 13.

*Nox tenebrosa abiit, lux clara diesq; propinquat:*

*Abiectis tenebris, lucis eamus iter.*

## Dominica 2. Rom. 15.

*Infirmum fratrem placide tolerare memento:*

*Plurima nam pro te Christus acerba tulit.*

## Dominica 3. 1. Corinth. 4.

*Est diues uarijs sanctorum Ecclesia donis:*

*Iudicio Domini qui placet, ille placet.*

## Dominica 4. Philip. 4.

*Fundite sæpe preces, lachrymas, suspiria, uota,*

*Et capite in uero gaudia uera Deo.*

**DISTI-**

DISTICHA IN EVANGELIA  
Dominicalia, conscripta

IOANNE S-  
GELIO.

Natiuitatis Christi, Euangelium

Lucæ 2. & Ioannis 1.

**N** Ascitur in mundi promissus gaudia Christus:  
Cœpit ab hoc uno uindice nostra salus.  
Mente Dei genitus, sed cum Patre Filius idē,  
Fit sacra pro nobis uictima, natus homo.  
Circumcisio Domini, Euan.

Luc. 2.

Seminis & pacis confirmat fœdera Christus,  
Præcisus ueteris legis honore puer.

Epiphan. Domini, Euan, Matth. 2.

Tentata est ferro uix nati infantia Christi  
Cur pigeat duram nos quoq; ferre crucem?  
Dominica 1. Euan. Lucæ 2.

Ecce puer uincit tumidos ratione sophistas:  
Omnia uictor habet, cui puer iste fauet.

Dominica 2. Euan. Ioan. 2.

Læticiæ Christus dignatus adesse iugali,  
Esse sibi curæ tale probauit opus.

Dominica 3. Euan. Mat. 8.

Approbat exemplum fidente in milite Christus:  
Ah quantum est, uni fidere posse Deo?

x

5

Dominica

## Dominica 21. Eph. 6.

*Vt contra Stygium pugnemus fortiter hostem.*

*Suggere tu nobis pectus & arma Deus.*

## Dominica 22. Philip. 1.

*Gratulor in Christo uos credere: deprecor idem*

*Vester ut aeterno tempore duret amor.*

## Dominica 23. Philip. 3,

*Qui uentrem curant, plausumq; sequuntur inanem*

*Vitate: inq; pio munere state uiri.*

## Dominica 24. Coloss. 1.

*Erepti tenebris, clara estis luce locati:*

*Sint uestri mores, uitaq; digna Deo.*

## Dominica 25. 1. Tess. 3.

*Corpora quæ tumultis requiescunt, ponite questus,*

*Illa olim Domini tollet in astra dies.*

## Aduentus Dominica. Rom. 13.

*Nox tenebrosa abiit, lux clara diesq; propinquat:*

*Abiectis tenebris, lucis eamus iter.*

## Dominica 2. Rom. 15.

*Infirmum fratrem placide tolerare memento:*

*Plurima nam pro te Christus acerba tulit.*

## Dominica 3. 1. Corinth. 4.

*Est diues uarijs sanctorum Ecclesia donis:*

*Iudicio Domini qui placet, ille placet.*

## Dominica 4. Philip. 4.

*Fundite sæpe preces, lachrymas, suspiria, uota,*

*Et capite in uero gaudia uera Deo.*

**DISTI-**

DISTICHA IN EVANGELIA  
Dominicalia, conscripta

IOANNE S-  
GELIO.

Natiuitatis Christi, Euangelium

Lucæ 2. & Ioannis 1.

**N** Ascitur in mundi promissus gaudia Christus:  
Cœpit ab hoc uno uindice nostra salus.  
Mente Dei genitus, sed cum Patre Filius idē,  
Fit sacra pro nobis uictima, natus homo.  
Circumcisio Domini, Euan.

Luc. 2.

Seminis & pacis confirmat fœdera Christus,

Præcisus ueteris legis honore puer.

Epiphan. Domini, Euan, Matth. 2.

Tentata est ferro uix nati infantia Christi

Cur pigeat duram nos quoq; ferre crucem?

Dominica 1. Euan. Lucæ 2.

Ecce puer uincit tumidos ratione sophistas:

Omnia uictor habet, cui puer iste fauet.

Dominica 2. Euan. Ioan. 2.

Leticie Christus dignatus adesse iugali,

Esse sibi curæ tale probauit opus.

Dominica 3. Euan. Mat. 8.

Approbat exemplum fidente in milite Christus:

Ah quantum est, uni fidere posse Deo?

x

5

Dominica

**Dominic. 4. Euan. Mat. 8.**

*Vt scapha parua, notis Ecclesia fertur, & undis:  
Sed sibi fidentem seruat ubiq; deus.*

**Dominica 5. Euan. Matt. 13.**

*Quotidie infelix lolium se frugibus addit:  
Assere tu messem CHRISTE benigne tuam.*

**In Septuagesima, Euan. Mat. 20.**

*Ante deum electi (gratis namq; omnia donat)  
Vltimus & primus sunt in honore pares.*

**In Sexagesima, Euan. Luc. 8.**

*Larga deus spargit diuini semina uerbi:  
Felix, qui retinet talia, cordis ager.*

**In Quinquagesima, Euan.  
Lucæ. 18.**

*Cernere quem mundi nescit sapientia, cæcus  
Agnoscit sola te bone CHRISTE fide.*

**In Quadragesima, Euan.  
Matth. 4.**

*Victor ab infesto tentatur demone CHRISTVS  
Omnibus in CHRISTO uincitur ille pijs.*

**Dominica Reminiscere, Euan.  
Matth. 15.**

*Exemplum fidei probat in Cananeide CHRISTVS  
Inunc, & dubitans quære placere deo.*

**Dominica Oculi, Euan. Luc. 11.**

*Redditur eloquium muto, sed ridet Apella:  
Felix qui agnoscit facta stupenda dei.*

**Dominica**



**Dōminica Lætare, Euan.**

**Ioannis 6.**

**Quotidie augusto qui consecrat omnia nutu,**

**Pare cibet modico milia quinq; deus.**

**Dominic. Iudica, Euan.**

**Ioannis 8.**

**Impius accusat te Christe furoris Apella,**

**Eheu quàm mundo est res peregrina deus**

**Domin. Palmarum, Euang.**

**Lucæ. 24.**

**Ecce uenit Pompa promissus simplice Christus;**

**Nam cupit hic solo cordis honore coli.**

**Die Parasceues,**

**Vulnera, flagra, crucem pro nobis Christe tulisti:**

**Tu mihi fidenti tempore mortis ades.**

**Dominica Paschæ, Euang.**

**Matth. 21.**

**Prostrata uictor rediuiuus morte triumphat;**

**Parta redit miseris gratia, uita, salus.**

**Dominica Quasimodogeniti,**

**Euan Ioannis 20.**

**Das mandata tuis, das uires Christe docendi,**

**Da ualeant firma pectora nostra fide.**

**Dominica Misericord. Euang.**

**Ioannis 10.**

**Semper ubiq; sonet pastori gratia CHRISTO:**

**Ille sua miseras morte redemit oues.**

**De-**

**Dominica Iubilate, Euang. Ioan. 16.**  
**Discite Iusticiam, & regnum uenerabile Christi:**  
**Ferte crucem, uincit sub cruce uera fides.**

**Domin. Cantate, Euan. Ioan. 16.**  
**Promittit Christus spirabile numen ab alto,**  
**Capturus regnum spirituale Deus.**

**Dom. Vocem iucunditatis, Euang.**  
**Ioan. 16,**

**Ah miser, ad Dominum quicumq; orare recusat:**  
**Qui petit in Christi nomine, cuncta feret**  
**Ascensionis Domini, Euangel. Marc. 7.**  
**Discipulos Christus saluandum mittit in orbem:**  
**Inq; patris rediens, pergit ad astra, sinum.**

**Domin. Exaudi, Euan. Ioan. 16.**  
**Spiritus ingrati promittitur arbiter orbis,**  
**O' Deus afflatu nos rege sancte tuo.**

**Domini. penteco. Euan. Ioan. 14.**  
**Cordibus infusum spirabile numen ab alto,**  
**In Christo renoua pectora nostra Deo.**

**2. Pentecostes, Euangelium**  
**Ioannis 3.**

**In nos tantus amor, diuini & cura Parentis,**  
**Pro nobis natum tradidit ipse suum.**

**3. Pentecostes, Euangelium**  
**Ioannis 10.**

**Pastor oues Christus custodit, cedite fures:**  
**Ille aditum ad ueri præbet ouile Dei.**

**Domini-**

**Domin. Trinitatis, Euange-  
lium Ioannis 3.**

**Nemo petit cœlum, nisi per te Christe redemptus  
A te uera salus, non aliunde uenit.**

**Dominic 1 post Trinitatis, Euan.  
Lucæ 16.**

**Impietas soluit securo in diuite pœnas:**

**I nunc, & summum quære Epicure bonum.**

**Dominica 2. Euangelium  
Lucæ 14.**

**Omnibus offertur diuinæ gratia cœne:**

**Ah miser, hic animi quem iuuat esse pigrum.**

**Dominica 3. Euang. Lucæ 15.**

**Tanta Dei bonitas, infirmos suscipit ultro:**

**Per Christum ueniam, qui resipiscit, habet.**

**Dominica 4. Euan. Luc. 6**

**Ipsè trabem ignorans, festucam carpis amici:**

**Pectoris ô quantum est ulcera nosse tui?**

**Dominica 5. Euan. Luc. 5.**

**Christe doces populum, mox retia piscib. imple:**

**Vis prius agnosci, cœtera deinde dabis.**

**Dominica 6. Euang. Matth. 5.**

**Christus ab interno pietatem corde requirit:**

**Cultibus externis nil pietatis inest.**

**Dominica 7. Euang. Mar. 8.**

**Pane cibatur modico densæ longa agmina plebis,**

**Omnia qui larga donat & auget ope.**

**Dominica**

## Dominica 8. Euang. Matth. 7.

*Sæpe lupum occultat, qui pelle incedit ouili:  
Fructibus est omnis uita probanda suis.*

## Domin. 9. Euan. Lucæ 16.

*Comparat oconomus malè partis rebus amicos:  
Rectius hic, alios qui pietate iuuat.*

## Domin. 10. Euangelium Lucæ 19.

*Institor eijcitur, Solymæ flet funera Christus:  
Supplicium ante pedes impius omnis habet.*

## Domini. 11. Euan. Lucæ 18.

*Inuenit hic ueniam, qui agnoscit, fudit & orat:  
Iusticiam extollis quid Pharisæ tuam?*

## Dominica 12, Euang. Mar. 7.

*Dum sensus surdo, dum uox est reddita muto.  
Declarant uerbis addita signa deum.*

## Dominica 13. Euang. Luc. 10.

*Prima Deo pietas debetur, proxima fratri,  
Sic Samarita tuam sentit egenus opem.*

## Dominica 14. Euan. Luc. 17.

*Vnus agit grates, lepra bis quinque leuantur:  
Ah quantum humana est in ratione malis?*

## Dominica 15. Euang. Mat. 6.

*Difficile est dominis pariter seruire duobus:  
Fide Deo. & curis cætera liber age.*

## Dominica 16. Euang. Luc. 7.

*Sponte deus uiduæ rediuuium reddit alumnus:  
Et dubitat quisquam, uelle iuuare deum?*

**Dominica**

**Dominica 17. Euan. Lucæ 14.**

*Luce sacra Christus sanans intercutis egrum,  
Quæ bona sint ferijs non prohibenda docet.*

**Domin. 18. Euan. Matth. 22.**

*Lege tumens, sed legis iners, stolidusq; sophista,  
Conuictus Christo uera monente, tacet.*

**Domini. 19. Euang. Matth. 9.**

*Restituis uerbo membris dum Christe solutum,  
Non sentit sapiens, sed pia turba Deum.*

**Domini. 20. Euangel. Mat. 22.**

*Sponsus ad instructas ciues uocat undiq; mensas:  
Infelix, tardo quem iuuat ire pede.*

**Dominica 21. Euan.**

**Ioannis 4.**

*Credenti satrapæ moribundum seruat alumnum,  
Et firmat dubiam Christus amore fidem.*

**Domin. 22. Euang.**

**Mat. 18.**

*Cui ueniam dederat Dominus, fit seruus iniquus:  
Des alijs ueniam, quam cupis esse tibi.*

**Dominica 23. Euang.**

**Mat 22.**

*Ius quid in ambiguo Pharisei quæritis æres?  
Sunt sua principibus, sunt sua danda Deo.*

**Dominica 24. Euan.**

**Matth. 9.**

**Plena**

**Plena fide accipitur tacto muliercula Christo:**  
*Sola Deo acceptos nos facit esse fides.*

**Dominica 25 Euang.**

**Matth 24.**

**Qui sua degeneri prædicis funera mundo,**  
*Verè Deus populum suscipe Christe tuum.*

**Dominica Aduentus, Euang.**

**Matth. 21.**

**Ecce uenit uili rex regnum uestus afello,**  
*Victor is, ô quantus, quando redibit, erit?*

**Dominica 2. Aduentus Euang.**

**Lucae 21.**

**Signa refert Christus mundi tractura ruinam:**  
*Tempus adest, letum tollite quisq; caput.*

**Dominica 3. Aduentus Euang.**

**Matth. 11.**

**Dum sua Ioanni miracula nunciat, ipsum**  
*Se quoq; Messiam Christus adesse docet,*

**Dominica 4. Aduentus, Euang.**

**Ioannis 1.**

**Pectore non dubio CHRISTVM Baptista professus**  
*In CHRISTO audendum fortiter esse docet.*

**DE VITA BEATA.**

**D. MARTINI LUTERI.**

**Ex Psalmo CXXVIII.**

**V**itam quæ faciunt beatiorē

**O. Chari-**

O' charissime Christiane sunt hæc.  
 Aeternum Dominum Deum timere,  
 Mandate illius & uias amare.  
 Sit uictus manuum labore partus  
 Sic uiues bene, sic eris beatus.  
 Vxor prole tuam domum beabit,  
 Letis ut generosa uitis uiuis.  
 Ad mensam tibi filij sedebunt,  
 Vt pinguis teneræ nouellæ oliuæ.  
 Sic fidus benedicitur maritus  
 In casto Domini timore uiuens.  
 Donet te benedictione semper  
 Ex Zion Dominus, Hierusalemq;  
 Florentem faciat bonis uidere:  
 Vt natos uideas. & inde natos,  
 Et pacem super Israel in æuum.  
 Hic dicat pius omnis, Amen Amen.

• EIVSDEM IN

### Epicurum

**V**itam quæ faciunt suis beatam  
 Porcis, hæc Epicurus ille tradit:  
 Ne spectes hominum, Deive mentem;  
 Non est qui regat atq; curet orbem.  
 Spem uitæ bene rideas futurae,  
 Quamuis mens ratioq; monstret ipsa.  
 Te soli tibi finge procreatum,  
 Certus cuncta tuo esse nata uentri.

Silenus placeat, nihilq; malis.  
 Viuas ut tua sus, tuusq; porcus,  
 Et tandem moriare porcus & sus.  
 Sic sic itur ad insulas beatas,  
 Aeterno quibus igne carcer ardet,  
 Et tales coquit ustulatq; porcus.  
 Tunc malles Epicuri non fuisse,  
 Sed serò uenient eæ querelæ:  
 Et disces aliud fuisse quiddam,  
 Quam quod riseris hic inane numen.

# IOANNIS STIGELII

## In Martialem.

Vitam quæ faciunt beatierem,  
 Nugacissime Martialis hæc sunt.  
 Delicti agnitio, pauorq; cordis,  
 Erroris dolor, alta pœnitudo,  
 Sola & saluifica fides salutis.  
 Nam quicumq; fide labante nusquam.  
 Apprendit penitus, quod ipse CHRISTVS  
 Humanam induerit Deus figuram,  
 Et nobis miserisq; perditisq;  
 Morti supplicioq; destinatis,  
 Aeternam reparauerit salutem:  
 Exercetq; fidem, piosq; fructus.  
 Adfert in medium, suæq; uitæ  
 Inuitat pietate molliores,  
 Ille inter meruit beatiore

Meret



Herodas statui, fruiq; cælo.  
Sunt hæc barbara uerba, forsan inquit,  
Nec sic sunt soliti loqui Quirites.  
Vitam quæ faciunt beatiorem,  
Nugacissime Martialis hæc sunt.

IOANNIS GIGANTIS.

Vitam quæ faciunt beatiorem,  
Hæc sunt credito, chare Christiane.  
Peccata agnita concione legis  
Deplorare, queri, dolere, flere:  
Et mentem miseramq; territamq;  
Ac certamine sauciam seuero,  
Verbi fonte Dei salubriore  
Per Christi meritum, crucemq; duram  
Tranquillare, rigare, roborare,  
Et uitæ nouitate Christianam  
Exerce fidem: atq; ita ambulare  
In uero Domini Dei timore,  
Iniunctamq; sequi uocationem:  
Et, qui non procul est, paratiore  
Expectare animo diem Supremum.

A D A M I S I B E R I.

In Antichristianos.

Quæ sint, quæ faciunt beatiorem  
Vitam, queritis Antichristiani?  
Vnum numine triplici colendum  
Deum agnoscere, et agniti timere,

2

2

Amare,

Amare, & uenerari, & inuocare,  
 Patrem: qui regit & tuetur omnem,  
 Quem uerbo è nihilo creauit orbem.  
 Filium: scelus ut piaret Ada,  
 Et qui factus homo, suaq; morte  
 Amissam reparauit & salutem,  
 Offensiq; patris repressit iram.  
 Spiritum: docet & fouet, gubernat  
 Qui nos, & iubet inuocare, & unum  
 Quæ nos cunq; premat ruina, forti  
 Fide apprehendere: fiat ut Dei laus  
 Et sic cognitiorq;, clariorq;:  
 Moribusq; referre, sancta, CHRISTVM  
 Vitæ totius innocentiaq;.  
 Hæc uitam faciunt beatiorem,  
 Sed non creditis Antichristiani.

#### GEORGII FABRICII.

Summam quæ doceant salutis, hæc sunt,  
 Cunctis mente tenenda Christianis:  
 Veri cognitio Dei suiq;,  
 Nostri debita proximiq; cura,  
 Cor mundum, moderata lingua, castum  
 Os cum lumine, dextra liberalis,  
 Contenta exiguo suoq; uita,  
 Incorrupta fides, amorq; constans,  
 Mens non ebria rebus in secundis,  
 Nec depressa metu graui maiorum,

Sed

*Sed quam spes bona seruat, inq; rebus  
In Christum facit omnibus tueri.*

# VERBUM DEI VERITAS.

Ioannis 17.

Adamus Siberus.

**E**st ueritas simplex & una, quam DEI  
Tradit nisi VERBUM nihil. Verbum Dei.  
Quod nec Sami senex, nec explibat Plato.  
Vnum & idem, trinum, & ὁμοῦ τοῖς, optimum  
Et maximum Deum docet cognoscere,  
Patremq; Filiumq;, sanctum & Spiritum,  
Et quæ uoluntas in genus nostrum illius.  
Tum ponit ante nostra nobis lumina  
Cladesq; miserasq; nostras, qua uia  
Et eripi ex malis queamus omnibus,  
Natura restituiq; praua in integrum.  
Quicumq; credit huic, Dei fit filius  
Christiq; frater. ut potitus cœlitum  
Vita, beatus æuum agas felix, tibi  
Verbum dei fidei sit unica regula,  
Norma actionum & omnium certissima.

FINIS.



## IESV CHRISTI

CAPTI ET VINCTI

Deductionum XII.

Liber Primus:

IACOBO STRASBURGO AVTORE.  
 CLARISSIMIS VIRIS D. DO-  
 ctoribus Bartholomeo Rünbaum, Theo-  
 logo et primario Pastori atq; inspectori Ecclesiæ  
 in Episcopatu Mersburgensi: & WOLFGANGO  
 MEVRERO, Medico ac professori Lipsensi  
 celeberrimo, assensibus suis observandis.

IACOBVS STRASBURGVS.

**C**ui caput Aonias effert, MEVRERE per artes  
 instruit & medicas utraq; lingua manus:  
 Tuq; sacri cœtus, & CHRISTI fide minister  
 Eximium patriæ BARTHOLOMAEÆ decus.  
 Affines saluete mei, quos omne per æuum,  
 Dò nec erit uirtus, inclita fama uehet.  
 Triste redit tempus, quo Phœbus palluit olim,  
 Et fuit in medio noctis imago die.  
 Dū n nostræ patiens carnis DEVS, editus aluo  
 Virginis, infami morte necatus obit:  
 Ex grege pontificum, quem uincula seua gerentem  
 Iudicis iniusti ducimus ante thronum.  
 Vt desint uires, tamen est pia nostra uoluntas:  
 Quod bene quis uoluit, non male fecit opus.

7

4

Exiguum

Exiguum magni uobis do munus amoris  
 Forsitan hic magni muneris instar erit.  
 Casta duæ seruant connubia uestra sorores  
 Tertia blandiloquo me uocat ore uirum.  
 Fœderis hoc genus est multo preciosius auro  
 Sit tamen hæc nobis copula firma precor.  
 Si quid apud seros est immortale nepotes,  
 Candida posteritas si mea scripta leget:  
 Non ero dedecori uobis. DEVS ocia tantum  
 Præbeat, & studijs tempora longa meis:  
 Producam prima sanctos ab origine patres,  
 Quos nunc fata mihi non satis æqua premunt.

DEDUCTIO PRIMA.

Christus capitur in horto, &  
 deducitur ad Annam.



Ors ubi facta potens fuit, & damna  
 tio cœpit:

Rursus in hoc oritur uita salusq;  
 loco.

Primus homo perijt liuore Draco-  
 nis in horto,

Et temerè donis excidit ipse suis.

Verus honore Deus, membris homo purus, in horto

Incipit ex hominum Christus amore pati.

Proh dolor, omnipotens Deus, & sine fine beatus

Sustinuit serua proditione capi.

Sternere quos nutu potuit, quos perdere uerbo:

Porri-

Porrigit his iussas in sera uincla manus.  
 Nec mora, pontificē trahitur captiuus ad Annam,  
 Milite lurconem circumeunte senem.  
 Ille madens uino, uerbis prorumpit in iram,  
 Ructu sæpe feros impediēte sonos.  
 Libertas inuisa malis: responsa daturus  
 Iam Christus pro se, si licuisset, erat.  
 Aulicus (infandum) cœlestia percutit ora,  
 Inclita sub duro uerbere mala crepat.  
 Christe capi uinclis hominum dignitate cruentis,  
 Concilianda tui cum patris ira foret:  
 His ego constrinxi rigidis tua membra catenis,  
 Inq; tuas pœnas ingeniosus eram.  
 Tractus es impurum duce me comitatus ad Annam,  
 Falleris ingenio, luderis arte mea.  
 Hic quoq; sacratos uiolauit dextera uultus  
 Sæua tuos, colaphis ore rubente meis.  
 Suscipe me miserum: fassas ignoscere culpas;  
 Est proprium meriti Christe benigne tui.  
 Vinculi peccati dissolue tenacia nostri,  
 Eripe morte meos illaqueante pedes.  
 Et pia simplicitas odijs si quando laborat,  
 Carcere uel sæuo scrutanda datur:  
 Suggere corstantes animos, da nescia uinci  
 Pectora, da celebrem sanguine teste fidem.  
 Ebria pontificum non gens, non aula potentum  
 In sacris teneat regna superba tuis.

Non bene pontificum pia templa furore reguntur.

Nec bene conueniunt Christus & aula leuis.

# DEDUCTIO II.

## DVCITVR IN CAIPHAE

summi pontificis palatium, in quo blasphemie ac seditionis à falsis testibus accu-

satus, suam diuinitatem coram Ca-

ipha confessus est.

ipha confessus est.

**S**istitur ad Caiphae Saducaei triste tribunal.

Turba sacerdotem ceca furore fremit:

Teste subornato potuit reus ille uideri,

Cui bona Romano iudice caussa fuit.

Dicere sed uerum per patria nomina iussus,

Libera mox soluit talibus ora sonis:

Credite, tempus erit, cum sedere uidebitis alta

Ad latus hunc natum patris adesse Dei.

Inde reuersurum coeli sub nubibus, inter

Angelicos sonitu testificante choros

Intonet, & subita surgens furiosus ab ira

Præses: Hic est sermo morte piandus, ait.

Nec caret assensu uulgi uox impia, clamat:

Est reus iste crucis, tu crucifige reum.

Christe sub iniusto mala præside multa tulisti,

Cum nece tollendus plebe iubente fores.

Cur tamen intacto lactantis ab ubere matris

Corpore purus homo, pectore sanctus erat.

Ipse sed in populo de te testabar inique:

Clama-



Clamabam, Malus est, tollite cæde malum.  
 Pontificisq; mea suffragia uoce probaui.  
 Impietas adeò tunc mea cæca fuit.  
 Dignus ego Stygium mitti peccator ad Orcum,  
 Dignus ego meritis uincula ferre necis.  
 Tu sis Christe mihi facilis, ueniaq; paratus:  
 Ut tua notescat gloria, parce mihi,  
 Verus es, & ueri defensor, disijce linguas,  
 Quas iuuat in sanctos friuola uerba loqui.  
 Ut si quaudo tuum lædunt mendacia cætum,  
 Te cunctis nostrum teste probemus opus,  
 Da me uera tua pro numine dicere sortem,  
 Proq; tuo da me nomine dura pati.  
 Lingua prius nervis mea palpitet ense recisis,  
 Tollere quàm laudes desinat ille tuas.  
 Quidquid erit miserum, per te tolerabile nobis  
 Est quia uita fugax, & mihi uile bonum.  
 Flebile mors alijs & inenarrabile damnum,  
 Mollia qui saluis ocia rebus agunt.  
 Det mihi sepositam Christus per fata coronam,  
 Martyrio nostram testificante fidem.  
 Flagra, catenarum tractus, feruleq; crepantes  
 Horrendis lacerent candida membra modis.  
 Ungula costarum crates infixæ parentes  
 Diuidat, intrepitum dilaceretq; iecur.  
 Leniet innumeros tua gloria Christe dolores,  
 Et dabit in nostram fata benigna necem.

DEDV

## DEDUCTIO III.

**D**ucitur in conclaue liëtorum pontifici-  
orum, ubi ab infimis feruis per  
noctem illuditur.

**T**raditur interea liëtibus atq; ministris,  
Scilcet agna feris dilanianda lupis.  
Lasciuos inter quæ non ludibria passus?  
Nil lare pontificum turpius esse potest.  
Lamina spurcantur, facies sacra uulnere liuet,  
Et crebro uerbis uerbera mixta sonant.  
Sanguineus tenui tegitur uelamine uultus,  
In caput unius turba scelestæ ruit.  
Impia pontificum domus, & spelunca latronum,  
Sunt aliquid uarium nomine rebus idem.  
Tot probra, totq; dolos famulorum passe nefandos,  
Christe, latent animo sensa quot ima meo.  
Subiectum minimis te scilicet esse docebat,  
Vt faceres summis nos in honore pares.  
Inter ego stabam sceleratos ipse ministros,  
Causa tibi luctus, causa doloris eram.  
Sis mihi propitius, quia tu peccata remittis,  
Et Deus, & nullo semine factus homo.  
Si nil peccassem, tu nulla remittere posses  
Crimina, sed ueniæ dat mea culpa locum  
Custodes dubiæ uitæ, comitesq; laborum,  
Adijce cœlestes agmina fida choros.

**Signa**

Signa canat Sathanas, & in una congerat hora,

Quidquid ubiq; malum terra uel unda parit:  
In mea coniuret socius mala mundus, & omnem

Sæuitiam ingenio contrahat, arte dolum:

His ego tutus ero sub ui, sub fraude, ministris:

Nulla milli tellus, nulla nocebit aqua:

Disijce pontificum sine successoribus aulas

Nomina Christe tuo semper iniqua gregi.

Ora tegunt qui nunc sibi fraude latente, Sophistas

Detege, fraud talis digna rubore fuit.

Lingua Sophistarum nihil est nisi Lerna malorum,

Nec minus ac Hydræ tetra uenena nocet.

#### DEDUCTIO IIII.

Ducitur mane ad concilium & à Pontifi-

cib. & consulib. damnatur & ho-

stis reipub. iudicatur.

**V**icino Phœbus radios ubi protulit ortu,

Lucifero clarum præueniente diem:

Flebile iudicij producitur ante tribunal,

Qui regit arbitrio cuncta creata suo.

Illum neglectæ pietatis crimine damnat

Ebria pontificum uentre tumente cohors.

Curia (ne sceleri quid fraudis desit inausum)

Tota reum motæ seditionis agit.

Interea Iudas sese, factumq; perosus,

Persidiæ precium mente dolente refert.

Parcite non meruit tristes dare sanguine poenæ,

Inquit,

Inquit, hic in fontem non onerate uirum.  
 Improbilas nescit cursus inhibere furori:  
 Nequitia, cœpit quod semel, urget iter.  
 Mœstus amansq; necis laqueo se strangulas ipsum  
 Proditor, & rupto pendet aqualiculo.  
 Iudice qui necis es damnatus Christe senatu,  
 Ac hostis patriæ dictus es esse tuæ:  
 Peccatis sis quæso meis placabilis, & me  
 Pro pietate iuua, pro bonitate fove.  
 Quid feci? damnantis ego pars magna senatus,  
 Vltima damnando primaq; uota dedi.  
 Sed tu corruptam deductus es ante tribunal,  
 Hic ubi simplicitas est tua facta nocens:  
 Ne mihi iudicij sententia seua noceret,  
 Quæ mihi dicta fuit, quæ subeunda foret.  
 Tu firmos animos, tu suffice robora menti,  
 Languida ne pereat tristis agone crucis.  
 Vt quoties morti sumus infernoq; propinqui,  
 In cœlo uitam sentiat illa nouam.  
 Mundus hic hospitium, non patria terra piorum est:  
 Scilicet est alio patria nostra loco.  
 Nam mandus mundana capit, cœlesta cœlum.  
 Sors fragilis non est, nec breue nostra bonum.  
 Debemur cœlo, quod clausum labe parentum,  
 Reclusumq; tuo sanguine Christe patet.  
 Mortuus ô utinam possem per fata relicto.  
 Corpore, cœlestes nunc habitare domos.

Tunc

Tunc ego spectarem Christo ducente triumphum,  
Mista per angelicos umbra beata choros.

O rex ô hominum frater dulcissime gentis,  
Maiestate deo, corpore iuncte mihi.

Primus homo mortem peccatis intulit orbi.  
Morte tua mortem tu premis alter homo.

Vtraq; mors operosa satis: quia prima quod infert,  
Peccati uictrix altera tollit onus.

#### DEDUCTIO V.

Ducitur ad Pilatum præsidem Romanum  
apud quem accusatur seditionis, læ-  
sę maiestatís, & hæreseos,

**P**ilato Caiphas Romani Cæsaris hostem  
Obijcit, heu species callida consilij.  
Iudicijs seuam ciuilem prouocat iram,  
Nil actum studijs dum uidet esse suis.

Quid Iudæus agit? stat præsidis ante tribunal,  
Vt cædis uacuas possit habere manus.

O gentem stolidam, uult corpore pura uideri:  
Sed premit hostili pectore triste nefas.

Abdita rimatur Aciti Deus intus cordis,  
Nec simulante fidem gaudet honore coli

Assistunt testes, qui publica crimina fingunt:  
Fraus, patrocinijs quæ caret, illa patet.

Quid faciat Christus, suspecta silentia forsan,  
Exprimit internus uerba coacta dolor.

Protinus

Protinus ergo sui patris asserturus honorem,  
 Ipse suum forti vindicat ore decus.  
 Præses ut audiuit, uocem ter ad æthera tollens:  
 Nullius est, inquit, criminis iste reus.

CHRISTE sub arpitrium me iudicis ac te ministra,  
 Te sceleris dixit cum mea culpa reum:  
 Me fera culpa premit, te culpæ poena fatigat:  
 Innocuus cum sis, cogeris esse nocens.  
 Parce mihi, iurisq; tui deflechte rigorem:  
 Iure tuo iudex non potes esse meus.  
 Aut ego succumbam, minus aut sis durus oportet:  
 Debile uas ego sum, sed grauis ira tua est.  
 Sit tibi Christe satis, uires habuisse nocendi:  
 Iusticia in trepitum non sit acerba caput.  
 Perdere posse malos, est digna potentia rege:  
 Parcere supplicibus, gloria digna Deo.  
 Sic rege, sic nostras uni tibi dirige mentes,  
 Libera foemineus ne premat ora metus.  
 Seruorum timor est index, odiosa tyrannis  
 Libertas Christum corda professa decet.  
 Ut, si quando tua lethum pro laudat pacisci,  
 Aut si quid leuius morte subire iubes:  
 Spernamus sæuæ fortes tormenta catastæ,  
 Spernamus rigide uulnera dura necis.  
 Quicquid id est, omnis fors est sperando ferenda:  
 Subleuat impositum spes melioris onus.

*Vt modò per totum lux uerbi fulgeat orbem,  
 Qua polus altus obit, qua premit imus humum.  
 Fax ubi Christe tuæ lucis diuina coruscat,  
 Eripiunt clarum nubila nulla diem:  
 Sed radijs quemcunq; suis non illa serenat,  
 Hunc satis illustrent lumina nulla locum.*

## DEDUCTIO VI.

*Ducitur ad Herodem tetrarcham, ubi  
 sindone in contemptû regij eius  
 nominis illuditur.*

**N***Ec mora, Pilato Christus mandante, tyranni  
 Ductus ad Herodis regia tecta fuit.*

*Callida robusti uulpes fit amica leonis:  
 Desinit ira uetus, conciliatur amor.*

*Simplicis ingenij perdendus quæritur agnus,  
 In caput illius uisq; dolusq; coit.*

*Rex quoq; signa petit uarias imitantia formas,  
 Regia sed nullo pondere nota cadunt.*

*Purpurea tunc ueste nitens, ludibria Christus,  
 Probra, minas, plagas, & maledicta subit.*

*Perfidie domus est diræq; libidinis aula,  
 In sanctos ubi ius sæpe satelles habet.*

*Non bene iunguntur uirtus & summa potestas,  
 Nec bonus atq; potens aulicus esse solet.*

*Ad sæuum pie Christe thronum deducte tyranni,  
 Dura per Ebræam sceptrâ tenentis humum,*

x

Ipse

Ipse fui socius promptissimus, ipse satellites;  
 Per medias urbis cum traherere uias.  
 Illudensq; tibi maledicta leuissima dixi,  
 Et fuit in cursu tunc furor iste meus.  
 Respice me patrio, quo seruas omnia, uultu:  
 Amplius erroris nec memores esto mei.  
 Mergere peccatum uoluisti, uincere mortem,  
 Tollere pestifero uirus ab angue datum:  
 Sed parue non molis erat, superare tot hostes:  
 Qui multos lædit, multa pericla subit.  
 Aspice, sancta quibus tua nunc Ecclesia damnis,  
 Aut quibus insidijs sit peritura breui.  
 Capta dolo trahitur seuis ludenda tyrannis,  
 Saluificam quibus est crimen habere fidem.  
 Hostis adest omni metuendus parte, nec undis  
 Est mare securum, nec uia tuta patet.  
 Qua medio terras cælo uidet altior imas  
 Phœbus, & ex æquo uesper & ortus abest:  
 Insidias sanctis meditatur callida uulpes,  
 Romanaq; suum tollit in urbe caput.  
 In folio residens summos affectat honores,  
 Et Christi sacro sanguine plena tumet.  
 Turpeq; sandalium nostris amplexibus offert,  
 Et secum mundi regna superba trahit.  
 Effertur inde leo, quem diues honorat Idume,  
 Cuius ad imperium Pannonis ora tremit:  
 Maximus ille tui, nostri quoq; nominis hostis,



In nos omne suum robur & arma mouet.  
 Tristius in terris nihil est pietatis amante:  
 Et, modò si fas sit, quod minus esse uelis.  
 Quò quis in hoc mundo maior, magis ille laborat  
 Tollere cum uera religione fidem.  
 Nil tã blasphemũ est, quod non reperire patronos  
 Possit, & auctorem reddat honorificum:  
 Sola est, quam damnant omnes, Ecclesia Christi:  
 Hanc unam, mundi uile catharma putant.  
 Agmina disruptis immania disijce uinculis:  
 Cur necat imbellem turba scelestæ gregem?  
 Vt diro percant per mutua uulnera bello,  
 Vt malè coniunctæ diffociantur opes.

## DEDUCTIO VII.

Reducitur ad Pilatum præsidem Romanum,  
 ubi à tota concione damnatur,  
 quæ ei etiam latronem Barnabam prætulit.

**C**occinea indutũ Rex Christum ueste remittit:  
 Ex probris pietas in noua probra uenit.  
 Qui sine peccato mortales induit artus,  
 In cuius nec erat mente, nec ore dolus:  
 Iudice fit populo peior latrone cruento:  
 Heu mihi, blasphemus quàm furor iste fuit.  
 Innocuum iudex renuit damnare cruorem,  
 Querit & ingratis tardior ipse moras.  
 Quid facis? exclamant. interfice: sanguinis huius

Sit rea uel nostræ sera propago domus.  
 Mortis ad exitium ruit irreuocabile uulgus,  
 Iudicioq; perit spontè lubensq; suo.  
 Væ misere genti, quæ nunc quoq; sanguinis huius  
 Turpem circumfert exul inopsq; notam.

CHRISTE per instantē populi moriture furorē,  
 Sors tua cūm peior sorte latronis erat.  
 Te mea nempe reum mortis sententia fecit,  
 Et uulgi clamor crimina nostra notat.  
 O' quoties uolui, peccato purus ab omni,  
 Ad uerbi normam uiuere Christe tui?  
 Sed mea sunt ueteris plenissima pectora lapsus,  
 Perpetrat aduersum luxuriosa caro.  
 Tu me diuini miserum rege numinis aura,  
 Affectus animi tu moderare mei.  
 Quodq; meis positum non est in uiribus, ipse  
 Exple, perq; tuam lubrica tende manum,  
 Ne cadat in Stygias nimis heu caro perditā casses:  
 Aut si fortè cadat, retrahat inde pedem.  
 Cūm premit infontem furiosa calumnia caussam,  
 Aut mendax ficto crimine lingua nocet.  
 Tu fac ne tanti faciam suffragia mundi,  
 Serpat ut infamis rubra per ora pudor.  
 Conscia mens recti, miseris tutissima res est:  
 Sola sub hoste uiget, sola sub igne manet.  
 Criminis arguimur: quid tum? modò criminis absit  
 Culpa,

Culpa, nec ex merito pœna sit ista suo.  
 Nempe reum dici, quàm culpam, præstat, habere;  
 Ferreq; plus prodest, quàm meruisse, malum.

## DEDUCTIO VIII.

Ducitur in prætorium, purpura per con-  
 temtum indutus: pugnis contunditur,  
 corona de spinis uulneratur, om-  
 ni iniuriæ & contumeliæ  
 genere uexatur.

**R**ursus ouis trahitur uastis lacerāda molossis:  
 Et mala, quæ tulerat plurima, plura subit.  
 Luditur ostrino Christus uelamine: mortis  
 Flebile principium flebilioris erat.  
 Percutitur uirgis, ac liuida membra flagellis,  
 Seruili pœnas supplicioq; luit.  
 Non sceptrum regale capit, sed arundo palustris  
 (Proh dolor) æterni gloria regis erat.  
 Horrida uulneribus facies hiat, oraq; sputo  
 Sordida, uerberibus tempora sacra tument.  
 Non ambit diadema caput, uittæq; decentes:  
 Dura sed ex spinis facta corona premit.  
 Innocui quantum dolor exprimit ille cruoris:  
 Siccine Rex mundi discrucandus eras?

CHRISTE tot indignos dignate subire dolores,  
 Quot tellus homines fert, feret, antè tulit:  
 Intima confiteor misere contagia mentis,

Ante tuam faciem nil nisi massa nocens.  
 His ego te uirgis, his te quoq; cædo flagellis:  
 Crimina nulla facis, sed peregrina luis.  
 Tuq; mea percussa manu geris ora cruenta,  
 Ora prius pura candidiora niue.  
 Imposui rigidam de spinis ipse coronam,  
 Excusso tibi quæ sanguine Christe madet.  
 Suggere diuini numen spirabile flatus,  
 Et sensus motu, segne cor igne foue:  
 Vt, miseri quàm sis preciosa redemptio mundi,  
 Agnoscant merito pectora sana tuo.  
 Non certè iocus est, aut fabula plena cachinno:  
 Est dolor, offensum, magnus, habere Deum.  
 Ille nec effuso placatur sanguine tauri,  
 Iusticia mendax nec Pharisee tua.  
 Non uenale patet meritorum stercore cælum,  
 Sola fides clausi perforat astra poli.

## DEDUCTIO IX.

In proprætorio sistitur sacerdotibus &  
 populo, ueste purpurea: & toto corpore  
 laceratus, clamore ad pœnam  
 crucis poscitur.

**M**vrice uestitus, populo, populiq; magistris  
 Exteriore domus parte uidendus erat,  
 Acra pontifices fremituq; minisq; laceffunt,  
 Damnatumq; super longius esse dolent.  
 Celsa feris populus clamoribus astra fatigat,

Et

Et iacit in dominum uerba maligna suum:  
 Scilicet iste Deo proprios sibi poscat honores?  
 Aut impunè uelit filius esse Dei?  
 Non ita, blasphemis mortem lex ipsa minatur,  
 Sustineat meritam iudice lege crucem.  
 Qui subit arbitrium uulgi, subit ille Charybdim,  
 Obruiturq; uagis fluctibus Oceani.

CHRISTE tot iniustis per me damnate querelis,  
 Quot momenta trahit temporis una dies.  
 Iudice cum mundo mortis damnamur iniquæ,  
 Cum nostris risu fabula plena sumus:  
 Da fortes animos, supraq; pericula mentem:  
 Da nos ferre malum, quod tolerare iubes.  
 Quid mihi uobiscum curæ, trepidatio, mœror:  
 Me contra, uobis quis malus arma deest?  
 Spem Christus, requiem præstat mens cōscia recti:  
 Desine fors miserum ludere, cede dolor.  
 Cur ego iudicijs rubeam commotus iniquis,  
 Cum mea non caussam uita ruboris habet?  
 Cur trepidem, patrias si cogar relinquere sedes?  
 Mundus hic est nobis omnibus una domus.  
 Cur exquisitæ sim mœstus imagine mortis,  
 Si semel his possim dedoluisse malis?  
 Præsentis genus est quoduis miserabile lethi:  
 Quælibet ad uitam mors tamen apta nouam.  
 Cur ego desperem, cum perfidus omnis amicus

Mendaci miserum futilitate premit ?  
 Præstat ab infido natum genitore relinqui,  
 Quàm uotis facilem non habuisse Deum,  
 Tu me Christe iuues, te iudice caussa laborat  
 Nulla, tibi nemo perfidus esse potest.

## DEDUCTIO x.

Reducitur in prætorium, populus clamo-  
 re & minis denuò poscit ad sup-  
 plicium, obiectu poten-  
 tiæ Cæsaris.

**P**Ræses ut audiuit diuino stemmate natum,  
 Cogitat offensos impietate deos.  
 Et rursus Christum duci iubet ante tribunal,  
 Ex illo patrium discat ut ipse genus.  
 Inde uiam tentat, populi qua mitiget iram,  
 Liberet & miserum morte premente uirum.  
 Clamitat effrænis passim dementia uulgi,  
 Supplicium merita non feret ergo crucis?  
 Dimisso Christo, Romani Cæsaris hoste,  
 Tu quoq; Romani Cæsaris hostis eris.  
 Quam non obsequio mundi sapientia flectit,  
 Sæpe minis audet sollicitare fidem.

CHRISTE Deus, ueterū qui non de stirpe deorū  
 Vel genus à Phœbo, uel Ioue ducis auo :  
 Vna sed æterni soboles æterna parentis,  
 Principium nescis, & sine fine manes.

A patre

A' patre nate prius, quàm condita secula mundi,  
 Quàm noua de nihilo terra creata fuit.  
 Et tamen humanos adeò miserate labores,  
 Vt sumpto fieres corpore uilis homo.  
 Da mihi noticiam fidei constantis, ut olim  
 Eloquar abiectio nil nisi uera metu.  
 Ne, ueluti nautas Sirenum molle soporat  
 Carmen, & exceptas strangulat inter aquas  
 Calliditas mundi uerbis me fallat amicis,  
 Quærat & ex nostra simplicitate malum.  
 En tua castra sequor, sub te duce milito, signis  
 Paruus adhuc ueui nomina nostra tuis.  
 Siue sit in fatis, seu me trahit impetus ardens,  
 Vna mihi noctem cura diemq; refert.  
 Seruulus esse tui coetus, tuus esse minister,  
 Et cupio uerbum Christe docere tuum.  
 Si tibi nostra placet simplex & recta uoluntas,  
 Illaq; successus est habitura bonos:  
 Ad laudes hanc ipse tuas tibi dirige: peccat  
 Ipsa relictæ sibi, numine firma tuo est.  
 Ad te non potis est sine te sua flectere uota:  
 Nil fit in his magnis motibus absq; Deo.  
 Nec tamen est truncus uel saxum, nostra uoluntas:  
 Gratia quam renouat, non creat alma nouam.  
 Corruptè bonam primi contagia lapsus:  
 Corruptæ est nobis exitiale malum.  
 Naturæ nunc VELLE manet, BENE uelle recessit:

Hoc tamen ex cœlo, non aliundè redit.  
 Prima uoluntatis tolli præstantia cœpit:  
 Hei mihi, uix superest illius umbra boni.  
 Condita quæ restat, cum sit mutilata, uoluntas  
 Nil bene mota Deo non præcunte facit.  
 Hec quàm serua diu est, nos iræ uasa manemus:  
 Mancipium est satanæ, non renouatus homo.  
 Ipsa sed à Christi renouatio sanguine pendet:  
 Omnis in hoc lotus sanguine, purus erit.

## DEDUCTIO XI.

Sistitur pro tribunali, & iniusta  
 sententia damnatur.

**Q**uid faciat præses? damnet sine crimine Christi  
 Officij prohibet nō uiolanda fides. (stum?  
 At uelit in fontem salua dimittere uita?  
 Consultum rebus non erat inde suis.  
 Nempe fuit rabidi metuenda potentia uulgi,  
 Et mala quæ secum Cæsaris ira trahit.  
 Aspice perfidiam mundi, quàm mobilis illa,  
 Quàm per multiplices est sinuosa uias?  
 Iudicis iniusti Christum sententia damnat:  
 Quàm subito mutat iusq; fidemq; metus?  
 Nil bona causa facit, homines timet, immemor eius  
 Præses, ad imperium sidera cuius eunt.  
 Sint modò qui iubeant, et erunt qui iussa sequantur,  
 Seu multis hæc sint noxia, siue bona.  
 Prima, quid expediat, sit cura: sit altera recti:

Hæc



Hæc modò sit magnis non inimica uiris,  
 Se mouet ex usu, non ex ratione uoluntas,  
 Obsequio cumulus dum modò crescat opum.

CHRISTE tuo finem rabies positura labori,  
 Vertit in ambiguos omnia iura dolos.  
 Tutius esse putat tolli moderamina legum  
 Mundus, & agnosci nomen inane Deum:  
 Quàm pro iusticia magnos tolerare labores,  
 Aut contra reges pro pietate loqui.  
 Ipsa quidem fragilis, nec tuta potentia semper,  
 Sæpe tamen multos utilitate capit.  
 Si nos ferre iubes uani ludibria mundi,  
 Adijce magnanimis pectora digna uiris:  
 Ne malefacta metu, terrore nefanda probemus,  
 Aut ipsi fallax ingrediamur iter.  
 Quicquid erit simplex, uno semel ore fatendum,  
 Nescit adulari spes animosa fide.  
 Cum mundo miserè perit hic què mūdus honorat:  
 Auctori fraus est perniciofa suo.

#### DEDUCTIO XII.

Educitur ex urbe in locū bustuarij Gol-  
 gatha, & inter duos latrones me-  
 dius cruci affigitur.

I Vdicij uix dicta fuit sententia, liçtor  
 Barbarus exultat, miles in arma ruit.  
 Baiulat ipse crucem Christus: portabile nulli,

Totius

Totius mundi crimina, portat onus.  
 Ad loca supplicij procedit: & urbe relictâ,  
 Golgatha, non posthac sic rediturus, adit.  
 Agmine plebs denso sequitur, matresq; pudicæ  
 Mite genus, mortis tristia fata dolent.  
 Inter sanguineos igitur Deus ipse latrones,  
 Pendet ab infami gloria summa cruce.

Christe Deus, mihi nate puer, mihi sanguine frater  
 Addite, proq; meis mortue flagitijs:  
 Quàm moles onerosa crucis, tibi debile dorsum  
 Per scapulas multo uulnere molle premit.  
 Heu mihi, culpa fuit magni mea ponderis instar:  
 Oppressere tuum crimina nostra caput,  
 Vincula, minæ, plagæ, ludibria, spinea ferta,  
 Crux, dolor, inq; tuum cuspis adaucta latus,  
 Sunt malefacta meæ uitæ, sunt intima cordis  
 Sensa mei, misere sunt tibi causa necis.  
 Sis bonus, & uitijs irasci desine nostris,  
 Ius mihi magnificum mors tua sancta dedit.  
 Tu peccatores, qui se peccasse fatentur,  
 In tua credentes uulnera, Christe beas:  
 Crimina confiteor, per te mihi credo remitti:  
 Cur meriti fiam pars ego nulla tui?

A M E N.

FINIS LIBRI PRIMII  
 De Christi passione.

## GEORGIUS FABRICIUS

Ioanni Bannoni, uiro optimo,

amico suo.



*Ultra canunt, sed pauca canūt laudanda poeta,  
Qui solum ingenio querere nomen amant.  
Nam dum uentosa temerē rapiuntur ab aura,  
In re saepe uolant uerba diserta leui.*

*Non ita nos docuit lucentis conditor arcis,*

*Prolatum stulto qui probat ore nihil.*

*Ille sua meritum uult innotescere mortis:*

*Hoc teneant hominēs pectore, uoce sonent.*

*Quantum est à patria Christum descendere sede,*

*Inq; mea, inq; tua uiuere carne Deum?*

*Innumera humana tolerare incommoda uite,*

*Pondera uulnifica grandia ferre crucis,*

*Cælestem diris pro peccatoribus Agnum*

*Sacrilega cæsum procubuisse manu:*

*Effudisse sacrum nullo parcente cruorem,*

*Redderet ut nobis cælica regna Patris:*

*Quos prius absorptos peccato, morte peremptos,*

*Nigri expectabant ignea claustra ducis.*

*Non pauci memores Doctorum, secla priora*

*Quos homines, aut quos nostra tulere pios,*

*Hac benefacta Dei cecinerunt carmine grato,*

*Quorum Christi animos impulit acer amor:*

*Quem dictauit amor cælestia uerba sacratus,*

*Qui par cum Christo & cum patre numen habet.*

*Nam Christum nemo sine numine nouerit illo,*

*Quod cælo ueniens pectora luce replet:*

*Ardentemq; Dei Christi q; inspirat amorem,*

*Torpentesq; animos suscitāt igne nouo.*

*Accipe Banno, breui quæ sunt digesta libello,*

*Non docti unius carmina ducta manu.*

*Sint tibi grata etiam: primū quia mittit amicus,*

*Deinde quod hæc Christo dona dicata Deo.*

DE

# DE CHRISTI PASSIONE, MORTE, SE- PULTURA, RESURRE- ctione, Liber II.

VARIORVM AVTORVM:  
Quorum hic est Catalogus.

<i>Actius Sincerus.</i>	<i>Iacobus Fabricius.</i>
<i>Adamus Siberus.</i>	<i>Iacobus Strasburgus.</i>
<i>Aeneas Siluius.</i>	<i>Iacobus Vimphelingus.</i>
<i>Andreas Crappus.</i>	<i>Ioachimus Camerarius.</i>
<i>Arnoldus Vesaliensis.</i>	<i>Ioannes Flaminius.</i>
<i>Basilius Zanchius.</i>	<i>Ioannes Pontanus.</i>
<i>Cæcilius Cyprianus.</i>	<i>Ioannes Sturnus.</i>
<i>Eobanus Hessus.</i>	<i>Ioannes Tuberinus.</i>
<i>Franciscus Hetsletensis.</i>	<i>Lactantius Firmianus.</i>
<i>Gabriel Altilius.</i>	<i>Lazarus Bonamicus.</i>
<i>Georgius Aemilius.</i>	<i>Ludouicus Pictorius.</i>
<i>Georgius Fabricius.</i>	<i>Nicolaus Borbonius.</i>
<i>Georgius Sabinus.</i>	<i>Petrus Chalybs.</i>
<i>Gregorius Conitius.</i>	<i>Prosper Aquitanicus.</i>
<i>Hercules Stroza.</i>	<i>Raphaël Zauenzonius.</i>
<i>Hermannus Nouæ A-</i>	<i>Vitus Ortel.</i>
<i>quile Comes.</i>	<i>Vitus Theodorus.</i>
<i>Hieron. Cantalupus.</i>	<i>Volfgangus Murcerus.</i>
<i>Hieronymus Eftenfis.</i>	<i>Volfgangus Vuerterus.</i>

CÆ

CAECILII CYPRIANI CARTHAGINENSIS Episcopi, De ligno uitæ.



EST locus ex omni medius quem cernimus orbe, (dicunt:

Golgotha Iudæi patrio cognomine

Hic ego de sterili succisum robore li-

Plantatū, memini fructus genuisse salubres. (gnū

Non tamen hos illis, qui se posuere, colonis

Præbuit: externi fructus habuere beatos.

Arboris hæc species uno de stipite surgit,

Et mox in geminos extendit brachia ramos:

Sicut plena graues antennæ carbasa tendunt,

Vel cum disiunctis iuga stant ad aratra iuuentis.

Quem tulit hoc primo maturo semine lapsum

Concepit tellus, mox hinc (mirabile dictu)

Tertia lux iterum, terræ superisq; tremendum

Extulerat ramum, uitali fruge beatum.

Sed bis uicenis firmatus & ille diebus,

Creuit in immensum, cœlumq; cacumine summo

Contigit, & tandem sanctum caput abdidit alto:

Dum tamen ingenti bisse nos pondere ramos

Edidit, & totum spargens porrexit in orbem:

Gentibus ut cunctis uictum, uitamq; perennem

Præberent, mortemq; mori qui posse docerent.

Expletis etiam mox quinquaginta diebus,

Vertice de summo diuini nectaris haustum

Detulit in ramos, cœlestis spiritus auræ.

Dulci

Dulci rore graues manabant undiq; frondess  
 Ecce sub ingenti ramorum tegminis umbra  
 Fons erat, hic nullo casu turbante serenus,  
 Perspicuis illimis aquis, & gramina circum  
 Fundebant letos uario de flore colores.  
 Hunc circum innumerae gentes, populiq; coibant,  
 Quam uarij generis, sexus, ætatis, honoris,  
 Innuptæ nuptæq; simul, uiduæq; nurusq;  
 Infantes, pueriq; uiri, iuuenesq; senesq;  
 Hic ubi multigenis flexos incumbere pomis  
 Cernebant ramos, auidisq; attingere dextris  
 Gaudebant, madidos cœlesti neectere fructus.  
 Nec prius hos poterant cupidis decerpere palmis,  
 Quam lutulenta uia uestigia foeda prioris  
 Detererent, corpusq; pio de fonte lauarent.  
 Ergo diu circum spaciantes gramine molli  
 Suspiciunt alta pendentes arbore fructus.  
 Tum si qua ex illis delapsa putamina ramis,  
 Et dulces, multo rorantes neectare, frondes  
 Vescuntur, ueros exoptant sumere fructus.  
 Ergo ubi cœlestem cœperunt ora saporem,  
 Permutant animos, & mentes perdere auaras  
 Incipiunt, dulciq; hominem cognoscere sensu.  
 Insolitum multis stomachum mouisse saporem  
 Vidimus, & fellis commotum melle uenenum  
 Reiecisse bonos turbata mente saporos.  
 Aut auidè sumptum non dilexisse, diuq;

Et malè

Et malè potatum tandem euomuisse saporem.  
 Sæpe quidem multi, renouatis mentibus, ægros  
 Restituere animos: & quæ se posse negabant,  
 Pertulerant, fructumq; sui cœpere laboris.  
 Multi etiam sanctos ausi contingere fontes,  
 Discessere iterum subito: retroq; relapsi,  
 Sordibus, & cœno mixti uoluuntur eodem.  
 Multi uerò bono portantes pectore, totis  
 Accipiunt animis, penitusq; in uiscera condunt.  
 Ergo qui sacros possunt accedere fontes,  
 Septima lux illos optatas sistit ad undas,  
 Tingit & in liquidis ieiunos fontibus artus.  
 Sic demum illuicem mentis, uitæq; prioris  
 Deponunt labem, purasq; à morte reducunt  
 Illustres animas, cœliq; ad limen ituras:  
 Hinc iter ad ramos, & dulcia poma salutis,  
 Inde iter ad cœlum per ramos arboris altæ,  
 Hoc lignum uitæ est cunctis credentibus. Amen.

## DE PASSIONE ET RESURRECTIONE Christi, Esaïæ prophetæ,

Cap. LIII. Interprete

GEORGIO AEMILIO.

**Q**uis facilem nostris tribuet sermonibus aurẽ?  
 Quæq; loquor, certâ credet habere fidem?  
 Grâde quis hoc agnoscet opus, quod gētibus ægris  
 Brachia cœlestis constituere manus?

A

Ante

Ante Deum crescet, patula ceu uirgula plantæ  
 Exerit è uiridi molle cacumen humo.  
 Sicut arenoso radix noua surgit agello;  
 Sic faciem domini pullulat ante sui.  
 Non illi species iuuenili mixta colore,  
 Læta nec egregij forma decoris inest.  
 Vidimus afflictum, sed enim uidisse dolebat:  
 Nullaq; pars, oculis quæ placuisset, erat.  
 Tam despectus erat, populoq; abiectus ab omni,  
 Vt magis abiectus nemo fuisse queat.  
 Obrutus ærumnis, magnoq; dolore, ferebat  
 Perpetuas curas, perpetuamq; luem.  
 Propterea ueluti miserum contempsimus ipsum,  
 Inq; oculis nostris nil nisi crimen erat.  
 Quinetiam flexa tulimus ceruice retrorsum  
 Lumina, non tantum sueta uidere nefas.  
 Ille quidem uerè nostris languoribus æger,  
 Pertulit humani grande doloris onus,  
 Suppositoq; gerens mortalia crimina collo,  
 Aspera pro nobis flagra crucemq; tulit.  
 Credidimus tantis percussum cladibus illum,  
 Irato miserum talia ferre Deo.  
 Vulnere sustinuit peccatis debita nostris,  
 Pro nostra pœnas impietate dedit.  
 Scilicet ut pacem nobis ueniamq; pararet,  
 Nostraq; se scirent corda placere Deo,  
 Utq; noua posset miseris ratione mederi,  
 Vulne-



Vulnere sanauit uulnere nostra suo.  
 Ignari nimium, nimiumq; errauimus omnes,  
 Ut malè, quæ nota ualle uagantur oues.  
 Quisq; suos cursus posita ratione secuti,  
 Perdidimus uerum, quod sequeremur, iter.  
 Hos tamen errores Dominus coniecit in illum :  
 Crimina sic humeris fert aliena suis.  
 Cum grauis afflictam premeret tentatio mentem,  
 Inijceretq; suas impia turba manus:  
 Promptus ad interitum uenturaq; fata cucurrit,  
 Nec fuit inuita uoce moratus iter.  
 Os tenuit clausum, trepidis ut ouilibus agnus,  
 Quem trahit ad certam dextera fune necem.  
 Verberat extremas nullis balatibus auras,  
 Sed silet, admotam subsequiturq; manum.  
 Sicut ouis niuæ cum dat sua uellera lanæ,  
 Perpetua linguam simplicitate tenet:  
 Sic pius hic tacuit medios detrusus in hostis,  
 Cunctaq; sedato pectore damna tulit.  
 Hinc grauib; pœnis, mortisq; dolore ren.oto,  
 Liber ab imposito factus agone fuit.  
 Iamq; tenet regnum, cuius uenientibus anni,  
 Quis poterit longos enumerare dies?  
 Cum fuit abscissus terræ uitalibus auris,  
 Quodq; breui fuerat, desijt esse breui.  
 Humanis uolui per funera rebus ademptum  
 Pro populi mortem crimine ferre mei.

Hæc mihi caussa fuit iuuenem demittere letho,  
 Qui cecidit nostra percutiente manu.  
 Mortuus, ut mortem uisus meruisse, sepulchro  
 Conditur, ut condi turba prophana solet.  
 Mortuus æsimilis locupletibus esse putatur,  
 Quos nil iusta Dei cura mouere solet.  
 Nil tamen admisit, quamuis peccasse putetur,  
 Et dolus innocuo nullus in ore fuit.  
 Sed placuit Domino tantis immergere curis,  
 Quo solet & sanctos more probare suos.  
 Iamq; ibi purpureo uitam cum sanguine fudit,  
 Factus ob humanum uictima grata nefas.  
 Auspice perpetuos Domino regnabit in annos,  
 Et Dominus longæ posteritatis erit.  
 Prospera succedent felicibus omnia signis,  
 Consilio summi quæ geret ille patris.  
 Cæca triumphato superabit tartara mundo,  
 Humanum cælo restituetq; genus.  
 Nam quia sustinuit uarios in carne labores,  
 Percipiet meritis gaudia digna suis.  
 Noticiaq; sui multos saluabit, in ipsum  
 Qui poterunt ueram cordis habere fidem.  
 Quosq; prius captos preciosa morte redemit,  
 Illorum dubiam non sinet esse fidem.  
 Hinc ego distribuens illi gratissima prædæ  
 Munera, perpeffo digna labore feram.  
 Scilicet & fortes bello superabit, & illi

Innu-

Innumeros fortes, quos regat ipse, dabo.  
 Officio quorum totum sua dona per orbem  
 Diuidet, & regum postmodo summus erit.  
 Hæc feret ille mihi: mortem quia passus acerbam,  
 Iniustos potuit inter habere locum.  
 Sustinuitq; reus multorum crimina solus,  
 Qui saluari alio non potuere modo.  
 Deniq; pro populo quoq; transgressore rogauit,  
 Et nos placatum fecit habere patrem.  
 Ergo Pontificem pariter, Regemq; uocemus,  
 Vt gerat officij nomen utrunq; sui.

I D E M,

Interprete Adamo Sibero.

**E**cce Patris, seruus meus, æthere missus ab alto  
 Deliciæ, condet regnata prioribus æuis  
 Secula non ulli, magnis procedere iussis  
 Mensibus, & iura imperio, quæ maxima tellus  
 Porrigitur, quæ cærulei fulgentibus apta  
 Cœli templa micant signis, extendet. at idem  
 Quàm ditione premet lata fortisq; potensq;  
 Cuncta, caput tam uile, infraq; putabitur omnes,  
 Munere qui terris nostro uitalibus auris  
 Vescuntur, formæ diuinum exutus honorem.  
 Nec tamen interea non, quos aurora remittit,  
 Vt rores spargunt herbas & gramina, uerbis,  
 Diuina promens quæ fundet uoce, rigabit  
 Oceanus gentes quas ponto continet: ora

A 3

Purpu-

Purpurei obuertent illius ob ora tyranni,  
 Indictisq; prius de rebus, uenit ad aures  
 Et quæ nullius fando, clarissima totum,  
 Quæ patet, immensum didetur fama per orbem.

Sic fatur, cælum & terras qui numine torquet  
 Ipse Deus, uult hæc alijs & mira referri,  
 Mira quidem, sed uera: canentem uera quis audit,  
 Aut rerum Domini sit quanta potentia credit?

Ergo: animi tamen o faciles aduertite mentem  
 Cura quibus, nec meta cui, nec terminus æui:  
 Ergo instaurator uitæ sese abdicat ipse  
 Maiestate sua, & coram patre pullulat usto  
 Incultoq; solo, telluris se cute rupta  
 Radice à tenera ceu uirgula subijcit, ingens  
 Exit & ad cælum ramis felicibus arbor.

Iamq; polo ueniens medius nos inter oberrat  
 Dum terris, grato quàm non decus enitet ore,  
 Corpore q̄ nihil est capiat quod lumina nostra  
 Illuue fœdo? non illi protulit ætas  
 Vlla prior similem, non postera proferet, in quo  
 Humana tam sit nil instar stirpe creati:  
 Vta illi ærumnis & plena laboribus, ardet  
 Membris & duris dolor ossibus, æstuat intus  
 Ingeminans animo quæ non dat cura quietem.  
 Hinc mens leua malis, oculosq; aue: timus, & quis  
 Sit, nemo querit nostrum, nec scire aborat.

Acger at ille meo uerè est languore, tuoq;

Conse-

Confectusq; hominum queriturq; doletq; dolore.  
 Non patitur propter, stulta quod mente putamus,  
 Cœlitus oppressus, fraudem ullam numinis iras.  
 Non illum proprii sceleris commissa fatigant:  
 Sed nostra immani mactatum uulnere, nostra  
 Immolat, atq; mori non fontem deniq; cogit  
 Culpa: luit pœnas, nobis immunibus esse  
 Supplicij datur: illius languore ualemus,  
 Et pacem & uitam munus morientis habemus.

Ut qui grex ouium passim dispersus in aruis  
 Saxa per & dumos nullo custode uagatur,  
 Ignota quò quenq; tulit regione libido  
 Humano creti decerrant semine: molle  
 Et iam mandebat pecus & fera multa trahebat,  
 Nec libertatis, nec erat spes ulla salutis.

Non tulit hoc animo rerum patiente Creator,  
 Cogere ouesq; uagas mandat, numerumq; referre  
 Pastorem stabulis, ouiumq; cruore mederi  
 Vulneribus proprio: mora nec, facilisq; uolensq;  
 Ille patris iussis paret, humerisq; subire  
 Dum gaudet noxas, & tristia crimina gentis.  
 Tantus amor nostræ: ueluti placidissimus agnus  
 Accipit aut iugulo qui ferrum, uellera præbet  
 Aut tondenda, crucis sacrata operatus in ara,  
 Sub nostrorum animam scelerū dat fasce nec hostē  
 In sæuum inuectus uel linguam ad iurgia soluit,  
 Vel uoces edens ullas crudele minatur.

Iamq; caput letho ponentem uita reliquit,  
 Mugit humus, cautesq; mouët, montesq; tremiscunt,  
 Amisso torpent cœli aurea signa magistro,  
 Ipse nigra frontem tingit ferrugine luce  
 Sol media, æternamq; timent secla impia noctem,  
 Conduntur saxo frigentia membra: sepultum  
 Flere iuuat. Sed quis nam me rapit? unde repente  
 Tempestas hæc clara? Deus Deus ecce refringit  
 Claustra domus cæcæ, atq; suo numine torquens  
 Lethumq; & scelerum facies immania mille  
 Monstra, haurit uitæ rursus spirabile lumen,  
 Panduntur cœli portæ, patriæ hoste subactō  
 Felices uictor dulcesq; reuisit ad oras.

Occurrit genitor, dans & quæ tempora uitæ  
 Non quisquam dictis æquarit, talibus infit:

Perpetuo mihi iūgit amor quem fœdere, terris  
 Excussus propter crimenq; scelusq; meorum,  
 Lethiferum immiti traiectus pectora ferro  
 Accepit uulnus, secum tumultoq; nocentum  
 Intulit admissa, & dites in funera merfit:  
 Funera, quæ sceleris purus, atq; omnibus expers  
 Est passus uitij, tantum quod uoluere casus  
 Humanos illum, duros & adire labores  
 Firma animi fuerat mihi mens, & certa uoluntas.

At nece iam postquam placauit numinis iras,  
 Affixusq; trabi uitæq; animaq; litauit:  
 Quæ nam, quæ tali reddam pro munere nato

Donâ

Dona meo? sobolis ductam longo ordine turbam  
 Semine ab æthereo cernet, dominabitur ævis  
 Omnibus, & fausta magni decreta parentis  
 Proferet & defendet dextra, mille labores  
 Quodq; tulit, uitam pro libertate suorum  
 Profundens, decus omne suis, feret ampla laborum  
 Præmia, iusticia nec ei certauerit alter:  
 Iusticia, reddet multos, ratione remota  
 Qua iustos operum, fiducia certa leuatos,  
 Noticia illius cœli quos miscet alumnijs.

Sic placitum: instar ei populus cōcrescet arena,  
 Et præda clarus, spolijs & onustus opimis (men-  
 Quod gerit, usq; feret magnum et memorabile no-  
 Proiecta sese quod uita, est passus haberi  
 Latrones inter, tollens delicta nocentum,  
 Hostibus & ueniam cæcis pacemq; rogauit.

I D E M,

Francisco Herstetensi interprete.

**E** Cquis crit, nostris certam sermonibus unquã  
 Qui putet esse fidem? cuius nam conscia tãget  
 Pectora, diuinæ miranda potentia dextræ?  
 Surget ut arenti turgescens uirgula campo,  
 Et ueluti radix sitientibus incipit agris  
 E' rimis terræ pulchrum diffundere florem,  
 Quæ latices haustura, diu stetit arida, gratos.  
 Non illi species, uenerandaq; gratia formæ  
 Corpore nil toto, postquam conspeximus illum

A s Quod

Quod placuisset, erat: Facies tristissima, nulli  
 Vnquam uisa uiro, nulli tam corporis atra  
 Illuies: Quoties pallentia sustulit ora  
 Vilis habebatur, populoq; abiectior omni.  
 Vsq; adeò noua forma uiri deterruit omnes,  
 Vt neq; tam fœdum nostri sufferre ualerent  
 Aspectum uultus, seseq; auertere mallent,  
 Quàm deformatam spretamq; uidere figuram.  
 Hinc est, cur illum libuit contemnere nobis.  
 Sustulit hei nostros languores, quæq; manebant  
 Vulnera pro nostris delictis, pertulit ultrò.  
 At nos ceu proprio pro crimine dira ferentem,  
 Atq; Deo abiectum cæci contempsimus ipsum.

Sed quod nos facimus, quod nos offēdimus, ipse  
 Soluit: Et hæc illi pepererunt uulnera mortem;  
 Ille subit pœnas, ut læta pace fruamur,  
 Nostraq; uulneribus sanentur uulnera fœdis.

Non aliter, quàm si pastorem totus aberrans  
 Grex quærat, per aquas perq; antra sonantia syluis,  
 Nec tamen inueniat quem uult: errauimus omnes,  
 Quisq; secutus iter, quod credulus ipse probabat:  
 Sed Deus hunc nostri suppressit pondere morbi,  
 Pondere quod fuerat nequaquam uiribus aptum  
 Humanis. Deus huc totam concurrere molem  
 Peccati fecit, quæ ingentia pectora pressit.

Non tamen in tanto discrimine, reddidit ullos  
 Anxius ore sonos, mactandus qualiter agnus

Obmu-



Obmutescit, & irarum nil concipit intra  
 Pectora : sed tacito retinet spem corde, metumq;  
 Atq; ut nullius dat conscia signa doloris  
 Vellere diues ouis, quam priuant munere lanæ.

Nunc trucidis ereptus tandem de faucibus Orci,  
 Redditus atq; patri, pœnas euasit, & omnes  
 Quas tulit ærumnas iam uictor despicit, Ecquis  
 Infinita noui narrabit secula regni?  
 Quãdoquidẽ abscissus terra, Deus imperat astris,  
 Et uidet inferior quo motu machina fertur.

Propter iniqua meæ percussus crimina gentis,  
 Hoc tantam perferre mali sum passus, ut ipse  
 Sub terra iacet uelut impia turba sepultus,  
 Vtq; solent Tragica subuerti morte Tyranni.

Nil equidem fecit quod dignum morte putetur,  
 Nullus in ore dolus : sed mens ut conscia recti,  
 Sic sine labe fuit, nulloq; infecta ueneno  
 Corpora, perpetuam gessit sine crimine uitam.  
 Paruit at Patri, statuit diuina uoluntas  
 In miserum totas irarum effundere habenas.

Qui quia sponte sua, caput obiectare periculis  
 Non dubitauit, & irarum se fluctibus offert,  
 Ut pro peccato sit uictima grata: uidebit  
 Posteritate domum longa florere, per illum  
 Perficiet Dominus feliciter omnia: Quicquid  
 Promisit, manibus tribuet Pater omnia largis.

Ecce meus multos, qui uero pectore credent,  
 Efficiet

Efficiet iustos seruus, quia iustus & ipse est,  
 Ergo participem regni super astra locabo,  
 Et faciam referat prædæ de fortibus amplam.  
 Quandoquidem sese mactandum præbuit ultro,  
 Inter & iniustos insonsq; uolensq; relatus,  
 Peccati molem, quam nemo ferre ualebat,  
 Sustulit, ac moriens pro transgressore rogauit.

## HISTORIA MORTIS IESV CHRISTI.

Hora matutina.

HERMANNVS NOVA

Aquila.

**T**Empore quo croceos mundo Tithonia uultus  
 Exhibet, heu, diris submisit colla catenis,  
 Aeterni mens alma patris, sapientia, uirtus,  
 Christus homo, puræ genitus de sanguine matris.  
 Illico discipuli capto fugere magistro,  
 Vendidit exili precio quem fœdus Apella,  
 Et uarijs malè muultauit gens perfida pœnis.

NICOLAUS BORBONIVS.

Aurora roseis pulchra exoriente quadrigis,  
 Se Christus ultro præbuit.

Ille (inquam) Christus, sapientia, sermo, uoluntas,  
 Et præpotentis mens patris,  
 Sponte dedit sese uiolentis obuius armis,  
 Satellitumq; uinculis.

Cuius

Cuius discipuli, ut duce capto, exercitus olim,  
 Pauentia terga dant fugæ.

Proditor interea laqueo se strangulat ipsum,  
 Et pendet, & medius crepat.

Hora diei prima.

HERMANNVS NOVA

Aquila.

Cum sol exoriens rutilum iubar inuehit orbi,  
 Præsidis infandum producit ante tribunal.  
 Hic testes coram statuunt, qui crimina fingant  
 In Christi caput infontis: tunc fune reuinctum  
 Concutiunt colaphis, ac sputo tempora fœdant.  
 Despicit Herodes uenientem, moxq; remittit  
 Vestibus indutum niueis, ad tecta Pilati.  
 Ille sacrum flagris, ac multo uerbere corpus  
 Dilacerans producit: & En homo, respice, dixit.

NICOLAUS BORBONIVS.

Sol oritur factus, cum Sol non factus ad Annæ

CHRISTVS tribunal sistitur.

Hic falsa infonti obiecerunt crimina testes,

Megera quos furiauerat.

Pulsatur colaphis, spuiturq; & mitior agno,

Illuditur uarijs modis.

Ductus ad Herodem fit fabula, moxq; flagellis

A Pontio discinditur.

Corpore producit lacerum crudeliter omni

Pilatus, Ecce homo, inquiens.

Hora

## Hora tertia.

HERMANNVS NOVA

Aquila.

Lucis ab exortu dum tertia ducitur hora,  
Vndiq; conclamat sceleratæ concio plebis:  
Tolle uirum, & confige cruci, cui nomen Iesus.  
Coccinea mox ueste nitens ludibria perfert,  
Et sacer illius pulsatur arundine uertex.  
Baiulat inde humeris uenerandi pondera ligni,  
Ad loca supplicijs quondam assignata reorum.

NICOLAVS BORBONIVS.

Tertia lucis erat, populus cum sæuijt, hora,  
Populus furore percitus.

Conclamant Iudæi omnes, iuuenesq; senesq;:

Tolle in crucem, Tolle in crucem.

Hic multo uertex sacer, à nebulonibus illis

Pulsatus est arundine,

Rexq; salutatus: quis digne expresserit unquam,

Ludibria illic quæ tulit?

Inde crucem portans humeris, & pulsus ab urbe,

Ad supplicij uenit locum.

## Hora sexta.

HERMANNVS NOVA

Aquila.

Sed cum sexta diem Phœbi surgentis ab ortu  
Signaret, celeri decurrens hora uolatu,  
Confixus clauis, ligni pendebat ab arce.

Cir

*Circum hinc inde latro medijs latus urget utrunq;*

*Posthæc discipulo matrem commendat, eiq;*

*Discipulum uice conuersa : tum deniq; clamans,*

*Heli lamazabachthani uoce insonat alta.*

*Mox sitiens, fel, & myrrhatum gustat acetum,*

*Omnia testatus iam consummata decenter.*

NICOLAUS BORBONIVS.

*Sexta hora, ex ligno clauis transfixus acutis,*

*Pependit, cum latronibus:*

*Quorū alter Christum agnouit, regemq; uocauit :*

*Alter malus perijt malè.*

*Discipulum matri, matrem commendat eidem,*

*Suorum neutiquam immemor.*

*Hinc uoce inclamans alta: Men' deseris ( inquit )*

*Deus meus, Deus meus?*

*Impia gens olli, sitiēti commoda nostra,*

*Acetum felle miscuit.*

**Hora nona.**

HERMANNVS NOVA

**Aquila.**

*Verum ubi postremo finem impositura labori*

*Hora superuenit, quæ creditur ordine nona :*

*Mox caput inclinans, extrema uoce parenti*

*Commendat redditq; animam : tremit illico tellus,*

*Et tenebris obducta repentè inuoluitur atris.*

*Finditur & templi quondam memorabile uelum,*

*Multorumq; suis standunt rediuiua sepulchris*

*Corpora,*

Corpora, pòst Solymam discurrere uisa per urbē.

NICOLAVS. BORBONIVS.

Nona aderat, tantis extrema laboribus, hora,

Cùm uerba dixit talia:

Perfeci tua iussa Pater: nunc accipe tandem

Quem reddo Spiritum tibi.

Expirat, caput inclinans: at sedibus imis

Emota tellus contremittit.

Sol mœret, subitoq; orbi nox incubat atra,

Velumq; templi finditur.

Plurima quinetiam è tumultis rediuiua fuerunt

Plerisq; uisa corpora.

Hora uespertina.

HERMANNVS NOVA

Aquila.

Sol ubi declinans inducit uespera terris,

Extinctum lugent superi, flet turba piorum.

Interea miles frigentia cuspide fodit

Pectora, quæ duplicem fundunt laxata liquorem.

Extinctumq; sacro tandem de stipite corpus

Tollitur: hoc dono acceptum rapit Arimathæus.

NICOLAVS BORBONIVS.

Vesper erat, labente die, cùm ferrea cuspis

Adhuc calens fregit latus:

Vnde liquor duplex promanat, sanguis & unda.

Flent femine stantes procul,

Flent (quid enim facerent aliud pia turba?) uidēdo

Coram

Coram Dominum infontem mori?  
 Nec sat adhuc arcana Dei mysteria norant :  
 Nouere pòst per Spiritum.  
 Centurio obstupuit: uæ, uæ, quid fecimus? inquit,  
 Hic filius Dei fuit.

### Hora nocturna.

HERMANNVS NOVA

### Aquila.

Sub noctem dum cuncta quietem animalia captât,  
 In tumulto positum gentis de more uetusto,  
 Ungitur, & uario conditur aromate corpus.  
 Tum Pharisea cohors rabie stimulata perenni,  
 Collocat excubias ad saxeâ tecta sepulchri,  
 Ne quis surripiat per noctem exangue cadauer.  
 Sic opus impleri fuerat, quæcunq; Prophetæ  
 Prædixêre olim, diuino numine pleni.

NICOLAUS BORBONIVS.

Tempus erat, quo se dant corpora fessa quieti,  
 Sacrum cadauer ungitur,  
 Excisoq; nouo, sub uiua rupe, sepulchro,  
 Vetusito more conditur.  
 Excubat ad saxum frustra, telisq; coruscat,  
 Armata militum manus.  
 Omnia sic fieri decuit: sic mystica uatum  
 Prædixerant oracula.  
 At Dominus propria uirtute, & patre uolente,  
 Die reuixit tertia.

B

CON-

## CONCLUSIO MEDITATIONIS.

*Qui legis hæc, dominũ Christum uoluisse memẽre  
Pro te pati, pro te mori.*

*Nos omnes, in nos Christi agnoscamus amorem,  
Eumq; amemus mutuõ.*

HISTORIA PASSIO-  
NIS IESV CHRISTI.

ARNOLDVS VESALIENSIS.

CHRISTVS egressus.

*Hortum egressus, habet comites, & tædia mortis,  
Orans procubuit, terra cruore madet.*

Captus.

*Oscula dat Iudas, miles ruit, arripit ensẽ  
Petrus, turba furit, fit fuga, palla manet.*

Ductus ad Annam.

*Petrus adit socium, Petrumq; ancilla moratur:  
Multa rogat præsul, percutit ora manus.*

Ductus ad Caipham.

*Deinde negat rursus, mendax stat testis, & ardet  
Præsul, turba spuit, concio blanda rogat.*

Ductus ad Pilatum.

*Pœnitet hĩc Iudas, rimatur crimina præses,  
Accusant Scribæ, friuolã causa datur.*

Ductus ad Herodem.

*Signa petit gaudens, ac multa interrogat heros,  
Illudit tacito, conciliatur amor.*

Redu-



### Reductus ad Pilatum.

Excusat præses, festi quoq; iura recludit:

Turba cruces iterat, uerbera dura crepant.

Murice uestitur, fertis, & arūdine CHRISTVS:

Ecce homo monstratur, clamat Apella cruces.

Clara Dei soboles prætorem terret, amorq;

Cæsaris, & pauidæ somnia dira nurus.

Expeditur nebulo, manibus dat Pontius undam,

Arbitrium uulgi CHRISTE benigne subis.

### Eductus ad Caluariam.

Crux humeris pendet, uetulus tenet, ciulat ordo

Femineus, diro pocula felle rubent.

### Suffixus in Gabalum.

Cingit latro pium, sublata inscribitur arbos,

Scinduntur uestes, Vah per inane sonat.

Improperat latro, latroni regna parantur,

Discipulus matrem suscipit inde suam.

Sol stupet, inclamans animam cōmendat IESVS,

Disiliunt rupes, & noua busta patent.

Pectora plebs tundit, mulierum prospicit ordo,

Centurio laudat, crura minuta rigent.

### Refixus depositusq;.

Impavidus stupidum prætorem accedit Ioseph,

Et mercata leui sindone membra tegit.

Centum adfert libras aloes Nicodemus amara,

Clauduntur tumulo pallida membra nouo.

B . . . DE

## D E M O R T E

C H R I S T I.

G E O R G I V S F A B R I C I V S.

**Q**ui solis excellit iubar,  
Et astra pulchritudine:

Deformis, horridus, lacer,  
Pendet necatus in cruce.

Qui dat creatis spiritum,  
Vitamq; donat mortuis,  
Extendit in ligno manus,  
Inter latrones mortuus.

Nostro ille laesus scilicet  
Et uulneratus uulnere,  
Peccata quæ non fecerat,  
Seruaret ut nos, pertulit.

Agnus leuatur stipite,  
Pro noxijs innoxius.  
Hæc sola grata pro reis  
Deo parenti uictima.

O' C H R I S T E noster, in crucis  
Oblatus ara, pontifex:  
Qui morte mortem permeans,  
Mortis tyrannum destruis :

Ad te perennis currimus  
Thronum paratum gratiæ,  
Patrata nobis crimina  
Obluione contere.

Per

*Per te queamus uincere*

*Hostem salutis dæmonem,*

*Et omne carnis lubricum,*

*Ac triste mundi gaudium.*

*Votis gementum porrige,*

*Distenta ligno brachia:*

*Preces & ad nostras caput,*

*Tabo reclina liuidum.*

*Tu uita, consolatio,*

*Robur, salus, redemptio,*

*Tibi, & parenti, & flamini*

*Sacro, canatur gloria.*

DE CHRISTI IN VI-  
tam reditu.

IDEM.

**V**ox Angelorum nuncia,  
Immensa perfert gaudia,

Peccata propter mortuum

CHRISTVM, Deo iam uiuere.

Euasit Heros: saxeo

Nil profuit uis Moisi,

Clastrum sepulchri peruium,

Furor repressus Tartari.

En uita, libertas, salus

Victore CHRISTO contigit:

Grates cui sint debite

Pro tam benigno munere.

B s

Tn

Tu CHRISTE pastor optime,  
 Agnos relictos congrega:  
 Duc ad superna gaudia,  
 Quæ liberauisti agmina.

Vt suscitatis à nece  
 Promissa dentur præmia:  
 Ornabis in pijs tua  
 Cum gloriosa munera.

Deo Patri cum Filio,  
 Cum Spiritu sanctissimo,  
 Canatur ut per secula  
 Triumphus & uictoria.

### CHRISTI FLAGELLATI

Ad hominem. *à d. d. d. p.*

**O** Miser, en uermis quæ gestē insignia cerne,  
 De spinis factum est en diadema meum.

Liber abit latro, cum me sententia damnat:

Pro multis unus uictima cædor ego.

Disce meo exemplo, luctus quoq; fortis acerbos  
 Ferre: mee carnis uulnera, culpa tua est.

### CHRISTI CRUCIFIXI SVA

in homines beneficia com-  
 memorantis.

### LACTANTIUS FIRMIANVS.

**Q**uisquis ades, medijsq; subis in limina templi,  
 Siste parū, in fontēq; tuo pro crimine passū.

Respice me, me conde animo, me in pectore serua:

ille

Ille ego, qui casus hominum miseratus acerbos,  
 Huc ueni, pacis promissæ interpret. & ampla  
 Communis culpæ uenia: hîc clarissima ab alto  
 Reddita lux terris, hîc alma salutis imago,  
 Hîc tibi sum requies, uia recta: redemptio uera,  
 Vexillumq; Dei, signum & memorabile fati.  
 Te propter, uitamq; tuam, sum uirginis aluum  
 Ingressus, sum factus homo, atq; horrentia passus  
 Funera, nec requiem terrarum in finibus usquam  
 Inueni, sed ubiq; minas, & ubiq; labores.  
 Horrida prima mihi in terris magalia Iudæ  
 Hospitia in partu, sociæq; fuerunt parenti:  
 Hîc mihi fusa dedit bruta inter inertia primum  
 Arida in angustis præsepibus herba cubile.  
 In Pharijs primos uixi regionibus annos,  
 Herodis regno profugus, reliquosq; reuersus  
 Iudæa: semper ieiunia, semper & ipsam  
 Pauperiem extremam, & rerum inferiora secutus:  
 Semper agens monitis humana salubribus, almæ  
 Ingenia ad studium probitatis: aperta salubri  
 Plurima doctrinæ iungens miracula: quare  
 Impia Hierusalem rabidis exercita curis  
 Inuidiæ, sæuisq; odijs, & cæca furore  
 Infonti est pœnis lethalibus ausa, cruentam  
 In cruce terribili mortem mihi quærere: quæ si  
 Latius ipse uelis distinguere, sicq; per omnes  
 Ire iuuat gemitus, mecum & sentire dolores,

Collige consilia, insidiasq; mei; nefandum  
 Sanguinis innocui precium, & simulata clientis  
 Oscula, & insultus, & saeva iurgia turbæ.  
 Verbera præterea, & præptas ad crimina linguas,  
 Finge animo & testes, & cæci infanda Pilati,  
 Iudicia, ingentemq; humeros, & fessa prementem  
 Terga crucē, atq; graues horrēda ad funera gress⁹.  
 Nunc me, nunc uerò desertum, extrema secutum  
 Supplicia, & dulci procul à genetrice leuatum,  
 Vertice ad usq; pedes me lustra : en aspice crimes  
 Sanguine concretos, & sanguinolenta sub ipsis  
 Colla comis, spinisq; caput crudelibus haustum,  
 Vndiq; diua pluens uiuum super ora cruorem.  
 Compressos speculari oculos, & luce carentes  
 Afflictasq; genas, arentem suspice linguam,  
 Felle uenenatam, & pallentes funere uultus.  
 Cerne manus clauis fixas, tractosq; lacertos,  
 Atq; ingens lateris uulnus, cerne inde fluorem  
 Sanguineum, fossesq; pedes, artusq; cruentos.  
 Flecte genu, innocuo terramq; cruore madentem  
 Ore petens humili, lachrymis perfunde subortis,  
 Et me nonnunquam deuoto in corde, meosq;  
 Fer monitus, sectare meæ uestigia uitæ:  
 Ipsaq; supplicia inspiciens, mortemq; seueram,  
 Corporis innumeros memorans animiq; dolores,  
 Disce aduersa pati, & propriæ inuigilare saluti.  
 Hæc monumenta tibi, si quando in mente iuuabit  
 Volucre,

*Voluere, si qua fides animo tibi ferre meorum  
 Debita, si pietas, & gratia digna laborum,  
 Surget, erunt ueræ stimuli uirtutis, eruntq;  
 Hostis in insidias clypei, quibus acer in omni  
 Tutus eris, uictorq; feres certamine palmam.  
 Hæc monumenta tuos si laberis orbis amicos  
 Auertent sensus, fugiente decoris ab umbra  
 Mundani efficient, ne spe captatus inani  
 Mobilis occiduis fortunæ fidere rebus  
 Auseris, aut uitæ sperare fugacibus annis.  
 Sed te nimirum sic ista caduca uidentem  
 Secula, & exutum patriæ melioris amore,  
 Orbis opes, rerumq; usus, & uota piorum  
 Moribus extollens sacris, uitæq; beatæ  
 Spe, duras inter pœnas, te rore fouebunt  
 Cœlesti, pactiq; boni dulcedine pascunt:  
 Purpuream donec, post ultima fata relicto  
 Corpore, sublimes animam reuocabit ad auras.  
 Gratia magna tibi nunc omnem exuta laborem,  
 Angelicos tunc læta choros, aciesq; beatas  
 Sanctorum inspiciens, æternæ pacis amœna,  
 Perpetuò felix tecum regnabit in aula.*

CHRISTI DOMINI AD MOR-  
tales Lamentatio.

ACTIVS SINCERVS.

**S**i quando magnum mirati surgere solem  
 Oceano, & toto flammam diffundere cœlo,

B 5

Certa-

Certatimq; suo terras ambire meatu,  
 Noctiuagam Phœben, præinctâ cornibus aureis,  
 Aeternosq; astrorum ignes, cœliq; micantes  
 Scintillare oculos, aliquem dare iura putastis,  
 Atq; polo regnare, hominum rerumq; potentem,  
 Cui mare, cui tellus, cui pareat arduus æther,  
 Cuncta supercilio qui temperet: hunc simul ægri  
 Mortales, si uestra dolor præcordia tangit,  
 Aspicite, immiti traiectum pectora ferro,  
 Pectora, sœdatisq; manus, perfusaq; tabo  
 Ora, cruentatumq; caput, crinesq; reuulsos.  
 Aspicite, & plenos lachrymarum fundite riuos.  
 Heu scelus, heu crudele nefas, iacet altus Olympi  
 Rector, & amisso torpent elementa magistro.  
 Quinetiam uacuum assueto sine pondere cœlum  
 Nutat, & ipsa suum quærunt solia aurea regem,  
 Quem diuersa procul sæuo cum crimine tellus,  
 Ignotum populis caput, & miserabile corpus  
 Sustinet, exanguesq; situ complectitur artus,  
 Et tremefacta graues testatur murmure questus.  
 Testatur sol ipse suum sub nube dolorem,  
 Iam latitans, atraq; notans ferrugine frontem.  
 Tu quoq; deformesq; genas, pallentiaq; ora  
 Contegis, inferiasq; tuo das luna Tonanti,  
 Auratum flauo tondens de uertice crinem,  
 Et lachrymas uda fundens in nocte tepentes.  
 Nec minus abruptis fama est exisse sepulchris,

Perq;



Perq; uias errasse nouis simulacra figuris,  
 Excitasq; umbras, medias ululasse per urbes  
 Sub noctem, & notos questu impleuisse penates.  
 Quid? non & pelagi rabies attollere fluctus  
 Immanes uisa est? montesq; euoluere aquarum,  
 Deiectura urbes, terrasq; haustura profundo?  
 Cum simul, & caput undisonis emersus ab antris  
 Ceruleus Triton rauco super æquora cornu  
 Constreperet, nautasq; horrenda uoce moneret,  
 Naturæ cecidisse patrem, regemq; Deumq;.  
 Hæ ne manus uasti iunxerunt fœdera mundi?  
 Harū opus est quodcūq; iacet, quodcūq; mouetur?  
 Quicquid ubi parens rerum natura gubernat,  
 Frugiferens tellus, foetumq; animantibus æquor,  
 Vitalisq; aër, atq; ignibus æthra coruscis?  
 Et nunc (prò facinus, quantum potuere nocentum  
 Flagitia?) immisissis dant peruia uulnera clauis,  
 Liuentesq; atro fœdant squalore lacertos.  
 Heu caput indignum spinis, uenerandaq; cœlo,  
 Et toties clara stellarumq; implexa corona  
 Cæsaries: heu pectus hians, conuulsaq; dira  
 Barba manu, tunisq; artus, & frigida membra.  
 Vos ne pedes cœlū premere, & uaga sidera sucti,  
 Fulgentesq; domos, superū sublimia tecta,  
 Tam se uæ immanes perpepsi cuspiâs ictus,  
 Et terram, & duras sparsistis sanguine cautes?  
 Nec trepidat mens cæca hominū? quæ tanta tenaci  
 Durities

Duricies in corde riget? num nigra uidetis  
 Tartara, tot claris hominum uiduata trophæis,  
 Desertasq; in nocte domos, & tristia regna?  
 Felicesq; animas lætum pæana canentes  
 Ponè sequi regem, & cœlo insedisse serenos?  
 Quid si non tantos subiisset sponte labores,  
 Humanamq; sua pensasset morte salutem,  
 Ille sator rex, & summi mens certa parentis,  
 Qui nutu ingentes mundi moderatur habenas:  
 Vt tandem intactos picea Phlegetontis ab unda,  
 Post obitum æternæ donaret munere lucis,  
 In partemq; suorum operum regniq; uocaret.  
 Tantus amor generis, seruandi & gloria nostri.  
 Quare agite ex animis mortales pellite uestris,  
 Si quid adhuc manet antiqua de sorde relictum,  
 Mendacesq; deos, & detestanda priorum  
 Sacra, prophanatis tandem detrudite ab aris,  
 Imbuat effuso terram nec sanguine taurus;  
 Nec miser ille suæ diuulsus ab ubere matris,  
 Ignotos agnus balet super hostia cultros.  
 Viuat ouis, uiuat quicquid sub sole creatum est,  
 Mentē animumq; Deo, non thura, uel exta parate,  
 Has illi pecudum fibras, hæc reddite dona.  
 Cernitis ut prouum flectat caput, ut pia pandat  
 Brachia, & ingratas uocet ad sua munera gentes?  
 Oblitasq; uiæ moneat meminisse relictæ,  
 Scilicet amplexus non reiecturus amicos.

At

At uos obtusas ignari auertitis aures  
 Infelix genus, & sæuæ ludibria mortis,  
 Nec quanta à tergo iam insistent tormenta uidetis.  
 Tempus erit, cum uestra illum commissa notātem,  
 Mulctantemq; reos, altaq; in nube sedentem  
 Adspicietis, & horrentes tremor opprimet artus.  
 Nec iam ferre oculos, flammarū ardore coruscōs,  
 Aut timidos acie uultus contendere contra  
 Audebit quisquam sibi conscius: ibit in ignes  
 Turba nocens, fontesq; exoluet corpore poenas,  
 Pallentesq; æternū amnes, uastasq; lacunas  
 Cocyti colet, & furias horrescet hiantes,  
 Atq; animum monitis non intendisse pigebit.  
 Tunc uos exactæ capient mala tædia uitæ,  
 Expertes cœli atq; auræ, sub nocte profunda,  
 Inq; caput trifidos nequicquam optabitis ignes,  
 Et frustra erectas tolletis ad æthera palmas.  
 Quos superum coetus, & fortunata piorum  
 Agmina, uix lachrymis poterunt spectare retentis,  
 Inuidiæ stimulis dirisq; ultricibus actos.  
 Ergo uitales miseri dum carpitis auras,  
 Dum compos mens ipsa sui est, dum certa facultas,  
 Dum ratio tempusq; sinunt, simul ite frequentes  
 Ite pij, ueniam factis exposcite uestris:  
 Ite, animos purgate, orciq; inhibete rapinas,  
 Et tandem patrio mentem conuertite cœlo.  
 Sic rex ille hominum, uacui spoliator Auerni,  
 Obliv-

Oblitus scelerum, cognatæ stirpis amore,  
 Promissiꝑ; memor, mentes intrabit amicas,  
 Vestræꝑ; posthabitis recolet præcordia templis,  
 Postꝑ; tot exhaustos uitæꝑ; obitusꝑ; labores,  
 Illo quo pluuias, quo pellit nubila uultu,  
 Ablutõs labe excipiet, lætusꝑ; reponet,  
 Sidereos inter procures, sanctumꝑ; senatum,  
 Sub pedibusꝑ; dabit stellantia cernere claustra.

GEORGIVS SABINVS.

Anni tempus adest, quo factus uictima Christus  
 Sanguine deleuit crimina nostra suo:  
 Fractaꝑ; Tartarei sunt limina carceris, in quo  
 Posteritas primi capta parentis erat.  
 Scilicet hisce decet nos commemorinisse diebus,  
 Nostra sit ut Christi morte redempta salus:  
 Et quàm non fuerit placabilis ira Tonantis,  
 Acternam nobis ira minata necem.  
 Nulla grauem poterant delere piacula culpam,  
 Quæ commissa fuit crimine fontis Adæ:  
 Vnica pro nobis nisi redderet hostia uitam,  
 Oppeteretꝑ; necem filius ipse Dei.  
 Heu quas sustinuit nostro pro crimine pœnas,  
 Quamꝑ; Dei nato non toleranda tulit.  
 Sanguinis emisit sudanti corpore guttas:  
 Vincula captiuas impediere manus:  
 Vulnificis plagas sub iniquo iudice uirgis,  
 Ac tulit implicitis spineaserta comis.

*Impia*

*Impia quid referam diræ conuicia linguae?*

*Inq; cruentatis liuida signa genis?*

*Cum trabe penderet palmas distentus in ambas,*

*Ferrea diuinum transijt hasta latus.*

*Hæc indigna uidens alto spectacula cœlo,*

*Sol stetit attonitis obstupescactus equis:*

*Indoluitq; diu mœstus, terrisq; negauit*

*Lumen, & in medio nox fuit orta die:*

*Motaq; contremuit uasto sub pondere tellus,*

*Saxaq; concussis dissiluere iugis.*

*Ista recordari solennibus acta diebus*

*Nos, & inoblito pectore ferre decet.*

*Indignum fuerit, solem, atq; carentia sensu*

*Saxa, Creatori condoluisse suo:*

*Nosq; dolere nihil, nec acerba morte moueri,*

*Reddita qua nobis uita salusq; fuit.*

NICOLAUS BORBONIVS.

*Huc me sidereo descendere fecit Olympo,*

*Hic me crudeli uulnere fixit amor.*

*Lagueo, nec nostro quisquã illachrimatur amor,*

*Quem nequeunt diræ frangere iura crucis.*

*Pungentem caput & cerebrum gestare coronam,*

*Cogit amor, cogit uulnera tanta pati.*

*Felle sitim nostram, & mixto satiauit aceto,*

*Mi pectus lata cuspide rupit amor.*

*De me solus amor, de regum rege triumphat:*

*Ille pedes clauis fixit, & ille manus.*

st

*Si cupis ergo animi mihi signa rependere grati,  
Dilige, præ cunctis sat mihi solus amor.*

VITVS ORTEL VINSHEMIVS.

*Hæc est peccatiq; tui, tristisq; ruina,  
Atq; eadem uitæ testis imago tuæ.*

*Verùm ego te propter sic sum laceratus, ut istò  
Vulnera uestra meo sana cruore forent.*

*Morte mea uiuis, sanatus sanguine nostro:*

*Heu mihi quàm paucos munera tanta mouent.*

AD CHRISTVM IN CRUCE PEN-  
dentem pro salute humana,

LAZARVS BONAMIGVS.

**P**endentem aspicio quoties te maxime regum,  
Mecum illa et tacitus uulnera mente agito :

*In fontes oculos cupio manare, nec inde  
Posse reor solui pro pietate tua.*

*Tu cœli terræq; sator, tu sidera nutu*

*Qui torques, quo stant omnia, quòue cadunt,  
(Tantus amor nostri) cœlo descendis, & ante,  
Virgine es enatus, secula qui fueras.*

*Nec minus es, quàm nos, passus frigusq; caloremq;  
Humano ut uitam morte dares generi.*

*Morte heu heu uidit quo nil crudelius unquam  
Sol, cinctum radijs occuluitq; caput.*

*Hanc ego contemplan, utinam rex maxime regū,  
Totus inardescam raptus amore tui.*

*Et mihi sis quicquid uideoq; optoq; animoq;*

Conci-

Concipio, & sine te sit mihi dulce nihil.  
 Sit mihi dulce, tua aspicio cū uulnera, flere:  
 Viuere sit tecum, sit mihi dulce mori.  
 Omnia cum Domino cœliq; herēbiq; potente,  
 Sint mea, & in Domino spes mihi sola meo.  
 Cetera sint (ut sunt) umbrarum somnia nobis,  
 Ad te olim ut uitæ per mare tutus eam.

NICOLAUS BORBONIVS.

In cruce te quoties nudum contemplor, IESV,  
 Perfossū palmas, & latus, atq; pedes,  
 Despero miser, & clamo me fulmine dignum,  
 Dignum Tartareos mille subire rogos.  
 Nam tibi sum tanti pie causa doloris IESV,  
 Plenus flagitijs, impietate grauis.  
 Displiceo breuiter totus mihi, uiuere tædet.  
 Sed tua uox animum recreat illa meum:  
 Huc omnes ad me, uos qui peccastis, adeste,  
 Vulneribus curo uulnera uestra meis.  
 Quis tam ferreus est, quem uox non molliat ista:  
 Quis præ lætitia temperet à lachrymis?  
 Inuitas ex æquo omnes, nullosq; repellis,  
 Promittisq; patris regna beata tui.  
 Maxima promittis, sed quæ præstabis abunde,  
 Nec quenquam fallēs: omnia nanq; potes.  
 O nos felices per te seruator IESV,  
 Nam tua mors nobis uita salusq; fuit.

## IOANNES PONTANVS.

**T**e fors dura hominum generis, te cura laborum  
 Immitem subigit mortis obire necem.  
**D**um trunco affixus, cunco & traiectus aheno,  
 Sensisti geminum uulnus utraq; manu.  
**S**ensisti fixas ferrato stipite plantas,  
 Horruit & capiti spina cruenta tuo.  
**E**t caua mortiferum senserunt ilia ferrum,  
 Vulnere manauit lympha merumq; tuo.  
**C**umq; sitim cuperes nostra sedare salute,  
 Torpuit arenti fellis in ore sapor.  
**A**tq; inter geminos crudeli sorte latrones,  
 Iudææ pateris iurgia sæuitiæ.  
**D**onec defesso decedens spiritus ore,  
 Clamauit: Quid me deseris alme Pater?  
**H**inc manes stygiosq; lacus, loca tetra silentum,  
 Inferniq; subis limina dura fori:  
**I**nde pias animas, & cælo digna secutas  
 Eximis, & superum munera ad alta uocas.  
**T**ertia lux aderat, roseo cum letus Eoo  
 Surgis, mox uictor sidera clara petis:  
**C**onsortemq; capis patrio cum numine curam,  
 Dextra tenens, dextro conspicuusq; loco.  
**T**e precibusq; pijs miseri, studioq; fidei  
 Oramus, nostro da ueniam sceleri.  
**D**a pacem, mala cuncta procul, morbosq; famemq;  
 Pelle, atq; hostiles da superare manus.

IACO-



## IACOBVS VIMPHBLINGVS.

CHRISTE Dei uerbum, uerax sapientia Patris,  
 Perpetua genitus qui deitate cluis,  
 Humanum misere ne prorsus plasma periret,  
 Neq; moriens stygias ingrederetur aquas,  
 Das ægris placidam mira uirtute salutem,  
 Atq; subis diræ tristia multa crucis.  
 An ne mea labi poterunt hi mente dolores:  
 Lancea, crux, clauis, sputa, flagella, uepres?  
 Absit ut ingratus tanto bone CHRISTE labori,  
 Non uidear lachrymas fundere sæpe graues.  
 Nunc ego peccator uitiorum pondere pressus,  
 Accelerans, placidam (te rogo) confer opem.  
 Da ueniam misero, cor dilue, crimina tolle:  
 Aspergar CHRISTI sanguine, mundus ero.

## VITVS THEODORVS.

Sum tuus in uita, tua sunt mea funera Christe,  
 Da precor imperij sceptrum uidere tui.  
 Cur etenim moriens tot uulnera sæua tulisti,  
 Si non sum regni portio parua tui?  
 Cur rigido latuit tua uita inclusa sepulchro,  
 Si non est mea mors morte fugata tua?  
 Ergo mihi certam præstes ô CHRISTE salutem;  
 Ergo tuo lotum sanguine Christe iuues.

DE MEDITATIONE VI-  
TAE AC MORTIS CHRISTI,  
Ad hominem peccatorem:

ABNEAS SILVIVS.

**Q**uid tibi tandem scelerate quæris? .  
Quid petis fallax homo, quid requiris,  
Immemor quate pietate quærat  
CHRISTVS, ametq; ē

Venit in mundum soboles Tonantis,  
Et licet cœlum regeret supernum,  
Ex Deo seruus uoluit uideri,  
Carnis in umbra.

Tu cinis putris, fugienda pestis,  
Alta deposcis miserande uermis,  
Vt parem credas habuisse nullum,  
Terra tumescis.

Ille carnalem pius in parentem,  
Tu patris iussus fugis: ille semper  
Sabbathum seruat, uiolas profanis  
Tu sacra factis.

Ille ieiunans domuit superbum  
Spiritus carnis: Veneri parentans  
Tu mades uino, saturoq; uentri  
Viuis amicus.

Ille sermones habuit modestos,  
Edocens sedes iter ad beatas:

*Fabulas*

*Fabulas crebrò referens inanes*

*Turpia narras.*

*Ille nullius bona concupiuit,*

*Et manus odit nimium cruentas :*

*Pauperem duxit, coluitq; uitam*

*Pacis amator.*

*Tu rapis quicquid potes & cruorem*

*Appetis: nullum scelus atq; crimen*

*Diues ut fias, reputas, nociua*

*Prælia mîsces.*

*Disce te quanti miserande fecit,*

*Ille qui uinclis uoluit teneri,*

*Vt tibi summam pareret quietem,*

*Ductus ad Annam.*

*Cæsus est insons alapis magister,*

*Iudici Caiphæ datus audiendus,*

*Tractus est gentilis & ad Tribunal*

*Inde Pilati.*

*Hinc ad Herodem rapitur uidendus,*

*Purpura sumpta redit ad Pilatum:*

*Qui licet nullum uideat reatum,*

*Iudicium infert.*

*Mox canes agnum lacerant: coronam*

*Spineam nectunt, uicibusq; pulsant*

*Corpus, & uultum feriunt, honesta*

*Lumina fœdant.*

*Ductus ad plebem lacer & cruentus,*

*C 3 Clamitant*

Clamitant cuncti, Cruce dignus iste:  
 Solue latronem, crucifige CHRISTUM  
 Caesaris hostem.

Tunc crucem gestans trahitur necandus,  
 Ad locum poenæ uenit: atq; nudus,  
 Heu duos inter positus latrones,

Fertur in altum,

Hinc datur sæuum sitienti acetum  
 Felle commixtum: latus est apertum,  
 Manat & de corpore uulnerato,

Sanguis & unda,

Probra quid dicam, referamq; multa?  
 Se Dei fecit genitum, frequenter  
 Clamitant: plures alios beavit,

Se modo saluet.

O' IESU quantum genus hoc amasti  
 Perfidum, quod ne moreretur, ipse  
 Pergis ad mortem: moriendo, mortis

Vincla leuasti?

Sic homo pro te patitur redemptor,  
 Tu quasi surdus, penitusq; cæcus  
 Gratiam pendis nihil esse talem,

Crimine plenus.

Tu tuum præbe Deus ô fauorem.

Labitur quisquis sine te beari

Queritat: tu me tibi, tu probatis

Adijce seruis.

Da mihi fontem lachrymis ut udis,  
 Hunc mei plorem sceleris reatum:  
 Quamq; latroni ueniam dedisti,

Sedulus oro.

CHRISTE te grato rogitemus ore,  
 Qui neci nostram es datus ob salutem,  
 Semper expectes reditum tuorum,

Vt ueniam des.

Voce iam clamas, Celeres uenite,  
 Se reum nemo magis esse credat:

CHRISTVS admissum leuat omne, cœlo

Missus ab alto.

IOANNES FLAMINIUS.

Heu quàm desflendum, quàm lamentabile corpus,  
 Quo latuit summi gloria uera Dei.

Da mihi nunc lachrymas, gemitus, suspiria, fletus,  
 Vt ualeam mortem plangere CHRISTE tuâ.

Heu modò quàm sæuis liuent tua corpora plagis,  
 • Et sacrum horrendo uulnere pectus hiat?

Sentibus heu diris caput est cum fronte serena  
 Perfossum, & facies heu malè cæsa tumet.

Omnia membra dolent, roscō perfusa cruore:

Pars nulla in toto corpore sana manet.

Quis mihi det lachrymas, gemitus, suspiria, fletus?

O' dolor, ô pietas, sanguine cuncta madent.

Heu quàm triste nimis, quàm lamentabile funus,  
 Quod desflere satis nulla Camœna potest.

C 4

Quo

Quæ te summe Deus uicit clementia tanta,  
In cruce pro culpis ut morerere meis?

Hic lachrymas effunde miser peccator amaras,  
Saxea clementi pectora tunde manu.

Hic gemitus offer supplex pietatis ad aram,  
In qua uulneribus est medicina tuis.

Dicito uoce pia : Rex clementissime CHRISTE,  
Da ueniam errori, criminibusq; meis.

Fac mea deplorem lachrymis peccamina ueris,  
Meq; tuam semper fac rogo ferre crucem.

BASILIVS ZANCHIVS.

Tange, precor, mihi care pater præcordia IESV,  
Corq; meum sacris affice uulneribus.

Ipsa meas feriant contorta sonoribus aures  
Verbera, & immiti tristia flagra manu.

Occurrat quocunq; ferar tua dulcis imago,  
Molliaq; impressis tempora secta rubis.

Non unquam fellisq; liquor, clauiq; trabales,  
Lanceaq; immemori defluat ex animo.

Te semper roseo conspersum sanguine cernam,  
Inq; meis semper uulnera sint oculis :

Vulnera, queis mortemq; necas, & lumina uitæ  
Reddis, & est homini uera recepta salus.

Te uideam sancto lustrantem cuncta cruore,

Quæ coelum ac terræ, quæ maria alta patent:  
Tendentemq; manus, & ad oscula cara uocantem,  
Pendentemq; imi pectoris hospitia.

Hoc

*Hoc mihi dulce decus, sint hæc noua gaudia menti:  
Hæc mihi diuitias, hæc mihi regna peto.*

NICOLAVS BORBONIUS.

*Plange anima infelix, pendentēq; aspice Christum,  
Et madidis oculis in cruce cerne Deum.*

*Plæge anima, atq; oculos in flumina magna remit-  
Pro te factus homo sustinet ista Deus. (te:*

*Quinq; per innocuum perpeffus uulnera corpus,  
En monstrat dextram, sanguineumq; latus.*

*En pedibus fixis, ulnisq; expectat apertis  
Oscula, demissum porrigit ecce caput.*

GEORGIUS FABRICIUS.

*O' anima, antè tui peccati mole grauata,  
Afflicta ad Dominum lumina tolle tuum:*

*Mors iacet ante pedes uictoris, Tartara moerent:  
Nam tibi mors CHRISTI uita salusq; fuit.*

*Qui medios inter tolerans indigna latrones,  
Ad patrium residet nunc super astra latus.*

*Sustulit ecce tuos, dum suscipit ipse, labores,  
Et causam in cœlis nunc agit ipse tuam.*

*Aspice cœlorum dominum, et crucis aspice formã:  
Et dic, iam meus est, hic homo, & ille Deus.*

*Crimina persoluit patiens mea, fecit ad alta  
Rursus ad astra uiam, uerus homo atq; Deus.*

*Tu quoq; ductorẽ sequere hũc, pars optima nostri  
O' anima, utq; datis læta fruarè bonis,*

*Disce pati, inq; malis certam sperare salutem:*

C 5 Diffi-

Difficile est CHRISTO te praeunte nihil.

LVDOVICVS PICTORIVS.

Ecce cruci adfixū, quo cuncta mouente mouentur:

Cuius cuncta bibunt fontibus, ecce sitit:

Qui fabricat brutis, auibusq; sedilia, pendens

Nil sua quo ceruix sustineatur, habet.

Est nudus, largitor opum: speciosior astris,

Liuet: & est iustus, uictima pro scelere.

Qui dat sceptrā, gerit de sentibus ecce coronam:

Latrones inter gloria summa probro est.

Quiq; refrigerium est, ipse est solaminis expers:

Et uitae dominus, mortuus ipse iacet.

Hec dixisse uelim: sed tu memor esto, tot, atq;

Tanta, tui causa, sustinuisse Deum.

IACOBVS STRASBURGVS.

Vnus homo totum morti subiecerat orbem,

Subiectum morti liberat unus homo,

Ille quod amisit leuitate, quod arte Draconis,

Reddidit hic cœlum sanguine, morte decus.

Hic uir hic est primis promissus patribus olim,

De cuius pendet nomine nostra salus.

Hic uerus Deus est, & homo sine crimine uerus:

Fert mala uix homini, non patienda Deo.

O' amor & pietas, hoc hoc erat esse benignum,

Culpa fuit mundi, pœna luenda Deo.

Ecce Creatorem: Qui summa gubernat & ima,

Ille stat iniusti iudicis ante thronum.

Qui



*Qui sine labe fuit natus, sine crimine uixit,*

*Criminis arguitur publicus ille reus.*

*Figitur ille cruci, quo terra mouente tremiscit,*

*Lucidior Phœbo liuida membra gerit.*

*Qui dat opes, strili qui lilia uestit in agro,*

*Nudus & humanæ pendet egenus opis.*

*Flumina qui fecit, uinum maturat in uuis,*

*Resinguat siccam non habet unde sitim.*

*Qui uitam seruat uiuis, uitamq; necatis*

*Reddit, in arboreo stipite cæsus obit.*

*Adspice peccator, peccati quæ sit imago:*

*Iusticiam tantæ reddere molis erat.*

**HIERONYMVS CANTALVPVS.**

*Aspice quæso tui quæ sunt tormenta magistri,*

*Qui pro te uoluit turba superba mori.*

*Factus homo, pro te mortem uelut agnus obiuit,*

*Vt caput eriperet è Phlegetontis aquis.*

*Esse, nisi lachrymas, tibi ferrea pectora dicam:*

*Funde foras lachrymas turba superba tuas.*

*Aspice quàm sæuis spinis pia tempora sudent:*

*Aspice, quantus eat sancta per ora cruor.*

*Aspice clauorum penetrantia uulnera palmas,*

*Aspice quàm sæua brachia fixa cruce.*

*Aspice mansuetum confossum uulnere pectus,*

*Aspice qui penetret clauus utrunq; pedem.*

*Pone seros animos, & colla superba recide,*

*Hoc tormenta piæ te docuere crucis.*

**ID E M.**

Si cui CHRISTE tui subeant in corda labores,  
 Et cruce pendentem uideat, fixumq; latronum  
 In medio, et sancto manans tibi sanguine pectus,  
 Aspera q; immeritas penitus penetrantia palmas  
 Spicula, si crines, si tempora cincta cruentis  
 Sentibus, et seuis casum te CHRISTE flagellis:  
 Emittunt lachrymas oculi, præcordia culpæ  
 Pœnitet, atteritur quicquid fuit ante superbum:  
 Mortales, nam Christe tuos dum brachia pandis,  
 Esse iubes humiles. poterat Iudæa repente  
 Turba mori, tanti sceleris rea, si tibi cordi  
 Plus uindicta foret, quam parcere Christe nocenti.  
 Huc oculos, huc uerte animos, huc dirige mentem,  
 Heu mortale genus: manibus quid seua nefandis  
 Fratribus arma paras? non hoc tormenta magistri  
 Mansueti docuere tui, qui cuncta creauit  
 Et regit, et pro te mortem tolerauit acerbam.

A Δ H Λ Ο Ν.

In templo Vincentino.

Semper in aduersis tibi sit patiētia CHRISTVS,  
 Cuius ab exemplo tristia disce pati.  
 Ecce Deus cœli, cunctorum conditor, ultro  
 Probra tulit, colaphos, sputa, flagella, necem.  
 Tu quoq; quicquid erit, patiens sufferre memento,  
 Pro CHRISTO patiens deniq; uictor eris.  
 Ne dubites, spera hunc quem tu prostratus adoras,

In

*In letum tenebras uertere posse diem.*

A Δ H Λ O N.

*In quodam templo Veneto.*

*Flebilibus nunc cerne oculis, quo fune ligatur*

CHRISTVS, *ut in mortē nūc moriturus eat?*

*Iste cui cœlum, tellus, mare, sidera parent,*

*Sacrilego per te subditur imperio.*

*O' pietas, ô fortis amor, sine labe reatus,*

*Figendus duro in stipite nudus adest.*

*Funde precor gemitus, & facta nefanda reuolue*

*Corde tuo, & flendo dic, Miserere IESV.*

*Ne dubita, fiet quicquid lachrymando requiris:*

*Lancea, spina, cruor, crux, latus, ista uolunt.*

PETRVS CHALYBS.

*Expansis manibus pendentem respice Christum,*

*Et madidos oculos, liuidulamq; cutem.*

*Perfossū spinis caput undiq;, sanguine corpus*

*Depictum, miseris membra notata modis.*

*Atq; memento tuæ transactæ non bene uitæ,*

*Et pete ne culpam uindictet ille tuam.*

IOANNES STVRNVS.

*Qui uagus in terris peccator & orbis oberras,*

*Auxilium quærens omnis egenus opis:*

*Huc propera, atq; tui uictoris suspice signum,*

*Ut quo mors, demon, tartara uicta iacent.*

*Hæc tibi parta quies per Christū, parta salusq; est,*

*Et pro peccatis uictima facta tuis.*

R A.

## RAPHAEL ZAVENZONIVS.

Lugeant cœli Dominum, Deumq̃;  
 Lugeat tellus, maris & profundum:  
 Lugeat quicquid iacet, aut suo pte

Iure mouetur.

Vosq̃; mortales lacerate crudis  
 Vnguibus pectus, faciem, capillum,  
 Altus ut uestris reboans dehiscat

Placētibus æther.

Ecce naturæ Deus instar agni,  
 Ad crucem dura trahitur cathena,  
 Squallidus, mœrens, humilis, cruentus,  
 Crimine nostro.

O' homo, si fas, speculari uultus  
 Sanguinis plenos, lachryma, saliuâ,  
 Et manus ambas, speculari totum

Deniq̃; corpus.

Si tuum noris Dominum Deumq̃;  
 Proruas passis manibus, crucemq̃;  
 Comprimas, felix, morere: hæc erit mors  
 Vita perennis.

## ADAMVS SIBERVS.

Aspicis hic iramq̃; grauem, dulcemq̃; fauorem,  
 Quo Deus humanum flagrat in omne genus.  
 Nulla Patrem placat, nisi Filius, hostia: Christum.  
 At nostri duro robore figit amor.

GRA

GRATIARVM ACTIONES  
PRO MERITO MOR-  
tis Christi.

ROBANVS HESSVS.

**N**Ate Deo, mundi precium non uile redempti,  
Quàm minor est meritis gratia nostra tu-  
Perdita per crimen miseris ut uita rediret, (is?  
Visus es horrendum mortis obire genus.  
Captus ut infamis, sine crimine raptus ad Annam,  
Atq; alios, per quos dictus es esse nocens.  
Verbera, derisus, conuicia, probra tulisti,  
Flagra nocens nemo te grauiora tulit.  
Et quàm non decuit te rex bone Christe coronam,  
O' quantum expressit sanguinis illa tibi.  
In cruce suspensus mortem mea uita subisti:  
Hei mihi, quàm meritis sum minor ipse tuis.  
Gratia si qua tamen poterit tibi grata referri,  
Hanc quoq; me facias CHRISTE referre tibi.

GEORGIUS FABRICIUS.

Cùm tua contemplor dulcissime funera IESV,  
Tam sæuæ causam me pudet esse necis.  
Et quoties grates ut cantet, fingere uerba  
Lingua cupit, meriti pondere uicta cadit.  
Quod nequeo uerbis, factis persolvere tento?  
Innocuum fecit te, mea culpa reum.  
Sed tu parce tuum, misero mihi, propter amorem,  
Ac præbe tantum gratus ut esse queam.

Te

Te uenerer, tibi uota seram, tua iussa capeſſam,  
 Teq; animo ſolum non dubitante colam.  
 Sim pius & patiens, pius ut patiensq; fuiſti,  
 Exemploq; hoſtes coner amare tuo.  
 Utq; implere tui mandata ſeuera parentis  
 Ingens te noſtri CHRISTE ſubegit amor:  
 Sic nos cogat amor, quiduis perſerre pati-  
 Et meritū, & nomen CHRISTE fatendo tuū.  
 VOLFGANGVS VVERTERVS.  
 In trabe funerea, quoties pendentia cerno  
 Membra pater, lachrymis pectus et ora madet.  
 Ut noſtra æterna floreret gloria laude,  
 Paſſus es, heu tanto non patienda Deo.  
 Ut nobis uitam miſeris, lucemq; parares,  
 Immerita ſcimus te periſſe nece.  
 Utq; dares cœlum mortalibus, atq; ſalutem,  
 Tænarij ingrederis pallida regna Iouis.  
 Pro tali grates tibi munere CHRISTE canemus,  
 Corpore donec in hoc uita ſuperſtis erit.  
 ANDREAS CRAPPVS.  
 Corpus aue natum Mariæ de uirginis aluo,  
 Vera Dei ſoboles, hoſtia uiua Patris.  
 Quæ tibi grata dabo, qui pro me paſſus, obiſti  
 Neſcia peccati mens tibi ſola placet.  
 Sed quia peccator commiſſa piacula plango,  
 Saluator largam redde ſalutis opem.  
 Aſpice contriti clemens ſuſpiria cordis,

*Spes peccatorum tu miserere mei.*

ROBANVS HESSVS.

*Gratia CHRISTE tibi: nā tu de morte redēptis*

*Morte tua, uitæ de cruce pandis iter.*

*Tu quoq; restituis mundo sua regna iacenti,*

*Dux bonus, & sæui conteris hostis opes.*

GRATIARVM ACTIO PRO

uarijs Dei in nos beneficijs.

PROSPER AQUITANICVS.

**I**lle Deus rerum, cœli terræq; Creator,

*Me propter sacra uirginē natus homo est.*

*Flagris dorso, alapis maxillas, ora saluiis*

*Præbuit, & figi se cruce non renuit.*

*Non ut tanta Deo quicquam patientia ferret,*

*Cuius nec crescunt, nec minuuntur opes:*

*Sed quod erat uitiatum in me, ut superaret in illo,*

*Factus sum CHRISTI corporis, ille mei.*

*Me gessit moriens, me uicta morte resurgens:*

*Et secum ad patrem, me super astra tulit.*

*Quid nam igitur uiuens unquā tolerare recusē?*

*Aut quid erit, quod me separet à Domino?*

*Ignem adhibe, rimare manu mea uiscera tortor,*

*Effugient pœnas membra soluta tuas:*

*Carcere si cæco claudar, nectarq; cathenis,*

*Liber in excessu mentis adibo Deum.*

*Si mucrone paret ceruicem abscindere licetor,*

*Intrepidum inueniet: mors citā, pœna breuis.*

D

Non

**N**on metuo exiliū, mūdus domus omnibus una est:

Sperno famem, Domini sit mihi sermo cibus.

Nec tamen ista mihi de me fiducia surgit,

Tu das **CHRISTE** loqui, tuq; pati tribuis.

In nobis nihil audemus, sed fidimus in te:

Quos pugnare iubes, & superare facis.

**S**pes igitur mea sola Deus, quem credere uita est,

Qui patriæ ciuem me dedit alterius.

Semper agā grates Christo, dabo semper honores:

Laus Domini uigeat semper in ore meo.

Tu modò fida comes mecum isti accingere pugnae,

Quam Deus infirmo præbuit auxilium.

Sollicita elatum cohibe, solare dolentem,

Exemplum uitæ simus uterq; pie.

Custos esto tui custodis, mutua redde,

Erige labentem, surge leuantis ope.

Vt caro non cadem, sed tandem mens quoq; nobis

Vna sit, atq; duos spiritus unus alat.

**IOACHIMVS CAMBRARIVS.**

**C**HRISTE qui mortem moriendo uictor

Sternis, & calcar scelerum retundis,

Et lauas mentis roseo inquinatæ

Sanguine sordes.

Profit iniusto tua mors iniqua,

Innocens saluet tua uita fontem,

Pro tui ut sacri quoq; me cruoris

Fluxerit unda.

**Nos**



Nos fidem præstare iuua uolentes,  
 Hac tuum sola capitur salutis  
 Munus æternæ, nec aditur atri

Ianua leti.

Nitimur frustra sine te, tuoq;  
 Numinis ductu, neq; destituti  
 Possumus quoquam, auxilio benignæ  
 Tendere, dextræ.

Palmes ut de uite recisus aret,  
 CHRISTE sic de te pereunt reuulsi,  
 Inq; inextincta scelerum cremantur  
 Vindice flamma.

Qui manent in te, Pater hos putando  
 Purgat æternus, magis uberes ut  
 Proferant, auctos tua quos coloret  
 Vineæ fructus.

CHRISTE Saluator tua ne sit in me  
 Mors inanis, me renuente sanctæ  
 Arboris fructum, renuente partæ  
 Munera uitæ.

CHRISTE Regnator tua uita, Mortis  
 Vinculis ruptis, mea censeatur,  
 Semper ut uiuam tibi, spiritus nec  
 Carne prematur.

Spiritum carnis sepelit libido,  
 Spiritus carnem domat interemtam:  
 Aut caro, aut regni tenet occupatam

D 2

Spiri-

*Spiritus arcem.*

*Detur ignaue diadema carni,  
Occidet uita regimen beata.  
Spiritus regnet, fugiet caterua*

*Dira malorum.*

*O' tuo nostrum rege CHRISTE sancto  
Spiritu cor, quo duce contumacis  
Vincat infirmæ pia cura mentis,*

*Robora carnis.*

*Tædij post hic brevis ut labores,  
Gaudio istic perpetuo fruamur,  
Te celebrantes Dominum atq; Regem*

*CHRISTE, Deumq;.*

*Sit Deo laus, gloria, honor Parenti,  
Sit Deo Nato, simul & Deo sit  
Flatui sancto: colat hunc, & omnis*

*Mundus adoret.*

**CHRISTVS SEPVLTVS.**

**GABRIEL ALTILIVS. (pi,**

**T**E'ne ego magne Pater, tene alti rector Olym  
Tene ego sic lacerũ indignos crudeliter art?  
Sic positum aspicio? quem non uasta atria cœli,  
Non mundus cepit: tegit heu brevis urna sepultũ.  
Nec miseri assiduos lachrymarũ fundimus amnes?  
Tanta nec æterno deflemus funera luctus?  
Ac tellus tremefacta, latensq; in nubibus aer,  
Cunctaq; turbatis flerunt elementa figuris:

*Fleuit*

Fleuit sol nigra tingens ferrugine cœlum,  
 Ipsaq; lugubri crimes uelauit amictu,  
 Auctorem miserata suum mœstissima Phœbe,  
 Atq; auersa nouus stupefecit sidera mundus.  
 Heu dolor, heu pietas, heu quæ manus impia tantū  
 Ausa nefas? neq; enim diris illa excidit ausis.  
 An ne parū fuerat, patrium modò linquere cœlū?  
 Nec dedignatum miseræ commercia terræ?  
 Quodq; Deum miscens homini ( mirabile dictu )  
 Induere humanos non fastidiueris artus?  
 Tristia quim diræ passus ludibria gentis,  
 Ferre necem, & nostro uoluisti occumbere letho.  
 Sic quondam charæ diuulsus ab ubere matris,  
 Mitis ubi extructas agnus mactatur ad aras,  
 Nostra luis commissa, tuo nos sanguine seruas,  
 Dulciaq; eternæ dās noscere præmia uitæ.  
 Quo iā summe Pater (nā suprā quicqd et infrā est,  
 Te uenerata tuos observant omnia nutu )  
 Da, seu te infirmæ tangunt contagia partis,  
 Terra, Prometheumq; lutum, primordia nostræ:  
 Seu dolor, & fassæ spes non indebita mentis,  
 Nec tua difficilis nostræ clementia culpæ,  
 Vt qui mœsta pij repetentes orgia sacri  
 Annua solenni colimus mysteria luctu:  
 Per te pacatæ defunctis munere uitæ,  
 Supremus tenues cum spiritus ibit in auras,  
 Elysij leta arua poli, sedesq; beate,

D 3

Polli-

Pollicitiq; tui pateant non irrita dona.

## PRECES AD CHRISTVM

passum, pro remissione peccatorum.

### CHRISTVS PECCATVM.

**S**uffixus tristi dum pēdet stipite **CHRISTVS**,  
Pro mundi patitur criminibusq; necem:

Sol tegit obscura nigram ferrugine frontem,

Saxaq; rumpuntur, terraq; mota tremit.

Cur? polluta illum **CHRISTI** pudet ora tueri,

Hec summum nequeunt sustinuisse scelus.

Ergo scelus Christus? scelus est, sed crimine nostro,

Hec propter pallet solq; solumq; mouet.

Nec uitia horremus, tremimus nec numinis iram

Conciliant **CHRISTO** quæ mala tanta Deos

### CHRISTVS PENDENS

in cruce.

Accipis hic iramq; grauem, dulcemq; fauorem,

Quo Deus humanum flagrat in omne genus.

Nulla Patrem placat, nisi Filius, hostia: Christum

At nostri duro robore figit amor.

### IOANNIS TVBBRINI.

Magno nate Deo, miserorum spesq; salusq;

Principium & finis, summi sapientia Patris.

Humanam sumis carnem diuina potestas,

Quo crucis in patulæ ferali corpore pendens

Accipis infandos cruciatus, & necem amarant.

Ad te confugimus, tua numina sancta precamur,

Hec

Heu sumus ingenti uitiorum mole grauati,  
 Inmemores patriæ, legum, nutusq; superni,  
 Crimina sed pietas poterit tua cuncta piare:  
 Crimine nanq; tua est maior clementia nostro.  
 Nam licet æquentur pietas, rigor atq; seuerus  
 In te, pronior ad ueniam tamen inclmaris.  
 Quare age delicti ueniam miserare precantes.  
 Sanguine quosq; tuo mundasti, respice: nanq;  
 Te sine restabit miseris spes nulla salutis.  
 Da tandem fragiles posituris corporis artus,  
 Suppetias sentire tuas, tua scandere regna,  
 Intuituq; tuo letos sine fine potiri.

## E I V S D E M.

Insons agne Dei, tollis qui crimina mundi,  
 Stipite sublimi tristia fata subis.  
 Puniceum fundis tranquilla mente cruorem,  
 Guttula nonq; tibi sanguinis ulla manet.  
 Cuncta tibiq; ualent heu dinumerarier ossa,  
 Aequat Nate Deo passio nulla tuam.  
 Has propter pœnas, hos propter mille labores,  
 Esto pius, diræ curret ut hora necis:  
 Excipe tunc animam migrantem corpore, uultu  
 Pacato, trepidam, CHRISTE benigne, meam.

## ANDRÆAE CRAPPI.

Christe salus hominum, spes, uita, redemptio, salue.  
 Ingenium Deus alme meum, mea dirige uota,  
 Dirige sermones diuino numine nostros,

Ne grauitèr maculent animum, ne corpora fœdēt,  
 Quiq; potes subito scrutarier intima cordis,  
 Pande meum, succende meos Deus optime sensus,  
 A' te ne longè uideat mea flectere corda.  
 Vna salus animæ, ueterem tibi propter amorem  
 Supplico, quādo polo descendēs pneumate ductus  
 Venisti in terras de cœli culmine nostras,  
 Vt genus humanum salues uirtute potenti,  
 Sumis principium: castus te seminat ignis,  
 Non caro, non sanguis, uenter te uirginis almus  
 Sincero afflatu tactus spiramine gignit.  
 Rara tui nouitas ortus iubet, ut Deus esse  
 Credaris: CHRISTVS sic cōditus, innuba uirgo  
 Nubit Spiritui, uitium nec sentit amoris.  
 Sancta pudicitie uirtus immobilis extat.  
 Vt mater, sic uirgo tamen castissima fertur.  
 Non tantum fragilem uoluisti sumere carnem,  
 Verumetiam uarios pro nobis ferre labores,  
 Spinea ferta, graues alapas, & deniq; mortem:  
 Sic damnosa meæ purgasti crimina uitæ.  
 Ergo subnixæ prece te rogo, propter acerbam  
 Christe tuam mortem, tua propter corpora rursus  
 Sumpta, tuum facilem descensum propter Auerni,  
 Vnde citò è uinclis textis adamante, redemptos  
 Carcere disclusos tecum super æthera letos  
 Duxisti: à cunctis nos eripe queso periclis:  
 Improba quando lues moribundos occupat artus,  
 Queso

Quæso meam iubeas animam tranare superna  
Sidera, semper ubi cum sancto pneumate, nec non  
Cum patre perpetuo, cui laus et gloria, regnas.

A Δ H Λ O N.

Quem toties factis offendi CHRISTE nefandis,

Quem grauitèr læsi crimine sæpe meo:

Te solum quæro, fateor tibi, te precor unum,

Tot scelerum uindex ne ferus esse uelis.

Reddere nulla potest hominum tutela salutem:

Non Rex, non Cæsar, conciliare potest.

Tu solus mea spes, tu iudex, tuq; patronus,

Largitor ueniæ, spes mea, sola salus.

Nam nisi peccassẽm, tu quid concedere posses?

Materiam ueniæ dat mea culpa tuæ.

Mors tua, crux, clauis, fel, lancea, spina, flagella,

Succurrant misero, mors tua præstet opem.

Tu satis atq; satis fecisti sanguine fuso,

Mecum ergo meritum diuide quæso tuum.

GREGORIVS CONITIVS.

O' mundi pastor, cœlum stellasq; gubernans,

Ad Patris dextram qui loca clara tenes:

Respice nos miseros, sceleris quos sarcina turbat,

Ne subeant animæ tartara nigra tuæ.

Pro quibus ad terras celso descendis Olympo,

Exoptans diram sumere CHSISTE necem.

En pietas ingens, proprio qui sanguine ab umbris

Restituis populos CHRISTE benigne tuos.

D s

Humano

**Humano parcas generi, quod dextra creauit,  
Que maria & terras fecerat, atq; polos.**

**GEORGII FABRICII.**

**In meipsum quando penetro, inq; latentia cerno,  
Totus homo miser est, perdita tota caro est.  
Et quia nulla mee pars non damnabilis umbræ,  
( Nam reuera aliquid si sumus, umbra sumus )  
Ad te tollo oculos, lachrymis manantibus, egros,  
Leticiam inq; tua sentio CHRISTE nece:  
Oblitusq; mei, pœnarum oblitus, & iræ,  
Vulneribus recreor CHRISTE cruenta tuis.  
Diffugiunt curæ, mors mussat, clauditur Orcus,  
Mors tua Christe quies, crux tua Christe salus.  
Effice, dura tuæ meditando uulnera mortis,  
Auferar, & flagrem raptus amore tui.  
In primis fragiles posituro corporis artus,  
Halitu in extremo mite leuamen ades,  
Inq; tuas fugientem animam placabilis ulnas  
Excipe, nec gremio CHRISTE repelle tuo.**

**IACOBI FABRICII.**

**Cum uideo lacerum pendentis corpus IESV,  
Corda dolorifico tacta pauore tremunt:  
Te cœli Dominum, Regem telluris & undæ,  
Impia non merite uincula ferre necis?  
Ac meditor quoties quis uulnera fecerit autor,  
Tum mea culpa statim me facit ægra reum;  
Deficio, totusq; mihi non sufficit orbis:**

**QVO**



Quo maneam non est, confugiam ue, locus  
 Denegat auxilium quicquid natura creauit,  
 Nec cœlum faciem gestat ut antè suam:  
 Occulit auratus clarissima lumina Titan,  
 Finduntur rupes, quassa tremiscit humus.  
 Tu uerò me CHRISTE uocas, tu brachia pandis,  
 Mitis in amplexus meq; uenire iubes:  
 Ipse tuas indignus ego deuoluor ad aras,  
 Te passum pro me moestus adoro Deum:  
 A ligno gestante Deum nec abiuro, donec  
 Præsidij fuerit spes data certa tui.  
 Me miserum, me noxa premit, te poena fatigat,  
 Ah ego debebam talia ferre mala.  
 O' ingens pietas, & amor diuine iuuandi,  
 O' meritum fari nulla quod ora queunt.  
 At tibi deuoto, quas unquam dicere possum,  
 Corde fero, grates perpetuoq; feram:  
 Et te CHRISTE rogo, lateris per uulnus apertū,  
 Per lacerum spinis, uerbere, cæde, caput:  
 Innocuum serua tibi me melioribus horis,  
 Sit meritum memori semper in ore tuum.  
 Omnia uicisti, meruisti cuncta ferendo,  
 Impositam doceas me quoq; ferre crucem:  
 Igne tuo frigans cœlesti pectus adure:  
 Insinuante Deo se, pia facta calent:  
 Vt tecum patiar, tecum contemnar, & istam  
 Ponam animam, meritum testificando tuum.

*At tandem in coelis tecum regnabo, beatas  
Intrans post mortem te præcunte domos.*

**HIERONYMI ESTENSIS.**

*Heu miseri passum et pendentem cernite Christū,  
Pro uobis uoluit uulnera tanta pati.*

*Sanguine uos redimens precioso ditis ab umbra,  
Vos pro peccatis fundite nunc lachrymas.*

*Tundite nunc pectus, ueniam deposcite culpæ,  
Et grates CHRISTO reddite corde Deo.*

**A Δ H Λ O N.**

*Da Pater omnipotens, da coeli maxime rector,  
Ut prosit Nati passio sacra tui.*

*Vtile sit CHRISTVM pro nobis tanta tulisse,  
Horrendumq; genus sustinuisse necis.*

*Cui gens sacrilega poenas inferre nefandas  
Insoniti ausa fuit, uerbera seua dare.*

*Ille hominum stirpem rapuit de faucibus orci,  
Pro nobis uoluit uulnera dira pati.*

*Sublimi ueteres purgauit sanguine culpas,  
Ut fragile humanum scandat ad astra genus.*

*Spinea ferta tulit Saluator, et hac ratione,  
Ne genus humanum tartara ad ima ruat.*

*Atq; ideo patulis manibus diuina potestas  
In cruce pendebat: gloria summa Deo.*

**ACTIVS SINCERVS.**

*Virginis intactæ partus, celsiq; Tonantis  
Unicus, ut uiuas, pertulit ipse mori.*

**NICO-**

## NICOLAUS BORBONIVS.

*Quis tibi nunc grates tanto pro munere soluas  
Care Pater, cuius mors mihi uita fuit?*

A Δ H Λ O N.

*Si pro te proprium peccator fundo cruorem,  
Te saltem lachrymas fundere ne pigeat.*

GEORGIVS FABRICIVS.

*Multa tulit pendēs laceratus & in cruce Christus:  
Verū pro nostro crimine cuncta tulit.*

Idem.

*In cruce quòd Christus laceratus brachia pandit,  
Vlnis amplecti te cupit ipse suis.*

Idem.

*Si uis auctorem, quicumq; es, nosse salutis,  
Sola salus CHRISTI sanguis, & una salus.*

Idem.

*Si quid in humanis sanctum est conatibus: ista  
Nequicquam Christus probra, necemq; tulit.*

CHRISTVS PECCATORI.

Idem.

*O' homo, si propria coelum probitate parares,  
Cur ferrem natus uulnera tanta Dei?*

Aliud.

*Aut mea te saluum faciet mors, aut tua uirtus:  
Sed tua si uirtus nil, mea mors faciet.*

Aliud.

*Si tua cum nostra bonitas nece, cum cruce uirtus  
Confer-*

*Confertur : restat nil tibi, quàm lachrymæ.*

ORATIO AD CHRISTVM,

Ex libro antiquo.

Optime CHRISTE Deus, mea lux, fiducia, uita,  
 Spes & perfugium, solaq; & una salus:  
 Te rogo per uarios uitæ duosq; labores,  
 Pallentes uultus, terribilemq; necem:  
 Et per descensum moriens quo inferna petisti,  
 Perq; iterum uiui corporis effigiem.  
 Et loca per celerem dehinc ad suprema uolatum,  
 Teq; per aduentum pneumatis oro sacri.  
 Tantorum à teneris annis scelerum, quibus ipse  
 Te miser offendi, ne meminisse uelis.  
 Des ueniam, firmæ detur constantia mentis,  
 Vt quæ displiceant, abstinuisse queam.  
 Et mihi protector tandem dux & pater aßis,  
 Hanc me dum uitam claudere fata uolent.

IMPLORATIO MERITI CHRISTI,  
 & nostræ indignitatis  
 confessio.

LVD. BIGVS PICTORIVS FER-  
 RARIENSIS.

**S**eu uideo solem ferri, cœlumq; rotari  
 Stellatum, aut subitas undare per aera nubes :  
 Seu uarios meditor flores, diuersaq; saxa,  
 Pendentemq; suo tellurem pondere, siue  
 Perpetuos fontis latices, æstusq; profundi,

Ac

Ac demum quocumq; oculos animum uo reflecto,  
 Obruit ingenium diuina potentia nostrum,  
 Maior & est quam mente capi queat. ille iugosos  
 Appendit montes, numerum cognoscit arene,  
 Vestit & autumnum pomis, & frugibus ornat  
 Aestatem, glaciâq; hyemem, durasq; resoluit  
 Vere niues, nudosq; facit reuirescere ramos.  
 Quod leo supplicibus parcat, quod ouile moloſſi  
 Defendant, nulloq; lepus mare gignat, & urſi  
 Lambendo forment catulos, ceruîq; latebras  
 Exquirant lenti præpingui corpore, & equor  
 Tranantes capita imponant, hîc illius, alter  
 Clunib' alterius, redeâtq; ad terga uiciſſim: (gues,  
 Quodq; homines sapiant, serpentq; tenaciter an-  
 Quodq; natent pisces, norintq; uolare uolucres,  
 Numinis est unius opus: quota pars ego rerum,  
 Quas Deus effinxit, nulloq; labore gubernat,  
 Si tellus punctum cœlo collata uidetur? (rim?  
 Mene aliud nisi inanem atomũ, aut nihil esse puta-  
 Et tamen (ô summi bonitas immensa Tonantis)  
 Tantillum in magnis tu rerum summa potestas  
 Delicijs retines, & uis mihi seruiat axis  
 Stellifer, & uictum det terra, animæq; salutem  
 Zelotypus curas: & me tibi iungere querens,  
 Sputa, alapas, spinas & flagra crucemq; tulisti.  
 Ast ego quid contrâ refero tibi? proh pudor, ut te  
 Laudarem, & possem monitus audire fideles,  
 Utq;

Utq; ego perpetuò te contemplarer, & uni  
 Me tibi subijcerem, & fugerem nocitura, dedisti  
 Vim mihi, præcipuum munus sermonis, & aures,  
 Erectamq; oculorum aciem, mentemq; capacem.  
 Te tamen opprobrijs, dirisq; laceffere uerbis,  
 Illicitos miscere iocos, obscæna canenti  
 Carmina blandiri, & ludos spectare pudendos,  
 Resq; sequi, & summo studio coluisse caducas,  
 Erubui nunquam: quo me miser insequar ore?  
 Quo pacto me pro meritis odisse nefandis  
 Sat potero, digneq; meam deflere ruinam?  
 Miror, & attonita ceu cautes hæreo mente  
 In caput hoc nondum infidas erumpere flammæ.  
 Innocuis iam parce iugis, & turribus altis,  
 Me pete, & in tenues mea mēbra resolue fauillas.  
 Me miserum, cur ex utero me protulit unquam  
 Chara parens, utinam in medijs fera pēssima cuius  
 Visceribus saturata meis foret, ô ego dignus  
 Nec pedibus deforme solum calcare, nec ipsos  
 Suspexisse polos. Fateor rex maxime regum,  
 Illecebris studuisse nimis præsentibus, & te  
 Innumeris læsisse modis: sed ponere finem  
 Constitui sceleri, & uitam emendare priorem.  
 Meq; licet Stygias esses missurus ad undas,  
 Idq; mihi notum fieret, te præter amabo.  
 Nil tamen, atq; tibi posthac placuisse relictis  
 Omnibus enitar, nulliq; uacabo quieti,

Donec

Donec erunt nostro uitales pectore flammæ.

VOLFGANGVS MEVRERVS

Aldenbergius.

Heu mihi, tantorum quæ tâta est causa malorum,

Quæ terrent animum nocte dieq; meum?

Vt mea non unquam sæuis mens libera curis,

Mollia quæsitæ tempora pacis agat.

Pœnitet anteaetæ me toto tempore uitæ,

A' me præteritas improbo sæpe uias.

Atq; annos cupio studio grauiore sequentes

Exigere in uera relligione Dei.

At miser ab nequeo, uotis contraria nostris

Se uitæ insinuant plurima facta meæ:

Quæ tristes pariunt animo oblucente dolores,

Quæ faciunt cordi uulnera mille meo.

Fallor, an hæc primi mala sunt de crimine patris,

Qui captus falso dæmonis ore fuit?

Obsequioq; leui contra ueneranda Tonantis

Iussa Dei, uetito polluit ora cibo?

Quod scelus obduxit bona quæ pulcherrima habe

Et numerosa sui de pietate Dei: (bat,

Concordesq; animæ uires lacerauit, & ingens

Exciuit toto corpore disidium:

Non tantum auctori nocuit, contagia latè

Serpserunt etiam uiribus aucta nouis:

Inuasitq; lues grauior genus omne minorum,

Qui nati humana conditione sumus.

E

Hinc

Hinc est illa levis nostræ confusio mentis,  
 Hinc bellum secum pectora nostra gerunt.  
 O' quantum est uiolasse Dei mandata? nec ille  
 Quod iubet, innocua simplicitate sequi?  
 Hæc ego dū meditor primæ uel incommoda culpæ,  
 Quæq; Sathan cumulat, plurima damna super:  
 Non requies datur ulla mihi, non ulla beatæ  
 Pacis in attonito gaudia corde manent.  
 Me peccata premunt deiectum & penè sepultum,  
 Ad Styga me mortis terror & horror agunt.  
 Erigit at rursus me inuicta potentia CHRISTI,  
 Præsidium uitæ per mala cuncta meæ.  
 Scilicet immensa is summi bonitate parentis  
 Factus homo, cecidit uictima grata Deo:  
 Ne miseris noceant, quæ plurima posse uidentur  
 Nobis ex merito mille nocere modis.  
 Hoc ego confisus, licet indignissimus ipse  
 Omni naturæ conditione meæ:  
 Audeo nunc certam tamen hanc sperare salutem,  
 Crimina quæ fassis usq; parata fuit.  
 Ut quoq; cum sanctis post huius tempora uitæ,  
 Cœlestem ante patrem gaudia plena feram.  
 Interea hæc donec mortalia membra trahuntur,  
 Præsidio firmes me bone CHRISTE tuo.  
 Ne mea mortiferæ succumbant pectora fraudi,  
 In me quam tacitè perfidus hostis agit.  
 Da uires animo, da nescia robora frangi,  
 Atq;



Atq; tuo uerbo lubrica corda rege:  
 Vt mea tota tibi sanctis conatibus usa  
 Seruiat, & iustis uita probata uiris.  
 Vt cor, mens, sensus, lingua, omnia mēbra laborēt,  
 Nominis in laudes maxime CHRISTE tui.

LVD. BIGVS PICTORIVS

Ferrariensis.

Summe parens, æterna quies, & origo salutis,  
 Et uitæ lux una meæ, tibi gloria soli  
 Debetur, te regna timent Cocythia, teq;  
 Terra iubente tremit, reprimuntq; ferocia uenti  
 Sibila, & angelicæ seruant tua iussa cateruæ.  
 Ast ego te patrem ceu dedignatus, adhæsi  
 Tanario regi: uanamq; superbus ut auram  
 Captarem, nullos renui tolerare labores.  
 Cumq; tuos æquum celebrare fuisset honores,  
 Noxia maluimus captare cupidinis arma:  
 Gloriolæq; auidi, subitos aperire tumultus,  
 Mentis Apollinei stimulatae numinis ostro.  
 Quàm melius rudis herbosus armenta per agros  
 Duxissem pastor, durasq; colonus aratro  
 Sulcasssem terras? nocuit solertia, meq;  
 Perdidit ingenium: quo mens nisi læsa fuisset,  
 Par erat ut ueteri fugerem tibi teste notari.  
 Te genui, multosq; dedi tibi largus honores:  
 Ac domini præsepe sui cū noscat a sellus,  
 Munera tu nunquam meā percepisse uideris.

E 2

Con-

Confiteor nimis ingratum me CHRISTE fuisse,  
 Erroresq; meos numerum transcendere arenæ:  
 Sed cum præstiteris mihi te uice patris, an ullam  
 Conuenit ut tanto ferat à genitore repulsam  
 Filius, & cassas effundat in æra uoces?  
 Pendenti tecum scio te ignouisse latroni:  
 Quiq; ter adiurans te cognouisse negauit,  
 Promeruit ueniam: & meretrix, tibi quæ fuit olim  
 Ausa lauare pedes lachrymis, & tergere crime.  
 Ecce cruentatæ iaceo crucis ante trophæum,  
 Iam precor in largos aperi mea lumina riuos,  
 Imbribus his tellus animæ madefacta, bonorum  
 Fac pariat fructus operum, uariosq; benigno  
 Vbere uirtutum flores, deturq; reatus  
 Hinc delere graues, & saluis mercibus ire  
 In patriam per aquas oculorum è fonte cadentes.  
 O' felix uena, & uernis fragrantior hortis;  
 O' fons utilior, fuluoq; potentior auro:  
 Tu sordes animæ purgas, tu destruis omnes  
 Insidias, tu magna tuis incendia carnis  
 Fluctibus extinguis, prohibesq; resurgere motus:  
 Illicitos, nutuq; oculi potes atria cœli  
 Scādere, & inuictū trahere in tua uota Tonātem.  
 Si lateris fleui aut capitis stomachi ue dolore  
 Sæpius, aut aliquam grauiter succensus ad iram,  
 Lentus ero in lachrymas, uitijs mea corda leuātes?  
 Heu quid id est? quæ flere uetat me dira potestas  
 Inui-,

Inuitoq; mihi geminos obturat ocellos?  
 Me ne rigare pudet nunc ora salubribus undis?  
 Qui nihil erubui nec uoce procaciter uti,  
 Nec te arte oppugnare omni: mens inde gelata  
 Nimirum optatos nequit elicuisse liquores.  
 Sis præsto Pater omnipotens, & flumina nostris  
 Excute luminibus: quo uiuas auspice Moses  
 E' petra deprompsit aquas: non deserit ales  
 Pullos foeta suos, licet irritetur ab illis  
 Sæpius, offensam pietas cum suserat omnem,  
 Non ne tuum pater est misereri? non ne redemptus  
 Abs te morte fui, longinquis exul in oris?  
 Hactenus erraui, redeunti ignosce: iubeq;  
 Vt stola prima mihi reddatur, & annulus, atq;  
 Calceus. & quoniam sub corde latentia nostri  
 Omnia, fac nostræ succurrant crimina menti:  
 Vt simul illa, quibus potero, deflero querelis,  
 Digneris multo uitulum mihi tradere pingui.

HERCVLES STROZA FLO-  
 rentinus.

Heu sator astrorum, terræ dominator & unde,  
 Omnia qui solo potis est peruertere nutu,  
 Vulnera sustinuit manibus, quas ipse crearat:  
 Scilicet ut moriens hominis commissa piaret.  
 O' nimium nostros genitor miserate labores,  
 Qui certam in mortem, natumq; simulq; æternum  
 Vnigenâ, summo CHRISTVM demittis olympos:

E

3

Quas

Quas tibi pro meritis reddant mortalia grates ?  
 Non si quisq; hominum centena uoce loquatur,  
 Fando æquet tua dona pater : tibi maxima uis est.  
 Imbecilla homini : sed quo tu maior, & ille  
 Est minor, omne tuum magis admirabile munus.  
 Ingratus tamen officij, ingratusq; salutis  
 Sæpius offendit tristi tua numina noxa.  
 Maxima culpa quidē est, quādo pro munere reddit  
 Contemptum, & sacri spernit pia dona lauacri.  
 Nitimur in uetitum, præcepta auertimus: unde  
 Omne æuum recolet rediuiuus mentis amator,  
 Atq; animi. saltem magno cum uate canemus:  
 Parce pater, nostræ delicta oblite iuuentæ.  
 Quæ regio in terris nostræ non conscia culpæ ?  
 Quis uiget in nobis multo sine crimine sensus?  
 Quo genitorem adeò humana de stirpe merētem,  
 Nos adeò ardētem, in pœnas non prouocat orbis ?  
 Qui tamen usq; adeò patiens, mitisq; bonusq;  
 Longānimisq; manet, magis ut miserescere nobis,  
 Quā meritam statuatur pro crimine sumere pœnā:  
 Cū non terra satis, satis una dehisceret Orci  
 Spelunca, horrifico pœnarum exercita luctu.  
 Quare age discinctos ne flebilis occupet hora,  
 Dauidicum ex imo repetamus pectore carmen :  
 Infirmi miserere Pater, miserere precantis,  
 Et, tibi quæ pietas, tot olentes abluc sordes.

F I N I S.

**BASILEAE, EX OFFICI-**  
**na Ioannis Oporini. Anno Salutis**  
**humanę M. D. LXIII. Men-**  
**se Februario.**





















